

سلسلة ليالي الرعب والغموض "العدد الرابع"

سلاسل

ليزا زغلول

بِلُومِ نِيَا اللّٰسْتِرِ وَالتَّوَنِيحِ

سلاسل

لا يجوز نشر هذا الكتاب أو أي جزء منه بأي شكل من الأشكال أو نسخ مادته بطريقة الاسترجاع، أو نقله على أي نحو بطريقة إلكترونية أو بالتصوير أو ترجمته إلى أية لغة أخرى دون الحصول على موافقة الناشر والمؤلف مقدماً.

All Rights Reserved. No part of this publication may be reproduced, stored in a retrieval system, or transmitted, in any form or by any means, electronic, mechanical, photocopying, recording, or otherwise, without the prior written permission of Bibliomania Ltd.



- ❖ الكتاب: سلاسل
- ❖ المؤلف: ليزا زغلول
- ❖ الطبعة الأولى 1445 هـ - 2024 م - القاهرة
- ❖ الناشر: بيلومانيا للنشر والتوزيع - مصر
- ❖ الرقم الكودي في بيلومانيا: BMS04260324
- ❖ مدير عام: جمال سليمان - مدير تنفيذي: محمد جلال
- ❖ العنوان: عنوان (1): 15 شارع السباق - مول الميريلاند - مصر
- ❖ عنوان (2): 29 شارع الكمال - الأميرية - القاهرة
- ❖ تليفاكس: 002026064518 - 002026337855
- ❖ محمول: 00201210826415 - 00201030504636 - 00201208868826
- ❖ صفحة الدار على موقع فيسبوك: <https://www.facebook.com/bibliomania.eg/>
- ❖ الموقع الإلكتروني: www.bibliomaniapublishing.com

كل ما ورد في هذا الكتاب من أخبار وأحداث وأراء يعبر فقط عن رأي الكاتب، ولنا يعبر بالضرورة عن رأي الناشر، ودون أدنى مسؤولية على دار بيلومانيا للنشر والتوزيع



/bibliomania.eg

جميع الحقوق محفوظة ©

www.bibliomaniapublishing.com

سلاسل

قصص إذاعية

ليزاز غول

الإهداء...

ليزا زغلول

الكرسي الهزاز

بعد ما خلصت القصة وقفلتها، وجهت لنفسي سؤال واحد وفضلت مترددة ومش عارفة أجاب عليه، أو بأمانة كنت عارفه بس في نفس الوقت خايقة، أصل هو نفس السؤال اللي فضل يتردد على لسان دوستويفسكي طول الوقت وماعتقدش انه لقاله إجابة قبل ما يموت...

- أتعلمين يا ليزا أن الانسان قد يعذب الانسان لمجرد أنه يحبه؟

في الحقيقة احنا بنتلذذ بتعذيب اللي بنحبهم، احنا مرضى بالحب والتملك والسيطرة، كلنا مخيين وش تاني تحت قناع البراءة والطيبة، وش قادر يدمر ويحرق ويقتل لمجرد انه يحتفظ بالناس اللي بيحبهم جنبه ومايبعدوش عن عينه، بعذر مسبقا عن أي أذى نفسي القصة هتسببه ليكم.

صحيت الصبح كالعادة على خناقهم فوق دماغي، خلاص تقريبا خدت على الوضع ده، بس الغريب ان النهاردة أجازة، فتحت عيني وبصيتلهم بغضب مفتعل وقولتلهم:

-هو احنا ربنا مش هانيتوب علينا بقي، أجازة أو لا لازم
نصحي بدري كل يوم، احنا مش في جيش يا ولاد، ارحموني انتوا
كبرتوا.

نيرة حطت وشها في الأرض وقالتلي:

-احنا آسفين يا بابا والله ما كان قصدنا نعمل دوشة
ونصحيك، أنا هاخذ علاء ونطلع نكمل لعب في الصالة حالا.

-استني يا حبيبي، انتوا فطرتوا؟

- لا لسه، بتاع العيش ماجاش.

-طيب أنا هقوم أحضرلكوا الفطار وانتوا لموا بقية

حاجتكوا عشان هننقل النهاردة.

-بجد يا بابا؟

-أيوه يا روجي.

-يعني كل واحد فينا هيبقى ليه أوضة لوحدة ومش هينام

احنا الثلاثة مع بعض؟

-صح يا نيرة، هنروح البيت القديم بتاع أبويا على ما ربنا

يكرمني وأحوش ونجيب شقة في مكان تاني.

-أنا مش فاكرة بيت جدوده خالص.

-عشان أنتي ماروحتيهوش قبل كده.

-وماروحناش قبل كده عنده ليه؟ هو عايش ولا ميت؟

-ميت يا نيرة، وموضوع ماروحناش البيت والكلام ده يعني

حكاية قديمة وطويلة وبايخة وأنا مش عاوز أفتح فيها ممكن!

-حاضر يا بابا، بس هتخليني أنا أختار الأوضة اللي

تعجبني.

-ماشي.

أنا نفسي مش عارف هدخل البيت ده ازاي بعد كل اللي فات، مش عارف أنساها ولا أتخطي كل اللي عاشته بسببي، بعث واحدة فتحت الشقة ونصفتها وادتها اللي فيه النصيب، قومت من على السرير ووقفت قدام صورتها ومسكتها وخذتها في حضني وقولتها:

-سامحيني وماتزعلش مني، أنا مجبر والله اني أرجع هناك، اللي بيحصل مش برضاي، بس العيال كبروا والشقة مش مستحيلة، حتى الايجار بقى غالي، ماتزعلش مني يا حبيبي وخليكي دايما معايا.

سمعت صوت همس جاي من ناحية الباب فبصيت لقيت علاء ابني واقف جنب الباب ومنتح وبيقولي:
-بابا هو أنت بتكلم مين؟ مش أنت قولت ماما ماتت!
-اه يا حبيبي، هي ماتت بس أكيد حاسه بينا.
-طيب أنا جعان بقى.

دخلت المطبخ وعملت لهم سندوتشاتهم وقعدوا ياكلوا، أما أنا فدخلت بصيت على الشنط والحاجات بتاعتنا اللي هناخدها معانا، بعد ما خلصوا فطار اتصلت على السواق اللي اتفقت معاه امبارح بالليل عشان ننقل الحاجة، جه تحت البيت ونزلنا الحاجات بتاعتنا ونقلناها لحد البيت القديم، الموضوع كان متعب أوي وخصوصا اني بطولي ومعايا طفلين، علاء سبع سنين ونيرة تسعة، بس ريك كبير وبيدبر، بعثلي ولاد حلال وقفوا معايا وساعدوني لحد ما خلصت الشقة ورتبت كل حاجة، جيران من

زمان أوي يمكن كنت ساعتها أصغر من الواد المزغود ابني اللي
نام على الكنبه ده، بصيت لنيرة وقولتلها:

-ها يا حربوءة اختارتي الأوضة اللي عايزاها تبقى بتاعتك
خلاص ولا المكان مش عاجبك؟

-لا تمام يا بابا، هاخذ الأوضة اللي فيها كرسي هزاز.

-ليه يعني؟

-أولا عشان كبيرة، ثانيا فيها بلكونة على الشارع، ثالثا
عشان أتمرجح على الكؤسي.

-أتمرجح .. آآآه ده العركة هتتنصب بينك انتي وعلاء كل

يوم على الكرسي ده بقى والدنيا هتسمع بينا.

-لا طبعا، أنا أكبر منه، هبقى أسيبه يقعد عليه شوية وأنا

مش موجودة.

-طيب ما نراضيه ونخليه يوم عندك ويوم عنده.

-يعني هتشيل الكرسي وتنقله كل يوم من أوضتي لأوضته!

-مش أحسن من الصداع اللي هيحصلي بسبب وجوده

عندك بس؟

-طيب خلاص موافقة.

دخلت فرشت أوضة أخوها وأنا رتبت احاجات اللي كانت

فاضلة وظبطت التلاجة ورصيت الأكل اللي كنا شارينه فيها،

وشيلت علاء دخلته أوضته وغطيته وواربت الباب عليه وسيبته

، طلعت من الأوضة لقيت الشقة هادية بزيادة، قربت من باب

الأوضة اللي هي اختارتها، لقيت صوت ضحكها عالي، واربت

الباب وبصيت لقيتها قاعدة ومغمضة عينيها وبتضحك، بس

فجأة حست بوجودي ازاي ما أعرفش ، لقيتها فحت عينيها
وبصتلي وقالتي:

-أنت ليه واقف على الباب كده، عاوز تتسنت عليا يعني؟
-ايه أتسنت عليك دي يا نيرة؟ أنا بس استغربت انك
قاعدة بتضحكي لوحك في الأوضة ولسه مانمتيش.

-مش عارفة أنا، عاوزة أقعد على الكرسي وأتمرجح كده.
-بس كده هتدوخي يا نيرة.

وقبل ما ترد عليا لقيت فجأة حاجة بتمسك في رجلي،
اتنفضت من مكاني وصرخت وبصيت لقيت علاء واقف
وباصيلي باستغراب وقال:

-ايه يا بابا هو أنت شوفت عفريت!
-أنت صحيت امتي؟ وليه ما عملتش صوت وانت طالع
من الأوضة؟

-قلقت لما لقيت نفسي نايم في الأوضة لوحدي فقومت
عشان أدور عليك.

-هو مش أنت كنت عاوز أوضة ليك لوحك؟
سابي واقف ودخل يلف في الأوضة، فتح البلكونة ووقف
بص لنيرة اللي قاعدة على الكرسي وشاورلي بايده عليها وقال:

-عايز الأوضة دي مش هقعدي في الثانية.

نيرة بصتله بغض وقالته:

-بس أنا اخترت الأوضة دي الأول.

حاولت ألحقهم قبل الحرب العالمية الخامسة ما تقوم
بينهم، وقفت في النص وقولتلهم:

-بص يا علاء يا حبيبي، معروف ان الولاد مالهمش حاجات كتيرة ومش بيحتاجوا مكان واسع، أما البنات بقي فعندك لبس واكسسوارات وحاجات غريبة فلازم لها مكان واسع.

-بس أن عندي لعب يا بابا وعجله.

-ما هي كمان عندها لعب وعرايس يا علاء.

-طيب خليها تديني الكرسي في أوضتي.

-انا اتفقت معاها ان الكرسي هيبقى يوم عندك ويوم

عندها، وبعدين الكرسي ده قديم مش لعبه يا ولاد.

-تضمنلي انها هتديهولي في اليوم بتاعي مش هتتلكك؟

-على ضمانتي يا علاء.

-خلاص ماشي، اشبعي بالاوضة يا نيرة، لما الكرسي هيبقى

عندي مش هخرج في اليوم ده وهفضل اتمرح عليه كثير.

ضحكت على منظرهم وعركتهم مع بعض وافتكرت

نفسي لما كنت بتنطط في البيت وأنا صغير من هنا لهناء، كل واحد

فيهم كل ودخل ينام وأنا دخلت الأوضة اللي كانت فاضلة

وفاضية، أوضة أبويا وأمي الله يرحمهم، رغم كل السنين اللي عدت

دي كلها الا اني حاسس ان ريحة أبويا لسه فيها، نمت شوية

وقومت عطشان فدخلت المطبخ عشان أشرب وقولت أظمن

على العيال أشوفهم نايمين ولا حد فيهم صاحي، علاء كان في سابع

نومه، غطيته كويس وسيبت باب الاوضة متوارب وروحت

اشوف نيرة، قلبي اتقبض أول ما وقفت قدام باب الاوضة، دورت

كالون الباب بايدي وفتحته وولعت نور الاباجورة الضعيف بس

مالقتش نيرة على السرير، دخلت وأنا عينيا بتلف في المكان كله،

دورت عليها وبصيت تحت السرير وفي الأركان، الكرسي كان بيتحرك حركة خفيفة معنى كده انها كانت لسه في الاوضة واستخبت، وقفت في نص الاوضة وناديت عليها بصوت واطي عشان ماصحيش أخوها، بس هي ماكنتش بترد خالص، بدأت أقلق أنا كنت مفكر ان ده مقلب هي عملاه فيا بس سكوتها وهدوء الأوضة وترني، حسيت بحركة في الدولار ، فقربت بحذر منه وفتحته لقيت نيرة نايمة في الأرضية بتاعته، وقفت مصدوم لثواني حسيت ان عقلي مشلول ومش مستوعب، هي ليه متكومة على نفسها كده، وطيت لحد ما وصلت لمستواها وهزيتها ففتحت عينيها بضعف وقالتلي:

-عايزة أنام يا جدو.

-يا حبيبي قومي أنا بابا.

-طيب سيبي أنام.

-أنتي ايه اللي منيمك في الدولار يا نيرة؟

فتحت عينيها وبصت حوالها باستغراب وبعدين رجعت

بصتلي وقالتلي:

-هو أنا فين؟

-في الدولار! ايه اللي نيمك هنا؟

-مش فاكرة، أنا آخر حاجة فكرها اني طفيت النور

وشديت عليا الغطا ونمت بس كنت على السرير.

-طيب قومي يا حبيبي.

ساعدتها تنام على السرير وغطيتها وفضلت قاعد جنبها

لحد ما راحت في النوم وبعدين وارتب باب الاوضة وسبيتها

ودخلت الاوضة، فردت جسمي على السرير وحاولت أنام ثاني بس خلاص، النوم كان طار من عيني، بصيت في الساعة لقيت لسه بدري عل الفجر ما يأذن، فضلت باصص للسقف لحد ما حسيت بحركة غريبة في الصالة، قومت بسرعة من على السرير عشان اشوف مين من العيال اللي صحي، بس قبل ما أخرج من الاوضة لقيت باب أوضتي بيتفتح ونيرة داخله بتجري عليا وبتقولي:
-بابا.. الحقني.

خدتها في حضني وطبطبت عليها وقولتها:

-مالك يا حبيتي في ايه؟

-أنا خايفة أوي.

-اهدي بس فهميني في ايه؟

-كنت نائمة وفي حد صحاني، ولما صحيت بصيت حواليا

مالقتش حد بس شوفت ضل قصير كان واقف جنب الباب بتاع

الاوضة من بره.

-مافيش حد غيري أنا وانت صاحي يا نيرة.

-لا علاء كان صاحي أنا متأكد انه بيحاول يخوفني عشان

اسيبله الاوضة والكرسي.

-علاء نايم يا حبيتي، ايه اللي هيصحيه دلوقتي؟

-يا بابا بقولك شوفت ضله، هو أنا هكدب عليك ليه

يعني!

-أنت عايزة ايه يا نيرة دلوقتي؟

-ماتخليهوش ليه دعوة بيا ولا يجي عند أوضتي.

-حاضر طيب، يلا روحي نايمي بقا.

خرجت من الاوضة وكنت لسه باخد نفسي وهشد الغطا
عليا لقيتها بتصرخ، جريت عليها لقيتها واقفة في الاوضة وباصه
للسرير بغضب قربت منها وحطيت ايدي على كتفها فاتنفضت
وقالتلي:

-مش قولتلك علاء هو الي بيخوفني عشان ياخذ الاوضة

-طيب ماتزعليش نفسك أنا هرجعه أوضته.

قربت من السرير وشيلت علاء عشان أرجعه أوضته بس
الباب كان مقفول، وقفته على الأرض وسندته وفتحت الباب
ولسه ببص على السرير وهشيله لقيت علاء نايم على السرير،
بصيت جنبي مالقتش الواد واقف، ماكنتش مستوعب الي
بيحصل، دخلت الاوضة وانا قلبي مقبوض، هزيت علاء كان في
سابع نومة، أو مال مين الي كان واقف جنبي من شوية ونايم مكان
أخته، سيبت الاوضة وروحت اشوف نيرة لقيتها نايمة هي كمان،
مش عارف لحقت تروح في النوم ازاي، قعدت في الصالة بضرب
كف بكف، لحد ما نمت على نفسي من غير ما أحس، كالعادة
الدوشة بتاعتهم هي الي بتصحيني بس المرة دي صوت دوشتهم
كان جاي من بعيد شوية، فتحت عيني وبصيت حواليا لقيت
نفسى نايم في أوضة ابويا، ناديت عليهم، كان صوتهم جاي من
الصالة دخلت نيرة وعلاء يالاوضة ووقفوا قدامي فقولتلمهم:

-صباح الخير عاملين ايه؟

الاتنين ردوا في نفس واحد:

-صباح النور يا بابا بخير.

-هقوم أحضرلكم الفطار دلوقتي.
-ماشي وأنا وعلاء بنلف حوالين الكرسي واتفقنا نلعب بيه
سوا وننام في نفس الاوضة.
-الللاه ، ده من امتي يا نيرة؟
-عادي مش هو أخويا وأنا الكبيرة .
-طيب ربنا يهديكم، عمنا انا هحضرلكم الفطار وهنزل
اشتري شوية حاجات ، هنيجوا مايا ولا هتفضلوا في الشقة؟
بصوا لبعضهم لثواني وبعدين نيرة قالتلي:
-هو انت هتتأخر؟
-لا يا حبيبي.
-يبقى خلاص هنفضل هنا بس ابقى هاتلنا حد يركب
التليفزيون عشان مانزهقش من القعدة في البيت بعد كده وانت
في الشغل.
-حاضر يا حبيبي.
حضرتلهم الفطار وقعدت كلت معاهم ولبست ونزلت،
كنت محتاج أجيب لمبات كهربا للممرات اللي بين الاوض عشان
العيال ماتخافش بالليل، واشوف الكهربائي وبتاع التليفزيونات ،
خلصت كل المشاوير اللي ورايا وجيبت اكل جاهز وروحت على
البيت وفضلت مستني الكهربائي تحت البيت لحد ما جه وطلعنا
عدل بريزة الكهربا وركب اللمض الجديدة، وقعدت مع العيال
شوية وماكملناش ثواني لقينا الباب بيخبط وبتاع التليفزيون جه
هو كمان ظبطه.

كانت الساعة داخله على خمسة المغرب، قعدت في
البلكونة لوحدي والعيال قدام التليفزيون، حسيت بتقل فظيع في
عينيا فغمضت غصب عني واستسلمت للنوم، مش عارف أنا
فضلت قاعد كده قد ايه؟ بس لما صحيت الشقة كانت هادية
أوي والنور مطفي، والعيال مش طالعلم صوت، دخلت أشوفهم
في الأوضة واطمنت لما لقيتهم نايمين، اتسحبت وقفلت الباب
وخرجت وقفت في الصالة، وماكنتش عارف أبدأ منين؟ رتبت
الصالة اللي كانت مكركبة ودخلت اللعب بتاعتهم بس وانا بحط
العروسة بتاعت نيرة لاحظت ان الكرسي بيتهز، زي ما يكون حد
قاعد عليه وقام، بصيت على سرير العيال واثأكدت انهم نايمين،
رجعت بصيت على الكرسي تاني لقيته ثابت ومش بيتحرك
فقولت يمكن بيتهيايلى، الكرسي ده كان بتاع ابويا الله يرحمه،
طلعت من الاوضة عل المطبخ، جهزت الاكل بتاع بكره عشان
هنزل الشغل واما ارجع هبقي هلكان ومتأخر فمش هبقى قادر
أعمل حاجة للغدا، ما حسنتش بأن الوقت اتأخر غير لما سمعت
أذان الفجر، خلصت اللي في ايدي ودخلت ريحت كام ساعة لحد
المنبة ما رن، قومت حضرت الفطار للعيال وصحيت نيرة قولتلها
ان الفطار على السفارة ولما تصحي هي وأخوها يفطروا، قفلت
محبس الغاز كويس ونزلت شغلي، طول اليوم كان قلبي مشغول
عليهم وحلفت ان مع أول مرتب هجيب تليفون للبيت عشان
أطمئن عليهم منه وانا بره في الشغل دايمًا بدل وجع القلب ده،
بعد يوم طويل من حرق الدم والأعصاب رجعت البيت لقيت
الشقة مترتبة زي ما سيبتها والأكل ما حدش قرب منه، قلبي وقع

في رجلي، جريت على العيال لقيتهم قاعدين في الاوضة وبيلعبوا بهدوء من غير دوشة، حمدت ربنا انهم كويسين ووطيت على الأرض وفتحلتهم ايدي فجم جري عليا، بصيت لنيرة بزعل وقولت لها:

-ماكلتوش ليه لحد دلوقتي؟

-كلنا يا بابا.

-ازاي والأكل بره ماحدث جه ناحيته؟

-لا بعد انت ما مشيت في حد جه اداانا أكل وقعد معنا

ومشى من شوية وقالنا انك خلاص قربت تيجي.

-حد مين؟ وازاي تدخلوا حد غريب البيت وأنا مش

موجود؟

-هو قال انه صاحبك وورانا صورة ليك معاه .

-صورة ليا معاه؟

-يا ترى مين ده؟ ماالكوش اسمه طيب؟

-لا يا بابا، بس قال انك وحشته وهيجيلك قريب عشان

يقعد معاك ووصانا نقولك ماتشيلش همنا هو هياخد باله مننا

طول ما انت في الشغل.

مش عرف ليه كلامهم رعبني وخلي ركبي تخبط في بعضها،

خدت نفسي ونزلت على الدكانة اللي تحت البيت وسألت الراجل

اللي فيها لو شاف الراجل اللي طلع للعيال فقالي:

-ماشوفتش حد والله يا أستاذ نبيل، شوف حد في القهوة

يكون شافه عشان هما اللي في وش المدخل.

جريت على القهوة زي المجنون، وسألت الصبي اللي
شغال هناك فقالي:

-والله يا أستاذ ما فاكرك، بس عينيا بعد كده هرکز مع الي
داخل واللي خارج ماعلش ماحدش يعرف انك سايب عيالك هنا
مننا.

-ماشي كتر خيرك.

البيت ده كان عبارة عن ٤ أدوار كلهم شقق ايجار قديم،
أبويا خد شقة منهم واتجوز فيها ومعايا لحد دلوقتي، طلعت
لقيت علاء واقف بيعيط قدام الاوضة، جريت عليه وحضنته
وقولتله:

-مالك يا حبيبي؟ فيه ايه؟

جسمه كان بيتنفض وقلبه بيدق سرعة، خدته في حضني
وبوسته من راسه وقولتله:

-اهدى بس وقولي اللي حصل بالراحة.

-ننذني نيرة أبابا..

-مالها اختك في ايه؟

-كنت قاعد على الكرسي ومرة واحدة زقتني من عليه
وضربتني وقالتي اطلع بره أوضتي والا هقتلك.

-مش معقول، نيرة ماتعملش كده!

-والله مش بكذب، كان شكلها يخوف أوي وعينيها كانت
بيضا كلها مافيهاش اسود.

سيب علاء وبلعت ريتي بخوف وخبطت على الباب كذا
مرة بس ماسمعتش صوت نيرة، كان في حد تاني بيتكلم غيرها،

حاولت أكسر الباب بأي طريقة وأدخل لكن الصرخة اللي سمعتها جمدت الدم في عروقي وثبتتني مكاني، بصيت لعلاء اللي كان واقف ماسك في رجلي ومنهار ووهو بيقولي:
-أنا خايف من نيرة يا بابا.

-ماتخافش يا حبيبي روح أوضتك حالا.
أقنعتة بالعافية انه يروح الاوضة الثانية وفضلت اعافر مع الباب لحد ما اتفتح ودخلت برعة لقيت نيرة واقعة على الأرض والكرسي واقع على دماغها، حاولت أفوقها بس ماكنتش بتستجيب، جريت بيها على المستشفى وهناك الدكتور طمني وقال لي انها هتبقى كويسه ومع الوقت فاقت وكتبلها مقويات، رجعت بيها على البيت الساعة كانت داخلة على ١١ بالليل، دخلتها أوضتها وعدلت الكرسي وبصيتها باستغراب وقولتها:
-ايه اللي حصل؟

-بص يا بابا، كنت بلعب مع علاء وفجأة حسيت اني مضايقة وجسمي كله سخن، كنت مغاظة من علاء وماحستش بنفسي غير لما وقعتة من على الكرسي وضربته وساعتها طردته من الاوضة وفضلت اتمرجح على الكرسي كثير لحد ما حسيت اني داخلة جيت اقف ما اقدرتش، الكرسي كان لازق في هدومي، وقعت ووقع عليا ودماغي اتعورت.

-خلاص الكرسي ده لا انت ولا هو، ماحدثش فيكم هيقعد عليه تاني.

ماستنتهاش تبتذني عاطفيا، قوم جرجرت الكرسي ودخلت اوضتي وقفلت عليه ورجعت قولتلهم:

اختفت، جريت على أوضة نيرة عشان أظمن عليها بس
مالقتهاش، قلبت عليها الشقة كلها ماكنتش موجودة، ماكنتش
عارف أعمل ايه، بس فجأة وأنا واقف في الممر اللي بين الاوض
سمعت صوت ضعيف جاي من الحمام، فتحت الباب ، وولعت
النور لقيت نيرة واقعة في الأرض، قربت منها وشيلتها ووصلتها
على السرير ، جبتلها مايه تشرب ولما هديت قولتها:

-مالك يا نيرة يا حبيبي في ايه؟

-مش عارفة يا بابا، انا ببقى كويسة وفجأة مابحسش

بنفسي.

فضلت سهران جنبها وكنت من وقت للتاني بروح ابص
على علاء ، قلبي كان بيتقطع عليهم، خدت تاني يوم أجازة ونزلت
قعدت على القهوة وأغير جو والعيال يبقوا تحت عيني ، صبي
القهوة وقف قدامي وقال:

-مالك يا أستاذ؟

-البيت حاله متشقلب بزيادة.

-مش فاهم؟

-العيال بيجرالهم حاجات غريبة؟

-يمكن عشان البيت مقفول بقاله فترة.

-يمكن بس انا سمعت صوتها في البنت .

-صوت مين؟

-صوت مراتي الله يرحمها كانت بتكلمني من جسم بنتي.

-يا دين النبي ! طيب وانت ايه اللي مقعدك في الشقة

طالما هي كده؟

-مجبور، الشقة اللي كنت فيها ضيقة مش مستحملانا انا والعيال وايجارها كمان رفع.
-ده انت محتاج شيخ يقراك في الشقة عشان لو فيها حاجة زي ما بتقول تروح لان واضح ان ماعندكش رفاهية انك تسديها وتشوف مكان تاني.
-لو كان بايدي ماكنتش دخلت الشق دي تاني.
-طيب في شيخ هنا هشوفهولك وانت اطلع خليك جنب عيالك ماتشيلش عينك من عليهم بدل ما يتأذوا.
طلعت فعلا قعدت معاهم قدام التلفزيون، نظرات نيرة ليا ماكنتش مريحاني، بعد شوية قامت وقفت وزعقت في وشي من غير سبب ودخلت الاوضة وقفلت عليها، بعد خمس دقائق ، سمنا صوت حركة غريبة في الاوضة علاء بصلي ووالي:
-ماتخافش دي تلاقيها بتتمرجح على الكرسي الهزاز اللي عندها.

-عندها؟ هو انا مش كنت نقلته للاوضة بتاعتي؟
-مش عارف يا بابا بس الكرسي كان عندها في الاوضة انا ماشفتوش عندك خالص.
-طيب يا حبيبي خلاص.

فضلت قاعد معاه لحد ما سمعت جرس الباب بيرن، قام علاء بسرعة فتحه وأول ما فتحه سمعت صرخه جاية من جوه، بصيت ناحية الاوضة وفضلت واقف متجمد في مكاني، الواد صبي القهوة والشيخ دخلوا ووقفوا في الصالة جنبي وبعدها ميل عليا ووالي:

-أنا حكيت للشيخ على كل حاجة انت قولتلها لي وواحنا طالعين قالي انها عارفة اننا جاينين.

-عشان كده صرخت.

الشيخ بص لعلاء وخط ايده على دماغه وفضل يقرأ قرآن وبعدين قالنا:

-الولد كويس ابعتوه يقعد عند حد لغاية ما نخلص الي هنعمله.

ساعتها علاء مسك فيا وفضل يتحايل عليا عشان ما ابعتوش عند حد لكن صبي القهوة طمنه وقاله:

-تعالى ماتخافش ده انا هوديك عند أمي وأختي ساعة وهرجعك تاني ماتقلقش.

خدته في حضني وطببت عليه وفهمته ان الموضوع هيخلص بسرعة وهيرجع عادي وفعلا خده ومشى وفضلت أنا والشيخ، حكيتله كل اللي بيحصل وقولتله على موضوع مراتي الله يرحمها واني كنت بلا حظ في بيتنا القديم ان البنت بتقعد تكلم صورتها وانا بدأت أقلدها لدرجة ان علاء كان بيتسغرب من اللي بنعمله، فقالي ان قرينها هو اللي ممكن يكون بيعمل كده وخصوصا ان في حاجة ربطاه بيا وهما العيال وخوفها عليهم، قعدت على الأرض وقولتله:

-بص يا شيخ انا سبب أساسي خلاني اسيب الشقة هو اللي كنت بلا حظ به يحصل فيها، كنت مفكر اني لما اجي هنا الدنيا هتتغير وهتتحسن بس الوضع بقى أسوأ.

-كله هيتحل باذن الله.

قربنا من باب الاوضة، بس الشيخ شاورلي أقف في مكاني
وطلع حاجة من جيبه وقربها من بقه ونفخ فيها ومسك الأوكرة
بتاعت الباب ولفها وأول ما الباب اتفتح، رمي اللي كان معاه في
الايضة، كانت بتصرخ، صوتها بيقطع القلب، اترجيت الشيخ
يسيني أدخلها بس ماوافقش وقاللي:
-جمد قلبك يا ابني عشان ماتضرهاش، البننت لسه
صغيرة.

كنت واقف جنبه على الباب وشايفها وهي بتتلوي
وبتتنج عل الأرض، غمضت عينيها وفضلت ادعيها في سري،
حسيت بيها واقفه جنبي ، بصيت عليها عينها كانت كلها دموع،
ماقدرتش أقاوم نفسي وقولتها:
-أنتي ليه بتأذيها دي بنتك سيبها.
-مش بايدى يا نبيل، غصب عني.
في اللحظة دي الشيخ هزني ففتحت عيني وبلعت ريقى
وبصيت حواليا باستغراب وبان عليا اني اتخضيت وقولته:

-هي فين؟

-هي مين؟

-مراتي، كانت واقفة جنبي هنا.

-ما قولنا دي مش مراتك، أنت مراتك ماتت وروحها عند

ربنا ، اللي معاكم ده قرينها.

بصيت لنيرة اللي كانت شبه الطير المدبوح على الأرض

وقولته:

-طيب واياه العمل؟

- التحصين، لازم تتحصنوا كلكوا.
-طيب وقرين مراتي عوز ايه مننا؟
-إجابة السؤال ده مش عندي، أنت أكيد أدرى ، القرين مبيأديش الا لو أتأذي!
-تقصد ايه؟
-أقصد ان أكيد وجودها والمشاكل اللي بتعملها عشان تلفت انتباهكم وتقولكم بيها انا موجوده مش من فراغ.
-طيب مافيش حل نهائي لى احنا فيه ، بنتي هتفضل كده؟
-للأسف البنت صغيرة مش هتستحمل، طاقة جسمها ضعيفة، لو ما حافظتش عليها هتموت في أي لحظة.
-أنا مش عارف ألقبها منين ولا منين؟
-هحصنلك البيت وربك يسهل الحال.
دخل الاوضة، نيرة رفعت راسها ومدتلي ايدها ، منعني اني اقرب منها وقالى خليك بعيد عنها لحد ما أخلص، رش في الأركان من المادة اللي كانت معاه وفتح الدولاب ورش فيه كمان، وفي الاخر قعد على الأرض في نفس مستوى نيرة ومسك دماغها وفضل يردد اية الكرسي تقريبا سبع مرات ولما خلص قالى:
-ساعدني ننقلها على السرير.
غطيناها وخط ايده على دماغها وكمل قراءة لحد ما جسمها اتنفض وشوفنا خدها غرقان بالدموع، ساعتها الشيخ قالى قرب يا ابني انت كمان، قربت منه فمسك دماغى وكرر نفس اللي

عمله لنيرة، كنت حاسس ان جسمي بيتحرق بس قاومت ولما
خلص حصن الشقة كلها وقاللي:

-لو حسيت بحاجة غريبة في الشقة ماتستناش للصبح،
كلمني على طول قرينها مش أمان عليكوا حنا طردناه من المكان
ورجوه ده ممكن يكون في شر ليكوا، القرآن ميتقطعش صوته في
الشقة شغال باستمرار، المرايات مايتشالش من عليها الغطا
تفضل مداريه باللي فيها، باب الحمام مايتسبش مفتوح ولا الاكل
يفضل مكشوف، مافيش ققط تدخل البيت، الأذكار ثم الأذكار
والالتزام بالصلاة، هي دي الحاجات الي ممكن تحفظك من قرين
مراتك اللي من الواضح يا ابني انه مش ناوي لحد فيكم على خير.
هزيت راسي وسكت، ماكنتش عارف أقوله ايه؟ أول ما
خرج بعث الصبي بتاع القهوة يجيب علاء ابني ، خدته في حضني
ودخلت الاوضة وفضلت صاحي طول الليل ، كل ما أحس بحركة
أجري على أوضة نيرة الاقيها نايمة لسه ف ارجع ثاني أقعد جنب
علاء ، فضلت على الحال ده لحد الساعة ٦ الصبح، حسيت
بحركة قدام باب الاوضة وبعدها الباب اتفتح، كانت نيرة واقفة
قدايمي، وعينيها مليانه دموع وقالتي:

-ماما قالت انها مش هترجع ثاني ولا هنشوفها، أنا كنت
بحبها هي ماكنتش بتأذييني ، أنت السبب ، بسببك هي خلاص
مشيت .

قربت منها وقولتها:

-دي مش ماما يا نيرة، ماما ماتت يا حبيبي، الموضوع
كبير أكبر من ان عقلك الصغين ده يفهمه.

خدتها في حضني وحاولت أحتويها، واهديها خالص لدرجه انها استسلمت لكلامي وطلعت نامت جنبي أنا وعلاء في السرير، على قد ما كنت خايف من اللي بعد كده الا اني في اللحظة دي كنت مطمئن بوجودهم جنب، هما اللي فاضلين ليا من الدنيا دي ومستعد احارب بيهم العالم، مراتي كانت مريضة نفسية، تحديدا بتعاني من الوسواس القهري، حياتي معاها كانت جحيم وشك في كل حركة وتفصييلة ومع ذلك استحملت عشان عيالي اللي من شدة تعبها قالت انهم مش عيالي، كانت بتجيلها نوبات غريبة، أوقات كنت بفكرها ممسوسه أو فيها حاجة، لكن كل الشيوخ اللي عرضتها عليهم قالوا انها كويسة ومافيهاش حاجة خالص، آخر مرحلة وصلتلها معاها كانت اني ودتها لدكتور نفسي واتصدمت لما عرفت ان كل الأعراض اللي بتعاني منها كانت أعراض الوسواس القهري، حاولت عل قد ما أقدر أخلقها بيئة كويسة أطمئنها على اللي جاي بس فشلت، كان نفسي تفضل معانا حتى لو مش هنتحرك وهتفضل مشلولة، اه أصلها رمت نفسها واحنا راجعين من عند ابويا في اخر مرة تحت القطر ويادوب لحقناها بس هي أصرت انها تنتحر وماتكمل شمعانا مش عارف كانت بتهرب من ايه؟..فوقت من كل اللي كنت فيه على حركة الكرسي الهزاز، اللي أصلا ماكنش في الاوضة ومش عارف جه ازاى، قعدت على السرير وبصيت للعيال اللي كانوا نايمين حواليا وبصيت قدامي بفرع وخوف، ماكنتش قادر أبلع ريقى بس ساعتها سمعت صوت ضحكة مخيفة، الكرسي كان بيتهز جامد وسمعت صوت بيقول...

ليزا زغلول "بتاعة العفاريات" _____

-جاهز عشان تسمع الحكاية؟ طيب عندك الجرأة

تواجه!

الكرسي الهزاز ج ٢

قعدت على السرير وبصيت للعيال اللي كانوا نايمين
حواليا وبعدها بصيت قدامي بفزع وخوف، ماكنتش قادر أبلع ريق
بس ساعتها سمعت صوت ضحكة مخيفة، الكرسي كان بيتهز
جامد وفي صوت بيقول...

-جاهز عشان تسمع الحكاية؟ طيب عندك الجرأة

تواجه!

فجأة سمعت صوت خبط على باب الشقة، الكرسي
الهزاز نفسه اتسمر مكانه وسمعت صوت صرخة ضعيفة، كل
الحاجات اللي كانت على المكتب كانت بتتهز جامد، حتى الدولاب
بتاع الهدوم الأبواب بتاعته اتفتحت لوحدها وصورة أبويا الله
يرحمه اللي كنت راكناها في الدولاب وقعت على الأرض والازاز
بتاعها اتكسر، ماكنتش فاهم ايه اللي بيحصل، خدت الولاد في
حضني وأنا بدعي وبقول:

-يا رب عديها على خير يا رب.

صوت الخبط على الباب كان لسه شغل ماوقفش، بس
الاروضة هدت شوية، ماكنتش عارف أعمل ايه بس فجأة سمعت
صوت أحمد الصبي اللي في القهوة، كان بينادي علينا، صوته
بيقرب، كنت بدعي انه يطلع هو بجد والصوت ما يطلعش تخيل

في دماغي، لكن النور اللي ظهر تحت عقب الباب أكدي ان في حد
بره فعلا وساعتها ماكدبتش خبر وناديت بصوت مهزوز عليه:
-أحمد احنا هنا.

باب الاوضة اتفتح ونور الكشاف ملى الاوضة، مد ايده
اول ما دخل وشافنا كده على السرير وشغل النور وقالي:
-ايه اللي حصل؟ مالكم كده؟
-أنت دخلت هنا ازاي؟

-الشيخ كلمني بعد الفجر وبعثني ليك بمرسال ضروري،
جيتلك أول ما النهار شفشق وفضلت اخبط الباب وارن-الجرس
وانادي لكن ماחדش رد، فاضطريت اكسر الازاز اللي في الباب
وفتحته ودخلت أشوف مالكووا لأن كلام الشيخ قلقني.
-الحمد لله انت دخولك أنقذنا.

-هي الاوضة عاملة كده ليه؟
-معارفش بقي في حاجة غلط، انا لازم اخذ العيال بعيد
عن هنا بس لسه ماقبضتش وماعيشش فلوس أأجر مكان نقعد
فيه.

-هاتهم عندي، ماتخفش البيت أمان، وتعالى نروح
للشيخ.

-دلوقتي؟
-ايوه يا أستاذ نبيل، هو انت شايف الوضع حواليك
يستحمل تقعد هنا أكثر من كده.
-لا والله انا ماكنتش مصدق ان اللي احنا فيه ده هيخلص
على خير.

-طيب ناولني علاء ابنك كده وشيل انت الامورة الصغيرة.
-ماشي.

خدت المحفظة بتاعتي والموبايل وصحيت نيرة، كانت
لسه مدروخه ومش فايقة، شيلتها ونزلت بيها ورا علاء ولما نزلنا
تحت البيت قال لبتاع الدكانة:

-شوف بتاع الازاز اللي على ناصية الشارع يا عم إسماعيل
واطلع معاه صلح الازاز بتاع شقة أستاذ نبيل.
وصلنا بيت احمد اللي كان بعدنا بشارعين، بصيتله
وقولتله:

-انا خايف لوجودهم يضايق الجماعة عندك.
-لا ماتقلقش يا أستاذ نبيل مافيش حاجة ده امي حبت
علاء المرة اللي فاتت وقالتي كل ما ينزل الشارع اوديهولها على
فكرة هي رقتهولك كمان.
-ربنا يخليك يا احمد يا رب.

احمد خد نيرة وعلاء ودخلهم لامه اللي بصتلي ودعتلي
وقالت:

-ربنا يزيع اللي في طريقك يا ابني.
سلمت عليها ومشيت أنا وأحمد لحد بيت الشيخ،
دردشنا شوية في الطريق كنت خايف من اللي مستنيني بس كان
عندي فضول اعرف ايه المرسال اللي باعتهولي:
-ماله الشيخ يا احمد؟

-هو قالي ان الشر اللي انت كنت فيه انت وعيالك ما
اتفكش لسه ولازم يقابلك ضروري والامش هيحصل خير.

-حسيت بكدّه امبارح بعد ما مشيتوا، ماعرفتش اغمض
عينيا، والكرسي الهزاز فضل يتحرك بهستريا كأن حد قاعد عليه،
أديك شوفت الاوضة عامله ازاي.

-خلاص احنا وصلنا اهو وهنعرف كل حاجة.
وقفنا قدام الباب وأحمد خبط كذا مرة، الشيخ فتح
وبصلي وقال:

-كويس انك بخير ولادك فين؟
-وديتهم عند ام أحمد.

-طيب خير ان شاء الله تعالوا اتفضلوا.
دخلنا البيت عنده كان هادي وريحته بخور ومسك فتح
باب أوضة جانبية وقال:

-اتفضلوا، وانا هعمل حاجة وجاي.
دخلت انا واحمد الاوضة والشيخ قفل الباب وانا،
الاوضة كان فيها كتب عربي ومساند على الأرض، أحمد يصلي
وقال:

-ماتخافش الشيخ كويس.
-أنا مش خايف منه بالعكس انا خايف ادخلك انت وهو
في مشاكل وتتأذوا.

الباب اتفتح والشيخ دخل ومعاه بنت صغيرة كان تقريبا
عمرها بتاع سبع سنين يمكن أزيد ويمكن أقل مش عارف، بس
قعد ونادى عليها وقالها:
-تعالى اقعدى يا حبيبتى ماتخافيش.

بصيت لأحمد وشاورتله بايدي لاني مش فاهم بس الشيخ
لمحني وقالي:

-ماتقلقش.

البتن قعدت قدامنا فحط ايده على دماغها وقرأ كذا آية
وبعدها قالي:

-مد ايديك يا ابني.

مديت ايدي على راسها وانا خايف ومرعوب من جوايا،
حط ايده على ايدي اللي كانت بتتنفض وكمل قراية وبعدين قال
للبتن:

-قومي يلا خليههم يدهنوكي بالمسك والزيتوت اللي جوه.

البتن خرجت وقفلت الباب فالشيخ بصلي وقالي:

-هفهمك كل حاجة دلوقتي ماتقلقش.

ولع بخور في المكان وقال:

أنا شوفت مراتك هنا، في العادة قبل ما انام بدخل الاوضة
اصلي فيها كذا ركعة واقرا الورد بتاعي، بس امبارح لما روحت من
عندك كان في ثقل جامد في جسمي دخلت قعدت في الاوضة هنا
وماولعتش النور، كنت حاسس ان في حد موجود معايا، لما ركزت
شوفتها واقفة في الركن اللي هناك ده .

بلعت ريقى وقولتله:

-ماعلش بس هو انت عرفت ازاي انها مراتي؟

-اللي معايا عرفني، حاولت اصرفها بعيد عنك انت

وعيالك لكن ماقدرتش، هي موجودة لسبب ما انا مش عارفة
ومش هتفارق غير لما تحقق اللي في دماغها، ودي مش روح يا

ابني ، الروح بعد الموت بترجع للي خلقها في مكان مش معلوم بالنسبة لينا، لكن ده قرين مراتك ولغرض ما كل اللي بيحصل ده من تحت ايده.

-مش عارف ليه بيحصل كده أصلا.

-حاول تفتكر.

-والله مش عارف.

-يبقي ماقدمناش غير اننا نحضر قرينها على البنت

الصغيرة.

-نحضر ايه؟ يعني انت بتقول عاوزه تأذينا تقوم

تحضرهالنا!

حكيتله اللي حصل معنا فقالي:

-بس احنا لازم نعرف هي عايزة ايه قبل ما تأذيكم فعليا.

-هي ممكن تأذي عيالها وتضرهم؟

-القرين مش هيفرق وهو بيأذي لأنه ما عندوش مشاعر،

القرين ده جن يا ابني.

-طيب تضمن منين انها متأذيناش لو حضرتها؟

-هنحبسها في جسم البنت الصغيرة اللي كانت هنا

وهنحصن البنت كويس.

-طيب والبنت مش هتتأذي؟

-البنت دي بتشوف وتسمع اللي مش بنشوفه ولا

بنسمعه.

-يعني ايه مش فاهم حاجة من اللي بتقوله؟ ملبوس هي

كمان يعني ولا ايه؟

-لا يا ابني زهورية.
-انا مش فاهم حاجة بس مش عاوز حد يتأذي.
-ماحدش هيتأذي ماتخافش، بس لازم احصنك انت
واحمد، هتحضّر معنا يا احمد جلسة التحضير دي ولا ايه؟
-مش عارف؟ خايف!
-ماتخافش ان شاء الله خير وجودك هيقويننا.
-خلاص ماشي هحضر وربنا يستر.
الشيخ قام نادي على البنت اللي دخلت وهي لابسة
فستان لونه أحمر ورابطة شعرها ضفيرتين، وبصلنا وقال:
-اقعدوا في الأماكن اللي حددتهالكوا.
قفل الباب وولع الشمع وطفى النور وقعد في الطرف اللي
كان فاضل للمثلث والبنت كانت قاعدة في النص، ردد كلام غريب
ماكنش قرآن ولا ادعية حاجة كده بلغة غريبة وبعدها حسينا بهوا
بارد في المكان، طلب مننا مانفتحش عينينا مهما حصل الا لما
يقولنا، كنا سامعين صوت زمجرة بتعلى تدريجيا لحد ما الشيخ بدأ
كلامه وقال:
-السلام عليك، بينا وبينك عهد لا تاذينا ولا نأذك.
في اللحظة دي سمعنا صوت حد بيلهث وبعدين صوت
تخين قال:
-لسه الأذى ما ابتداهش.
-عليك عهد لو كسرته تبقى لعين، انا حضرتك عشان
تكون معين، عايز أعرف ايه اللي حصل وعاوز ايه من نبيل وعياله.
-نبيل جوزها اللي قتلها بسكوته.

في اللحظة دي نطقت غضب عني وقولته:
-كداب يا شيخ ماقتلتهاش.
حسيت بكهربا ماشيه في جسمي وسمعت الشيخ وهو
بيقولي:

-اسكت يا نبيل، احنا محضرينه عشان نسمعه.
القرين ضحك ضحكة مخيفة وقال:
-نهايتك هتبقى على ايدي يا نبيل، بس مش هتبقى سهلة
لازم أتلذذ بموتك زي ما عملتوا فيا.
الشيخ اتعصب عليه وقاله:
-اخرص وجاوب على قد السؤال اللي سألته انت هنا
عشان تطيعني، ليه بتأذي نبيل وعياله؟
-الحكاية كلها بدأت عند أبوه، أبوه الحاج اللي عارف ربنا،
اللي الناس كلها مخمومه فيه.
-أبويا أنا ماله؟

-اصبر يا نبيل هنفهم كل حاجة دلوقتي، احكي كل حاجة
حصلت معاكي بالتفصيل والا هحرقك.
فجأة اتحول الصوت التخين لصوتها الناعم، ايوه كنت
عارفة وواخذ عليه، هي نوال سمعتها وهي بتقول:

-نبيل بالنسبالي كان كل حاجة، كنت راضية أعيش معاه
تحت أي ظروف، اتخطبنا واتجوزنا والدنيا مشيت بس بعد كام
شهر بدأ أبوه وأمه يسألونا هنفرح بيكوا امتي؟ مافيش حاجة في
السكة ولا ايه؟ كنت شايقفة ان لسه بدري، احنا لسه قدامنا
العمر طويل، قللت من زياراتي ليهم عشان مابقاش عندي إجابة

على اسألتهم لحد ما في يوم قررنا نروح انا ونبيل للدكتور، طلب منا شوية تحاليل عملناهم وخذت انا نتيجة التحاليل روحت بيها للدكتور بعد كام يوم مع حماتي وهناك الدكتور صدمنا وقال ان نبيل مابيلخلفش، ماكنتش عارفة اتعامل ازاى مع الموضوع ولا أقوله ايه بس حماتي طلبت مني اني اسكت واقوله ان الموضوع مسألة وقت وهي هتتصرف او نشوف دكتور تاني، وفعلا بدأت اتهرب من الكلام في الموضوع ده مع نبيل، لحد ما حمايا في يوم سمعني وأنا بقول لحماتي ان نبيل في يوم هيعرف واني من حقي ابقى ام واشوف حياتي، ماكنش عندي استعداد اضحي بكلمة ماما عشان خاطر نبيل مع اني كنت بحبه، بس مافيش راجل بيعز ست ، العيال هما السند والعزوة، ساعتها حماتي كتمت بوقي وقالتي: اسكتي ماتفضحيناش عاوزة تطلعي ابني معيوب وتركي الناس علينا ويشمتوا فينا ! مافهمتش ايه الغلط في اللي طلبته ، بس بعد كام يوم حمايا جالي الشقة ونبيل مش موجود وطلب مني البس عشان اروح معاه مشوار، روحنا شقة عند واحد شيخ قالي انه هيباركني وهحمل ان شاء الله من نبيل ، كنت خايفة وعاززة امشي بس حمايا صمم اننا ندخل للشيخ ده ولما دخلت طلب منه كوباية ليمون عشان اهدى ولما شربتها عينيا بدأت تتقل وماحستش بالدنيا من حواليا، دماغى كانت ثقيلة وكنت بفتح بالعافية ، بس لما اتحاملت على نفسي ومسكت دماغى وبصيت حواليا لقيت نفسي في الشقة عندي على سريري، فكرت ان كل اللي حصل ده حلم، لما طلعت الصاله لقيت حمايا قاعد وبصلي وقالي: حاولي تخلي جوزك قريب منك اليومين دول يا بنتي،

حطيت وشي في الأرض وسكت والأيام عدت وبعد شهر ونص تقريبا عرفت اني حامل، الدنيا ماكنتش سيعاني من الفرحة وماكنتش مصدقة، جريت على حماتي عشان افرحها بس هي اتصدمت وقالتي:

- حامل ازاي ده انا كنت لسه بدورك على دكتور تروحيه

في البندر.

حكيتها كل اللي حصل وساعتها وشها اتغير وقالتي:

-هو وداكي لمين؟

-ماعرفش!

ماكنتش فاهمة اللي حصل ساعتها بس من يومها وهي

اتغيرت معايا ومابقتش تقولي تعالي زي الأول ولا تسأل عليا، لما عرفوا اني حامل في بنت بصت لحمايا وسابتنا ودخلت الاوضة ، حتى حمايا هو كمان وشه اتقلب وقال:

-كنا عايزين ولد.

-هي هتفرق يعني يا عمي! المرة الجاية نبقي نجيب ولد

اللي جاب البنت يجيب الولد.

قام دخل اوضته ورا مراته وسابنا قاعدين انا ونبيل في

الصالة وبعد شوية نبيل نزل يجيب حاجة للعشا، فروحت اسألهم لو هيتعشوا معانا ولالا، بس وانا واقفة على الباب سمعت حماتي وهي بتصرخ في حمايا وبتزعله وبتقوله:

-هتخلي اللي من الشارع من صلبننا؟

حسيت ان الدنيا بتلف بيا ساعتها وكنت بدعي ربنا ان
اللي فهمته مايكنش صح، ماقدرتش امشي ساعتها وفضلت واقفة
متسمرة مكاني لحد ما سمته بيقولها:
-انا عملت كده عشان نبيل.

-ما كان طلقها وراحت لحالها، انت دلوقتي ضريت ابنك
هتلبسه في بنت ومش من صلبه كمان.

بلعت ريقى بصعوبة ، حمايا اللي أمنته على نفسي وقولت
ده زي ابويا خدني وداني لحد وسلّمني له عشان ابقي حامل عشان
مايفضحش ابنه، سيبت الشقة ونزلت اجري على الساللم ، لقيت
نبيل في وشي ماكنتش طايقة اشوف وشه ولا وشهم وماكنش
عندي استعداد اني اجاوب على حاجة ، طلبت منه يروحني الشقة
وفعلا نفذ طلبي من غير ما يسألني فيه ايه، حياتي من الليلة دي
اتشقلت واتدمرت دخلت في دوامة اكتئاب ماعرفتش اطلع منها،
حاولت اتخلص من اللي في بطني، جربت كل حاجة بس للأسف
نيرة بنتي كانت ماسكة في الدنيا ومتبته، في يوم الولادة كنت كارهه
اشوفها ومارضتش ارضعها طبيعي، حماتي حضرت غصب عنها
وما استحملتش علي ابنها اللي بيجري طبت من طولها ووقعت
ميته، حمايا السبب في كل اللي حصل، مش هنكر ان نبيل كان
شايلني من علي الأرض شيل، وكان بيعمل كل اللي يقدر عليه
للبنات، كل ما كنت بشوفها كنت بحس بوجع فظيع جوايا ،
إحساس الخيانة ماكنش بيفارقني، بعد فترة الدنيا هديت وانا
حاولت اتقبل اللي حصل واعدي لاني لو اتكلمت هتفضح
وماحدش هيصدقني لان أبو نبيل ممكن ينكر ويتهمني ساعتها في

شرفي، وفي مرة كنا عنده في البيت ، البنات تعبت فنبييل خدها ونزل بيها الطوارئ وفضلت انا في البيت لان رجليا كانت لسه متجسسه، دخل عليا أبوه وانا نائمة على السرير فقومت واتعدلت وشديت عليا الغطا وقولته:

-خير يا عمي في حاجة؟

-فيه يا كتير يا نوال.

-خير ان شاء الله.

-انا مش عارف اطلعك من دماغي من يوم ما جينا نقرا

فتحتك لنبييل.

-انت بتقول ايه يا عمي ؟ أنا مرات ابنك نبيل ، نبيل لو

سمع الكلام ده مش هيحصل خير، ده ابنك الوحيد ماتخليش الشيطان يدخل بينكم، استهدى بالله يا أبا الحاج.

الشيطان عمّاه وأنا مقدرتش أدافع عن نفسي وبعدها

قالي:

-يمكن المرة دي تصيب ويجي الواد، أنا ماكنتش عاوز

بنات بس مش مشكلة.

بلعت ريتي بصعوبة، ماكنتش قادري اخذ نفسي من اللي

بيحصل معايا، كنت بحاول أستخبي في الغطا وهو كان قاعد على

الكرسي الهزاز ويراقبني وهو ساكت، ماقدرتش أقوم من مكاني ،

شديت عليا الغطا وفضلت أعيط، عقلي ماكنش مستوعب كل

اللي بيحصلني ولا قدرة افهمه، ولما نبيل والبنات جت عمي قاله:

-روح نام انت في اوضتي وخذ البنت معاك وانا هفضل
سهران جنب مراتك عشان شكلها تعبانة وانت واقف على حيلك
مع البت روح ارتاح.

فضل قاعد على الكرسي الهزاز ، كنت سامعه صوت
الحركة بتاعته ، لما اتأكد ان نبيل والبت ناموا كَرَّر اللي عمله
وسابني وطلع من الاوضة، ما حستش بالدنيا من حواليا غير تاني
يوم الصبح ونبيل بيطبطب عليا عشان يصحيني ، فتحت عيني
وأول ما شوفته قدامي زقيته بعيد، ما كنتش طايقة اشوفه ولا
اشوف ابوه ولا البت ، فضلت كذا يوم على كده ولما قدرت اقف
على رجلي طلبت من نبيل يروحني الشقة ويفضل هو والبت مع
ابوه، في الأول رفض وقالني :

-مش هينفع نسيبوا ابويا لوحده ده كبير ومش هيعرف
يخدم نفسه.

-يبقى خليك معاه انت وبتك وروحني، دي مش بتي مش
عايزة اشوفها.

ابوه ادخل في اليوم ده وقاله:

-روحها يا ابني وخذها تغير جو وفسحها هي من بعد موت

امك وهي مش تمام.

واحنا مروحين في القطر كان كل اللي حصل في الكام يوم
اللي فاتو بيتعاد قدام عينيا زي شريط الفيديو، ما حستش بنفسي
غير وانا برمي نفسي من القطر، فكرت ان كل حاجة خلاص
هتخلص، بس فتحت عينيا بعدها ولقيتني لسه في الدنيا بس المرة
دي مش رجلي اللي كانت مكسورة لا ده انا كنت مشلولة، ولدت

علاء وأنا كده، فرحوا أوي لما طلع ولد، ماكنتش طيقاهم ولا رضيت ارضع علاء برضو، نبيل شك فيا انا مريضة نفسية بدأ يعرضني على شيوخ ودكاترة وأنا التزمت الصمت، ماكنش عندي حاجة اقولها، كنت بدعي ربنا ياخذ وديعته لأن خلاص حياتي اتمدمت، كل ما كنت بغمض عيني كان اللي عمله فيا بتعرض قدامي، كنت بقوم من النوم اصرخ وأقول انهم مش ولاد نبيل وارجع انا تاني، نبيل نفسه خاف مني وبقي يبعد العيال عني لما دخل في مرة لقاني بخنق علاء، ماكنش هيصدق لو حكيتله، مافيش عقل ممكن يستوعب ان الاب يبقى حجر ويأذي ابنه في مراته، كل ما كنت بشوف العيال قدامي كنت بتعب وبنفعل، طلبت منه يبعدهم عني بأي طريقة يبعثهم عنده

أو يوديههم لأي حد، كنت بتمنى يموتوا كلهم، بما فيهم نبيل، كان نفسي يبقى سندي بس انا حربي معاه كانت خسرانه، في المرة الأخيرة اللي شوفته فيها كان نبيل مش في البيت والعيال بيلعبوا في الصالة وانا قاعدة على الكرسي اللي نبيل جابهولي، ماحستش بيه غير وايده على رقبتي، شد الكرسي من وسط الصالة ودخلني بيه الاوضة وهو كاتم بوقي وكرر عملته تاني على الكرسي الهزاز، في المرة دي انا قررت انا ماسكتش، استنيت نبيل يرجع من الشغل وكنت هحكيله كل حاجة بس لما اتاخر اتصل على الموبايل وقالي ابويا تعبان وانا هروح ابات عنده النهاردة، غمضت عينيا وعرفت انه لما خرج من هنا قرر يعمل اللعبة دي عشان انا هدوته انا هفضحه فحب يمثل انه تعبان عشان لما احكي لنبيل مايصدقنيش، طلعت من الاوضة على الكرسي، العيال كانوا

نايمين في الصلاة، مافيش حاجة شفعتلي اني افضل عشانهم، طول ما هما قدامي هفضل اتعذب، كنت مقرره اني اموتهم بس في اخر لحظة قررت انتحرا انا ، هما مالهمش ذنب انا اللي غلظت لما سكت على كل اللي حصل ده من الأول بس أوقات الخوف من الفضايح بيعمل كوارث، قربت من جركن الجاز وشربته كله، ومن بعدها الدنيا هديت، أو اتهيألي انها هديت، كنت مفكره اني هرتاح بس ماعرفتش برضو عشان كده خلصت عليه بالبطنيء، عيشته رعب ماتخيلش انه يشوفه، كل ما أتخيل شكله وهو شايفني قدامه بعد ما دفنوني احس بالمتعة، كان بيتمني الموت وبيتحايل عليا اخلص عليه وانا قدمته الموت ببطء، النار كانت ماسكة فيه وأنا واقفة بضحك بهيستريا ، وبقول لنفسي جزء من حقي رجعلي ، بس ما ارتحتش برضو لازم الكل يموت نيرة ، علاء ونبيل، ماينفعش حد يخرج من الحكاية دي على خير عشان كده قررت اجننهم وأولع في البيت وكنت بنفذ ده الصبح بس المرسال الغبي الي انت بعته انقذهم مني.

ماكنتش مستوعب الي بيحصل ، غصب عني فتحت عيني وفضلت اصرخ وأقول كفاية وفي اللحظة دي شوفت نار ماليه الاوضة ومحوطاني النار كانت بتعلي واللاوضة مافيهاش حد غيري ، صرخت كتير لحد ما حسيت ان زوري اتجرح ومابقتش قادر اخذ نفسي ولا اقاوم الحرارة، وقعت على الأرض وشوفت النار وهي بتمسك في جسمي الي كان بيتنفض ، دموعي كانت نازلة بتحرقني، وشريط ذكرياتي بيتعاد قدامي، اليوم الي شيلت فيه نيرة علي ايديا، أول مرة سمعتها بتقول بابا واليوم الي عرفت فيه اني

بقيت أبو الولد، وأول هدية جبتها له لما حفظ الفاتحة، ما كنتش قادر استوعب ان كل حياتي تبقى كدبة واللي كدبها عليا اقرب حد ليا في الدنيا، كنت حاسس اني داخ والدنيا بتلف بيا وفجأة سمعت صوت الشيخ وهو بيقرأ قرآن، فتحت عيني وقومت بصيت حواليا، شوفتها قاعده قدامي هجمت عليها وحاولت أخنقها، ما كنتش قادر اتحكم في نفسي، في حاجة كانت مسيطرة عليا وبتحركني، فضلت أضرب فيها أشمتها بألفاظ قدرة عمري ما تخيلت اني أقولها لكن فجأة حسيت ان في نار بتطلع من دماغي وبدأ شكلها يتغير، حسيت ان عيني مزغله فغمضتها وفتحتها واتصدمت لما لقيت نفسي بخنق الشيخ وكنت بضربة، بعدت عنه بسرعة ومسكت دماغي بايديا وفضلت أخبطها في الحيطه اللي ورايا، حسيت بايد بتتحط عل كتفي وسمعت بعدها صوت الشيخ وهو بيقول بضعف:

-اهدى يا نبيل أنت مؤمن ماينفعش تعمل كده.

عيطت دي أول مرة احس فيها اني عيل، ومش عارف يتصرف، كنت حاسس اني باخد نفسي بالعافية وأنا بقولة:

-مش قادر ولا عارف استوعب كل اللي حصل، دماغي

مش مجمعة ان ده كله حصل وانا مش دريان.

-طيب قولي يا ابني وجاوب عليا بصراحة لو نوال كانت

جت حكتهك اللي حصل من الأول كنت هتصدقها؟

-لا ماكنتش هعرف اصدقها.

-ولو قبل ما تنتحر كانت حكتهك وروحت حللت للعيال

وطلع كلامها صح كنت هتعرف تعيش معاها؟

-برضولا، في كل الحالات ما حدش ينفع يطلع عايش من الحكاية دي.

-استهدى بالله، العيال ما لهمش ذنب في كل اللي جرى.
-العيال! عيال مين؟ ودول يبقوا عيالي ولا عياله؟ أنا دماغى ما حدش مستحمل.

-انا ما قدرش افتيك في حاجة زي دي يا نبيل، بس هما ما لهمش ذنب.

-ولا انا ليا ذنب في كل اللي حصل ده.

سيبتهم وخرجت من بيت الشيخ، ما كنتش عارف أروح فين؟ فضلت ماشي في الشوارع تايه لحد ما لقيت رجلي وخداني للبيت، طلعت وأنا دمي بيغلي، فتحت الباب ودخلت ماسيبتش حاجة فيها على حالها، كسرت كل حاجة ووقفت قدام الكرسي الهزاز وشوفته بيتحرك قدام عيني، فضلت اكسر فيه لحد ما دغدغته وقعدت على الأرض أعيط زي العيال الصغيرة وأنا بقول:
-لو ده اختبار منك ف أنا مش قده يا رب، مش قده انت سامعني!

غمضت عيني وفردت جسمي على الأرضية بتاعت الاوضة، كل حاجة كانت مكسرة حتى نفسي، أول مرة أحس اني مهزوز وضعيف، كنت بحاول افكر في اللي جاي وأخرج من الدائرة اللي اتحطيت فيها بس مانجحتش وماعرفتش، استسلمت وشوفت امي قاعدة جنبي وبترفع راسي من على الأرض وحطيتها على رجليها، مشت ايدها في شعري وطبطبت عليا وقالتلى:
-ريح دماغك من التفكير.

-مش عارف يا أمي، كلهم خدعوني وكذبوا عليا، أنا ما
أدّش حد، هو الانسان ممكن يتعمد يأذي حد بيحبه يا أمي؟
-الانسان ما بيأدّيش غير اللي بيحبه يا ضنايا.
-مشيتي ليه وسيبتيني؟
-لكل أجل كتاب يا نبيل.
-مش عارف أعمل ايه؟
-اعمل اللي يرضى ربنا يا ابني.
-اللي يرضي ربنا مش هيريجني ولا هيشفي الوجع اللي
حاسس بيه.

-كل اللي أذاك هيتأذي الدنيا دي كاس ودابير.
فجأة صوتها تخن واتغير فرفعت عيني وبصيتها برعب،
كانت نوال قاعدة قدامي قالتلي بلهجة كلها غضب:
-انت هتنفذ اللي أنا هقول عليه.
هزيت راسي وأنا بفكر ههرب منها ازاى لكنها قالتلي:
-فاهم ولا مش فاهم؟
-فاهم حاضر، فاهم.

فضلت واقف مكاني كذا ثانية وبعد كده جريت على
الباب وسيبت كل حاجة في الشقة، نزلت وقفت في الشارع
وبصيت على البيت من تحت بس فجأة في ايد اتحطت على كتفي
فاتنفضت من مكاني وصرخت في قلب الشارع بفرع، لكن أحمد
قال:

-اهدي يا أستاذ نبيل ده أنا.
-خضتني، عاوز ايه؟

-بصراحة انا لما روحت البيت لقيت العيال بيسألوا عليك
فقولتلهم انهم هيفضلوا عندي كام يوم عشان انت مسافر، خليههم
لحد ما تهدي وتشوف هتعمل معاها ايه، ولو مش عاوزهم
سيبهم وانا اربيهم.

-تعالى معايا عشان اجيب العيال.

-سيبهم بس يومين لحد ما تهدي.

-مش هسيب عيالي عند حد هما مالهمش غيري في الدنيا
دي أصلا مش هبقى انا والزمن الأسود ده عليهم.

-طيب براحتك ربنا يهديلكم الحال.

خدت العيال منه وابتسمتلهم وحاولت ابين ان كل حاجة

تمام، علاء مسك ايدي ووالي:

-بابا عاوز اكل جيلاتي.

-وأنا كمان يا بابا.

-طيب تعالوا نروح نجيب جيلاتي.

خدتهم واتعشينا بره سندوتشات فول وفلافل وجبتلهم
جيلاتي، كل ما كنت ببصلهم بفتكر كلامها ويرن في دماغى كل اللي
حصل، الوقت اتأخر والدنيا ليلت، الساعة كانت تقريبا داخله
على واحدة بعد نص الليل، واحنا مروحين قولتلهم:

-تعالوا نروح نقرا الفاتحة لأبوياء ولأمكم.

الفرحة اللي كانت في عين نيرة وهي بتقولي بجد يا بابا

كانت قتلاي لكى ابتسمت وقولتلها:

-آه يا حبيبتى بجد.

-أنا مش فاكر جده يا بابا خالص.

-مات وانت لسه صغير.
-هو كان شبهك يا بابا ويحبك زي ما بتحبنا؟
-لما تروحله ابقى اسأله.
-هو هيرد عليا يعني؟ مش انت قولت الميتين مش
بيتكلموا.

-ان شاء الله هو هيتكلم معاكم ماتخافش.
وصلنا المقابر وقفت قدام قبر ابويا وقولت للعيال تعالوا
اقروا يا لاد الفاتحة.

كنت ماشي في الشارع عادي الفجر ماكنش لسه أذن،
دخلت الحارة بتاعتنا، كان احمد قاعد على عتبة القهوة اللي لسه
فاتحه، قرب مني وقال:

-أستاذ نبيل هما العيال فين؟
-وانت مالك؟

-يعني ايه وانا مالي؟ أنت عملت في العيال ايه؟
-عيالي اعمل فيهم اللي عاوزة مالكش فيه فاهم.
سيبته وطلعت قعدت على الأرض في الشقة، فضلت
اعيط ، مش عارف عدى عليا وقت قد ايه وانا قاعد كده بس
سمعت صوت خبط جامد على باب الشقة، قومت وانا بطوح
فتحت الباب، كان الشيخ وأحمد واقفين، بصيتلهم من فوق
لتلحت وقولتلهم:

-عايزين ايه خير ولو ان وشكم ده مايجيش من وراه أي

خير.

-فين العيال يا نبيل يا ابني؟
-عيال مين؟ أنت مين؟
-أنا الشيخ يا نبيل؟
-انا ماعنديش عيال يا شيخ، العيال اللي كانوا عايشين
معايا دول مش عيالي دول ماتوا ودفنتهم.
-قتلت عيالك يا نبيل.
-يووووووه ما قولت مش عيالي.
أحمد زقني ووقعني على الأرض وفضل يضرب فيا وهو
بيزعق وبيقول:
-انت شيطان زيك زي ابوك، وديت العيال فين حرام
عليك؟
صوته كان عالي وأنا كنت بزعق قصده، الناس اتلمت
علينا، الشيخ حاول يسلكني من تحت ايده وبأعجوبه نفدت منه
ووقفت وانا بنهج ووشي بينزف وقولتله:
-دفنتهم معاه.
-موتهم؟ هانوا عليك؟
-لا دفنتهم وهما حايين.
الناس اتكاثروا عليا وكتفوني والشيخ وأحمد سابونا وراحوا
المقابر وبعد شوية البوليس جه وخدني عشان يحقق معايا لأن
الشيخ وأحمد لما راحوا لقوهم ماتوا فعلا فبلغوا عني وجيت هنا.
-يعني انت مش بتنكر انك قتلت عيالك مع سبق الإصرار
والترصد!

-دول مش عيالي ، مش عيالي، مش عيالي، تقدرنا تسألوا
الشيخ وأحمد عن اللي نوال اعترفت بيه وقالته لما حضروا القرين
بتاعها.

-بس الشيخ وأحمد أنكروا اللي أنت بتقوله ده وقالوا انك
قتلت ولداك بعد ما اتأثرت نفسيا بموت مراتك.
-ماحصلش هما بيكذبوا.

-هيكذبوا ليه يا نبيل؟ عندهم سبب عشان يكذبوا!
-الشيخ قالي قبل كده انه عمره ما هيفضح ستر واحدة
سترت نفسها وربنا تم ستره عليها مش هيخلي الناس تنهش في
سيرتها.

-انت مصدق اللي بتقوله ده يا نبيل؟ تقرير الطب الشرعي
بتاعك أثبت انك سليم ومش بتعاني من أي اضطراب نفسي،
عارف ده معناه ايه؟

-مش هيبقى معناه أسوأ من اللي أنا فيه دلوقتي.

-ما عندكش كلام تاني عاوز تقوله يا نبيل؟

-لا يا سيادة القاضي.

-الحكم بعد المداولة.

كنت عارف ان نهايتها واحدة، كلها هتبقى موت، ما حدش
هينفع يخرج من الحكاية دي حي، بعد شوية دخل القاضي وقال
انهم حكموا عليا بالاعدام، بصيت حواليا للناس اللي كانت بتهلل
وفرحانة وهي بتقول يحيى العدل، الناس دي لا تعرفني ولا تعرف
نوال، ايه اللي عملته عشان يفرحوا في اعدامي كده.

بت مباشر

كنت لسه راجع من الشغل، دخلت يادوب غيرت هدومي وخذت دُش دافي، وبعدها طلعت وقفت في المطبخ عشان أعمل لنفسي أي حاجة أكلها، كنت واقع من الجوع ومش قادر أصلب طولي، في نفس الوقت موبايلي كان بيرن في الأوضة، كنت سامع صوته بس مكسل، قولت لما آكل هبقى أدخل الأوضة مرة واحدة، عشان أشوف مين بيرن عليا وأريح شوية أصل الدنيا مش هتطير يعني، سخنت الأكل اللي كان في التلاجة بقالة كام يوم وقعدت آكل في المطبخ، لما خلصت نضفت المطبخ، وبصيت حواليا برضا وطفيت النور ودخلت أوضتي، أنا عايش في الشقة دي لوحدي بعد موت أبويا وأمي، ماليش غير جدي اللي عايش في محافظة تانية؛ وده ماشفتوش من سنين كتيرة وماعرفش عنه حاجة، قعدت على حطرف السرير وطلعت الموبايل من جيب الجاكيث وأول ما مسكته رن تاني، ركزت مع الرقم وحاولت أفتكر لو شوفته قبل كده لأنه مش متسجل عندي، استنيت لما خلص الرنة ودخلت بحثت عنه في التروكولر ولقيته محفوظ باسم الحاج حسن، استغربت وقولت لو رن تاني هبقى أرد وقبل ما أحط الموبايل على الكوميدينو اللي جنب السرير رن وهو لسه في ايدي فرديت عليه...

-مين معايا؟

-أنت حازم السيد؟
-أيوه، مين حضرتك؟
-أنا الحاج حسن، اللي في الشقة اللي جنب الحاج
اسماعيل جدك.
-اه خير في حاجة؟
-للأسف يا ابني أنا متصل ببيك عشان أبلغك أن جدك في
العناية والدكاترة بيقولوا ان أيامه معدودة.
-الكلام ده حصل امتي؟
-بقاله كام أسبوع على الحال ده وما فيش تحسن خالص.
-طيب حضرتك ما بلغتنيش ليه قبل كده؟
-كان رافض انه يقلقك، بس النهاردة تعب خالص وطلب
مني أقولك انه محتاج يشوفك، يا رب تلحق تشوفه يا ابني.
-طيب أنا جاي البلد حالا مش هستني للصبح، خليك
جنبه أرجوك لحد ما أوصل.
-حاضر يا ابني.

قومت حضرت شنطتي بسرعة، ماكنتش شايف قدامي ولا
عارف أنا بحط فيها ايه؟ وخذت نفسي ونزلت جري على موقف
الميكروباصات، وهناك اتصدمت ان الميكروباص عشان يحمل
في الوقت ده قدامه بتاع ٣ ساعات، وده وقت كبير جدا ده أنا
ممکن أكون وصلت قبل ما يحمل، ماكنش قدامي غير اني اشيل
أجرة الركاب اللي ناقصين عشان ننجز ويطلع وألحق جدي، طول
الطريق كنت بدعي ربنا انه مايورنيش فيه حاجة وحشة، اه احنا
مش بنتفاهم وبنشد مع بعض لو اتجمعنا، بس أنا كنت مطمئن ان

حسه في الدنيا هيقف في ضهري قصاد أي حاجة، أول ما
الميكروباص وصل البلد رميت الفلو للسواق ونزلت جري نطيت
في التاكسي الي كان واقف وقولتله...

-المستشفى العام بسرعة يا اسطا.

-الاجرة خمسين.

-الي أنت عاوزه هديهولك بس انجز الله يباركك.

كنت عارف ومتأكد انه بيستغلني، الأجرة يوم ما يضر بها
الدم وترفع مش هتزيد عن عشرين جنية بس مش مشكلة أهم
حاجة عندي ابي أوصل، وصلت المستشفى وسألت على جدي
فقالولي انه في العناية وان وقت الزيارة خلصت، كنت بلف
حوالين نفسي ومش عارف أعمل ايه لحد ما موبيلي رن ولقيته
الحاج حسن فرديت عليه وقولتله...

-أنا تحت في الاستقبال، بس هما بيقولوا ان مواعيد

الزيارة خلصت مش عارف أعمل ايه.

-شد حيلك يا ابني البقاء لله.

بعدت الموبايل عني وبصيتله بصدمة وقولتله بصوت

عالي...

-لا قوله حازم تحت، عرفه ابي جيت ماتخليهوش يمشي.

فجأة، الخط فصل، كنت بعيط زي العيل الصغير ومش

مستوعب كمية الاختبارات الي الدنيا عماله تحطني فيها، حسيت
بكف ايد بيتحط على كتفي، لفيت وبصيت لقيت راجل شكله
عادي واقف قدامي وباين انه حابس الدموع في عينيه الي كان
لونها أحمر، طبطب على كتفي وهز راسه وقاللي...

-أنا الحاج حسن جار جدك الله يرحمه.
ماحتش بنفسي غير وهو بيسندي ويقوللي...
-شد حيلك أو مال مش كده.

ماكنتش عارف الدنيا ماشية حواليا ازاى؟ بس هو خدني
معاه العناية وطلب منهم يخلوني أشوفه للمرة الأخيرة قبل ما
يغسلوه ويكفنوه، كنت واقف قدامه ومش مصدق انه خلاص
مات ومش هشوفه تاني، الموت أصعب اختبارات الدنيا وجعه
شديد أو وبيكسر، غمضت عيني وبوسته من راسه وخرجت وقفت
تحت عند باب المستشفى لحد ما الحاج حسن طلب مني أدخل
أخلص شوية ورق، كنت سامع الجوامع وهي بتذيع خبر موته
ويقولوا الدفنة عقب صلاة العصر، طلعتنا بيه من المستشفى على
المسجد وصلينا عليه ودفناه في المقابر، الناس بدأت تمشي واحد
ورا الثاني لحد ما لقيت نفسي واقف بطولي قدام قبره مافيش حد
جنبي غير عم حسن اللي بصلي وقاللي...

-شد حيلك، آخر فترة كان بيتكلم عنك كثير وكان ناوي أما
يطلع من المستشفى يسافرك يقعد عنك، كان نفسه يحس
بالونس وتاخذ بحسه.

-أنا قصرت في حقه أوي، هبص في وشه ازاى في الآخرة،
هحط دماغه على مخدة وأنام ازاى وأنا عارف انه ميت وهو
زعلان وشايل مني.

-مسامحك، لما قولتلي انك جاي دخلتله وقولتله حازم
جاي، رغم انه كان في غيبوبة ابتسم وكان حاسس باللي بيجراله
وقبل ما يموت بدقايق فتح عينة وطلب مني اقعهه وفضل

يوصيني عليك ، ماعرفش انه كان بيودعني، وصاني عليك كثير
وقالي ماسيبكش وأفضل في شهرك.
اتفتحت في العياط وقعدت على الارض وصرخت بصوت
عالي.

-اهدى يا ابني ووجد الله، ماتعمل في نفسك كده، كلنا
أموات ولاد أموات بس لسه ما تعلنش عننا.
-أنا قلبي واجعني أوي.
-قوم يا ابني روح معايا.
-أروح فين بس؟ الشقة عمر ما هيبقى ليها معنى من غيره.
-بس هو موصي انك تفتح الشقة وتقعدها فيها
وماتقفلهاش.

-هقعدها ازاى فيها وهو مش موجود؟
-دي وصيته يا ابني، تعالى بس ارتاح وربك عليه الحل.
قومت روحت معاه، وقفت قدام باب الشقة، الحاج
حسن طلع المفتاح من جيبه وناولهولي وقالي...
-شوف عايز تقعد هنا ولا تيجي تقعد عندي، كده مده أنا
وحداني وماليش حد بس مش عاوز أبقي رخم وأجبرك على حاجة،
بصيتله بحزن ولوهلة حسيت ان جدي اللي واقف قدامي فقربت
منه وبوست راسه وقولتله...
-ماعلش أنا محتاج أقعد لوحدي شوية، عاوز أعيط
وأطلع الحزن اللي جوايا.
-براحتك، فأى وقت لو احتاجت حاجة خبط عليا، شقتي
جنب الشقة بتاعتكم على طول.

-الله يكرمك يا عم حسن.
-هشوفلك لُقمة عندي تصلب بيها طولك، أنت بقالك
كثير واقف على رجلك وجاي من سفر أكيد محتاج تاكل وترتاح.
-ماليش نفس ماتتعبش نفسك، كلت أول ما رجعت من
الشغل، قبل ما تقولي ان جدي تعبان ومحجوز في العناية.
-خلاص ادخل ارتاح يا ابني وربنا يلطف بيك ويعينك على
مصيبتك.

خدت المفتاح وحطيته في الباب وفتحته، ولما دخلت
شغلت النور وقفلت باب الشقة ورايا، كنت واقف محتار
مشاعري متلخبطة، آخر مرة تقريبا كنت فيها في الشقة دي؛ من
ست سنين لما جيت أدفن أبويا وأمي، اتخانقت مع جدي يومها
وصممت أبات على السلالم، وساعتها أول ما النهار طلع رجعت
بيتنا وما بقتش أرد عليه لحد ما اتصالحنا في مرة وأنا بزور قبر أبويا
وأمي في العيد، لو كنت أعرف انه هيمشي ويسيبني كنت تبت فيه
بايديا وسناني، وقضيت الايام كلها معاه ورميت الشغل وراضهري،
أنا ما خدتش من الشغل غير الوحدة والانعزال عن كل حاجة
بحبها، بقالي تلت سنين شغال مندوب مبيعات، ما عملتش حاجة
لنفسي غير اني يادوب بكفي طلباتي ولو حوشت بطلوع الروح
قرشين كده على جنب؛ بتيجي الدنيا تسحلني وتاخدهم، زي ما
حصل معايا كده في الميكروباص اللي جيت فيه.. بصيت للصالة
وأنا حاسس ان مش مصدق اني مش هلاقيه جوه في الأوض، رجليا
خدتني لأوضته ولقيت نفسي بدور كالون الباب ودخل أقوله...
-وحشتني يا حج اسماعيل.

بس الأوضة كانت فاضية، قربت من السرير ودفنت وشي فيه وفضلت أعيط، مش عارف أنا نمت امتي؟ بس صحيت على صوت الجرس وهو بيرن وكنت حاسس ان جسمي كله مكسروصلت للباب وفتحته لقيت عم حسن واقف قدامي، ابتسملي بهدوء وقاللي...

-صباح الخير يا حازم يا ابني، آسف لو أزعجتك بس ماسمعتلكش صوت من أول ما دخلت فقلقت عليك وماعرفتش أمنع نفسي من اني آجي أطمئن عليك.

-ولا يهملك يا عم حسن أنا بس امبارح نمت على نفسي في أوضة جدي وأنا قاعد على سريره وفوقت على صوت الجرس.

-طيب اذا كان كده بقي هحضر لقمة ونفطر سوا.

-مالوش لزوم والله ماليش نفس أصلا لأي أكل.

-بس اسكت ادخل خدلك دوش كده وفوق على ما أحضر

الفتار ، ده اسماعيل كان بيجي يفطر معايا كل يوم من حلاوة أكلي.

-الله يرحمه.

-أمين يا رب، يلا اسمع الكلام وماتقطعش في قلبي.

-حاضر يا عم حسن.

قفلت الباب وبصيت حواليا بحزن وخذت الشنطة

بتاعتي دخلت بيها أوضة جدي، حطيتها على السرير وفتحتها وطلعت تيشرت وبنطلون وخذته ودخلت الحمام، لما خلصت وقفت قدام التسريجه أدور على مشط أسرح بيه شعري، حسيت بحركة غريبة ورايا، ماكنش باين حاجة في المرآة، بس لما لفيت

وبصيت لقيت هدومي كلها متنوره على السرير، استغربت لأني ماطلعتش الهدوم من الشنطة أصلا ومافيش حد معايا في الشقة عشان يعمل كده، ماالقتش تفسير للي بيحصل بس فجأة باب الشقة خبط، كنت بفتحها وكلي ثقة ان عم حسن جايب الفطار وجاي.. بس ماالقتش حد قدام الباب، بصيت على باب عم حسن واستغربت ومرة واحدة الباب بتاعه اتفتح ولقيته شايل صينية الفطار وطالعجاي عندي، ابتسمته وقولته...

-عنك يا عم حسن.

دخلنا الشقة وفطرنا سوا وفضلنا ندرش لحد ما قالي...

-ما تقوم تعملنا كوبايتين شاي.

-حاضر عينيا ليك.

عملت الشاي ورجعت قعدت معاه كان كل كلامي عن جدي وصحوبيتهم ووقتهم اللي كانوا بيقضوه سوا، سكت مرة واحدة وقالي...

-ناوي تمشي امتي؟

-مش عارف؟

-مش عارف ازاى هو انت مش وراك شغل؟

-شغلي مش بمواعيد ده بتارجيت بحققه وكده.

-مش فاهم يا ابني والله حاجة من كلامك؟

-شغال مندوب مبيعات في شركة مكياج، بلف بعينات

من منتجاتها على الناس اللي مهتمة بالموضة والجمال وكده.

-ودي شغلانة بتكسب؟

-لا طبعا، بس اهي أحسن من قعدة البيت.

- طيب واللي يجبلك شغل أحسن منه؟
-ايدي على كتفك، هو أنا هكره يعني!
-ماشي، في مشروع أنا وجدك كنا بنحضرله والافتتاح كان قريب، بس تقول ايه بقى أجل ربنا نفذ قبل ما نفتحه.
-وبعدين ؟
-انت هتدخل معايا باللي كان جدك دافعه.
-بس أنا مش عارف ايه المشروع أصلا، مش يمكن ماعرفش اشتغل فيه؟
-مش لازم جرب واتعلم واهو ملكك ومالك، وبعدين مش هعرف اديك فلوس جدك دلوقتي لاني حطيت كل اللي حيلتي في المشروع، لما الدنيا تمشي ابقني خد فلوس جدك من نصيبي في ارباح المشروع.
-طيب فهمني المشروع ده عبارة عن ايه؟
-لا احنا هننزل تشوف بعينك المكان مش بعيد ده خطوتين من هنا.
نزلت معاه فعلا عشان أشوف المشروع اللي جدي وهو كانوا هيعملوه، وقفنا قدام مخزن تقريبا وأول ما فتح بابه اكتشفت امه محل من جوه، كان لسه متشطب ونضيف ومتقسم رفوف، بصيت لعم حسن وقولتله...
-مش فاهم برضو والله ايه اللي هيتعمل هنا؟
-تركيبيات.
-تركيبيات ايه؟ مش فاهم!
-عطور وتركيبيات.

الـ١١١١، بس أنا حقيقي ماعرفش حاجة في الموضوع ده

خالص.

-ولا أنا يا ابني، بس جدك هو اللي صمم وقال هنتعلم،
احنا حطينا كل فلوسنا فيه حتي شققنا مرهونة على المشروع ده
فلازم ينجح والا هتري في الشارع، انت مش هيهمك عشان ليك
مكان تاني، لكن انا ماقداميش مكان غيرها.

-خلاص هنكمل المشروع ده وأمرنا لله، كلمتوا ناس

واتفقتوا معاهم يجيوا يشتغلوا ولا لسه هندور؟

-كل حاجة جاهزة حتي الياطرة تعب جدك هو اللي أجل

الافتتاح.

-طيب يومين تلاته كده ونفتح المشروع ان شاء الله.

ان شاء الله.

طلعنا وقفنا قدام المحل وبدأ يعرفني على المحلات اللي

حوالينا، شاوري علي العمارة اللي فيها الشقق بتاعتها وقال...
-مممكن تتابع العمال من الشباك وتشوفهم.

رفعت راسي وبصيت على الشباك بتمعن، ماعرفش ليه

قلبي كان مقبوض وحسيت ان في حد ولقف ورا الستارة، طردت

الفكرة من دماغي وركزت مع كلام عم حسن اللي عمل كام مكالمة

واحنا واقفين واتفق مع الناس علي ان المحل يتفتح على الساكت

عشان جدي ولما خلصنا كل واحد طلع شقته، بعد شوية نزلت

دورت على اقرب سوبر ماركت جبت منه شوية جبن وعيش

وحطيتهم في التلاجة وقررت اسافر تاني يوم الصبح أدفع الايجار

وأسلم الشقة اللي كنت قاعد فيها وأنقل حاجتي هنا، في الليلة دي

ماسمعتش صوت عم حسن خالص، دخلت نمت في أوضة جدي وكنت حاسس انه معايا، كل ما كنت بفتح عينيما كنت بسمع صوت واحد بيتكلم بس جسمي كان بيبقي ثقيل مش قادر يتحرك خالص، صحيت الصبح وأنا حاسس اني مضايق من غير سبب، لبست هدومي وخبطت على عم حسن وقولتله اني مسافر القاهرة، وشه اتخطف ووقف ساكت وبعدين قالي...

-ليه يا ابني هو احنا مش اتكلمنا امبارح؟
-لا أنا هروح أخلي الشقة وأجيب حاجتي المهمة أنقلها

هنا.

-طيب خلاص الله يوفقك وما تتأخرش.
سلمت عليه ونزلت من البيت على الموقف وأول ما وصلت القاهرة طلعت على الشركة اللي شغال فيها، قدمت استقالي وخذت فلوسي اللي فاضلة ورجعت البيت لميت حاجتي وحاجة أمي اللي فاضلة وخذت عربية مخصوص عشان أنقل الحاجة وقبل ما امشي سلمت الشقة لصاحبها واداني قرشين، وصلت البلد الساعة ١١ بالليل، طلعت الحاجة وركنتها قدام الباب، اتمرمتت وطلع روحي ومع آخر كرتونة كنت بطلعها لقيت عم حسن بيفتح باب الشقة وبصلي وقال...

-مالك يا ابني خير؟

-مافيش كنت بجيب الحاجة وسلمت الشقة.
-هو أنا مش لسه مخبط عليك من ساعتين
وقولتليماروحتش وهنزل بكره!

-أنا؟ ايه يا عم حسن؟ أنا معدي عليك الصبح وقايلك
مسافر القاهرة وأديني لسه واصل قدامك مادخلتش الشقة حتى!
-والله يا ابني من ساعتين سمعت خبط في الشقة،
فخبطت عليك عشان أشوف مالك؟ فتحتلي وسألتك عملت ايه
وروح القاهرة ولا لا فقولتلي بكرة وقفلت الباب في وشي حتى
أنا استغربت من معاملتك دي!
-مش أنا والله لسه راجع.

بصينا لبعض بخوف وفجأة سمعنا صوت غريب في
الشقة كأن حد بيعيط، حسيت ساعتها ان جسي بيتنفض،
ماكنتش قادر أقف على رجليا من الخوف، رجعت ذا خطوة لوره
لمالمحت ضل بيتحرك جوه الشقة من ورا الازاز بتاع الباب،
بلعت ريقى بصعوبة وشوفت عم حسن وهو واقف جنبي ومرافع
ايده وبيشاور بيعل على الباب وبيقولي...

-هو في حد من صحابك جوه ولا ده حرامي؟
-مش عاوز أصدملك.

-ايه يا ابني؟

-أنا قافل الشقة بالمفتاح قبل ما امشي.

-يعني ايه؟

-مش عارف بس أنا مرعوب ومستحيل أبات في الشقة

دي.

-طيب تعالى عندي لحد ما نشوف صرفة الصبح.
دخلت معاه شفته، كنت مرعوب وبتنفض وهو كان
سرحان قعدت على الكنبه و سرحت في الهدوم اللي طلعت من

الشنطة والصوت اللي سمعته وحكيت لعم حسن عن كل اللي
حصلي فقالي...

-بكره نشوف حد من اللي بيختموا يجي يقرأ فيها.

-مش فاهم؟

-هنشوف حد يقرأ فيها قرآن لو فيها حاجة هتمشي.

-اه ماشي تمام، مافيش مشكلة.

دخل عم حسن عشان ينام وفضلت أنا قاعد في الصالة،
كنت سامع صوت جدي وهو بينادي، كذا مرة أفوق وأنا واقف
قدام الباب، في آخر مرة ما حستش بنفسي الا وأنا بحط المفتاح
في كالون الباب ، بس قبل ما ادوره في ايد اتحط على كتفي
وسمعت صوت جاي من ورايا بيقولي...

-رايح فين يا حازم؟

لفيت ورايا وفضلت مبرق ومش عارف أجمع كلمتين على

بعض

-ايه اللي مدخلك الشقة في الوقت ده مش قولنا بكره

هنشوف حد يقرأ فيها؟

-كنت سامع صوت جدي بينادي عليا.

-جدك مات يا ابني فوق.

فجأة مد ايده على كالون الباب وسحب المفتاح وقالي...

-ادخل قدامي يا ابني الله يباركك.

دخلنا الشقة وطلب مني أبات معاه في الأوضة، فضلت

طول الليل صاحي مش عارف أنام على الساعة عشرة قام حد

الفطار ونادى عليا عشان آكل، حاولت أتصرف بطبيعتي بس ماقدرتش كنت خايف، بصلي وحت وشه في الطبق وقالي...
-هبعث حد يجيبلنا شيخ يشوف الشقة ماتقلقش يلاكل

حاولت آكل على قد نفسي وبعد ما خلصنا مسك تليفونه واتصل على واحد اسمه سيد وقاله...
-ازيك يا واد يا سيد كنت عاوزك تجييلي شيخ يعملنا ختمة في شقك الحاج اسماعيل على روحه يعيني وكده، بس عايز حد كويس ومتدين، ماشي خلاص شوفه ولو كده هاته..
فضل يهز راسه ويقول...

-ممام اه ماشي خلاص عرفته هاته ، طيب خلاص سلام.
قفل التليفون وبصلي وقالي...
-سيد ده صبي القهوة اللي في آخر الشارع واد جن، جاب الخلاصة هيجيلنا الشيخ محمود هو كان قريب من جدك وراجل طيب وفي حاله.

-أهم حاجة نعرف ايه اللي في الشقة.
-ان شاء الله خير، كنا كل شوية نسمع صوت خبط على الحيطه المشتركة اللي بين الشقتين ونبص لبعض ونسكت، ماחדش فينا كان قادر يكذب التانيلحد ما سمعنا جرس الباب وهو بيرن عم حسن كان قايم يفتح، لكني شاورتله يفضل مكانه وقومت فتحت أنا، كان في ولد بتاع ١٧ سنة ومعاه شيخ فابتسمت بهدوء وقولتله...

-أنت الشيخ محمود صح؟

-أيوه يا ابني أنت مين؟
-حازم حفيد الحاج اسماعيل الله يرحمه.
-الله يرحمه ياما كان بيتكلم عنك، اومال حسن فين؟
-مستي حضرتك جوه اتفضل.
سيد استأذن وقال...
-ماعلش يا أستاذ انا هخلع عشان القهوة لوحده.
هزيت راسي ودخلت الشيخ محمود وقفلت الباب ، عم
حسن رحب بيه وقعدوا واتكلموا وعملنا شاي وشربناه وسألنا ليه
مش قاعدين في شقة اسماعيل، بصيت أنا وعم حسن لبعض
وماكانش عارفين نبدأ منين؟ فضلنا ساكتين شوية وبعدين حكيتله
كل اللي حصل من يوم ما جيت ولما سكت عم حسن كمل باللي
شافه، ساعتها الشيخ محمود بصلنا وقال...
-هو الحاج اسماعيل كان عليه دين قبل ما يموت؟
عم حسن قال...
-لا خالص ، اسماعيل كل أسرارہ معايا لو في حاجة زي دي
كان عرفني.
-طيب عموما أنا محتاج أشوف الشقة وبعد كده نقعد
نتكلم في اللي فيها.
بصلي وقال...
-ماتخافش، شكك بيقول انك مهزوز.
-أنا بخاف من ضلي والله.
-خليك جدع زي جدك ماكنش بيخاف من حاجة غير
ربنا، يلا حد يفتحلي الشقة.

قومت أنا وعم حسن معاه وخذ مني المفتاح فتح الباب
وقال...

-بسم الله الحافظ المنان، السلام على أهل الدار.
دخل برجله اليمين وفضل يقول قرآن طول ما هو ماشي
فيها، لف الشقة كلها واحنا واقفين جنب الباب ولما خلص قعد
على الكنبه وقال...

-اقفلوا الباب وتعالوا انتوا خايفين كده ليه؟ مافيش
حاجة في البيت، اللي هنا كله خير.

بصيت لعم حسن وبلعت ريقى وهو بيقفل الباب
وسحبني من ايدي وقالى...

-تعالى اقعد مدام الشيخ محمود قالأمان يبقى مافيش
حاجة.

-طيب واللي احنا شوفناه؟ هنكذب عينينا يعني وودانا.
-اقعد يا ابني وهفهمك.

قعدت وبصيتله، كنت مستنيه يتكلم لكن هو سكت
شوية وبعدين ابتسم وقال...

-المكان اللي مابيتذكرش اسم الله فيه بيحبهم وجدك
بقاله فترة تعبان ومش في البيت عشان كده هما كانوا هنا.
-هما مين؟

-مش هيفيدك تعرف هما مين؟ البيت دلوقتي نضيف
ومافيهوش أي حاجة تضرك وعشان تكون مطمئن شغل الكاسيت
اللي هناك ده على اذاعة القرآن الكريم على خلي ذكر الله يحفظك.

-يعني حضرتك متأكد اني مش هشوف ولا هسمع
حاجة؟

-أنا لفيت البيت كله ما فيهوش حاجة يا ابني.

-ماشي يا شيخ ربنا يجازيك خير.

-روحوا اتوضوا وتعالوا نقرأ سورة يس

قومت أنا وعم حسن اتوضينا وقرينا مع الشيخ محمود
سورة يس، لما خلصنا قعد يدعي لجدي واحنا نأمن وراه، وبعدها
استأذن ومشي، بصراحة كنت خايف اقعد لوحدي؛ عشان كده
اتحججت وطلبت من عم حسن يقعد معايا لحد ما أطمئن للشقة
وهو اقتنع، حسيت ان جو الشقة بقى أهدي وطاقتها اتغيرت ،
عدى يوم والثاني والشقة ما حصلش فيها حاجة غريبة ، عم حسن
رجع شقته، في البداية كنت خايف، بس مع صوت القرآن اللي
كان طالع من راديو المسجل قلبي كان مطمئن شوية ومرتاح، كنت
بدخل أنام وسايب باب الاوضة مفتوح؛ عشان صوت القرآن يبقى
واصلني، في الليلة دي أنا صحيت لقيت الاوضة من حواليا ضلمة،
مسكت الموبايل وقومت من على السرير، يا دوب وصلت عند
كوبس الكهرباء وقبل ما ادوس عليه سمعت صوت عياط جاي من
الصالة، كنت حاسس ان قلبي هيقف من الخوف ، بلعت ريقى
بصعوبة، أصلي كنت سايب نور الأوضة شغال، مش عارف هو
انظفي امتى؟ ومين اللي بيعيط بره ده ودخل ازاي؟! كنت واقف
ورا الباب خايف وبترعش صوت العياط بيزيد، بلعت ريقى
بصعوبة وشجعت نفسي ومسكت الأكورة لفيته وواريت الباب
وبصيت بره لقيتالصالة ضلمة، قررت أتسحب لحد ما أوصل

لباب الشقة وأفتحته بهدوء وأهرب ، خرجت من الأوضة فعلا على طرايف صوابي، خايف أتنفس بصوت عالي للي موجود يسمعي، جسمي اتنفض فجأة لما صوت العياط وقف وسمعت حد بيقول...

-أنا اللي عملت في أخويا كده ، أنا السبب، مش عارف أسامح نفسي...

رجع يعيط تاني، لفيت ضهري لباب الشقة ومش عارف أنا ليه احساس الخوف اللي كان جوايا للحظه اتبخر، دورت كثير على الصوت بس ماوصلتش لمصدره، روحت خبطت على عم حسن اللي كان قايم وشكله مخضوض وقال...

-مالك يا ابني فيه ايه؟

-بص أنا مش هتكلم، تعالي معايا.

خد المفتاح وقفل باب شقته ودخل معايا الشقة، وقف

جنبي في الصالة وقال...

-مطفي النور كده ليه؟ ولعه بدل ما حد يتكعبل ويقع

يجراله حاجة.

مسكت ايده وهي على الكوبس وقولتله...

-لا سيبه مطفي وركز مع الصوت.

-صوت ايه يا ابني بس؟ ما فيش حاجة.

شديته تاني لحد ما وقف في نص الصالة وسكت، بلع

ريقه وبصلي وقال...

-هوده صوت مين؟

-مش عارف، بس دورت في الشقة مالقتش حد ولما ولعت النور الصوت اختفى وبقي فيه وش كثير.
-أومال مين اللي بيعيط ده.
-مش عياط بس.
-أومال ايه كمان؟
-سمعته بيقول... أنا اللي عملت في أخويا كده، أنا السبب، مش عارف أسامح نفسي...
-طول عمر جدك قاعد في الشقة ما اشتكاش من حاجة فيها، ايه اللي اتغير عشان يجرا كده؟!
-يمكن ماكنش بصحى بالليل متأخر!
-لا يا حازم الشقة ماكنش فيها حاجة خالص يا ابني.
-طيب عندك تفسي للي بيحصل؟
-لا برضو بس أنت ليه موطي صوت القرآن كده، علي الصوت شوية.
-ماوطيتش حاجة، بشغله قبل ما أنام وبصحى الآقبه واطي كده، مش عارف جدي جايب المسجل الأنتيكة ده منين؟
-ههههه ده حكايته حكاية والله كان واخده تخلص حق من واحد كان عليه دين وعياله ادوله المسجل لما أبوهم مات بدل الفلوس اللي عليه.
-يااااه.
-استني اما اعلي القرآن شوية يمكن صو العياط ده يختفي.

قرب عم حسن من المسجل وحط ايده بالغلط على زرار
قفل منه القرآن وعلى ناحي الكاست اللي بيتحط فيه الشرايط،
صوت العياط ساعتها بقى واضح، رجعت كام خطوة لورا وعم
حسن دور وشه وقالى ...

-شغل النور وتعالى كده.

ولعت نور الصالة وروحت وقفت جنبه وأنا جسمي كله

بيتنفض، شاور على المسجل وقالى...

-الصوت ططالع من جوه سامع؟

-أيوه فعلا، بس ازاي؟

-يمكن في شريط ولا حاجة!

حاولت أفتح باب المسجل بس ماكنش بيتفتح خالص،

شيلت المسجل ورفعته ل فوق وقولت لعم حسن...

-فيه جوه شريط كاسيت بيلف.

-يبقى الصوت ده متسجل عليه.

-وايه اللي بيشغله؟

-حط المسجل في الفيشة وتعالى نسمع الشريط فيه ايه،

يكن نعرف سرك لاللي بيحصل.

-حطيت المسجل على الترابيزة ووصلته بالكهربا وعم

حسن عمل كوبايتين شاي وقعدنا ، شغلنا الشريط اللي في

الكاسيت وبدأنا نسمع، كان حد بيعيط كتير وفجأة قال نفس

الجملة اللي سمعتها قبل كده، بصيت لعم محمود وقولتله...

-أنا مش فاهم حاجة؟

-خلينا بس نكمل للأخر يمكن نفهم اللي بيحصل ده ليه؟

-ماشي.

شغلت الشريط تاني والعياستمر شوية وبعد كام دقيقة

سمعناه يقول...

-سامحني يا محسن يا أخويا والله ما كنت عايز الأمور بينا توصل لكده، كنت جايلك بعدما أقفل الدكانة، سمعت النهاردة ناس في السوق بتقول انك تعبان، قلبي اتخلع لما لقيتهم بيقلوا انك مابقتش دارى بحاجة حواليك وان كل حاجة بتروح من ايدك، حقك عليا يا أخويا والله ما كنت أعرف ان ده كله هيحصلك، تنقطع ايدي قبل ما أذكى، هي قالت ان لما أرسلك العمل وتخطيه مش هتبقى طايق القعدة في البلد وهتاخذ عيالك وتهمل كل حاجة، كنت عاوز أحافظ على فلوس أبونا، مش طمع والله يمكن قلة حيلة مني وخوف انك تباع الارض وتضيع كل حاجة، ضيعتك بايدى يا أخويا، أوعدك لو طلعت من الدكانة على خير هطلع على بيتك وأحكلك اللي عملته وندوروا على حد يفك اللي عملته، مش عاوز حاجة من الدنيا غير انك تكون بخير يا أخويا، السيل شكله جامد أوي يا محسن، ماعرفتشأطلع من الدكانة ومش عارف هطلع ولا لا، عشان كده أنا قررت أعترف على الشريط ده باللي عملته فيك، لو ربنا افتكرني أكيد حد هيسمع الشريط ده سواء من صلبى أو لا بشيل اللي يسمع كلامي ده أمانه انه يسمع هولك، سامحني يا محسن.. سامحني يا أخويا.

التسجيل وقف، بصيت لعم حسن وعيني مليانة بالدموع، كنت باخد نفسي بالعافية، فضلت باصص للمسجل لحد ما قالي...

-بتآمن بالصدف يا حازم؟

-آه يا عم حسن.

-هتعمل ايه بالتسجيل ده؟

-لو أعرف الراجل ده هروحله، يمكن اللي بيحصل في

الشقة ده يخلص.

-صاحب المسجل ده اسمه ابراهيم عبد القوي، اللي

حكيتلك قصته مع جدك، مات من كام شهر، الدكانة بتاعته كانت

على قدها ولما السيول شدت الدكانة بتاعته اللي كان بيسترزق

منها اتهدت فوقه ومات، عياله ماكنش معاهم يدفعوا لجدك اللي

على أبوهم، رغم ان جدك قالهم انه سامح؛ مراته صممت ياخذ

حاجة قصاد الدين ، ساعتها ادوله المسجل بتاعه، وهو خده

وركنه، مافتكرش انه شغله خالص الا قبل ما يتعب بيومين تقريبا

أو يوم.

-تفتكر جدي شاف حاجة وتعب بسببها؟

-مش عارف يا ابني والله.

-بس اللي يؤكد كلام ابراهيم اللي على الشريط ده؛ ان

أخوه محسن تعبان هو وعياله الجوز، محسن ده كان يمشي على

الأرض ماحدث يجرأ يبصله، بس فجأة حالة اتبدل والدنيا جت

عليه جامد.

-طيب أنت شايف ايه؟

-احنا ناخذ المسجل ده ونروح للشيخ محمود، هيدلنا

نتصرف ازاى ونعمل ايه؟

-ماشى، مافيش مشكلة.

الفجر أذن واحنا قاعدين فقومنا اتوضينا وصلينا وفضلنا قاعدين لحد الساعة ما بقت تمانية، عم حسن قالي...
-ادخل البس يا ابني وأنا هروح ألبس عشان نزل للشيخ زمانه صبحي.

-ماشي تمام.
خرج راح شقته، بصيت للمسجل اللي على الترايزة، خدت نفس عميق ودخلت أوضة جدي عشان أغير هدومي، لما خلصت طلعت خدت المسجل وروحت خبطت على عم حسن اللي فتح الباب وقالي...

-يلا بينا يا ابني، كلمته وهو مستنينا دلوقتي في البيت.
نزلنا الشارع، المحلات كانت لسه بتفتح، والعيال كانوا مالين الشوارع وهما رايعين المدرسة، فضلنا ساكتين لحد ما وصلنا لبيت الشيخ محمود، وقف عم حين قدام الباب وخبط كذا مرة فالشيخ فتح ورحب بينا ودخلنا أوضة جنب الباب على طول، كان المكان بسيط أوي وفاضي، ركن في مصاحف وكتب واضح انها دينية وحصيرة كبيرة على الأرض، قعد معانا على الأرض وقالنا...

-احكولي اللي حصل.
عم حسن بدأ وقاله...
-أنا كنت نايم عادي بالليل لحد ما لقيته جاي يخبط عليا، قلق منامي الله يسامحه.
-بص يا شيخ هو اللي حصل اني ...

حكته كل الي حصل ولما خلصت كان شكله متأثر، غم
عينيه وخذ نفسه وقال...
-ربنا استرد وديعته قبل ما يخلص نفسه ويفك الي عمله
لأخوه، يا رب سترك ورضاك يا رب.
-العمل ايه يا شيخ محمود دلوقتي؟
-مافيش يا ابني بايدنا حاجة غير اننا نروح لمحسن
ونسמע التسجيل ده ونحاول نفك الي اتعمله.
ساعتها عم حسن نطق وقاله...
-هو المرشوش بيتفك يا شيخ محمود؟
-كله باذن الله بيتفك بس احنا نقول يا رب.
-يا رب يا شيخ محمود.
-يلا بينا نروح بيت محسن، هات يا ابني المسجل ده
معاك.

-حاضر يا شيخ.
طلعنا من بيت الشيخ محمود على بيت محسن، لقينا
واحدة قاعدة على باب البيت، الشيخ وقف قدامها؛ فقامت
وقفت قدامه وقالته...
-خير يا شيخ مالك؟
-فين جوزك وعيالك؟
-جوه قاعدين مش دارينين بالدنيا من حواليلهم.
-طيب ادخل يا بتي قوليلهم اني عاوز أشوفهم
-هي هتفرق معاهم، تعالى يا شيخ تعالى.
-ادخلي عرفيهم عشان مش لوجدي معايا ضيوف.

-ضيوف؟

-يا بيتي ادخلي وسبيك من لت الحريم.

دخلت وبعد شوية طلعت هزت راسها وفتحت الباب على آخره، الشيخ دخل ودخلنا وراه، حطيت المسجل على الترابيزة الصغيرة اللي كانت في نص الصالة وقعدنا، فجأة باب واحدة من الأوض اتفتحت وطلع منها راجل في أواخر الخمسينات بس كان شكله مبهدل وهدومه مقطعة، قعد على الأرض وبصاته لينا كانت غريبة، مراته جت وقفت وقال...

-تشرىوا ايه؟

-مش هنشرب يا بيتي ، نادي على عيالك كمان وتعالى

عشان تحضري اللي هيتقال.

الست مشت وفجأة باب البيت خبط، ولما فتحت لقت عيال عبد القوي الاتنين، الشيخ محمود كان باعت حد من عياله عشان يطلب منه يتقابلوا في بيت عمهم محسن، الكل اتجمع في الصالة، عيال عبد القوي ومحسن وعياله ومراته وأنا وعم حسن والشيخ محمود، الشيخ شاورلي فاستأذنت من مرات محسن توصل المسجل بالكهربا والشيخ بصلهم وقالهم...

-اسمعوا كويس وركزوا، شغل يا ابني.

دوست على الزرار وصوت العياط بدأ، محسن اتنفض تقريبا كان قلبه حاسس ان ده صوت أخوه رغم انه مش في وعيه، كلهم باين على وشوشهم انهم مصدومين، محسن عيط وبقى بيشهق بصوت عالي، الشيخ قعد جنبه وحط ايده على دماغه وقرآله قرآن، أما عيال عبد القوي فأنا كنت متأكد اهم كان نفسهم

الأرض تتشق وتبلعهم، كانوا يبصوا حوالهم بكسوف واحراج
لحد ما مرات محسن قالت...

-انتوا مالكوش ذنب في كل اللي حصل، حتي أبوكم خد
جزاته ، أما الورث اللي كانوا بيتخانقوا على اللي هيتمتع بيه بقي
ملعون، ماحدش عارف ياخذ منه قرش، لأن عمكم مش فاكر مكان
ورق الأرض محطوط فين.

فجأة أغمى على عم محسن فنقلناه الأوضة بتاعته،
وقعدنا حواليه، الشيخ محمود طلب مننا نطلع بره وفضل قاعد
معاه بيقرآله قرآن وبعد شويه كرر نفي اللي عمله مع عياله التوأم
وقال لأهمهم...

-هي العيال دي كانت بتطلع مع أبوها الصبح من البيت؟
-اه قبل ما يتوهوا كده كانوا دايمًا بيطلعوا معاه.

-بيروحوا معاه الدكان؟

-لا بياخذهم يلعبوا في الحته الواسعة اللي قدام البيت.
-يبقي العمل اللي عبد القوي رشه كان قدام البيت،

ومحسن والعيال خطوه سوا.

-ربنا يسامحه على اللي عمله فينا.

-الله يرحمه.

بصلي وشاور عليا وقال...

-ده حفيد الحاج اسماعيل أكيد تسمعي عنه، هو اللي

اكتشف الشريط اللي في المسجل.

-طيب كده الدنيا تمام يا شيخ ولا ايه؟

-هيبقوا كويسين مع الوق يا ابني دي مش حاجة بتروح في
يوم وليلة.

-ربنا يتم شفاهم على خير.

استأذنت أنا وعم حسن عشان نمشي لكن الشيخ نادى
عليا وأنا على باب البيت وقالى...

-خد يا ابني المسجل معاك، خلاص ان شاء الله مش
هتسمع ولا هتشوف حاجة تاني.

قربت من المسجل وشيلته ورجعنا البيت، حطيته في
مكانه زي ما كان جدي حاطه بالظبط على البنسوار، بعدها نزلت
مع عم حسن عشان نشوف دكان التركيبات اللي اتفتح ده ماشي
ازاي ويبيبع ولا لا، فضلنا قاعدين شوية مع الناس اللي شغالة
هناك وبالليل على الساعة عشرة ونص جبت عشا وطلعت
الشقة، عم حسن كان راحي يحضر قعدة بين اتنين متخاصمين
وقالى...

-حضرلنا العشا زي ما علمتك على ما أخلص اللي ورايا

وأرجع.

دخلت الشقة وشغلت المسجل على الراديو، وروحت
طسيت وشي بشوية مائة وغيرت هدومي، وقفت في المطبخ
عشان أحضر العشا، سمعت صوت جاي من الصالة، بلعت ريقى
بخوف ومشيت ورا الصوت شوفت جدي وهو واقف قدام
المسجل ويحاول يطفيه، الغريب انه كل ما كان يطفيه كنت
بشغله ويرجع يطفيه، حاولت أقنع نفسي ان دي تهيؤات لحد ما
الفيشة اتشالت من الكهرا لوحدها وحد صرخ في وشي جامد.

دي كانت أغرب قصة سمعتها من حالة عندي، بقالي ٩ سنين شغالة دكتوراة نفسية في مستشفى كبيرة وعندي عيادتي الخاصة بس القسط دي معلمة جوايا ماقدرتش أتخطاها، الحالة جت المستشفى عندنا بناء على شكاوي امن الجيران، قالوا ان حازم بعد موت جده، بقى شخص عدواني وبيكتب طلاسم على ورق ويسيبها قدام باب شققهم، أنا بحكيلكم القصة دي النهاردة في البث عشان بالصدفة شوفت حازم وأنا بمر على الحالات الجديدة، وللعلم بالشيء كل اختبارتنا أثبتت انه سوي ومش بيعاني من أي اضطراب نفسي بس احنا مجبرين نحجزه في المستشفى عشان ميأديش نفسها وعشان اللي بره ما يأذيهوش.

برئيس

ماكنتش عارف أمهدلها ازاي؟ حاولت كتير أفاتحها في موضوع السفر، بس في كل مرة آجي أقولها واحنا بنتكلم في التليفون؛ كانت بتصعب عليا، فبسكت وومابقاش عارف أجمع كلمتين على بعض، لأني متأكد انها هتقفل المكالمة وهتنكد على نفسها، بس خلاص مابقاش فاضل غير أسبوع ولازم تعرف اني مسافرعشان الشغل الجديد، عارف كويس انها هتزعل، يمكن كمان تتعب وتضايق مني وتتخانق معايا، بس لو فكرت مرة بعقلها؛ هتفهم ان الشغل الجديد ده فرصة مش هتتكرر دلوقتي خالص لو اعتذرت عنها، بيني وبينك كنت محتاج أمسك في الشغل الجديد ده بايدي وسناني؛ عشان أعرف أظبط دنيتي وأتجوزها في أقرب وقت، قررت أروحها تحت البيت، اتصلت بيها وطلبت منها تلبس وتنزل تقابلني، خدتها فسحتها في كل الأماكن اللي بتحبها، بس في الآخر عزمتها على العشا وخليتها كمان تختار المطعم والأكل اللي يعجبها، بصتلي باستغراب وقالتلي...
- ايه الدلع ده كله بقي، أكيد..أكيد وراك مصيبة صح؟

أنطق، اعترف يا مجد الانكار مش هيفيدك!

حسيت انها قفلت مني، فقررت ألم الدور وأروحها،
وممكن نتكلم تحت البيت عندها تكون هديت شوية، طول
الطريق كانت بتعيط ، أول ما نزلنا من التاكسي سابتني وطلعت
تجري على البيت، خدت نفس عميق وحاسبت سواق التاكسي ،
حاولت أهدى ودخلت وراها عشان أفهمها كل حاجة وأراضيها،
طلعت السلالم وخبطت على باب شقتهم، كنت سامع صوت
مامتها وهي بتتحايل عليها تفتح الباب وتقولها ايه اللي مزعلها بس
هي ماكنتش راضية، خبطت على الباب ورنيت الجرس كذا مرة
لحد ما مامتها فتحتلي الباب أول ما لقتني في وشها قالتلي...

- هوأنتوا اتخانقتوا؟ مزعل بنتي ليه يا محمد؟

- والله يا طنط أبدا هي ما سمعتش كلامي للأخر، خدت

اللي يزعلها ورمت كل حاجة ورا ظهرها.

- طيب ادخل يا ابني نتكلم جوه، ماينفعش تفضل واقف

على الباب كده.

دخلت وشرحتها كل اللي حصل، واني وافقت على الشغل

الجديد عشان أقدر أسعد ميرنا وأحقق لها كل اللي بتتمناه

فقالتي...

-ماتزعلش يا ابني، أنت عارف انها بتحبك، بس بما انا

زعلانة أوي سييها يومين تلاته كده والدنيا هتروق وتهدى بينكم.

-أنا قدامي أسبوع واحد ومسافر، مش عايزها تكون زعلانة

مني،

- ربنا يصلح حالكوا يا ابني، أنا هكلمها بس أما تهدي.

شربت كوباية الشاي اللي مامت ميرنا عملتهاالي وخذت نفسي ونزلت من بيتها، فضلت ألف في الشارع شوية ولما حسيت ان الوقت أتأخر روحت البيت، أنا عايش مع أبويا لأن أمي ماتت من ٣ سنين وخمس شهور، ميرنا وأبويا هما كل حياتي، من أول يوم شوفتها وهي شقلبت كياني، بقيت ألف على مكاتب الشركة عشان أعرف هي جاية لمين أو بتعمل ايه؟ ولما عرفت ان بنت خالتها شغالة معايا في نفس الشركة ماكدبتش خبر وروحت كلمتها، طلبت منها تحددلي معاد مع خالتها عشان أروح اتقدم فيه لميرنا، الموضوع جه بسرعة أوي في خلال شهر كنا بنتمم الخطوبة، اتفقنا على سنة ونص خطوبة وبعدها نعمل الفرح، عدى من الوقت اللي اتفقنا عليه ٧ شهور وأنا لسه الفلوس اللي معايا ماتكفيش مقدم للشقة اللي ميرنا اختارتها، عشان كده قبلت الشغل الجديد، ميرنا تستاهل ان الواحد يجبلها نجمة من السما لو يقدر، حاولت أتواصل معاها كذا مرة بس هي كانت رافضة تديني أي فرصة وتسمعي، كلمت بنت خالتها وصاحباتها اللي أعرفهم وشرحتلهم اللي حصل، طلبت منهم يكلموها بس كانت رافضة تسمع للكل، ماكنش قدامي وقت، الأيام كانت بتجري وهي لسه ماراقتش، عشان كده قررت أروحلها البيت تاني وأواجهها وزى ما تيجي بقي، وصلت بيتهم وخبطت ووقفت قدام مامتها محتارهاقولها ايه، بس كان لازم أحط النقط على الحروف فقولتلها...

- بعد اذنك يا طنط أنا محتاج أتكلم مع ميرنا ضروري.

- حاول يا ابني.

وقفت قدام أوضتها، خبطت على الباب بتاعها كذا مرة،
بس هي ماردتش فحطيت ايدي على الباب وقولتلها...
-ميرنا أنا متأكد أنك سمعاني، كل ده بعمله دلوقتي
عشانك، قبلك عمري ما دورت على مرتب عالي أو لاء، الدنيا كلها
ماكنتش فرقالي، عايزك تعرفي اني مسافر عشانك، وأوعدك اني
مش هنشغل عنك ودايما هتلاقيني جنبك حتى لو بعيد .
كنت سامع صوت عياطها المخنوق اللي بتحاول تكتمه،
اتنهدت وكملت كلامي وقولتلها...

-برنيس

برنيس دي مكان جميل أوي، في جنوب البحر الأحمر بس
هي مشكلتها انها بعيدة شوية، من القاهرة لبرنيس تقريبا بتاع عشر
ساعات بالعربية، لو طيران ممكن تبقى ساعة ونص بالكثير، عارفة
اسمها خطفني أوي زي أني ما خطفتيني كده، لما دورت شوية
على النت على برنيس لقيت انها منطقة جميلة وهادية، فأكيد
هبقى مرتاح، خصوصا ان المشروع اللي أنا همسكه هناك قرية
سياحية لشركة كبيرة، فالدنيا هتبقى متظبطة ومش هتعب في
الشغل، ادعيلي كتير يا ميرنا وماتزعليش مني، الخطوة دي افتكري
دايما اني واخدها عشانك.

شيلت ايدي من على الباب، غمضت عيني ومسحت
دموعي اللي خانتي ولفيت لمامتها وقولتلها...
-هكلمكم دايما عشان أطمئن عليكم، لو احتاجتوا أي
حاجة كلميني في أي وقت، خدي بالك من ميرنا ومن نفسك اني
عارفة انك في مقام ماما الله يرحمها.

-ربنا يرضى عنك يا محمد، تروح وترجع بالسلامة يا حبيبي.
طلعت من عندهم على القهوة، قعدت مع صحابي شوية
وبعدين رocht البيت، فلقيت بابا مجهز العشا ومستنيني،
ماكنليش نفس آكل، بس مارضتش أزعله وقعدت كلت معاه لحد
ما لقيته بيقولي...

-كنت فين يا حبيبي وأتأخرت كده ليه؟
-كنت عندها، ماينفعش أسافر من غير ماتعرف، أنت
عارف ان زعلها وحش.

مش عارف هو ليه بيضايق مني لما أجيب سيرتها، مع انها
طيبة وأهلها كويسين، خلصت أكل وقومت عملته كوباية الشاي
وناولتهاله فقاالي...

-دي آخر كوباية شاي هتعملها لي يا محمد صح؟
-ايه! ليه؟ هو أنا رايح ومش راجع؟ أنا قاعد على قلبك
يا حج ١٥ يوم وهتلاقيني نازلك أجازة.
-تروح وتيجي بالسلامة يا ابني.
-هدخل انام بقى عشان اتأخرت، انت عارف لازم أصحى
بدري.

-ماشي يا حبيبي تصبح على خير.
دخلت أوضتي وبصيت على شنطتي الي كنت مجهزها،
شيكت على كل حاجة وغيرت هدومي ورميت نفسي على السري،
وساعتها افتكرت شكلها وهي بتضحك، ابتسمت وغمضت عينيا
ونمت...

كانت بتنادي عليا وأنا واقف في مكان ضلمة ومش شايها، صوت عياطها كان بيقطع في قلبي، ناديت عليها بعلو صوتي وقولتها...

-ميرنا أنتي فين؟

-أنا هنا يا محمد.

-هنا فين؟ مالك بتعيطي ليه؟

-بعيط عشان أنت واحشني أوي.

-واحشك! أنا لسه ماسافرتش يا حبيبتي، وبعدين لو

واحشك ليه ضيعتي الأسبوع اللي كان فاضلي وأنت زعلانة.

-حاسب يا محمد حاسب.

-فيه ايه يا ميرنا مالك؟

-حاسب يا محمد.

-ميرنا فيه ايه؟ ايه اللي حصل؟ ميرنا!

قومت من النوم مفزوع وجسمي كله بيصب عرق، حتى نفسي ماكنتش عارف أخده، بصيت حواليا باستغراب وحمدت ربنا انه كابوس وانتهى، مسكت التليفون واتصلت عليها كذا مرة لكن موبايلها كان مقفول، خوفت أكلّم والدتها في الوقت ده وأقلقها، حاولت أنام بعدها تاني بس دماغي ماكنش متظبط، أول ما صحيت وبصيت في الساعة لقيت نفسي متأخر على معاد السوبر جيت، فخرجت من البيت مستعجل من غير ما أتصل بيها، حاولت أكلّمها بعد كده موبايلها كان لسه مقفول ومامتها مش بترد عليا، فضلت على الوضع ده لحد ما وصلت برئيس، لا

عرفت أنام في الطريق ولا حتى لما وصلت، لأن صدمتي في المكان ماكنتش أتخيلها، كنت فاكر اني هقععد في برنيس على المينا، بس اكتشفت انهم فاتحين لنا بيوت في وسط مساكن البدو، مشيت لحد ما وصلت لرقم البيت اللي مفروض هقععد فيه، اللي يخليك تتوه ان البيوت هنا كلها في المكان ده شبه بعضها أوي، دور واحد مبني بالطوب الأبيض والسقف بتاعه على شكل قبه، بس كل البيوت مترتبة بالأرقام، خبطت على الباب ففتحلي واحد ورحب بيا ودخلني، بس أول ما قفل الباب حسيت ان بطني اتقلبت، المكان حرفيا ماكنش آدمي، ريحته وحشه ومش نضيف وفي ناس كتيرة موجودة، اتصدمت لما عرفت ان هنا مافيش فرق بين المهندس والعامل، بصيت للشخص اللي فتحلي الباب وقولتله...
-هما عارفين في ادارة المشروع باللي بيحصل في السكن

هنا؟

-كل عيش يا باشمهندس لو عاوز.
-هما اللي محتاجيني، مش أنا اللي عاوز الشغل.
-غلطان، هيجيبوا غيرك عادي، شوفلك ركن اقعد فيه
بقي احنا هنا كلنا ولاد تسعة.

سابني واختفي في وسط الناس الكثير اللي كانوا موجودين، أنا مش شايف نفسي أحسن منهم بس مش متعود أقعد مع حد، حاولت أدور على ركن وأقعد فيه زي ما قالي، بس أول ما حطيت شنطتي على الأرض في واحد جه فتحها وخذ تيشرت وبصلي وقالي

...

-تسلم على الهدية يا ذوق.

ساعتها قفلت شنطتي وخذت نفسي وفتحت باب السكن وخرجت وقولت يا فيكك، ماكنتش عارف رجليا رايحة بيا فين، فضلت ماشي مهموم وسرحان وخلص، لحد ما خبطت في واحد شكله غريب عن المكان، مش بدو زيهم بصيتله باحراج وقولتله...

-آسف، ماخذتش بالي.

-ولا يهمك.

ابتسمتله ومشيت وسيبته، دورت علي قهوة أو فندق أقعد فيه، بس اتصدمت ان المكان كله على بعضه لا فيه قهاوي ولا فنادق، حتى سكانه أصلا من البدو كلهم ومايتعدوش ال ١٠٠ بني ادم، فضلت ماشي لحد ما توهت، لفيت حوالين نفسي واكتشفت ان الدنيا ليلت والرجل خفت خالص عن المكان، وفجأة حد حط ايده على كتفي، لفيت بخضة فلقيت الراجل الغريب اللي اتخبطت فيه قبل كده، ابتسم وقال...

-مالك؟ شكك تايه قولي العنوان اللي أنت عاوز تروحه

وأنا هوصلك.

ماكنش قدامي مكان أقوله يوديني فيه غير السكن

فقولتله...

-بيت رقم ٣٦ .

-أنت من العمال الجداد اللي جايبينهم برنيس؟

- هو مش كده بالظبط، بس اه انا شغال في المشروع

الجديد بتاع القرية اللي بتتبني هنا.

- طيب تعالى هوصلك.

مشيت معاه لحد ما وصلني ووقفنا قدام الباب ندردش شوية، استغرب جدا لما عرف اني مهندس مش عامل عادي وقبل ما يمشي خرج الي فتخلي الباب لما وصلت، كان معاه اتنين كمان، بصلي باستهزاء وقال لي وهو معدي من جنبي...

-أديك رجعت تاني للمكان اللي ماكنش عجبك!
حطيت وشي في الارض وماعرفتش حتى أرد عليه، سلمت على الراجل اللي وصلني وطلعت الكام سلمه، لكنه فجأة نادى عليا وقال لي...

-لو المكان مش مناسب ليك أنا ممكن أساعدك.
نزلت من على السلام بسرعة وقولتله بحماس...
- ازاى؟ أقصد هسكن فين؟
- في هنا بيوت مستواها أحسن من كده؛ بس ايجارها عالي شويتين.

- مش مشكلة الفلوس بس أعرف أقعد في مكان نضيف.
- خلاص تعالى ورايا.
خدني معاه وفضلنا نلف علي اصحاب الشقق، ب كلهم رفضوا لما عرفوا اني مهندس وشغال تبع مشاريع التنمية، وقفت باستسلام وقولتله...
-خلاص رجعي السكن، مافيش مشكلة، هستحمل لحد ما أشوف صرفة.

-تعالى معايا وخلص.
-آجي معاك فين؟

- البيت هيكون فين؟ أنا قاعد مع أمي في شقة وفي شقة
تحتنا كانت بتاعة أخويا بس هو مسافر.
- مش هضايقكم ولا هسبب مشاكل؟
- لا خالص بالعكس، هتاخذ بحس البيت.
- مش عارف أقولك ايه؟ بجد تسلم على وقفك جنبي
وأنت ماتعرفنيش.

في اليوم ده أنا روحت معاه ووالدته حضرت لنا العشا ولما
أكلنا نزلنا احنا الثلاثة روقنا الشقة ، بعد ما خلصنا وقفت في
البلكونة ومسكت كوباية الشاي بتاعتي، كانت الساعة داخلة على
عشرة ونص، الجو كان في لسعة برد مع انه طول النهار بيبقي حر
جدا، لأن برنيس قربية أوي من خط الاستواء جه وقف جنبي
وقالي...

- على فكرة بقي احنا ماتعرفناش كويس لحد دلوقتي، أنا
اسمي وليام يا محمد، وأمي اسمها تريز، شوفت الصدمة في عينيك
لما شوفت الصليب على الحيطه بتاعتنا فوق، استديتك تسأل
بس انت عديتها وعملت مش واخذ بالك.

- بص بصراحة دينك مايهمنيش يا وليام أنا مش متعصب
خالص، كفاية عندي انك فتحتلي بيتك وأنت ما تعرفنيش.
- عشان شكلك طيب واين حلال بس.
- ربنا يخليك يا وليام.

- هنطلع بقي ونسيبك تنام؛ عشان تلحق ترتاح وتروح
شغلك الصبح.

- ماشي تمام، ربنا يقدرني وأردلك جمايك دي.

- جمایل ایه یا راجل عیب ماتقولش کده، لو احتجت حاجة خبط علینا احنا بنصحي بدري عادي.
هزیت راسي وسکت وهما طلعا شقتهم، وقفت فی البلكونة لثواني وحسیت اني فی الجنة، الدنيا هادية أوي، النور بعيد وكل حاجة ضلمه وساکته، خدت نفس عمیق وقررت أدخل أنام خلاص، قفلت البلكونة ودخلت الأوضة، بمجرد ما حطیت راسي علی المخدة حسیت ان البيت بیتهز، كنت فاکر انه زلزال، فخرجت من الاوضة جري لکن لما طلعت الصالة، ماکنش فی حاجة خالص فقولت لنفسي ...
-يمكن هزة خفيفة وراحت لحالها.

بس وأنا داخل الأوضة تاني لمحت الستارة بتاعت البلكونة اللي فی الصالة بتتحرك، بلعت ريقی بصعوبة وبصیت حوالیا باستغراب، قربت من الستارة عشان أشوف ایه اللي بیحصل! بس اتفاجئت لما لقيت البلكونة مفتوحة، ماکنتش مستوعب اللي بیحصل، متأكد اني قافلها کویس قبل ما أدخل أنام ازاي اتفتحت؟ ومین اللي عمل کده؟ طلعت البلكونة وبصیت یمین وشمال بحذر لأن الشقة أصلا فی الدور الأرض والمكان من حوالینا صحرا، ماقلتش حاجة غريبة فقفلت البلكونة ودخلت الأوضة تاني عشان أنام، بصراحة ماکنتش عارف أغمض عینی من کتر الخوف، فضلت اقرا قرآن لحد ما روحت فی النوم من غیر ما أحس بنفسي، صحیت الصبح علی صوت المنبة المزعج وهو بیرن، کان فی حاجة غريبة جسمي کله کان مثبت علی السریر وحاسس ان فی حاجة طابقة علی نفسي وبتخني، فتحت عینی

بضعف وحاولت أحرك حتى ايدي؛ لكن ما قدرتش كنت حاسس ان قلبي بيدق بسرعة أوي، وسامع صوت نفس حواليا بس مش عارف جاي منين؟ فضلت على الوضع ده كام دقيقة وبعد شوية حسيت ان جسمي مرة واحدة فك وبقيت قادر أحركه، قومت من على السرير مرعوب وخايف، لدرجة اني طلعت جري لوليام فوق وحكيتله على اللي حصل معايا فضحك وقالى...

-الحالة اللي مريت بيها دي اسمها الجاثوم، يعني شلل النوم، بتحصل للناس اللي مابتنامش كويس وبتفضل فترة كبيرة مرهقة.

-أنا أول مرة يجرا لي كده.

-ماتخفش ده بيحصل عادي.

سمعت صوت تريز وهي بتنادي على وليام من جوه وبتقوله...

-خلي محمد يدخل عشان يفطر معانا قبل ما ينزل الشغل.

بصلي وشاورلي وقالى..

-أظن أنك سمعت كلامها؛ ادخل عشان ماتاخذنيش

مخالفة.

-والله مالوش لزوم أنا كنت هاخذ أي حاجة وأنا نازل

الشغل.

شدني من ايدي ودخلي المطبخ وقعدنا على الترايزة الصغيرة اللي كانت فيه، بدأت تريز ترص أطباق الأكل قدامنا، قعدنا كلنا وأول ما خلصت ماستنتش أشرب الشاي، استأذنت

منهم ونزلت بسرعة، لبست هدومي وخرجت عشان ألحق أروح الشغل، اتفاجئت بوليام ووهو داخل عليا بالعربية وبيقولي...

-اركب هوصلك في طريقي.

-مش عايز أخليك تتأخر على شغلك بسببي.

-مافيش تأخير ولا حاجة.

ركبت معاه لحد المشروع اللي كنت شغال فيه ونزلني

قدام البوابة وقاللي...

-هعدي عليك لما أخلص شغل نروح سوا.

-مش عارف أقولك ايه والله كده كثير.

بصلي بغضب مفتعل وسابني ومشى، دخلت جوه وبدأت

أشوف الدنيا رايحة فين وجاية منين؟ أول حاجة دورت على مكتبي

واتصدمت أما لقيتهم عاملين المكاتب في كارافانات، ماكنتش

مستوعب بس حاولت أمشي الليلة، بصيت على ورق التصاميم

اللي قدامي وقررت أنزل اخد لفة في الموقع اللي المفروض هيتعمل

عليه قرية سياحية كبيرة على البحر، المكان كان واسع وهادي

وجميل، وقفت ورا العمال وهما بيشتغلوا وفجأة، سمعت صوت

جاي من ورايا، كان نفس الشخص اللي شوفته في السكن، لفيت

ووقف قدامه فقاللي...

-اختفيت فين يا باشمهندس امبارح؟ ولقيت حتة تبات

فيها ولا لا؟ احنا قلقنا عليك والله.

-أنت اسمك ايه؟

-محسوبك رجب.

-شغال ايه هنا يا رجب؟

-عامل يا باشمهندس، بشيل طوب.
-طيب خد بالك وانت بتتعامل معايا بقى يا رجب عشان
احنا هنا مش في السكن، احنا هنا في الشغل وأنا المهندس
المشرف علي المشروع الي انت شغال فيه، بجرة قلم ممكن اقطع
أكل عيشك.

-أنا كنت بظمن عليك والله بس يا بشمهندس.

-روح شوف شغلك يا رجب.

-حاضر يا بشمهندس.

أنا نادر لما بتعامل مع حد كده، بس أوقات ببقى مجبر
على الاسلوب الحاد ده؛ عشان الي قدامي مايتعودش عليا
ويتعدوا حدودهم معايا، فضلت واقف على راس العمال لحد ما
جت فترة الاستراحة بتاعهم وبدأو ياكلوا، واحد منهم قرب مني
بعلبة أكل وقال ...

-اتفضل يا باشمهندس عشان يبقي عيش وملح.

خدت الأكل من ايده وانا عيني على رجب وابتسمت
للعامل وشكرته بكل أدب وبدأت أكل، بعد شوية لما خلصوا أكل
رجعوا للشغل تاني وفضلت متابهم من بعيد عشان ماחדش
يبوظ الدنيا، لما خلصوا راجعت على كل حاجة وعطيتهم اذن
بالانصراف ورجعت على مكتبي، دخلت فتحت التكييف وحاولت
أفصل من الوقفة في الشمس طول النهار، ماكنتش شايف من
الصداع، لما خلصت شغلي وعملت التقرير اليومي وبعته على ميل
الادارة، قفلت المكتب وخذت مفتاحه وخرجت، وقفت بتاع ٣
دقايق قدام البوابة ولقيت وليام جاي بعرييته وقف قدامي وقال ...

-ماعلش اتأخرت عليك.
-لا أنا لسه طالع يادوب.
-ايه رأيك في الشغل هنا ولا القاهرة؟
-القاهرة تكسب، بس هنا هدوء .
-مع الوقت هتتعود والدنيا هتبقى تمام، يلا اركب بسرعة
بدل ما يجيلك ضربة شمس.
- هي لسه ماجتش!

ركبت بس وأنا بقفل باب العربية لمحت رجب، واقف
جنب البوابة ييراقيني من بعيد، مش عارف هو ليه شاغل دماغه
بيا للدرجة دي ومستتيني يشوفني هروح فين؟ استغربت أوي لأنه
كده يبقى فوت أتوبيس العمال اللي بينقلهم للسكن! هو فضول
الانسان ممكن يسحله كده؟ فوقت على صوت وليام وهو
بيقولي...

-هنطول قدام شوية كده ونجيب جمبري واستاكوزا

للغدا.

حسيت بالاحراج وقبل ما اعترض على كلامه كان على
صوت الكاسيت وبص قدامه، فضل منسجم مع الاغنية بطريقة
غريبة، كنت مرعوب وخايف الا العربية تتقلب ونعمل حادثة ولا
حاجة، للأسف اللي توقعته لقيته، زي ما يكون قلبي حاسس،
فجأة وليام ما عرفش يسيطر على الدركسيون بتاع العربية ودخلنا
في عربية تانية، اتقلبنا كذا مرة، ما كنتش قادر أغمض عينيما فضلت
فاتحها وماسك في الكرسي وباصص لوليام اللي كان بيضحك
بشكل غريب، وفجأة العربية استقرت على ظهرها وفضلنا

متشقلين، ناديت على وليام مرة واثنين بس ماكنش بيرد عليا وعينه كانت مغمضة، حاولت أفك الحزام وأفتح الباب بس ماقدرتش، كنت حاسس ان دماغي هينفجر من الوضع المقلوب اللي أنا فيه بس ماكنش بايدي حاجة، نفسي بدأ يتقل وعينيا كمان بتغمض، استجمعت كل طاقتي وخبطت الشباك بتاع العربية برجلي؛ فاتكسر والازاز ملى المكان، مديت ايدي وخذت حته قطعت بيها حزام الأمان وبصعوبة خرجت من العربية، بصيت على وليام وحاولت أنقذه بس وضعه كان صعب، بدأت اصرخ وألف في المكان وأنادي بصوت عالي يمكن حد ينقذنا، لحد ما فجأة محاستش بنفسي ووقعت على الأرض..

كنت سامع صوت ضعيف زي ما يكون في سرينة اسعاف بتقرب، غمضت عيني باستسلام وفجأة بعد ما كنت حاسس اني انفصلت عن الدنيا من كتر التعب، فتحت عينيا بالراحة، لقيت في نور ضارب فيها فمستحملتش وغمضت بسرعة، بس الأصوات اللي حواليا كانت عالية وداخله في بعضها، حاولت أميز حاجة من اللي بتتقال، لكن كل اللي سمعته جملة واحدة...

-جهزي حقنة ميدازولام بسرعة لو سمحتي.

كنت حاسس ان الدنيا بتلف بيا ومش قادر أخذ نفسي، بمجرد ما الابرة شكتني كل حاجة بدأت تهدا بالتدريج، فتحت عيني بصعوبة وشوفت رجب واقف على جنب قدامي، حاولت ارفع ايدي واشاورله بس ماقدرتش جسمي كله تقل فجأة ونمت.

الصداع كان ماسك دماغي بشكل فظيع، حركت صوابي وبعدها فتحت عيني، المكان كان هادي والاضاءة بتاعته مش عالية، اتحاملت على نفسي وقومت وقفت، شلت الكانيولا اللي كانت في ايدي وبصيت حواليا واتسحبت عشان أشوف وليام، هو أكيد في سرير من السرير اللي جنبي دي، لفيت عليه المكان ومالقتهوش، فخذت نفسي وطلعت من المستشفى من غير ما حد يحس بيا، ماكنش معايا لا موبايل ولا ساعة ولا بطاقة حتى، يادوب التيشرت اللي كنت لابسة والبنطلون، بصيت حواليا باستغراب شكل المستشفى كان قديم أوي وبدائي حبيتين، ده حتى أنا خرجت من غير ما حد يقولي انت رايح فين؟ ولا جاي منين! فضلت ماشي لحد ما لقيت نفسي حرفيا تايه في وسط الصحراء، بصيت حواليا بتعب وقبل ما أفقد وعي لمحت نور عربية بتقرب، كنت زي المجنون اللي بيحاول يتعلق بقشاية، فضلت أشاور يمين وشمال وأناادي لحد العربية ما وقفت قدامي، واللي سايق فتح الشباك وقال...
-أي خدمة يا أستاذ؟ أنت ايه اللي موقفك هنا كده في

الوقت ده؟

كنت مصدوم مش عارف أرد، أصل اللي كان سايق العربية وليام، بس هو بيقولي أستاذ ليه؟ هو مش عارفني ولا ايه؟
-أنت موقفني عشان تفضل باصصلي كده ومتتح؟
-لا أبدا بس مستغرب، أصل احنا صحاب انت مش
فاكرني خالص؟

سكت ثواني وركز معايا كده وقال...
مستوحاة من أحداث حقيقية

-ماعلش بس حقيقي مش فاكر؟
- طيب مش أنت عملت حادثة النهاردة الصبح؟
-لا .
-مش أنت أسمك وليام ومامتك اسمها تريز؟
-أيوه ده حقيقي .
-يبقي أنت وليام يا عم، أنا كنت معاك وقت الحادثة، انت أكيد الحادثة عملتلك فقدان في الذاكرة.
فتحت باب العربية ودخلت قعدت وقولتله...
-اطلع بينا على البيت يلا الله يباركلك، أنا محفظتي وقعت وموبايلي ضاع ويومي ماكنش أحسن حاجة بس أنت حظك حلو مافيش فيك خدش يوحد ربنا.
ابتسم ابتسامة عريضة كده خوفتني وخلتني قاعد على الكرسي بتنفض، انا شوفت نفس الابتسامة دي قبل العربية ما تتقلب، بلعت ريقى بصعوبة وغمضت عينيا واتشاهدت، اتحرك بالعربية لحد ما وقف قدام البيت وبصلي وقالى...
-اتفضل تعالى هعرفك على تريز.
خبطت بايدي على دماغي وحاولت استحمل اللي بيعمله، منا عارفه وعارف تريز أصلا من أول يوم جيت فيه هنا، ابتسمت وحاولت أمشي الليلة وأخلها تعدي، لما طلعتنا فوق لقينا تريز نايمة، فبان عليه انه اضايق وقالى بعصبية...
-تعالى هفتحك الشقة اللي تحت تبات فيها.
حاولت افكره انه اداني نسخة من المفاتيح، بس هو مشى قدامي فنزلت وراه، فتحلي الشقة، ماكنش فيها حاجة اتغيرت،

وقف في الصلاة وشاورلي على نفس الاوضة وقالى تقدر تنام هنا، وسابني وخرج، دخلت الحمام خدت شاور وطلعت عشان ألبس واتصدمت لما مالقتش هدومي اللي في الدرج ولا شنطتي، فاضطريت ساعتها البس هدومي اللي متبهدة تاني، قعدت على الكنبه اللي في الصلاة وحاولت أفهم اللي بيحصل حواليا، بس فجأة حسيت بصداع فظيع ودوخه ماكنتش قادر أستحملها، غمضت عينيا بس بعد كام دقيقة سمعت صوت صريخ، فوقت مفزوع وماكنتش عارف ده جاي مينين؟ صوت الصريخ فضل مستمر، ماعرفش ازاى أنا فتحت باب الشقة اللي قاعد فيها وطلعت أجري علي شقة وليام، فضلت أخبط على الباب كتير، للحظة حسيت ان في حاجة غلط وان ممكن يكون وليام هو اللي بيصرخ، لفيت عشان أنزل بس فجأة باب الشقة اتفتح وسمعت صوت نايم بيقولي...

-في ايه؟

-هو انت مش سامع الصوت اللي أنا سامعه ده؟

-صوت ايه مش واخذ بالي!

-صوت صريخ أنت مش سامعه بجد ولا ايه؟

-اه، ده عادي ويبتكر كل يوم لأن في ناس كتير ماتت هنا.

حسيت ان الجو برد فجأة، فبلعت ريقى بخوف وبصيته

باستنكار وحذر وقولتله...

- ناس ماتت هنا فين؟

-اهدى الموضوع أبسط من كدة، كل الحكاية ان فيه

حقل ألغام قريب من هنا وده في ناس كتير ماتت بسببه، عشان

كده بنسمع الاصوات دي عادي، في الحقيقة مش احنا بس اللي بنسمعها كل الناس اللي بتعدي علي الطريق بالليل بتسمع وبتشوف و...

- كمل وايه؟

- والبدو اللي في المكان عارفين الكلام ده كويس، بس ما حدش يجراً فيهم يحكي عن اللي بيحصل.
-بس أنا مرعوب ومش قادرأنام ومش عارف اتجنب كل الأصوات دي.

-ارجع مكان ما جيت مدام مش عاجبك.

بلعت ريتي من الصدمة وحسيت اني مش عارف اجمع كلام اقولهوله، خد نفسه ودخل الشقة وقبل ما يقفل الباب في وشي بصلي وقال ...
-تصبح على خير.

نزلت السلالم ودخلت الشقة، الصريخ كان لسة مستمر، فتحت البلكونة ووقفت فيها شوية ، كنت بحاول أطمئن نفسي انها مجرد أصوات وبس، الصريخ فعلا كان جاي من ناحية الصحرا، كنت بترعش من جوايا وفجأة، لمحت حاجات حمرا بتلمع في وسط الضلمة، كانت بتقرب مني فدخلت بسرعة وقفلت باب البلكونة، جريت على الاوضة وقفلت بابها عليا، بعد شوية لما هديت واطمنت سمعت خبط على باب الاوضة اللي كنت قاعد فيها، فكرت انه وليام وكنت هفتح بس على اخر لحظة وأنا ايدي على كالون الباب سمعت صوت صريخ عالي جدا جاي من الصالة بره، فضلت شوية بحاول أستوعب اللي بيحصل، حاسس

ان الدم اتجمد في عروقي، صوت الصريخ اللي كان جاي من الصلاة خلاص حسم الموضوع وعرفت ساعتها ان دول اللي وليام اتكلم عنهم، طول الليل عيني مفتحه ماغمضتهاش، لحد ما سمعت رنة الجرس بتاع الباب، ساعتها جريت على الباب فتحته ولقيت تريز واقفة قدامي مبتسمة ومعها صينية صغيرة، استأذنتني ودخلت حطتها على الترابيزة وقالتلي قبل ما تطلع شقتها ...

-افطر كويس.

-هو وليام لسه نايم؟

- سافر هو ماقالكش ولا ايه؟.

- امتي ده انا لسه شايفة امبارح؟

- سافر بالليل، جاله شغل ضروري وسافر.

- طيب لو احتاجتي أي حاجة أنا هنا مكان وليام.

-قبل ما تخرج ابقى عدي عليا اديك مفتاح العربية بتاعته،

لو بتعرف تسوق أهي هتساعدك تروح بيها شغلك.

هزيت راسي وسكت ودخلت وقفلت باب الشقة،

ساعتها حسيت ان الصداع هيفرتك دماغي، قعدت على أقرب

كرسي وحاولت أهدي، ماكنش في أي مسكن خالص معايا،

بصيت علي صينية الاكل وقربت منها وقعدت كلت، بعد ما

خلصت اتشجعت وطلعت طلبت منها تيشرت من بتوع وليام لأن

شنطتي وكل حاجتي مش لاقيتها خالص، فدخلتني أوضته

وقالتلي...

-تقدر تاخذ اللي يعجبك وليام مش هيمنع عادي.

سحبت تيشرت وبنطلون ولبستهم كانوا مضبوطين عليا،
طلعت الصلاة وابتسمتلها فهزت راسها وقالتي...
-شكلك كده حلو جدا.
- حضرتك هتعوزي حاجة اجبها معايا وأنا راجع من
الشغل؟

- لا شكرا، امسك ده مفتاح عربية وليام روح بيها عشان
المسافة طويلة من هنا للمكان اللي شغال فيه.
خدت منها المفتاح وشكرتها تاني ونزلت من البيت،
ركبت العربية واتحركت لحد ما طلعت للطريق وفضلت ماشي
لحد ما وصلت لمكان الشغل، دخلت من البوابة وركنت العربية،
بس قبل ما أنزل منها لمحت في دواصة العربية محفظتي
وموبايلي، مديت ايدي وجبتهم واتفاجئت ان المفاتيح بتاعتي
كانت معاهم كمان، أومال وليام ماله بينكر انه عمل حادثة
بالعربية واني كنت معاه؟ يمكن مش عايزني احسسه بالذنب
وكده او خايف من اني ازعل منه؟ كان في حاجات كثيرة بتروح
وتيجي في دماغي لحد ما استسلمت وفتحت باب العربية ونزلت
وقفت قدام الكرفان، حطيت المفتاح في الباب ووقفت لثواني
وقولت لنفسي لو الباب اتفتح يبقي المفتاح ده فعلا وقع من في
عربية وليام قبل الحادثة واحنا مروحين وهو كان معايا وبيكذب،
بس لو ماطلعش هو نفس مفتاح الباب يبقي انا اللي فيا حاجة
غلط، دورت المفتاح في الباب فاتفتح على اخره، ماكنتش
مستوعب الموقف وفضلت اسأل نفسي هو ليه كذب عليا وقالني
انه ماعملش حادثة مدام مفتاحي وحاجتي كانوا في عربيته؟ وليه

أنكر أصلا انه يعرفني! كان في أسئلة كثير في دماغي محتاج اجابة عنها بس مش هينفع أشغل بالي بيها عشان ورايا شغل كثير. قعدت على الكرسي ومن الصداع غمضت عينييا. كنت سامع صوت انفجار قريب أوي مني، جسمي كله اتنفض وخبط في الأرض فجأة، حاولت أفوق وأفتح عيني بس ماكنتش قادر ومرة واحدة حسيت ان فيه ايد ماسكة كف ايدي وسمعت صوت بيهس جنبي وبيقول...
-أرجوك يا محمد فوق بقي أنا مش قادرة أستحمل كل الغياب ده.

حسيت اني متأثر أوي وعينييا بدأت تدمع، وفجأة ...

فتحت عينييا شوفت ميرنا وهي قاعدة قدامي، كنت مبسوط انها أول حاجة شافتها عيني، بس لما بصيت حواليا استغربت، مش عارف أنا ايه اللي جابني هنا، كنت في أوضة في مستشفى، لما ميرنا حست بحركت مسحت دموعها وباست ايدي وقالتلي...

-أخيرا، الحمد لله انك فوقت، أنا كنت عارفة انك قدها. غمضت وفتحت كذا مرة، لقيتها فتحت الباب وطلعت تجري من الاوضة وهي بتنادي...
-دكتور بسرعة محمد فاق.

غمضت عينييا من كترالتعب اللي كنت حاسس بيه، صوت الدوشة خلاني أفتح عيني ثاني، كان بابا وميرنا والممرضة واقفين قدامي

- بصيت لبابا باستغرب وقولتله بتعب...
-بابا هو فيه ايه أنا بعمل ايه هنا؟ وايه اللي حصلي؟
الدكتور دخل الاوضة وقال...
-حمدلله على سلامتک.
- حد يفهمني أنا بعمل ايه هنا؟
- بص يا مجد أنت معانا هنا بقالك بالظبط ٣ شهور .
- ليه؟ أنا مش فاکر أصلا اني جيت المستشفى.
- اهدى بس وقولي انت آخر حاجة فاکرها ايه؟
- كنت في المكتب وغمضت عینيا ونمت شوية.
- لا .
- لا ايه مش فاهم.
- أنت في أول يوم شغل لیک طلعت من الموقع وفضلت
ماشي لحد ما دخلت حقل ألغام وانفجر فيک لغم، عارف حقيقي
ربنا بيحبک انک عايش لحد دلوقتي.
-أنت بتقول ايه يا دكتور؟ الكلام ده ماحصلش خالص.
- مش أنا اللي بقول، رجب هو اللي قال الكلام ده.
- رجب ده عامل معانا في المشروع .
بابا اتکلم وقال...
-ماهو يا مجد يا ابني رجب ده كان مستغرب انک ما
مارضتش تبات معاهم في السكن، أنت سيبت شنتتک ومشيت
وبعدها روحت الشغل تاني يوم عادي، فقرر يراقبک عشان
يشوف انت قاعد فين وكده، ولقاك ماشي بعد ما خلصتوا شغل
لحد ما دخلت في حقل الالغام، حاول يوقفک بس أنت
مستوحاة من أحداث حقيقية

ماسمعتوش وكملت لحد ما انفجر تحتك لغم ورضاه هو اللي طلب الاسعاف وجابك هنا.

- لا لا ده مستحيل، أنا خدت شنطتي وروحت قعدت عند واحد عرفته صدفة هناك اسمه وليام ومامته اسمها تريز وهو اللي وصلني الصبح للشغل، ده حتى خرجت معاه من الشغل وكان سابق العربية اللي عملنا بيها الحادثة، أنا مافيش لغم انفجر فيا. الدكتور بص لوالدي وقاله ...

-الي محمد مر بيه ماكنش سهل، هتلاقيه بيقول حاجات كتيرة أوي ما حصلتش، حاولوا بس تكونوا جنبه وماتسييهوش لوحدها ولا تضايقهو عشان حالته ماتنتكسش.

- أنت بتقول ايه يا دكتور؟

- آخر مرة كنت في شغلك امتي؟

- امبارح بتاريخ ٢ يناير.

- النهاردة ٣ ابريل يا محمد.

- ازاي؟

- انفجار اللغم للأسف كان سبب في بتر رجلك الشمال، عملك كمان تشوه في جزء كبير من وشك عشان كده عملت ترقيع، ولما عملناك أشعة، ظهر ان الانفجار اللي حصل اثر على دماغك لما اتخبطت؛ ده عملك وذمة دماغية ممكن هي اللي تكون ماثرة على الذاكرة عندك.

- يعني ايه مافيش وليام وتريز؟ أنا مش فاهم انتوا ازاي بتحاولوا تقنعوني اني في المستشفى من ٣ شهور، أنا حافظ مكان

البيت ولون العربية وكل التفاصيل اللي جواه، حتى ملامح وليام نفسه.

- كل اللي أنت بتحكيه ده من عقلك الباطن مالوش وجود أنت ماتحركتش من المستشفى من أول ما دخلتها.
- أنا عايز أخرج يا دكتور من هنا.

-هتفضل تحت الملاحظة يومين وهكتبك على خروج لما نظمن عليك.

بعد ما الدكتورمشى بابا بصلي بحزن وسابنا وخرج، كان فاضل معايا ميرنا اللي كانت الدموع مغرقة وشها، الممرضة خبطت ودخلت وهي بتزق كرسي بعجل وقالتي...
-الدكتور باعتهوالك ممكن تنزل الجنية، تغير جو لو حبيت.

-ياريت أرجوكي.

ميرنا والممرضة ساعدوني اقعد على الكرسي وخرجنا من الاوضة عشان نركب الاسانسير، كنت حاسس اني في كابوس وهصحى في أي وقت منه عشان كده ماكنتش متأثر بكلام الدكتور عن رجلي اللي اتبترت ولا وشي اللي اتشوه وعملوله تجميل لاني عارف اني هفوق وهلاقي الدنيا تمام، ركبنا الاسانسير اللي كان كله مرايات، بصيت بطرف عيني وأنا خايف في المراية الي جنب ميرنا واتصدمت.. معقول وشي بعد عملية التجميل يبقي نفس وش وليام بكل ملامحه.

دخلت في نوبة هياج فظيعة، ماحدث عرف يسيطر عليا الا لما ادوني حقنة مهدأة تقريبا كان اسمها مش غريب عليا

ميدوزولام باين، لما صحيت طلبت من بابا يديني الموبايل بتاعه ولما بصيت فيه شوفت برضو وش وليام، غمضت عينا وخذت قرار اني ما اتكلمش لحد ما اطلع من المستشفى، عشان ماحدث يقول عني مجنون، في اليوم اللي طلعتنا فيه طلبت من بابا قبل ما نمشي من البحر الاحمر نروح مكان معين، ماكنش فاهم حاجة بس أنا كنت محتاج أتأكد من اللي مریت بيه في برنيس، العربية وقفت على الطريق فتحت الشباك وبصيت منه، كنت شايف بيت من دورين وفي عربية لادا حمرا مركونة جنبه، ميرنا بصتلي باستغراب وقالتي...

-في ايه يا محمد؟ مالك بتبص على ايه؟

-على البيت اللي ماحدث مقتنع بوجوده!

-هو فين؟

-هناك أهوا!

-مافيش حاجة هناك يا محمد دي صحرا.

-مش ناقص استظراف في بيت دورين وجنبه عربية.

-والله مافيش حاجة.

بابا سمعنا فسألته اذا كان شايف البيت ولا لا فبصلي

باستغراب وقالتي...

-بيت ايه يا حبيبي؟ دي صحرا ما فيهاش حاجة.

بصيت تاني للبيت وبصيتلهم باستغراب وبلع ريق

وسكت، ولحد دلوقتي أنا ما عنديش تفسير لي حصل.

للعلم أنا قوايا العقلية كويسة، رجعت شغلي القديم في

القاهرة بعد فترة طويلة لما ركبت طرف صناعي، قدامي شهرين

خلاص على الفرح، أكيد هتسألني ايه اللي خلاك تحكي كل ده
طالما تجاوزت ورميت ورا ضهرك وعديت، خليني أقولك ان
المشروع اللي أنا كنت شغال فيه في برنيس لسه ما اتسلمش، من
كام يوم لقيت رقم غريب بيتصل على والدي، طلع رجب وطلب
يكلمني وقال...

-في واحدة اسمها تريز جت سألت عليك وقالت انها أم
وليام وانه مارجيش من يوم ما سافر ومحتاجك تدور معاها عليه!

خمسة جنت

كل حاجة كانت متلخبطة، مش عارف وصلت للنقطة دي ازاي؟ أنا اللي عملت كده، أنا السبب أنا السبب في كل اللي حصل.

روحت البيت يومها لأبويا وأنا فرحان بنتيجة الثانوية العامة، أخيرا حققت حلمه وهدخل كلية تفرحه، ده كان فاقد في الأمل وبيقول اني مش وش علام.

أنا اسمي وائل أبويا وأمي منفصلين، أمي ماستحملتش انها تشيل مسؤوليتي فسابتني لأبويا واتجوزت وعاشت حياتها، أما هو فاشتغل ورديتين عشان يربيني ويكبرني، كان بالنسبالي أب وأم وصاحب وكل حاجة، في ناس كتير قالوله انت مش حمل مصاريف العلام بلاش منه وخليه يشتغل ويساعدك بس هو رفض وأصر اني اكمل تعليم وماكتفيش بالاعدادية عشان مابقاش زيه، عارف انه بينحت في الصخر عشان بيقوم الصبح يحضرلي الفطار وينزل الشغل واما يرجع يعمل الغدا وناكل وينزل تاني الشغل ويرجع بالليل لو فيغسيل او ترويق يخلصه وبعدها ينام زي القليل، كل يوم بيعدي بالشكل ده ، قالوله اتجوز بس هو موافقش وكان ابسط رد للجميل اللي عمله معايا فاني اشرفه وارفع راسه واذاكر كويس ، كفر صقر كلها كانت بتحلف بأخلاق وائل

ابن عزيز وودي حاجة كانت مفرحة وده كان كفاية عندي، ذاكرت واجتهدت وعملت كل حاجة أقدر عليها ده أنا حتي كنت بعمل ملخصات لصبري ابن العمدة واديها له عشان يديني الورق بتاع الدروس الخصوصية اللي بياخدها، مش هقول كنا شله مع بعض لأن هما كانوا من كبارات البلد وأنا ابويا يادوب حته عامل في المستشفى بتاعة البلد بس أنا كنت عارف اربطهم جنبي كويس بالملخصات اللي كنت بعملها لهم، حتي في وسط الدروس اللي كانوا بياخدها من غيري كانوا بيسقطوا، دخلت على أبويا يوم النتيجة ووقفت قدامه وقولتله...

-أنا جيبت ٩٨% يا عزيز .

-ماتهرز رش يا واد يا وائل وقول جبت كام؟

-والله زي ما بقولك كده وان شاء الله هدخل طب وهتبقى أبو الدكتور.

عينيه دمعت وبصلي وقالى...

-لو بتعمل فيا مقلب مش هسامحك والله .

-والله يا ابيه مش مقلب .

-اومال مافيش زغاريد في البلد ليه هو ما حد نجح غيرك؟

-ههههههه لا يا حج ، دول مكلميني من المحافظة

والمحافظ بنفسه باركلي عشان من الاوائل .

-يا مننتا كريم يا رب ، الحمد لله تعبي فيك مارحش على

الفاضي.

-هردلك كل اللي انت عملته اضعاف يا ابيه .

-أنا مش مستني رد منك أنا عايزك ترفع راسي.

- هرفع راسك وهبقي الدكتور وائل عزيز.

-ده يوم المني يا غالي.

فضلت قاعد جنبه في اليوم ده وتاني يوم اما النتيجة بانث والكل عرف اني من الاوائل جم يباركوا لابويا ويهنوه، وبعد ما كل ده خلص روحت أشوف العيال صحابي ، الشله اياها صبري ابن العمدة وأحمد ومؤمن قرايب مرات المأمور بتاع القسم ، مجاميعهم كانت كويسة بس أنا كنت أعلي منهم كلهم ، اتبسطت أوي لما العمدة قابلني وقالي ...

- ازيك يا دكتور وائل عامل ايه وأبوك عامل ايه

زمان الفرحة مش سيعاه دلوقتي؟

- والله يا حضرة العمدة مش مصدق نفسه.

- الحمد لله يا ابني لكل مجتهد نصيب وانت طيب

وبتجتهد، ان شاء الله كلكوا تدخلوا الكليات اللي عايزنيها.

- هو أنت زعلان عشان صبري مش هيلحق طب؟

- مش هخبي عليك يا ابني كنت زعلان بس دي

حكمة ربنا هو قال هيدخل طب بيطري لعل وعسي يعرف يتعامل

مع البهايم اهي هتبقي شبهه.

- ان شاء الله هيبقي زي الفل وأهو كله طب.

- طيب يلا مش هعطلك ادخلهم هتلاقهم

متجمعين في المنذرة.

دخلت لقيتهم قاعدين ويضحكوا والدنيا تمام معاهم ،

سهرنا يومها وكل واحد روح داره والايام عدت والتنسيق فتح

وقدمنا واتقبلنا انا اتقبلت في طب بشري، وصبري طب بيطري

وأحمد دخل صيدلة ومؤمن علوم ، أحسن حاجة في الموضوع ده كله أننا دخلنا جامعة واحدة وبدأنا نخطط للسكن لو ماجتلناش مدينة ونشوف هنعمل ايه؟ أنا عارف ان مستوايا المادي اقل منهم كلهم، بس خلاص كلها كام سنة واتخرج وابقى دكتور قد الدنيا وارحم ابويا من المرمطة في الشغل ، أول يوم دراسة بعد المحاضرات اتجمعنا وروحنا نشوف المدينة هندخلها الاول ولا بعد فترة من الدراسة واتفاجئنا ان المأمور قريب أحمد ومؤمن متوسطننا في المدينة ومجمعنا كلنا في مكان واحد وعاطينا صالون نقعد فيه، صالون ده زي الاوضة بس واسع شويتين، خدناه احنا الاربعة بس في اخر لحظة جابولنا واحد خامس من بلدنا هو كمان بس ماكنلوش خلطة بينا ، كان في كلية اداب وفي حالة، كل واحد عمل ليستة باللي ناقصة وهيجهيه وروحنا البلد، دخلت يومها على ابويا اللي كان نايم ، مارضتش اصحيه فضلت قاعد محتار مش عارف اقوله ازاى ، الطلبات دي هتبقى تكاليف زيادة عليه، فكرت انزل اشتغل اي حاجة عشان اعرف اجيب حاجة من اللي محتاجها للسكن، بس اكتشفت ان الوقت مش هيساعني أنا يا دوب قدامي اسبوع علي ما اروح واستقر في الجامعة ومش هعرف اجي البلد هنا الاكل فين وفين ، كنت قاعد افكر في حا مناسب ، ما حستش بيه لما صحى وجه قعد جنب ، هزني وقالى...

- يا واد بكلمك من بدري فيك ايه مالك مهموم

وسرحان كده ليه؟

- مافيش حاجة يا ايه.

- لافيه وواضح ان فيه حاجة كبيرة شغلاك كمان ، انطق وريح بالي.
- محتاج شوية طلبات عشان السكن بتاع الكلية خلاص هنبداً ونقعدوا فيه من الأسبوع الجاي.
- طيب وايه اللي مزعلك كده؟
- بقولك عايز طلبات يعني فلوس واحنا حالتنا زي الزفت.
- مالكش دعوة سييها على الله ، اربي حمولك عليه وهو هيدبرها.
- ونعم بالله.
- تاني يوم الصبح لقيت ابويا بيصحيني من النوم ويبسألني على الطلبات اللي محتاجها للسكن، فقولتله على الحاجات وكملت نومولما رجع بعد الظهر كان شكله مضايق أوي فقعدت جنبه وقولتله...
- مالك يا ابيه في ايه؟
- مافيش يا ابني.
- هتخبي علي ابنك الدكتور.
- يظهر اني كان مفروض احلم على قدي زي ما قالولي، بس أنا كنت عايزك أحسن الخلق.
- يا ابيه لو على الطلبات أنا مش عايزها هروح واجي مش هسكن.
- مهو كده هتبقي مصاريف زيادة برضه، ماتشلس هم أنا هحاول أدبرلك الدنيا وان شاء الله خير.

كل يوم بيوعي كنت بشوفه مهموم زيادة عن اللي قبله
وقلبي كان بيوجعني عليه لكن مافيش بايدي حاجة اعملها ، وقفي
يوم دخل عليا وقال...

- تعالى شيل معايا الحاجات اللي قدام الباب .
اول ما طلعت من البيت لقيت اغلب الطلبات اللي كنت
طالبها منه موجودة قدام الدار، بصيتله بفرح وروحت حضنته
وبوست راسه وقولتله...

- شكرا يا حج الله يخليك ليا، ربنا ما يحرمني منك.
كان جايبلي حاجات ماتخيلتش اني اشوفها في يوم من
الايام الحلل كانت نضيصة أوي والبطانية كان شكلها جديد بصيتله
وقولتله...

- كلفت نفسك ليه يا ايه؟ كانت اي حاجة
مستعملة هتقضي الغرض، لازم يعني تجيب جديد.
- من نفسي ده انت ضنايا الوحيد، هو أنا ليا غيرك
يا وائل.

- ربنا يخليك ليا يا ايه، بس هو أنت جبت كل ده
منين ؟

- مالکش دعوه بقى هو أكل وبحلقة ولا ايه!
- لا والله بس عايز أعرف انت جبت الفلوس دي
كلها منين ، باين ان الحاجات دي غالية أوي.
- انت رايح تقعد في وسط عيال ناس من كبارات
البلد مش هخليك تحس انك اقل منهم.
- ربنا يخليك ليا.

دخلنا الحاجات جوه البيت وكنت فرحان أوي ومش قادر اصدق نفسي، بدأت أجهز الشنط والأيام اللي كانت فاضلة عدت بسرعة وسافرنا الجامعة بس روحنا الأول على المدينة، كل واحد حدد السرير والدولاب اللي هياخده وقفلنا الباب وخرجنا على كلياتناولما خلصنا محاضرات اتقابلنا في المطعم بتاع المدينة كلنا وطلعنا الاوضة لقينا محمود قاعد علي الباب هو ده كان الخامس بتاعنا، بس ماחדش فينا توقع انه يجي دلوقتي، فتحنا الباب ودخلنا كلنا وبدأ كل واحد فينا يرص حاجته ويرتبها، ولما خلصنا قعدنا ماكناش لاقين حاجة نعملها وماينفعلش نخرج بعد الساعة ٦ من المدينة، قسمننا نفسنا وفضلنا نلف في المدينة ونتصور وفي الاخر رجعنا تاني الاوضة لقينا صبري ماسك صندوق دومينو وقاعد بيعد في القطع، فرح أوي لما لقاهم ٢٨ قطعة ونادي علينا وقالنا...

-تعالوا نلعب دومينو ولا مش بتعرفوا؟

قولتله باستغراب ...

-أنت ابوك عارف انك جايب معاك دومينو؟

-لا انا لقيته هنا في اخر أوضة في الدور ده.

-ماتعملناش مشاكل مع صحاب الاوضة احنا لسه بنبدأ

السنة.

-الاوضة ما فيهاش حد ولا حتي فرش ، أنا لقيته مركون

فخدته ، هنلعب بيه شوية ونرجعه مكانه تاني عادي.

-ماشي خلاص.

ضمينا سريرين على بعض واتغطينا ببطانيتي بما انها كانت
أكبر بطانية وقعدنا نلعب سوا بس محمود كان قاعد على سريره
ويراقبنا في صمت، ناديت عليه وقولتله...

-تعالى العب معنا.

-مش بعرف.

-هنعلمك تعالى بس.

جه قعد جنبنا، وبدأنا نعلمه طريقة اللعب، كنت حابب
انه يندمج معنا بدل ما هو شكله مقفول على نفسه كده، خلصنا
لعب وبدأ النوم يخطف منا واحد ورا التاني فقفلنا صندوق
الدومينو وكل واحد راح سريره وطفينا النور، حطيت راسي على
المخدة وحاولت أنام بس صوت نفس محمود اللي كان عالي
ضايقي، قومت فعدت وفضلت باصصله، هو ماكنش نايم، كان
ممدد على السرير وحاطط ايديه على ودانه، قومت وقربت منه
وهزيتيه من كتفه فقام مفزوع ومسك ايدي زي الاطفال وقالي...

-أنت سمعته يا وائل صح؟

-سمعت مين؟

-اللي كان واقف جنب السرير وقالي تعالى معايا!

-ماكنش في حد هنا يا ابني؟ أنت كنت بتحلم!

-لا لا أنا شوفته وشه كان مسلوخ وعينيه طالعه لبره ونازل

منها دم .

-أنا صاحي والله لسه مانمتش، لو كان في حد هنا كنت

خدت بالي أنا ماعرفتش اغمض من صوت نفسك لانه كان عالي.

- والله العظيم كان هنا، وربنا كان هنا.

الشباب قاموا على صوت محمود وهو بيعيط ، حاولت
أهديه بس خلاص كانوا فاقوا ، اتملوا حواليه وسألوه عن اللي
حصل فقالهم...

-أول ما دخلت السرير سمعت صوت حد جنبي على
اسرير بيهمس في ودني ، فغمضت عيني وحاولت أشغل نفسي بس
للأسف لما فتحت لقيت واحد مشوه واقف جنب السرير من
ناحية راسي وكان بيقول كلام غريب أوي خلاني أصدع ، ماكنتش
قادر اتنفس ولا اسيطر على نفسي كل اللي عملته اني حطيت ايدي
على وداني عشان ماسمعش صوته لحد ما لقيت وائل هو اللي
قداامي.

ساعتها كلهم بصولي وقالولي...

-أنت عامل في الواد مقلب؟

-أبدا والله، أنا حتي مانمتش، سمعت صوت نفسه العالي
قومت قعدت وفضلت اراقبه، ولما خوفت عليه وقفت قدامه
واول ماشافني مسك في ايدي وقعد يقولي كان في حد هنا ومش
عارف ايه بس انا لا شوفت حد ولا سمعت حاجة من اللي بيحكي
عنها، بصوله من فوق لتحت وسابوه وكل واحد فيهم دخل سريره
وصبري بصلي وقاللي ...

-اطفي النور ياعم وبطلوا شغل عيال بقى.

- حاضر يا صبري.

محمود مسك ايدي تاني وفضل يترجاني اني مطفئش
النور وأفضل صاحي معاه لحد ما يهدى بس أنا كنت شايف انه
الموضوع عادي كابوس وهو بيهول، فطفيت النور وحاولت أنام،

صوت عياطه وشهقاته كانت عالية أوي فحطيت مخدة على دماغي عشان أعرف أنام، صحيت الصبح وكانوا كلهم نايمين ما عدا محمود ماكنش في سريره فقولت لنفسي يمكن نزل يشوف محاضراته، دخلت الحمام وغيرت هدومي وصحيتهم عشان يلحقوا محاضراتهم بس قالوا انهم هيناموا عشان كانوا متفقين انهم يطلعوا يتفسحوا بعد الظهر فنزلت وسيتهم بعد أول محاضرة بصيت في تليفوني عشان اشوف الساعة لقيت أكثر من خمسين مكالمة منهم، طلعت بره القاعة ورزيت عليهم صبري رد عليا وهو منهار وقال...

-تعالى بسرعة في مصيبة.

-يا عم أنا عندي محاضرات مهمة.

-انجز وتعالى في مصيبة.

كنت حاسس بقبضضة في قلبي من كلامه، سببت المحاضرة ورجعت المدينة لقيت صبري واقف جنب البوابة أول ما وصلت شدني من ايدي على جنب وقالي...

-هو الواد محمود راح فين امبارح؟

-ماعرش أنا حطيت المخدة على دماغي عشان أعرف

أنام ولما صحيت ماكنش في سريره.

-لقوا جثة مشووه في الحمام اللي جنب الأوضة اللي انا

خدت منها صندوق الدومينو يا وائل .

-طيب أنا مش فاهم حاجة احنا ايه علاقتنا بالجثة!

-دي جثة محمود.

-نعم ؟ اللي هو ازاي ده؟

-زي ما بقولك كده ، أنا مش عارف ايه اللي بيحصل بس
خايف.

-ماتخافش يا ابني احنا ما عملناش حاجة، احنا كلنا اتعرفنا
على الجثة ، مافضلش غيرك احنا رنينيا عليك كتير عشان تيجي ،
المفروض هتدخل تشوفه وتطلع تأكدلهم ده محمود ولا لا.
-طيب.

حاولت امسك نفسي ودخلت على ادارة المدينة وهناك
طلع معايا مشر دخلني أوضة كان فيها سرير واحد وعليه ملايه
مغطية الشخص اللي ممدد عليه، المشرف قرب وشال الملايه
فبصيت لمحمود بصدمة عينيه كانت طالع له لبره نص وشه كان
مشوه وجلده دايب زي الراجل اللي وصفه بالظبط، جسمي
اتنفض وحسيت اني مش قادر اخد نفسي فالمشرف طبطب على
كتفي وقال...
-اتعرفت عليه؟
-أيوه هو محمود.

قبل ما يغطي وشه لاحظت ان جبينه مكتوب عليها ح ا
ب س ، ماكنتش فاهم حاجة بس خرجت من الاوضة وأنا مش
شايف قدامي من كتر العياط، طلعت أوضتي وقعدت علي السرير،
كل واحد كان متكوم علي نفسه وسرحان في اللي حصل لمحمود ،
ماحدث عنده تفسير لحاجة من اللي حصلت من امبارح للنهارده،
بس المشرف دخل علينا فجأة وقال ...

-ماحدث يفتح بوقه منكم بكلمة ولا اللي حصل يطلع
بره، المدينة دي في ولاد يامه قاعدين فيها مش عايزين نشردهم،

ادارة المدينة هتحل الموضوع ده وهتبليغ أهل محمود انه مامتش هنا واياك حد فيكم يكذب اللي هيتقال.

بصينا لبعض بعد ما سابنا وخرج من الاوضة بس
ماحدش قدر ينطق ولا يتكلم، دفنت وشي في المخدة وحاولت
اغمض عيني بس قبل الفجر صحينا كلنا علي صوت عياط مؤمن
صاحبنا اللي في علوم كان بيصرخ وبيقول ...
-ابعدوا محمود عني أنا مش عايز أروح معاه.

الغريب في الموضوع اننا لما ولعنا نور الاوضة ماكنش في
حد موجود أصلا ، مؤمن بس هو اللي كان قاعد علي سرير تحت
البطانية بتاعته وبيتنفض من كتر الخوف ، حاولنا نهديه على قد
ما نقدر وفضلنا سهرانين جنبه لحد الصبح ونمنا كلنا ولما صحينا
كان وش مؤمن مخطوف وأصفر فصبري اقترح علينا اننا ناخده
ونخرج نغير جو وفعلا بعد شوية خرجنا رغم انه كان معترض انه
يسيب السرير وقالنا...

-سيبوني اموت على السرير .

غصبنا عليه وخذناه وخرجنا روحنا ماك بس ماحدش كان
ليه نفس ياكل اصلا وطلعنا منها على سينما، احنا ماكانش
مبسوطين بس حاولنا على قد ما نقدر نطلع مؤمن من المود اللي
كان فيه ، بس هو فضل سرحان ومكتتب لحد ما علاء قالنا ...

-هو فيه هنا ملاهي؟

-تقريبا اه فيه بس بتسأل ليه؟

-مؤمن ابن عمي لما أمه كانت تزعله أبوه كان بيوديه

الملاهي تعالوا نروح يمكن يفك.

-ماشي يلا بينا.

طلعنا على الملاهي فعلا في اليوم ده وحاولنا نسبته على
قد ما نقدر بس لما جم يركبوا الساقية سيبتهم لوحدهم ووقفت
مستنيهم عشان عندي فويا من المرتفعات، مؤمن وأحمد
وصبري ركبوا في عربية واحدة والساقية بدأت تتحرك، ماعرفش
ليه قلبي كان مقبوش ومش مطمئن بس لفه في الثانية القلق بدأ
يختفي من جوايا لحد ما سمعت صوت صريخ جاي من فوق ولما
رفعت عيني شوفت منظر خلى الدم يتجمد في عروقي ، ماكنتش
مستوعب اللي بيحصل أصلا بس فضلت باصص ومتتح كان في
حديدة كبيرة معدية من بطن مؤمن وطالعه من ضهره جسمه
فضل متعلق بالشكل ده، كنت سامع صريخ صبري وأحمد من
فوق كل الناس اللي كانوا في الساقية وشافوا المنظر ده فضلوا
يصرخوا، وقفت تحت مؤمن كان بينا مسافة كبيرة بس بدأت
أكلمه وانادي عليه بصوت عالي، حاولت اطمنه على ما الاسعاف
توصل، مؤمن كان لسه جي ويحرك ايديه فقولتله...

-مؤمن ماتخفش احنا كلنا هنا مش هيحصلك حاجة.

مرة واحده حسيت ان في حاجة نزلت علي وشي مديت
ايدي عشان امسحها واتفاجئت ان ده دم ، حاولت اني اتمالك
أعصابس بس فجأة الساقية اتحركت وجسم مؤمن اتفصل نصين
ووقع عليا ، كنت مصدوم مش عارف ابلع ريقى، غمضت عينيا
ماقدرتش أبصله وهو كده، ولاد الحلال جروا وشالوه عني ، كل
هدومي كانت اتغرقت بالدم ووشي كمان، بصيت حواليا وانا قرفان
من نفسي بس لما ركزت مع جثة مؤمن لقيت ان نصه الفوقاني

هو اللي وقع عليا، وكان شبه محمود أوي وشه كان مهري ومسلوخ
وعينه طالعه لبره وبتنزف وجينه كان مكتوب عليه ح ا ب س
يالهوري ده نفس اللي كان مكتوب على جين محمود لما مات،
حسيت اني داخ والدنيا بتلف بيا، كل اللي كنت شايفه حواليا هو
الدم، حسيت ان عيني مزغلله ومصدع أوي وفجأة وقعت من
طول وأنا سامع صوت صبري وأحمد وهما بينادوا عليا.
-يا وائل وائل.

فتحت عيني بفرع وبصيت حواليا بخوف كان صبري اللي
قاعد جنبي واول ما فتحت قرب مني وقال...
-حمد لله على سلامتكم يا وائل .
-هو ايه اللي حصل؟ مؤمن مات بجد ولا ده كابوس؟
طمني الله يخليك.

سكت شوية وبعدين قالي...
-بصراحة كده مؤمن تعيش أنت.
-يعني اللي حصل ده ماكنش كابوس؟
بصيت على ايديا اللي كانت بتترعش، وماكنتش قادر اخد
نفسي من كتر الخوف بس فجأة حط ايده على كتفي وقال...
-اهدى يا وائل.

-هو ايه اللي بيحصل ، الاول محمود ودلوقتي مؤمن في
حاجة غلط .

فضلت أصرخ وأقول في حاجة غلط لحد الممرضات ما
دخلوا كتفوني وادوني حقنة مهدأة ساعتها الدنيا ضلمت في عنيا
وحسيت ان روحي بتروح...

كنت ماشي في صحرا واسعة وعطشان أوي وفجأة لقيت
نار وحواليها تلاته اتنين كانوا لابسين عبايات حمرا ومدارين وشهم
والتالت كان من غير حدوم يادوب لافف جسمه بشال وداهن
راسه باللون الابض، قربت منهم لحد ما وقفت جنبهم وقولت...
-شوية مائة لو سمحتوا عشان تايه وعطشان.
قام الراجل وبصلي وقرب مني ومد ايده بحاجة فخار كده
وقالي...

-اروي عطشك ، طريقك كان طويل بس هانت.
ماكنتش فاهم هو بيقول ايه بس مش مهم قررت أشرب
وخلص ومع أول بوق شربته حسيت ان الطعم متغير دي مش
مايه مستحيل ، بعدتها عني وشمته لقيت ريحتها غريبة فمديتها
للراجل وقولتله...
-شكرا خلاص مش عاوز مايه.

وقبل ما امشي مسحت بوقي لقيت علي ايدي دم، بصيت
للراجل لقيته واقف قدامي وبيضحك بس عينونه كانت فاضية
النيني مخلوع منها، اتنفضت من مكاني ورجعت كذا خطوة لوره
لحد ما اتكعبلت ووقعت علي ضهري وفضلت أزحف لورا، الاتنين
اللي كانوا لابسن احمر قاموا وقفوا جنب الراجل وشالوا الغطا من
علي وشهم مابقتش قادر ابلع ريقني دول كانوا مؤمن ومحمود،
فضلوا يقربوا مني وكانوا هيخنقوني بس فجأة في نور ظهر في
المكان وسمعت صوت بينادي عليا من بعيد...

فتحت عينيأ بضعف كان أحمد و صبري جنبي وشكلهم متأثر أوي ، لما فوقت ثالولي في نفس واحد...
-حمد لله على سلامتكم يا وائل.
-هو ايه اللي حصل لمؤمن انتوا مش كنتوا معاه؟ ازاى وقع.

-الدكتور قال مانتكلمش في حاجة هتتعبك.
-أنا محتاج افهم ايه اللي حصل؟ من فضللكوا.
اتكلم صبري وقال...

-احنا كنا راكبين عادي ده حتى كان بدأ يفك ويضحك بس مرة واحدة قام من جنب أحمد وقالي اقعد مكاني ، كان قاعد قدامنا لوحده طبيعي جدا ، فجأة بدأ يحط ايده على وده ويسدها ويعمل تصرفات غريبة، حاولنا نهديه شوية فهددنا اننا لو قربنا منه هيرمي نفسه وفي نفس اللحظة اللي قال فيها كده الساقية وقفت فوق وما اتحركتش من مكانها وفجأة قام وقف علي حرف الكرسي وقال خلاص يا محمو هجيلك اسكت بقى وقام ناطط من العربية بس ماوقعش علي الارض ده جسمه اخترق الماسورة الي في الجنب وفضل متعلق شوية كده لحد ما الساقية اتحركت من نفسها وفصلته نصين، نص وقع عليك والنص الثاني اتهرس واتحول لقع لحم صغيرة.

ماكنتش مستوعب اللي بيتقال وحسيت اني مش قادر اخذ نفسي بس فجأة أحمد نطق وقال ...
-أنا همشي مش هستني اما الدور يجي عليا وأموت زيهم ، هروح اقعد في البلد.

فقولتله...

-بس لازم نعرف سبب اللي بيحصل ده الاول وبعد كده
اللي عايز يمشي يتفضل، مؤمن ومحمود كان مكتوب علي جبينهم
نفس الحروف.

-أنا مابقتش فاهم حاجة ومع ذلك من أول موت مؤمن
وأنا خايف وحاسس ان الدور عليا.

-اهدي يا أحمد جايز اللي بيحصل ده صدفة!
نطق صبري أخيرا وقال...

-وجايز ده بسبب الدومينو اللي لعبنا بيها ووديتها مكانها.
-وهي الدومينو هيكون فيها ايه؟
-جايز كان فيها حاجة محبوسة أو جايز ملعونة زي ما
بنشوف في الافلام.

رديت على صبري بعصبية وقولتله...

-أديك بتقول بلسانك زي الافلام.. يعني مش حقيقة
خالص.

-تقصد ايه؟

-أقصد ان اللي حصل مع مؤمن عادي بعد موت محمود،
واحد شاف صاحبه بيموت قدامه، طبيعي يتأثر احنا بني ادمين.
-بس محمود ماكنش صاحبنا أه بنشوفه من بعيد بس
مافيش كلام بين أصلا.

الدكتور دخل عشان يطمئن عليا وكتبلي على خروج ،
وصلنا احنا التلاته المدينة وماكانش عارفين هنبلغ أهل مؤمن في
البلد ازاي بالي حصل، في أسبوع واحد بلدنا خسرت اتنين من

شبابها اللي زي الورد، أحمد اتصل على والده وبلغه بالي حصل وقاله...

-أنا هاجي اقعد في البلد كام يوم كده لحد ما نفسيتي ترتاح.
وفعلا بعد ما خلص المكالمة مع أبوه لم كل حاجت
ووقف على باب الاوضة وودعنا وقبل ما يمشي قالنا...
-لو لينا عمر هنتقابل لو مالناش والدور كان عليا وموت
ماتقعدوش في المدينة وروحوا البلد.

غصب عني عينيا دمعت وبكيت ، افتكرت في اللحظة
دي محمود ومؤمن ونظرات الخوف اللي كانت مسيطرة عليهم،
مشى احمد وفضلت أنا وصبري في الاوضة لوحدا، كل واحد مننا
كان في وادي غير الثاني، صبري كان قاعد يكلم نفسه وانا باصصله
ومش عارف اعمله حاجة فضلت قاعد مكاني لحد ما قام وقف
قداي وقاللي...

-اللي احنا فيه ده لعنه وهتقضي عليا كلنا الموضوع بدأ
بمحمود وسحب لمؤمن ومش بعيد حد فينا يبقى اللي جاي.

-وحل اللعنة؟

-نلاقي صندوق الدومينو.

-تفتكر؟

-ماقدمناش غير كده .

-ولما نلاقيه هنعمل ايه هنقعد نلعب بيه.

-هنشوف فيه ايه يا وائل أو نوديه لشيخ .

-تمام معاك يلا بينا.

بدأنا ندور على صندوق الدومينو في كل اللي الاوض اللي جنبنا، حتى في وولاد بدأو ياخدوا بالهم مننا وسألونا بندوق على ايه؟ فصبري اتسحب من لسانه وقالهم...
-في صندوق دومينو ضايح مننا وبندوق عليه ماحدث شافه.

كلهم قالوا لا فنزلت انا وصبري ندور في الاوض الفاضية اللي في الدور اللي تحت لكن فجأة تليفون صبري رن ولقينا أبوه اللي بيتصلفرد عليه ومرة واحدة لقيته بدأ يدمع وقعد على الارض وفتح الاسبيكر وقاله...

-انت بتقول ايه يا ابيه؟

-زي ما سمعت كده بقولك أحمد صاحب مؤمن الله يرحمه مات وهيندفن مع أحمد هتيجي تحضر الجنازة؟
-مات ازاي؟

-بيقولوا كان نايم في العربية وهما جاينين وفجأة صحى وفضل يصرخ وفتح باب العربية وهي ماشية ونط منها.
رفع راسه وبصلي وفضل ساكت وأبوه عمال ينادي عليه ويقوله...

-أنت معايا يا صبري؟ هتيجي يا ابني الدفنة ولا مش هتقدر؟ لو هتيجي أبعت عربية تاخذك.

قربت من صبري اللي كان قاعد بيعيط على الأرض وخذت منه الموبايل وكلمت العمدة وقولته...
-هاجي أنا وصبري ما تقلقش يا عمدة.

-وائل يا ابني خلي بالك من صبري ، أنا مش عارف ايه
اللي بيحصلكوا ده يا ابني والله.
-خير ماتقلقش صبري معايا هوصله لحد عندك.
قفلت معاه وبصيت لصبري ومديته ايدي عشان يقوم
بس هو فضل قاعد فقولتله...
-قوم مش وقته احنا لازم نلاقي الصندوق الزفت ده ،
الدائرة مابقاش فيها حد غيري انا وأنت.
قام معايا وقبل ما نخرج من الاوضة اللي كنا بندور فيها
ولد من اللي في الدور الي فوق دخل علينا وهو بيلهث وقالنا...
-انتوا بتدوروا على صندوق الدومينو؟
قولتلها بلهفة...
-أه تعرف مكانه؟
-لقيته من كام يوم وسلمته للمشرف ماكنتش أعرف انه
بتاع حد منكوا.

سيبناه واقف في الاوضة ونزلنا جري على المشرف من
غير حتي ما نشكر الولد، وصلنا لمكتب المشرف وخبطنا عليه
ودخلنا قولناله ان الصندوق بتاعنا ومحتاجينه ، فمد ايده في
الدرج واداهولنا ،طلعنا الاوضة ولمينا كل حاجتنا ونزلنا من
المدينة علي الموقف وصلنا البلد على معاد الدفنة ولحقناها
بالعافية صبري طلب مني أنزل معاهم وهما بيدفنوا أحمد
وأكشف وشه عشان نتأكد من وجود العلامة ، الموضوع كان
صعب عليا بس كان لازم نعرف اللي بيحصل ده صدفه ولا لعنة
متسلسلة وهتاخذنا كلنا في سكتها، لما زحت الكفن وكشفت وش

أحمد لقيت وشه متشوه متشوه وعينيه طالعه لبره شوية ومكتوب على جبينه ح ا ب س ، غطيت وشه ولعت ريقى بصدمه وطلعت من القبر بتاعه وقلبي مقبوض ، كنت بسأل نفس الدور علي مني فينا بصيت لصبري اللي شدني أول ما خرجت وقال...
-ها العلامة موجوده.

هزيت راسي لاني ماكنتش قادر اتكلم، روحنا من الدفنة على بيت صبري وخذنا صندوق الدومينو وطلعنا على بيت حجاب ، ده شيخ كده معروف عندنا في البلد انه بركه وبتاع ربنا وليه كرامات ، الستة كانت داخله على ٨ ، خبطنا على الباب لكن ماكنش في حد بيرد فسحبت أنا وصبري كرتونة وقعدنا على العتبة بتاعت بيته وبعد شويه لمحناه جاي من اول الشارع وقف قدامنا وقالنا باستغراب...

-لعله خير مالكم كده قاعدين علي الباب ليه؟

صبري بصله وقاله...

-احنا محتاجين منك مساعدة يا عم الشيخ.

-طيب تعالوا ادخلوا مش معقول هنتكلموا على الباب.

دخلنا معاه البيت، الشيخ حجاب وحيد هو اللي مريينا

كلنا وكان بيحفظنا القران في الكُتاب بتاع البلد، بصلنا وقال...

- الموت بيخطف خطف في لمح البصر وشكلكوا خايف.

فقولتله...

-بصراحة كده الموضوع كبير يا شيخ.

-ازاي فهمني؟

- كل اللي ماتوا دول ماكنتش موتتهم عادية وشهم كن بيتسلخ ويتشوه وعينهم كانت بتبقي طالعه لبره ومكتوب على جبينهم كلمة حروف معينة.

-حروف معينة؟

-ح ا ب س.

-طيب في حاجة معينة حصلت قبل اللي بيجرى ده ما

يبدأ

-بصراحة اه.

-ايه اللي حصل؟

صبري طلع صندوق الدومينو من الكيس وحطه قدامه

وقاله ...

-ده السبب.

الشيخ قال ...

-بِسْمِ اللَّهِ الرَّحْمَنِ الرَّحِيمِ .

قرب من الصندوق وبص عليه ومسكه وفضل يقلب فيه

يمين وشمال وقال...

-ماله ده؟

-من أول ما لعبنا بيه وكل ده بيحصلنا، احنا شاكين ان ده

بداية اللعنة وفيه حاجة هي اللي بتعمل فينا كده.

- هو انتوا جاييينه منين؟

-ل Quincy في اوضة من بتوع المدينة بس ماكنش فيها حد.

-طيب اصبروا..

مسك الصندوق ورفعہ وبدأ يقرأ قرآن ويحرك الصندوق
بس مافيش حاجة حصلت فبصلنا وقال...
-الصندوق مافيهوش حاجة يا شباب ، اللي بيحصل جايز
يكون صدفة من أكثر.

خرجنا من عنده واحنا مش فاهمين ايه اللي بيحصل بس
هو نصحنا نصلي ونلتزم بالقران والاذكار ونروحله من وقت للتاني
وبعد يويمين من دفنة أحمد موبايلي رن وفزعني، قومت
مخضوض لقيت صبري اللي بيتصل ، كنت خايف أرد عليه بس
هو فضل يرن لحد ما رديت عليه...

كان بيعيط وصوته مبوح، وسمعتة وهو بيهمس
ويقول محمود ومؤمن وأحمد عندي ومعاهم واحد أصلع ولافف
شال علي وسطه الحقني يا وائل بعدها يمعت شهقة و...
يتبع...

بطانية الدجال (خمس جثث ٢)

كنت خايف أرد على صبري بس هو فضل يرن لحد ما
استسلمت وفتحت عليه...
كان بيعيط وصوته مبحوح، وسمعته وهو بيهمس
وبيقول...

- محمود ومؤمن وأحمد عندي يا وائل ومعاهم واحد ..
واحد اصلع ولافف شال على وسطه وجسمه مكتوب عليه
طلاسم كتيرة أوي ، الحقني يا وائل الحقني مش عاوز أموت زي
سكت شوية ، كنت متوتر وخايف اتنفضت من على
السرير وفتحت الاسبيكر وخطيت التليفون على السرير وفضلت
أنادي عليه وأنا بغير هدومي بسرعة...
-صبري أنت معايا، سامعني يا صبري اتكلم ، اقرا قرآن
ماتسكتش يا ابني.. يا صبري.

مسكت الموبايل وبدأت أقراله أنا القرآن اللي كنت فاكراه
وساعتها سمعت شهقة مرعبة وقعت الموبايل من ايدي ، فضلت
واقف متنح شوية ومش مستوعب اللي بيحصل بس فجأة
سمعت صرخة واحدة ست من التليفون كانت بتقول...
-صبري لا ، رد عليا يا ضنايا.

قفلت الخط وما اعرفش أنا ازاى كملت لبسي ، طلعت
من البيت جري على بيت العمدة، ماكنتش حاسس بالدنيا من

حواليا، وشوش الناس كان شكلها غريب ، حتى الشوارع كنت حاسس اني أول مرة أمشي فيها وقفت في الشارع وحسيت اني فقدت الذاكرة مش فاكر أصلا دوار العمدة بيروحوله منين ، كنت ماشي زي المجنون بسأل الناس على الدوار لحد ما وصلت وأول ما وصلت دوار العمدة وقفت مصدوم على الباب، ماكنتش مستوعب اللي بيحصل قدامي كل الستات كانت قاعدة لابسة أسود وفيهم اللي بيعيط واللي بيصوت كنت ماشي في وسطهم ومش مستوعب لحد مالقيت نفسي واقف قدام أم صبري ، الحاجة بهية عرفاني وبتحبيني، مسكتني من كتفي وقالتلي...
-ادخل اقعد مع صبري هو مايبحبش الدوشة هتلاقيه حابس نفسه في أوضته.

بصيتها باستغراب ودخلت جري على اوضة صبري لقيت الاوضة فاضية وفي حد على السرير مغطينه بملاية، حسيت بقبضة في قلبي بعد ما كنت هديت من كلامها ان صبري جوه ، قربت من السرير ببطء ووقفت قدامه ورفعت الملاية من على اللي الشخص اللي على السرير، فجأة الدموع نزلت من عينيا كأنها شلال ووقعت على الارض وأنا عيني متعلقة بيه ورافضة تصدق ان صبري مات هو كمان بأبشع الطرق، جسمه كله كان محروق ووشه متشوه وعينه طالعه لبره ومكتوب على

جبينه ح ا ب س ، كنت باخد نفسي بالعافية ومش مستوعب اللي بيجرى حواليا بس فجأة حسيت ان في ايد محطوطة على كتفي فضلت باصص لصبري وبعيط لحد ما سمعت صوت ورايا جمد الدم في عروقي ، مش عارف ده كان

صوت محمود ولا مؤمن ولا أحمد ولا ... صبري! بصيت ورايا
بفزع لقيتهم هما الأربعة واقفين ورايا شكلهم كان مفزع ويخوف ،
كنت حاسس ان جسمي ثقيل ومش قادر أنحرك كانوا واقفين
وماسكين ايدين بعض ويرددوا كلمة واحدة بس في نفس واحد...
-حابس.

بلعت ريتي بصعوبة وبصيت حواليا وبدأت أنشاهد أكيد
هما جاين ياخدوني أنا كمان، كله من صندوق الدومينو ربنا
يسامحك يا صبري أنت السبب في كل اللي أنا فيه ده بس ازاي
والشيخ قال ان الصندوق مافيشوش حاجة، كنت حاسس اني
هتجنن ، الدنيا من حواليا بدأت تلف ودماعي صدع ومابقتش
شاي فقدامي كويس كل حاجة كانت بتدخل في بعضها ، فضلت
أكح لحد ما وقعت على الارض والدنيا بدأت تضلم في وشي
بالتدريج...

حسيت ان جسمي كله بيتهز ، أنا اخر حاجة كنت فاكرها
اني كنت بموت ، معقول موت خلاص وهتحاسب دلوقتي، كنت
خايف أفتح عيني، مرعوب ومش قادر دماغي مصدع وجسمي كله
بيتكسر بس الأصوات اللي كنت سامعها كانت داخله في بعضها
ومش قادر أميزها الا لما سمعت صوت أبويا وهو بيقولي ...
-اوعي تكسر قلبي وتروح زيهم انت زرعتي اللي
ماحصدتهاش فوق يا وائل الله يرضى عنك.

فتحت عينيها ببطء ولقيت في ناس كثير مالمومين حواليا ،
لفيت وشي يمين وشمال لقيت العمدة واقف وأبويا وناس كتيرة
واقفة جنبي وفضلوا يقولوا...

-الحمد لله، حمد لله على سلامته يا عم عزيز .
حاولت أقوم وأقعد بس جسمي كله كان مكسر، مديت
ايدي لأبويا فقرب مني كنت حاسس ان الكلام مخنوق مش راضي
يطلع مني مسك ايدي وقالي...
-اهدي يا حبيبي هتبقى كويس الأعمار بيد الله يا ابني
وصحابك في مكان أحسن دلوقتي.

غمضت عينيها باستسلام ده ماكنش كابوس وعدى
وخلص ده واقع أنا مش عارف أهرب منه، بس يا ترى دوري هيجي
امتى النهاردة ولا بالليل ولا بكره، منا أكيد هموت زيهم؛ لأنني لعبت
معاهم نفس اللعبة ماقدرتش أكمل اليوم معاهم بعد الدفنة، كنت
واقف جنب قبر صبري وهو بيندفن وحاسس اني محبوس في مكان
ضلمة وخصوصا لما قفلوا عليه ومشياوا ، فضلت قاعد جنب قبره
وبعيط مش قادر أستوعب انهم خلاص كده مش هشوف حد
فيهم تاني، بصعوبة وبعد محايلات كتيرة أبويا خدني وروحني
البيت معاه، دخلني اوضتي، قعدت على السرير وفضلت أفكر كل
حاجة حصلت بينا ، صممت في اللحظة دي ان حتى لو هموت
فلازم أكشف اللي حصل عشان مايتكررش مع حد غيرنا ، أسبوع
كامل كل ما كنت بصحى من النوم كنت بلاقي رجليا وخداني للقبر
بتاعه أقعد أكلمه واقراه قرآن وبعد المغرب ما تأذن أخذ نفسي
وارجع على البيت وادخل من سكات اوضتي، كنت بدعي ربنا

يديني أي اشارة توصلني لحاجة وفي يوم الشيخ حجاب قابلني وأنا
مروح بعد المغرب من عند قبر صبري فوقفني وقالى ...
-مالك يا وائل يا ابني ليه عامل في نفسك كده؟
-مش بايدني يا شيخنا والله، كل حاجة باظت.
-ماتشيلش نفسك الذنب كل اللي حصل وهيحصل
مكتوب ومافيش منه مهرب.

-وحتى لو في مهرب ، أنا مش عاوز أهرب يا شيخ كل اللي
عايزه حقهم وليه بيتكتب على جبين كل واحد فيهم ح ب ا س .
-أنا مش علرف يا ابني ايه الحروف دي، بس صدقني
صندوق الدومينو اللي جبتوهولي مالوش أي علاقة باللي
بيحصلكم.

-عادي يا شيخ خلاص هي كده كده هتقفل بعدي أنا آخر
اللعنة .

-اوعي تفقد ايمانك بربنا وتستسلم، تعالى اوصلك بيتك
بدل ما انت تايه كده.

-التوهه الحقيقية هي انك تبقى عايش وعارف انك
هتموت بس مش عارف امتي؟!

-كلنا هنموت يا وائل يا ابني بس معادنا مش معروف،
تعالى يلا تعالى.

وصلني البيت يومها وماسبنيش الا لما أبويا رجعوساعتها
سلم عليه وقاله...

-خلي بالك من ابنك يا عزيز.

ووبعدها سابنا ومشى، أبوبا بصلي ساعتها وخدني في
حضنه وفضل يطبطب عليا ويقول...
-مش عايزك تبقي دكتور، مش فارق معايا اهم حاجة
عندي انك تبقي بخير وكويس يا ابني، ماتفكرش اني مش حاسس
بيك، أنا بسمعك كل يوم بالليل وأنت بتعيط وبتكلم نفسك بس
مش عارف أعملك ايه ومافيش في ايدي حاجة.
-مافيش حاجة يا آبه ، انا بس متأثر من موت صحايي
مش أكثر.

سيبته ودخلت أوضتي وقعدت ورا الباب على الأرض ،
كنت حاسس ان الجو برد أوي فجريت على السرير ودفنت نفسي
فيه، بس برضه جسمي فضل يتنفض، ناديت بصوت ضعيف
على أبويا عشان يشوفلي أي حاجة تانيه تدفيني فجاب لي بطانيته
غطاني بيها وفضل سهران جنبي لحد الساعة ٣ الفجر ، طمنته
اني كويس وطلبت منه يروح ينام عشان يلحق يرتاح ساعتين
ويقوم لشغله ويقدر يواصل، بطلوع الروح وافق وقام راح أوضته
، غمضت عينيأ وحاولت أنام بس كنت سامع صوت همس قريب
مني فتحت عينيأ بالراحة و شوفتهم واقفين حواليا، محمود
ومؤمن كانوا على الطرف الشمال وصبري وأحمد على الطرف
اليمين، الأوضة كانت ضلمة بس هما كل واحد فيهم كان شايل
شمعة في ايده، شكلهم كان يرعب أوي الدود كان طالع من
تجاويف وشهم اللي في أجزاء منه اتحللت، ريحة المكان كانت
معفنة أوي ، فجأة اتحركوا مع بعض وقربوا الشموع من السرير
ولنار لهمت في البطانية ، كنت بصرخ فيهم وبتراجهم ما يعملوش

كده بس لا حياة لمان تناي ، النار لهمت في البطانية وأنا فضلت
أصرخ لحد ما أبويا دخل عليا وهو مفزوع لقي البطانية بتولع وأنا
جسمي متلج ومش بيتحرك من على السرير ، شد البطانية رماها
على الارض وسندني وطلعتني من الاوضة وجري جاب مايه وطفى
النار اللي كانت ماسكة في البطانية وبصلي بغضب وهو بيقترب
مني وقالى...

-النار دي ولعت ازاي؟ كنت عاوز تنتحرا! عاوز تروح

لزمايلك وتسيبني؟

-لا والله أبدا أنت مش فاهم حاجة.

-ماشي فهمني يلا أنا سامعك أهو.

-احنا، أنا بس ماعرفش بس انا حاولت انام وفجأة

حسيت بحرارة وشميت ريحة حاجة بتتحرق ففتحت عينيا لقيت
البطانية بتولع.

-وما اتحركتش وسيبت السرير فضلت قاعد عليه ليه؟

-ماكنتش قاجر اتحكم في جسمي والله خالص.

-أنا مش عارف أعملك ايه؟

-ماتسبنيش يا ابيه، أنا حاسس اني رجعت عيل تاني بخاف

من الضلمة مش عاوز أنام لوحدي ولا عايز اموت زيهم واتعذب.

-بعيد الشر عليك ربنا يحفظك ليا.

فضل قاعد جنبي في الصلاة لحد ما هديت وخدني دخلني

اوضته ونيمني على سريره وحط ايده على دماغي وفضل يقرا لي

قرآن لحد ما روحت في النوم خالص وسمعت صوته من بعيد

بيقولي...

-هنزل الشغل ومش تأخر خد بالك من نفسك
وماتقومش من السرير.

روحت في النوم ماكنتش قادر أقاومه، وبعد فترة صحيت
غصب عني ، كنت مصدع أوي وحاسس ان في مسامير مغروزة في
دماغي، كل حاجة حواليا كانت بتلف بمجرد ما فتحت عينيا
لمحت حاجة بتجري قدامي خرجت من الأوضة، بلعت ريتي
بصعوبة واتحاملت على نفسي وقومت من السرير عشان أشوف
ايه اللي بيحصل، لما طلعت الصاله حسيت ان فجأة في وسط
ضباب ماكنتش شايف قدامي بس كل شوية كنت بسمع حد
بينادي عليا منهم، وقعت على الارض وفضلت أعيط لحد ما
افتكرت كلام الشيخ حجاب قومت وقفت وقلت لنفسي ... كلهم
ماتوا مش موجودين اللي بيحصلي ده وهم واحساس بالذنب
عشان ما قدرتش اعملهم حاجة ولا اساعدهم بس فجأة حسيت
بحد بيلمس ضهري من ورا ومرة واحدة زقني على قدام كنت هقع
على وشي بس ربنا ستر ولحقت نفسي ، كان في حد حوليا في وسط
الضباب اللي مش عارف ده جه منين بيحاول يوقعني فجأة
حسيت ان المكان بقى بارد أكثر والأرضية مبلولة وسمعت صوت
باب بيتقفل، فتحت عيناي وقفلتهم وفضلت أفرك فيهم شوية
وواحدة واحدة كل حاجة بدأت تظهر قدامي ن كنت واقف في
الحمام لوحدي وفي نور ضعيف داخل من الشباك يادوب مخليني
اشوف قدامي ، مش عارف ايه اللي جابني هنا ، كنت واقف في
الصالة أصلا، روحت عند باب الحمام عشان افتحه بس اكتشفت
انه مش بيتفتح، الغريب ان باب الحمام بتاعنا مش بيتقفل من

بره اصلا وما فيش حد عشان يقفله حن بره حتى، في اللحظة دي افتكرت الضل الاسود اللي لمحته في اوضتي اول ما صحيت وحسيت بحركة ورايا بلعت ريتي بصعوبة ولفيت عشان اشوف في ايه، كنت سامع نفس بس مش شايف حد خالص، قلبي كان بيدق بسرعة اوي وحسيت اني داخ ومش قادر اقف على رجلي، كنت بفتكر منظر جثة كل واحد فيهم واللي حصل معاهم كفيديو فلاش باك بيتعرض قدامي، حسيت ساعتها اني خلاص هموت وان دي النهاية، كان اللي فارق معايا وصعبان عليا بس هو أبويا لأن انا اللي حاجة اللي طلع بيها من الدنيا كلها في اللحظة دي شوفت واحد قدامي أصلع ولافف شال أحمر حوالين جسمه كان بيقترب مني وعاوز يخنقني بس فجأة في ايد اتمدت وشدتني...

فتحت عيني لقيت نفسي نايم على الارض جنب المقابر، ماكنتش مستوعب اللي بيحصلني، بصيت حواليا باستغراب بصراحة مش عارف انا جيت هنا ازاى قومت من على الارض ومشيت عشان أروح البيت بس كل حاجة كانت غريبة من حواليا الطريق المقابر والبيوت كل حاجة كان شكلها متغير حتى مكان بيتنا ماعرفتوش، وقفت تايه ماكنش في ناس في البلد خالص حتى دوار العمدة ماكنش موجود، فضلت ادور على الناس وانادي عليهم بس ماكنتش لاقى حد خالص، حسيت بايد بتتحت على كتفي فلفيش وشي وأنا بتنفض من جوايا وفضلت متنح مش مستوعب هو نفس الراجل اللي حكولي انهم شافوه قبل كده وأنا برضه شوفته لافف شال أحمر على وسطه وداهن راسه بلون

أبيض رجعت كام خطوة لوره أصل شكله كان مفرع أوي بس هو ما اتكلمش شاورلي ولف ظهره ومشى، مافهمتش اشارته بس من باب الفضول وانه الوحيد اللي شوفته في البلد مشيت وراه عشان أعرف الناس راحت فين وايه اللي بيحصل ، فضل ماشي فترة طويله لحد ما بعد عن البيوت ، حسيت ساعتها اني خايف ليعمل فيا حاجة أو يأذيني فكنت بمشي بحذر لحد ما وصل لبيت مبني بالطوب من دور واحد وقف قدام الباب ولف وبصلي وقال...

- تعالى كلهم جوه.

مافهمتش كلامه بصيت ورايا كنت مفكر انه بيكلم حد تاني مش أنا بس مالمقتش حد رجعت تاني بصيت على الباب اللي كان واقف لقيت الباب مفتوح بس الراجل مش موجود فقولت لنفسي أكيد دخل البيت ، فضلت متردد شوية ادخل ولا مادخلش بس في النهاية خدت قراري ودخلت البيت عشان أشوفه وأعرف مين اللي جوه اللي اتكلم عليهم أكيد مش قاصده على صحابي اللي ماتوا لأنهم اندفنوا اصلا وزمانهم اتحللوا،

أول ما دخلت البيت بابه اتقفل فجأة لواحد ، حسيت ان الدم اتجمد في عروقي ، بصيت حواليا بفرع وأنا خايف ريحة المكان كانت وحشة أوي، المكان نفسه كان بدائي زيادة عن اللزوم كان في كرسي خشب وحصيرة وكلام غريب مكتوب على الارش بطباشير أبيض او جير وكلام تاني في جنب دم أو بويه حمرا، وفي في اخر الاوضة سرير مفروود عليه بطانيه، قربت ببطء من السرير وحاولت استجمع شجاعتي واشوف ايه اللي تحت البطانية ولما رفعتها كنت متخيل اني هلاقي الراجل تحتها بس ساعتها شوفت

عضم كثير متكوم و٤ جماجم رجعت كام خطوة لوره وسيبت
البطانية من ايدي فوقعت على الارض وفجأة جه الراجل الاصلع
من ورايا وشال البططانية وغطاهم بيها وبصلي وقالي...
-الفضول وحش.

ماحستش بنفسي غير وأنا بسأله وبقوله...

-أنت مين؟

-حابس.

-مين حابس؟

-حابس الساحر هو في حد ما يعرفهوش؟

-أنت اللي قتلت صحابي؟

-أنا اللي هقتلك.

-ليه؟

-اسأل نفسك.

فجأة حسيت ان الحيطان بتقع عليا والمكان كله بيتكسر،
جسمي كله بيتنفض وكأن في كهربا ماشيه فيه ، فتحت عينيا لقيت
في ناس لابسه أبيض وواقفين قدامي وماسكين في يايدهم جهاز
صدمات كهربا، وأول ما فتحت فرحوا أوي وفي واحد منهم فتح
باب الأوضة وقال...

-قولوا للحاج عزيز ان ابنه فاق وبخير.

بدأوا يعلقولي محاليل وقيسوا الضغط والمؤشرات
الحيوية، ماكنتش فاهم حاجة من اللي بتحصل ولا فاكر اصلا
جيت هنا ليه وازاي؟ بعد شوية نقلوني عنبر عادي وهناك فهمت
اني في مستشفى حكومي لأن كان في ناس غيري معايا في العنبر، أبويا

دخل شد كرسي ومسك ايدي وفضل قاعد جنبني هو ما اتكلمش وأنا ماكنتش قادر افتح ، بس مسكت في ايده زي الطفل الصغي الللي خايف يتوه فضلنا على الحال ده لحد ما في دكتور جه عشان يعمل مرور على الحالات الموجودة ، رفع جفن عيني لفوق فشوفته قدامي ده ماكنتش الدكتور ده كان ... حابس اتحركت بتقل وبعدت عنه ورفضت انه يقرب مني ، فضلت اصرخ ومسكت في ايد ابويا وفضلت اتحايل عليه عشان مايخليهوش يقرب مني بس ابويا طبطب عليا وقال اهدى يا ابني ماتخافش ده دكتور لسه متعين من فترة وطيب وابن حلال زينا مش هياذيك ، كل ما كان بيلمسني كنت بحس ان في نار بتكوييني ، رفعت ايده وشاورتله عشان يبعد عني فشال السماعة وبصلي وقال...

- احنا محتاجين نفحصك كويس عشان نشوف لو في

اصابات عندك نعالجها

-اصابات ايه أنا كويس اهو.

-كويس ازاي؟ وأنت فضلت ٣ ايام تحت الانقاض من غير

أكل ولا شرب.

-أنقاض ايه؟ هو ايه الللي حصل؟

هنا بابا ادخل وقال...

-انت مش فاكرا حاجة من الللي حصلت؟

-لا يا آبه انا مش فاكرا حاجة خالص غير واحد بنفس

شكل الدكتور ده كان عاوز يقتلني.

- لا حول ولا قوة الا بالله يا ابني، أنا لما بطانيتك ولعت

لوحدها خدتك عندي الاوضة وفضلت قاعد جنبك لحد ما نمت

وكنت بقرالك قرآن وروحت الشغل بعدها بشوية لقت الناس بتقول ان البيت اتهد ، سبيت شغلي وكل حاجة وجريت عليك حاولوا ينقذك من غير ما يعرضوا حياتك للخطر ، كان عندي امل لآخر لحظة انك عايش وهتطلع ولما شوفتهم مطلعينك قدامي حسيت ان ربنا جبر بخاطري، تعالي يا ابني لما تشد حيلك نروح السيد البدوي انا مش عارف ايه اللي بيجرالك.

بصيت لأبويا وقولتله...

- لما أخرج من هنا وعد هحكيلك كل حاجة .

- هتخرج باذن الله وهتبقى كويس ولا ايه يا دكتور؟

الدكتور اللي كان شبه حابس أوي بصلي وقالي...

-كنا مستغربين انك طالع مافيش فيك خدش، قلبك بس

هو اللي نبضه كان ضعيف ووقف لدقيقتين وخمسة وتلاتين ثانية ومع الصدمات الكهربي رجع اشتغل تاني عادي بنفس الكفاءة عشان كده نقلناك هنا العنبر وشوية وهنعملك أشعة ولو سليم هتخرج بعد كده عادي جدا، أنت محظوظ وربنا بيحبك.

-شكرا يا دكتور واسف على اللي حصل أنا بس اتلخبطت

شوية لما شوفتك في الاول خلطت بينك وبين حد تاني.

-لا ولا يهملك بتحصل يخلق من الشبه أربعين.

هز راسه ومشى وسابني أنا وأبويا ، اللي طلبت منه يروح

للشيخ حجاب ويجيبه معاه لاني محتاجه ضروري، هو ماكنش راضي يمشي ويسبني بس مع زني واصراري وافق وراح يجيبه، كنت سامع أصوات همس جنبي في وداني أو بالتحديد هما كلهم كانوا بينادوا عليا بس أنا حاولت اتماسك لحد ما سمعت صوت

الشيخ حجاب وهو داخل العنبر بيسلم على الناس ويبسألهم على صحتهم، وقف قدام السرير بتاعي وقرب مني وقالى...
-ايه اللي حصل أنت كويس يا ابني ؟ أبوك لما حكالي ماكنتش مصدق وقولت هاجي الاقايك مدغدغ.
-صدقني أنا نفسي مش عارف ايه اللي حصل بيعاوز أحكيك على حاجة.
-احكي يا ابني أنا سامعك .
-هو أبويا فين؟
-طلبوه في الشغل فراح يشوفهم ماتخافش انا هفضل معاك لحد ما تيجي .
-أنا فهمت اللي بيحصل بس مش عارف سببه.
-ازاي؟
-كل اللي حصلهم ويحصلني بسبب واحد اسمه حابس.
-مين يا ابني حابس ده؟
-ماعرفش بس هو شبه السحرة والدجالين.
-وانتوا ايه علاقتكم بيه؟
-برضه ماعرفش بس انا بسمعهم بينادوا عليا واول ما بغمض عينييا بشوفهم قدامي وبشوفه معاهم ده حتي لما كنت في البيت قومت لقيت نفسي في المقابر و...
حكيتله كل اللي حصل لحد ما فتحت عيني في المستشفى هنا، الشيخ حجاب بلع ريقه وقالى...
-اللي بتقوله ده مالوش غير تفسير واحد يا ابني.

-ايه يا شيخ ، أنا تعبت ومش فاهم حاجة من اللي بيحصل؟

-في الوقت اللي انت كنت فيه تحت البيت وهو مهدوم عليك روحك كانت حرة ونشطة بس مش حرية كاملة بدليل انك رجعت للحياة تاني .

-مش فاهم!

-تسمع عن الموت المؤقت .

-هو علميا بيقي موت اكلينيكي او سريري زي ما بيتقال في المستشفيات.

-هو ده بعينه اللي أقصده ، روحك ما بتبقاش اتحررت من جسمك للآخر بيقي في رايط لسه مكتفها بجسمك عشان كده لما الحواس في جسمك اتصدمت بالكهربا روحك رجعت لمكانها الطبيعي .

-طيب وده ايه المشكله فيه يعني؟

-لو اللي انت توقعته صح وحابس ده ساحر يقي هو اللي بيحاول يموتك ويفصل روحك عن جسمك.

-طيب والعمل؟

-حاجتين أولاً لازم نحصنك عشان ما يقدرش يوصلك ولا يأذيك، أما ثانيا فلأزم نعرف انت ايه مشكلتكم مع حابس أنت وصحابك عملتوا ايه عشان ينتقم منكوا ويقتلكوا واحد ورا الثاني بالشكل ده.

-كلهم كان مكتطوب على جبينهم اسم حامس بس على

شكل حروف مش كلمة متصله.

-اول ما نظمن عليك هاخذك معايا البيت عندي وهناك هقدر أحصنك بس أنت لازم تفتكر كل اللي حصل بينك وبين صحابك بالتفصيل الممل عشان نعرف ايه حكاية حابس وليه بيقتلكم.

-حاضر يا شيخ بس من فضلك بلاش تعرف أبويا حاجة عشان ما يقلقش سيبه بالي هو فيه.
-ماشيا يا ابني ربنا هيستر ان شاء الله والدنيا هتبقى أحسن

-يا رب يا شيخ حجاب يا رب.

الشيخ حجاب فضل قاعد جنبي بيقرالي قرآن وانا من وقت للتاني كان جسمي بيتنفض ومابقاش قادر اخذ نفسي وفجأة جسمي يتشنج ويرجع تاني ، الوضع ده استمر تقريبا ساعة ونص وبعدها جم خدوني عشان اعمل الاشعة ، ابويا كان فرحان أوي ان كل الاشعة اللي اتعملت كانت سليمة ومافيهاش كسور اما الشيخ حجاب فكان واقف مش على بعضه وقرب مني وقالي...
-قول لابوك انك هتيجي عندي البيت عشان ارقيك وهتفضل عندي شوية.

-ماشيا يا شيخنا.

أول ما الدكتور كتبلي على خروج بصيت لأبويا وقولتله...
-أنا هروح مع الشيخ حجاب بيته.
-ليه يا وائل احنا هنروح نقعد في بيت جدك مش هنقعد في الشارع.

-عايزه يرقيني يا ابيه برتاح لما يقرالي.

-خلاص يا ابني ولو اننا هنتقل عليه بس اللي يريحك ، انا
كده كده هبقى مطمئن عليك، الشيخ هلال راجل محترم ويعرف
ربنا كويس .
-ماشي يا آبه.

خرجت مع الشيخ حجاب على بيته وأبويا راح البيت
القديم بدل دارنا اللي اتهدت ، طول الطريق الناس كانت بتبصلي
بصات غريبة ناديت على الشيخ حجاب وقولتله...
-هي الناس دي مالها بتبصلي كده ليه؟
-امشي ومالكش دعوة بحد بص قدامك وماتركزش
معاهم.

فضلت ماشي كثير حاطط وشي في الارض ، ماخدتش بالي
اننا بعدنا عن البيوت والناس غير لما بصيت حواليا ولقيتتنا واقفين
قدام نفس البيت اللي شوفت فيه الدجال فيه، رجعت كام خطوة
لوره وقولت للشيخ حجاب...
-هو انت تعرف حابس؟
-حابس مين؟
-اللي حكيتلك عنه، أصل ده بيته!
-لا يا ابني ده بيت مهجور بنعمل فيه الخلوات تعالى
ماتخافش .

دخلت وراه وأنا حاسس ان في حاجة غلط بصيت على
المكان بسرعة كده لقيت كنبه عربي قديمة وكام كرسي خشب
وكانون شكله قديم، الشيخ رعي نفسه على الكرسي بتعب وقعد
وقالي ...

-ارتاح يا وائل وخذ نفسك الطريق كان طويل يا ابني واللي
جاي لسه أصعب وأصعب.

-ليه بتقول كده يا شيخ؟ هو أنا هموت؟
-ماحدش يعرف الغيب انا قولتلك قبل كده الغيب ده في
علم اللي وحده.

-هو مافيش أي طريقة تعرفنا حابس ده احنا أذيناها ازاى
أو بيخلص مننا ليه؟

-قرب يا ابن عزيز قرب ، تعالى اقعد عند رجليا كده.
قعدت عند رجله فحط ايده على راسي وبدأ يتمتم بكلام
غريب ماكنتش سامعه بس حسيت ان النار ماسكه في جسمي
وبتكوييني وبدأت أغيب عن الوعي بالتدريج..

لما فوقت كنت نايم على سرير وأبويا جنبي والشيخ
حجاب كمان، شاورولي افضل نايم في مكاني وماتحركش خالص
وبعد شوية باب الاوضة اتفتح ودخل منه راجل لابس جلاب
رمادي ودقنه طويلة الشيخ حجاب قام استقبله وباس ايده وعرفه
على ابويا وقعدوه جني ابتسم بحزن وقال...
-ماتخافش اللي بيثق في اللي خلقه ربه مش بيخذه .
-ونعم بالله.

-انا سمعت كل اللي حصل وروحت بيت كل واحد في
الاربعه وبصيت على حاجتهم كمانوالغريب يا ابني ان كلهم كانوا
مافيش فيهم حاجة ، مافضلش غيرك، مد ايده وقلع الشال
الابيض اللي كان على كتفه وغطى وشي بيه وقال...
-ركز يا ابني في اللي هتشوفه.

بدأ يقرا قرآن كنت حاسس ان في حاجة مكتفاني وسادة وداني لأن صوته اختفى بسرعة وفضلت شايقة قدامي عاعد لبيحرك بوقه لكن مش سامع منه حاجة، كل فين وفين كنت بسمع صوزت حاجة جامدة بتصفي في ودني ولما احي اسد ودني الشيخ حجاب وأبويا يمسكوا اييد ويمنعوني اني اسد وداني، لاحظت ان الشيخ تعب ووقف فشديت الشال بتاعه ورميته بعيد عني، كلهم كانوا ببصولي باستغراب ، الشيخ كان ماسك ايده تقريبا بتوجهه جامد ، عينيه بدأت تدمع واتكلم بلسان ثقيل وقال...

-الله يعينك على اللي عليك يا ابني .

حجاب وقف جنبه وقاله...

-أنا حاولت أكثر من مرة يا شيخ بس ماكنتش بعرف اكل ، كنت بحس ان في ايدين بتتلف حوالين رقبتي وتخفني حتي جسمي كنت بحسه متكتف، أنا في حاجة كانت بتزاولني بس عشان محصن نفسي كويس ماقدرتش عليا .

أبويا ادخل وقالهم...

-أنا عايز أعرف اللي ابني فيه ده بسبب ايه؟

فالشيخ حجاب رد عليه وقاله...

-دجال مؤذي ايمه حابس بينتقم منهم لسبب احنا مش

عارفينه!

-دجال؟

-ايوه يا حج عزيز موت العيال ماكنش طبيعي ، هي

الاعمال بيد الله طبعا بس لكل حاجة بتحصل سبب.

- أبويا بصلي وقالي...
-عملتوا ايه عشان تتلعنوا اللعنة دي؟
-والله يا آبه ما نعرفوه ولا شوفناه، أنا حكيت للشيخ
حجاب كل اللي حصل.
هنا الشيخ اللي حجاب جايبه اتكلم وقال...
-هما محضروش حاجة، اللي حصلهم مش بقصد هما
اتعدوا على حرمة حابس.
-يعني ايه يا شيخنا.
-حابس ميت من فترة قبل ما الشباب دول يموتوا ، فاكر
انت الدجال اللي الأهالي ولعت في بيته وقالوا انه واقف على
السطح بتاع البيت والجن معاه بيتحرق .
-اه يا شيخ فاكره ماله؟
-هو ده حابس بشحمه ولحمه .
-بس ده كان في بلد تانيه على ما افتكر كان في الاسماعيليه
باين يا شيخ.
ابويا قالهم...
-وايه علاقة ابني بكل ده؟ أنا ابني لا عمره راح الاسماعيليه
ولا يعرف دجالين.
-وليه ماتقولش ان حد عامل لابنك حاجة وجت في الكل.
-حاجة زي ايه؟
-عمل يا عزيز حد عامل لابنك عمل.
-مين اللي هيأذيه وليه؟
-مش لازم يكون في سبب يا عزيز.

- طيب والحل هنعمل ايه، أي حاجة هتقولولي عليها
هعملها أهم حاجة ابني بالله عليكم ما يتأذيش ولا يجراه حاجة.
-فكر معنا مين ممكن بيكرهه وعاوز يأذيه؟
-مش عارف حاسس ان عقلي مشلول.
كنت قاعد متابعمهم وهما بيتكلموا وحاسس ان دماغي
هينفجر من الصداع، بصيتلهم بضعف وقولتلهم...
-أنا خلاص تعبت لو حابس ده هيموتني يبقي خلاص
يموتني ونخلص أنا ما عنديش اعصاب عشان اتحمل كل اللي
بيجرالي ده.
صعبت عليهم فبطلوا كلام والشيخ حجاب خد الشيخ
التاني بعيد شوية وفضلوا يتكلموا وبعدين نادوا على ابويا اللي كان
ماسك ايدي وبيطيط عليها وقالوله...
-هي الحاجة ام وائل فين؟
-منفصلين من زمان وما نغرفش حاجة عنها .
-ما بتسألش على ابنها؟
-لا خالص من زمان وهي سيباهولي.
-تفتكر ممكن تأذيك فيه يا عزيز؟
-هي ممكن تأذي ضناها؟
-أنت اللي عارفها مش احنا.
-هي رمته وهو حته لحمة صغيرة بس مش عارف هي
ممكن يوصل جحودها انها تعمله عمل عشان تأذيه.
-عمتا هيبان الشيخ محتاج يروح البيت عندكوا.

-بس انت عارف ان البيت اتهد وما فيش فيه حاجة عرفنا نطلعها منه.

-ماتخافش لو في حاجة جوه الشيخ هيحس بيها.

-ماشي يا شيخ حجاب خليك مع وائل ابنك هنا وأنا هخطف رجلي معاه لحد البيت عندكوا وهنرجع تاني .

بعد ما مشوا أبويا رجع قعد جنبي ومسك ايدي وقالى ...
-أمك وحشة بس مستحيل تعمل كده.

-صدقني يا آبه مابقتش فارقة أنا خلاص تعبت وعايز

أرتاح.

-عايز تفارقني يا ضلي ده انا على طول كنت بقول انك

سندي ماتتكمش كده تاني.

-الموت ما يخوفش اللي بعده هو اللي يخوف ، أمانه

عليك لو موت ما تدفينيش بالليل عشان بخاف.

-اقفل بوقك وبطل كلامك الماسخ اللي شبهك ده.

-حاضر يا آبه أنا هنام شوية لحد ما الشيخ حجاب يرجع.

وفضل نايم لحد الشيخ حجاب واللي معاه ما رجعوا

دخلوا علينا ووقف الشيخ محمود وقالى...

-اللي كان مع حابس بينتقم من العيال دي بسبب حاجة

موجودة في بيتك يا عزيز.

-ايه اللي موجود في بيتي؟

-أنت تعرف حابس منين؟

-ورب الكعبة ما اعرفه.

-أومال ايه اللي جاب بطانية الدجال عندك في البيت؟
ساعتها قعدت على الكرسي وحسيت اني اتشليت ومش
قادر أنطق ، البطانية اللي اشترتها مستعملة بنص التمن عشان
اديها لوائل يروح بيها المدينة هي السبب في كل اللي حصلهم،
فوقت من سرحاني علي الشيخ حجاب وهو بيهزني وبيقولي ...
-ايه يا عزيز؟

-البطانية دي اشترتها بنص التمن مستعملة من سوق
الجمعة عشان وائل طلب مني واحدة يروح بيها المدينة.
-وانت كنت عارف انها بطانية حابس؟
-لا أنا جاييها مستعملة من سوق الجمعة.
-طيب صحي وائل عشان ناخده عن البيت ونولع في
البطانية وننقذه.
-حاضر.

فضلت اهز في وائل ابني عشان يصحى بس هو ماكنش
يبرد، ناديت عليه كتير لحد ما صرخت وهزيتيه وقعته على الارض
واكتشفت ان وائل... مات
بطانية الدجال كانت السبب في موته زي ما كانت السبب
في موت محمود ومؤمن واحمد وصبري وابني .

سبع أرواح

معروف عندنا في الأرياف من زمان أوي، ان الشخص اللي بيأذي الحيوانات وخصوصا القطط، بيتأذي وبيتأذي جامد أوي لدرجة انه في أحيان كثيرة ممكن يتلبس ويتجنن، بس احنا ماكناش عايزين نأذيهم ، الموضوع كله بدأ في الشهر اللي قبل امتحاناتنا، ثانوية عامة بقى وكنا خايفين، وفي يوم واحده صاحبتنا جت الدرس وحكتلنا على فيلم شافته علي الكمبيوتر بتاع أخوها الكبير، كانت مبهورة أوي بيه وقالتلنا...

- البطل بتاع الفيلم كان دكتور، بس مش دكتور عادي، ده كان مخاوي والجن بيساعده عشان يشفي الناس.
ماكنتش فاهمة هي عايزة مننا ايه فقولتلها...
-ده فيلم يا نهلة يعني مش حقيقة.

-منا عارفة يا عبير بس احنا ممكن نروح لحد يحضرلنا حاجة تساعدنا كلنا في الامتحان، أو يعملنا حاجة نشربها أو نأكلها تخلينا نحل كويس ونجيب مجموع وندخل الكليات اللي عايزنها.
عيونهم كانت بتلمع، الكلام كان شكله مغري وسهل بالنسبة ليهم، خوفت منهم فسيبتهم ومشيت، أنا مستحيل أعمل حاجة زي دي، ماينفعلش أبقي بصلي وعارفة ربنا وأعمل كده عشان أنجح، في الفاصل اللي بين الدرسين نهلة جت وقفت جنبي وقالتلي...

-احنا كلنا اتفقنا وموافقين فاضل أنتي، هتيجي معانا ولا

ايه؟

-آجي معاكم فين؟

-هنورح لواحدة اسما (ستهم) ، ونشوف هتقدر تساعدنا

ازاي؟

-نهلة انتوا اتجننتوا صح، ازاي هتعملوا حاجة زي كده لو

أهلكم عرفوا هتبقى مصيبة.

-أصل احنا أهلنا غلابة ومش هيعرفوا يدخلونا جامعات

بافلوس يا بنت العمدة، على العموم ردك وصل خلاص.

حاولت أوقفها بس هي زقتني ومشيت ورجعت ليهم ثاني

وقفت معاهم ، كنت شيفاهم وهما بيتكلموا ويضحكوا،

ماقدرتش أكمل المراجعة واستأذنت من الأستاذ وروحت الدوار ،

دخلت أوضتي وفضلت حابسة نفسي فيها ماكنتش طايقة أكلم

حد ولا أشوف أخواتي، حتى قلبي كان مقبوض أوي، بالليل لقيت

نهلة بتتصل بيا ، كنت متردده اني أفتح عليها ، بس في الأخر رديت

ولقيتها بتقول لي...

-اخس عليكي، كده ماتسألش علينا عملنا ايه؟

ماكنتش قابلة اني أتكلم معاها بس غضب عني قولتلها...

-الطريق ده آخرته وحشه وأنا مش عيزاكوا تتأذوا يا نهلة.

ضحكت بصوت عالي وقالتي...

-ده حتى الأذي طلع بفلوس كثير يا عيبر.

-يعني ايه مش فاهمة!

-طلبت مننا فلوس كثير، تقريبا عايزة من كل واحدة مننا ألف ونص.

-يالهوري وانتوا وافقتوا على الهبل ده؟

-لا طبعا يا بنتي، احنا اهلنا شغالين باليومية أصلا عن أبوكي العمدة، هيجيبوا منين الآلاف دي.

-بلاش الطريق ده، أنا فعلا خايفة عليكوا.

-أنا بس قولت أعرفك عشان متاخدش منا جنب وتبعدي عننا، الموضوع مش مستاهل.

-ماقدرش والله، بس كنت خايفة عليكوا عشان احنا صحاب وأخوات ومترين مع بعض.

قفلت معاها المكالمة وحاولت أنام بس ماقدرتش، كنت ميتة من الجوع، دخلت المطبخ عشان آكل أي حاجة، عملت سندوتش ووقفت أكله في المطبخ وفجأة لمحت ضل على الارض غير ضلي، كان واقف ورايا وفي ايده سكينه، لفيت بسرعة مالقتش حاجة، بس في نفس اللحظة في كوباية وقعت من المطبخية على الأرض واتكسرت، ماكنتش مستوعبة هي وقعت ازاي الكوبايات أصلا محطوطه جوه، يبقى أكيد حد وقعها بقصد، بس ازاي ومافيش حد معايا في المطبخ، لفيت حوالين نفسي وقبل ما أطلع من المطبخ النور قطع، بلعت ريقى بصعوبة وفضلت أقول...
-أعوذ بالله من الشيطان الرجيم.

شوفت حد ماشي في الصلاة بشمعة، فقولت لنفسي ده أكيد أحمد ابن عمي الكبير، طلعت أجري وراه وناديت عليه، عشان يقف ويوصلني للأوضة لأنني بخاف من الضلمة بس هو

ماردش عليا، فضلت ماشية وراه عشان أدخل أوضتي، بس
اتصدمت لما عدى أوضته ووصل لنهاية الممر، وبدل ما يحد
عشان يوصلني دخل في الحيطه، أه والله دخل في الحيطه، كنت
واقفة مذهولة مش عارفة أنطق ولا قدرة أشغل دماغي، الدنيا
بقت ضلمة من حواليا، صرخت بفرع لما حسيت بهوا بارد بيخبط
في وشي، جسمي كله اتنفض، رجليا ما عادتش شيلاني، سمعت
صوت بينادي عليا ...
-عير يا عير.

فتحت عينيا بفرع لقيت أني واقفة قدامي وبتبصلي
باستغراب وهي بتقولي...
-فوقي يا بنتي، أنت ايه اللي نيمك هنا !
-ماما أنا ...
-أنتي ايه انطقي.

بصيت حواليا باستغراب، ماكنتش لسه مستوعبة أنا
فين؟ آخر حاجة كنت فكرها اني كنت واقفة في الممر اللي بين
الأوض فوقت من سرحاني على ايد أمي وهي بتخبطني في كتفي
وبتقولي...

-يا بنت انطقي؟

في اللحظة دي دخل أحمد ابن عمي الكبير من باب الدوار
وسلم علينا وخط شنطته وقعد فأمي قالتله...
-حمد لله على السلامة يا أحمد، بركة انك رجعت من
الجيش بخير.

بصيتله باستغراب وقولتله...

-هو أنت مش كنت هنا من امبارح؟

-لا يا عبير أنا لسه واصل حالا زي ما انت شايفة أهو.

-أومال ايه اللي..

قطعت كلامي وسكت لما لقيت أمي مركزة معايا ،

استأذنت منهم بحجة اني هروح أذاكر ودخلت أوضتي بسرعة قبل

ما تستجوبني ، مش عارفة أصلا أنا وصلت للكنبة ازاي وامتي؟

دخلت الأوضة وقفلت عليا وقعدت على السرير، فضلت سرحانة

لحد موبايلي ما رن، كانت نهلة بتقولي انهم هيتجمعوا عندها في

البيت عشان يذاكروا وطلبت مني اني أجي معاها، أنا عارفة ان

بيت نهلة على قده وضيق فقولتلها...

-طيب ايه رأيك لما تيجوا عندنا!

-عبير بنت العمدة مستقليه بينا؟

-والله أبدا ، أنا عاملة عشان البيت ضيق وأنت اخواتك

كثير ومانبقاش ضايقناهم.

-لا يا ستي مش هتضايقونا وبعدين ده أنا وأنتي وعلياء

ونورهان ودعاء.

-ماشى خلاص يا ستي، هقول لأبويا وهاجي ان شاء الله.

-هنستنكي.

فجأة باب الأوضة خبط فقولت...

-مين؟

-أنا أحمد يا عبير.

قومت فتحت الباب وبصيتله باستغراب وقولتله...

-خير يا أحمد مالك؟

-ما فيش بسأل عليكي عشان كان شكلك مرتبك أما جيت!

-أنا بس مرتبكة عشان عايزة أروح عند واحدة صاحبتى

وقلقانة ان بابا مايرضاش.

-تحبى اكملك عمى عشان تروحي؟

-لا عادى أنا هكلمه.

-طيب عمما هو فى المندره.

-خلاص هروحله أهو.

-لو احتاجتى حاجة هتلاقينى.

-تسلم يا أحمد.

سببته وروحت على المندره عشان أشوف أبويا وأتكلم

معاه ، وقفت قدام الباب وخبطت فأذلى أدخل، فتحت الباب

ودخلت، المندره فيها كنب عربى وفى جنب مكتب لأبويا وقدامه

كرسين، بصيت عليه كان قاعد على مكتبه بيخلص ورق ، قربت

منه وقولتله...

-بابا.

-نعم، مالك يا عبير؟

-هو ممكن بعد اذنك اروح أذاكر مع صاحباتى؟

-وليه هما مايجوش يذاكروا معاكى هنا؟ الدوار واسع

ويساع كثير.

-ما أنا قولتله لكن هما قالوا المرة الجاية.

-رايحة بيت مين؟

-أبو نهلة .

-آه ، طيب روجي بس ماتتأخريش.

هزيت راسي وقربت منه وبوسته من راسه وجريت من المندرة، طلعت منها وأنا مبسوفة، دخلت على الأوضة وأنا فرحانة، وقفت قدام الدولاب وفتحته وطلعت مه اللبس، غيرت ولبست هدومي وخذت كتيي وطلعت على بيت نهلة، لما وصلت رنيت عليها على الموبايل وعرفتها اني بره ، طلعت استقبلتني هي وأمها ودخلت قعدت معاهم لحد ما اتجمعنا، بس لما وصلوا نهلة بصتلنا وقالت...

-احنا كده خمسة فاضلنا اتنين، مش هينفع كده.

ماكنتش فاهمة هي بتقول ايه قولتلها...

-فاضل اتنين على ايه؟

-عشان نبقي سبعة.

-ونبقي سبعة ليه؟

-عشان هنقسم المنهج على نفسنا.

مالقناش حد غيرنا احنا الخمسة يكمل معانا ، فاضطرينا نمشي واتفقنا نتجمع تاني بكره، لما روحت البيت اتحججت وقولتلم اني تعبت وما قدرتش أكمل مذاكرة وهنتجمع تاني بكره، بالليل موبايلي رن ، بصيت لقيت نهلة بتتصل بيا، فتحت عليها وقولتلها...

-ايه يا بنتي مالك؟

-أنا تحت الشباك بتاعك افتحي.

-تحت شبابي! طيب استني.

جريت على الشباك وفتحته وأنا قلقانة وخايفة، مديتها
ايدي عشان أشدها تدخل فقاتلي...
-لا مش هينفع حد يشوفني عندك.
-طيب في ايه يا بنتي؟
-احنا لقينا اتنين كمان يعني كده بقينا سبعة.
-طيب كويس.
-ضروري تيجي بكره يا عبير.
-حاضر يا بنتي حاضر.
كنت مستغربة تصرفها، أصلها كانت تقدر تكلمني على
التليفون ماكنش في لزمة انها تطلع من بيتها وتجيلي مخصوص
عشان تأكد عليا، أكيد في حاج وهي خافت تقولي عليها، فتحت
الشباك ونطيت منه وجريت وراها ومسكتها من كتفه ، اتفضت
وكانت هتصرخ بس أنا كتمت بوقها وقولتها...
-اهدي ده أنا عبير.
-نشفتي دمي.
-أنا اسفة معلش.
-في ايه؟ ايه اللي جابك ورايا؟
-أنت جيتيلي مخصوص عشان تقوليلي الكلمتين اللي
قولتيهم دول؟
بلعت ريقها واتوترت وقالتي...
-بصراحة لا ولو قولتلك جاية ليه مش هترضي فيبقى
بناقص.
-فهميني فيه ايه؟

حسينا بحركة حواليا ، فارتبكت وقالتي...
-لما تيحي بكره ونتجمع هتفهمي.
-طيب خلاص.

فهمت من نظراتها ان في حد بيراقبنا، سيبتها تمشي
ودخلت اوضتي من الشباك وقفلته كويس، وحاولت أذاكر شوية
قبل ما أنام، بس تفكيري كله كان مشغول بنهله، لأول مرة اتمنى
الليل يخلص بسرعة، وأخر ما زهقت ، دفنت نفسي في السرير
وحاولت أنام، بس صوت الخبط اللي على سباك أوضتي فزعني،
قومت من على السرير ووقفت قدام الشباك وهو مقفول وقولت
مين أكثر من مرة لكن ماحدث رد، فكرتها نهلة ففتحت بس
مالقتش حد، وقبل ما أقفل الشباك سمعت..صرخة جمدت الدم
في عروقي وخلتني أقفل الشباك بسرعة وأجري أستخبي جنب
السرير ، كان جسمي كله بيتنفض من الخوف ، ماعرفتش في الليلة
دي أنا ، كنت قلقانة وخايفة، لحد ما سمعت صوت أبويا وهو
راجع من صلاة الفجر، لقيت نفسي رجليا وخداني لحد الكنبه ،
اترميت عليها وماحستش بالدنيا من حواليا، صحيت الصبح على
صوت أبويا وهو بيقولي...

-ايه اللي منيمك هنا ؟ أنت تعبانة ولا ايه؟
-لا لا كنت مستنياك عشان أستأذن منك أروح لنهلة أكمل
مذاكرة.

-طيب روجي، بس ادخلي كملني نوم في أوضتك، احنا مش
لوحدنا في الدوار.
-ماشي يا بابا ، أسفة.

سببته وجريت على الأوضة، دخلت وقفلت الباب ووقفت وراه ، ماكنتش عارفه اللي أنا بعمله ده صح ولا غلط ، بس حبيت أروح أشوف ايه اللي نهلة هتعمله؟ استنيت لحد الساعة ما بقت ٥ العصر ولبست ونزلت البلد عشان أروحها وهناك لقيت علياء ونورهان ودعاء وبنيتين كمان ماكنتش أعرفهم، ناديت على نهلة وقولتها...

-هنعمل ايه؟

-هنذاكري يا بنتي.

-طيب خلاص يالا بنا.

قعدنا نذاكر وبعد العشا قامت نهلة وطت اضءة الأوضة وشاورت للبنات اللي كل واحدة فيهم قعدت بعيد عن الثانية وبعد كده طلعت بره الأوضة ودخلت وهي بتجر وراها شوال طلعت منه قطط سوده صغيرة وادت لكل واحد فينا قطة، منظر القطط كان يخوف، بصيت للبنات باستغراب لقتهم بيتعاملوا عادي وبيلبعوا معاهم، بصيت للقطة اللي كانت بين ايديا، قلبي اتقبض، نهلة كانت مكتفة القطط ولما حاولت أفك القطة اللي معايا زعقتلي وقالتلي...

-اياكي تعمملي كده.

-في ايه يا بنتي ؟ أنتي كدده بتعذبهم.

هتفهمي دلوقت وزعت علينا سكاكين صغيرة وقعدت في

مكانها، كنت بتلقت حواليا بخوف وقولتها بتوتر...

-شغلي النور يا نهلة، ايه الهبل اللي بتعمله ده؟

-اسكتي يا عبير وركزي في اللي قدامك والا هنتأذي

-يعني ايه مش فاهمة؟ هو ايه اللي بيحصل بالضبط؟
-اللي تشوف عيون القطة اللي قدامها حمرا تدبجها
بسرعة والا هتأذينا كلنا.

كل اللي طلح عليا اني بقيت أصرخ وأقول ...
-يخرب بيوتكم ، انتوا بتهببوا ايه؟
-اسكتي يا عبير.

في اللحظة دي صرخت علياء وقالت...
-القطة اللي معايا عندها حمرا.
بصيت حواليا وخذت بالي ان في حاجة حمرا فعلا منورة
في وسط الضلعة بس نهلة صرخت فيها وقالتلها...
-ادبجها يلا والا هنتأذي.

النور الأحمر اختفي وسمعنا شهقة من علياء، الوضع
اتكرر مع الكل ، ماكنش فاضل غيري أنا ونهلة ، حاولت أبعد
القطة عني بس جسمي كله كان مشلول وفجأة عيون القطة
احمرت، كنت سامعة صوت نهلة وهي بتصرخ وبتقولي...
-ادبجها، اخلصي يا عبير .

ماحستش بنفسي غير وأنا بدبح القطة فعلا بدم بارد
وبعدها جسمي كله ساب ووقعت على الأرض، كنت شايفة نهلة
وهي بتدبح القطة اللي معاها بس بعدها فضلت تصرخ بصوت
عالي، فضلنا على الوضع ده شوية ، حولت أزحف وأوصلها بس
كنت حاسه ان جسمي كله بيتكسر، غمضت عيني واستسلمت
ومن بعدها ماحستش بحاجة حواليا خالص غير لما سمعت
صوت نهلة، كانت متأثرة ومهزوزة وبتعيط فتحت عيني وبصيت

حوليا المكان كان كله دم، قومت مفزوعة وبتلفت حواليا بخوف
وقولتها ...

-هو ايه اللي حصل؟ أنت هببتي ايه!
-ماعرفش ، ماعرفش.

البنات بدأت تصحي واحدة ورا الثانية بس كان في واحدة
اختفت وبدأنا ندور عليها في الأوضة هي أكيد ماخرجتش لأن نلهة
بلعت ريقها وقالت ان مغيث حد في البيت، قلبنا البيت على
البنات بس ماكنتش موجودة لما رجعنا تاني نفس الاوضة لقينا
الحيطة مكتوب عليها بالدم ...
-الروح الأولى.. رحاب.

نهلة وقعت على الأرض وفضلت تعيط، البنات كلهم
انهاروا ، حاولت افهم اللي حصل منهم بس ماكنش في حد فيهم
ماسك نفسه، كانوا منهارين وبيعطوا وبيصرخوا لحد ما زعتلهم
وقولتلهم...

-أنا عايزة أعرف اللي بيحصل هنا والا هروح أحكي لأبويا
وهتتفضحوا وتروحووا كلكوا في داهية.

-مافيش حاجة امشي اني يا عبير.

-مش همشي يا نهلة الا لما أعرف ايه اللي حصل والقطط
والدم والبنات ، عايزة تفسير لكل ده.

فضلت تضرب راسها بايديها وقالت بضعف ...

-أنا السبب يا عبير ، كنا عايزين ننجح وماعناش فلوس
عشان الست تعملنا العمل فقررنا نضحي بقطط عشان الجن
يحضر ويسمع كلامنا .

-وبعدين؟

-ماعرفش ايه اللي حصل.

-مين اللي قالك ان اللي بيدبح القبط بيحضرله جن؟

-الجن بيلبس القبط السودا وأنا جمعت سبع ققط على

عددا ، كان لازم ندبح سبع ققط عشان نقدر نسخر الجن

ويخدمنا.

-واحنا من امتي لينا في الكلام ده؟ من امتي أصلا بنأذي

حيوانات!

-ما أنتي أذيتي ودبحتي القطة بايدك ولا انت مفكرة انك

أحسن مننا؟

-أنا عملت كده من زعيقك وضغطك عليا، غصب عني

لما قولتي هنتأذي كلنا.

-بطلي دور الملاك اللي انت عيشاه ، أنت من جواكي

شيطان وألعن مننا، وانت دلوقتي في المركب معنا .

-يعني ايه؟

-لو روحتي حكيتي لحد عن اللي حصل كلنا هنشهد انك

انتي اللي خططي ونفذتي كمان .

-ايه السواد اللي جواكي ده؟

بصيتلهم بقرف وشديت شنطتي وخرجت من البيت كله،

الدنيا كانت ضلمة وشكلي كان متبهدل أوي، في كولددير في الشارع

معمول رحمة ونور على حد ميت في بلدنا، وقفت قدامه وغسلت

وشي وايديا وعدلت هدومي ورجعت البيت، حاولت اتماسك لحد

ما وصلت، ماعرفش ليه طول الطريق كنت حاسه زي ما يكون في

حد ماشي ورايا بس لما كنت ببص ماكنتش بلاقي حد خالص، أول ما لمحت البيت ، طلعت اجري لحد ما وقفت على الباب ورنيت الجرس وهديت، دخلت وأنا اعامله نفسي مرهقة وتعبانة من كتر المذاكرة، دخلت على اوضتي وشديت الهدوم اللي قابلتني ودخلت خدت حمام دافي، بس وأنا واقفة والماية بتنزل عليا حسيت بحاجة لازقة في رجلي ، وسمعت صوت نونوه، بلعت ريقى بخوف وبصيت على رجل بفرع لقيت في قطة سوده جنب رجلي لازقة فيها، طلعت أجري من تحت المايه وشديت هدومي لبستها وأنا جنب الباب وبعدين فتحته وخرجت لقيت أمي واقفة ووشها مخضوض وأول ماشافتني قالتلي...

-في ايه؟ بتصرخي ليه؟

-قطة ، في قطة جوه.

جسمي كله كان بيتنفض وبيترعش وحتى نفسي ماكنتش قادرة أخده، جريت على أوضتي وقفلتها عليا، قعدت على السرير وحاولت أفكر أي قرآن كنت حفظاه ، بس ماكنتش فاكراه حاجة خالص ولساني كان ثقيل أوي، فضلت أشهق لحد ما سمعت خبط على الباب اتنفضت وانكمشت على نفس بس سمعت صوت أمي من بره وهي بتقولي...

-افتحي يا عيبر.

قومت فتحت الباب واترميت في حضنها وفضلت أعيط

وهي تهدي فيا، أبويا دخل الأوضة وبصلي وقاللي...

-مالك يا بنتي أنا لما قالولي انك تعبانة سبت اللي ورايا

وجيت جري، فيكي ايه أجيبلك دكتور.

هنا أمي نطقت وقالتله...

-شوف حد يرقوها ، أنا مش هخليها تروح تذاكر مع حد
تاني ، البنات دي أنا قلبي مش بيرتاح لهم أكيد حسدوها عشان
ناصحة مش زيهم.

أبويا بصلي وهز راسه وقال...

-هبعث للشيخ حالا يجي يرقوها.

طلع من الاوضة وأمي فضلت تطبطب عليا وتبوس راسي

وتقولي...

-اطمني هتبقى كويسه، دي عين والعين حق يا ضنايا.

بلعت ريقى وقولتها...

-والقطة اللي شوفتها في الحمام؟

-ماكنش فيه قطط يا حبيبتى ، أنا دورت فيه كويس،

ماكنش فيه حاجة.

دفنت نفسي في حضنها وفضلت أعيط بحرقة وأنا بقول

في سري ...

-ربنا يسامحك يا نهلة ، ربنا يسامحك.

بعد شوية أبويا شيع لنا حد ينادي علينا عشان الشيخ

وصل ومستنيني في المندره، قومت غيرت لبسي ومشيت مع أمي،

كنت بقدم رجل وبأخر الثانية، وقفت قدام باب المندره خايفة

ومرعبة لحد ما أمي شدتني من ايدي وراها ودخلت بيا، الشيخ

بصلي وقال لأبويا...

-يااه دي من سن بنتي يا عمدہ البنات كبرونا، البت بتي
راحت تذاكر عند واحده صاحبته مش عارف ليه ماتعدش في
البيت تذاكر لوحدها.
-ههههه كلهم كده يا شيخ ، بنتي ساعات بتروح تذاكر مع
صاحباتها.

الشيخ بصلي وقال...

-اقعدي يا بنتي واحكي لي مالك؟
قعدت عل الكتبه وبدأت غصب عني أعيط فقالي...
-الحزن من الشيطان، عشان يخرج الانسان من رحمة
ربنا.

-حاسه اني مخنوقه وعايضة أعيط كثير بشوف حاجات
وبسمع أصوات.

-من امتي الكلام ده؟

-من أسبوع تقريبا.

-طيب اهدي بس كده وقولي لي عملي حاجة غلط مثلا
دلقتي مايه سخنة نطيتي من غير ما تذكرني اسم الله؟
-لا خالص والله ، بص أنا هحكيلك.

حكيتله كل حاجة حصلت معايا ما عدا اللي جرى في بيت
نهلة فبص لأبويا وأمي وقالهم وهو متأثر...

-معمولها حاجة جامدة ، مأثرة عليها وتعباها، اللي هي
فيه ده البداية.

-والعمل يا شيخ؟

-لازم نعرف الأول هي شاربه ولا واكلها ولا مخطية.

أدخلت أمي وقالته...

-يعني هو نوع العمل هيفرق معاك يا شيخ؟

-أكد طبعاً لكل نوع علاج.

-هو انت مش هتعالجها بالقرآن؟

-أكد يا حجة بس بيبقى في خطوات بتفرق من سحر

لسحر.

-يا ضنايا يا بنتي ، يا ريت ربنا كان افتكرنى قبل اليم الأسود

د.ه.

-استهدي بالله يا حجة، ان شاء الله خير.

بصلي وقالي...

-قوليلي يا عبير يا بنتي.. أنت كتي حاجة عند حد أو شربتني

حاجة؟

-لا خالص.

-حتى صحابك اللي بتذاكري عندهم؟

-صحابي مش ممكن يأذ...

سكت وماقدرتش أكمل، كنت هضعف وأحكي اللي

حصل بس هو قالي...

-مدام ماكلتيش ولا شرتي بره البيت وماحدش بيدخل

بيتكم يبقى أكيد خطيتي حاجة مرشوشة، والمرشوش ده ممكن

يكون مش ليكي ونغلب على نوصل لى عمله ونحله.

-أنا مش عارف بجد، كنت بروح الدروس وبخرج عادي

زي الناس، عمري ما أذيت حد عشان يجري كده.

في اللحظة دي قومت من مكاني مفزوعة لما شوفت
القطعة السوداء واقفة على مكتب أبويا، زي ماتكون بتوصلي رسالة
وعايزة تقولي أنني كدابة انتي أدتيني من غير سبب، كلهم كانوا
باصينلي باستغراب فالشيخ قالي...

-مالك يا بنتي فيكي ايه؟ ليه وقفني مرة واحدة كده!

-خايفة من القطعة اللي هناك دي.

-قطعة؟ فين؟

شاورتلهم على المكتب بتاع أبويا وفجأة القطعة اختفت،
بلت ريقى وحسيت ان الدنيا من حوليا بردت ورجليا مابقتش
شيلاني، اتحدفت على الكنبه وعينيا غمضت.

كنت سامعة صوت الشيخ وهو بيقرأ قرآن، صوته كان
بيروح ويجي ويعلى ويوطى زي ما يكون حد بيلعب معايا، كان في
صوابح محاوطة رقبتي وبتخنقني، حسيت بسخونية في ايدي
الشمال وتنميل وفجأة فتحت عيني وشوفت الشيخ قدامي، كان
حاطط ايده على راسي وبيحرك شفائفه، بس ماكنتش سامعه
منه حاجة، حركت ايديا وحاولت أنطق بس صوتي ماكنش طالع
خالص، حسيت بتقل في جسمي وسمعت صوت الشيخ قريب
أوي من وديني قالي...

-نامي دلوقتي والصبح هتبقى بخير ان شاء الله.

استسلمت للنوم بضعف وقلة حيلة، كنت سامعة صوت
البنات حواليا، بصيت لقيت نفسي في نفس الأوضة ونهله بتوزع
علينا الققط، شوفت نفسي وأنا قاعدة خايفة وجسمي بيتنفض،

كان نفسي أمنع كل اللي بيحصل بس نظرات نهلة ليا كانت زي
ماتكون شيفاني وحاسة بوجودي، وقفت خايفة في ركن لحد ما
جه دوري اني أدبح القطة فضلت أصرخ بصوت عالي ، عشان
مادبحهاش بس فجأة...

فتحت عينا بفزع، ماكنتش قادرة آخذ نفسي، أمي وأبويا
كانوا حواليا واقفين مخضوضين وفجأة دخلت نهلة عليا الاوضة
ووقفت جنبهم وفضلت تعيط، رمت نفسها عليا وخذتني في
حضنها وفضلت تططب عليا وتقولي...

-ماتخافيش يا عبير، هتبقى زي الفل والله، إلهي تندب في
عينه رصاصة اللي حسدك يا حبيبي.

ماما حاولت تهدي نهلة اللي كانت بتمثل الدور
ومنسجمة فيه أوي وراحت تعملها ليمون، أما بابا فقال...

-عايزين حاجة يا بنات.

-ربنا يخليك يا حضرة العمدة.

-شكرا يا بابا.

-لو احتاجتي حاجة يا عبير أو تعبتي رني عليا.

-ماتخافش عبير دي أختي هاخذ بالي منها.

خرج من الأوضة فبعدت عني وقامت قفلت الباب
وجعت قعدت على حرف السرير، نظراتها كانت كلها شر نطقت

وقالتلي...

-أنتي حكيتلهم حاجة؟

-ماحكيتش لحد حجة.

- في حاجة حصلت ولازم تعرفيها.
-حاجة ايه تاني؟ كفاية مصايب بقى أبوس ايدك.
-اتكتب على الحيطه امبارح بالليل حاجة بالدم.
-حاجة ايه؟
-اتكتب الروح التانية ..علياء.
-يالهوري علياء صاحبتنا؟
-آه.
-طيب الحقي روجي حذريها.
-فوت عليها وعملت حجة انك تعبانة وعيها تيجي معايا
عشان نشوفك بس أمها قالت انها مش لقيها من بعد العشا وده
نفس الوقت اللي ظهر فيه الاسم على الحيطه.
-معني كده اننا كلنا هنموت بالترتيب اللي دبنا بيه
القطط.
-أنا مش فاكرة الترتيب أصلا.
-ولا أنا، حرام عليكي أنت السبب في كل اللي بيحصل ده.
-انا جيا لك نشوف حل مش تبكتيني.
-عيزاني أعملك ايه، أنا بشوف كوابيس وقطط سوده وأنا
صاحيه ونايمه.
-هو الشيخ اللي بيقولوا ان أبوكي جابهولك ده قالك ايه؟
-ان معمولي عمل مرشوش ومخطياه وممكن يكون لغبي
وخطيته مايعرفش المصيبة المسيحة اللي هبناها.
-وماينفعش يعرف لأن البنت اللي اختفت في أول يوم دي
بنته.

-يالهوري، هي رحاب تبقى بنت الشيخ.
هزت راسها وحطت وشها في الأرض فقولتلها ...
-ربنا ينتقم منك يا نهلة زي ما ضيعتينا معاكي، افرحي
بالامتحانات وانت بتشيلى ذنب كل واحدة فينا.
-أنا ماشيلتش ذنب في حاجة، هما كانوا جاينين وعارفين
احنا هنعمل ايه انتي بس اللي ماكنتيش عارفة، بس دبحتي القطة
بارادتك لعلمك لو ماكنتيش دبحتها ماكانش هنتأذي ولا
هيحصل حاجة، من الآخر انت شريكة معانا.
-يا رب ، يا رب رحمتك يا رب.
-تفتكري مين اللي هيموت النهاردة بالليل أو هيختفي؟
-هو أنتي باردة يا نهلة؟ اللي بتتكلمي عليهم صحباتك
وعشرة عمرك، ازاى مستحيلة تقولي كده.
-أنت مكبرة الموضوع ليه؟ أنا عايزة حل لليلة دي عشان
فاضل ٣ وبعدين أنت وأنا لو ما اتحلش الموضوع ده هنموت كلنا.
-دلوقتي خايفة من الموت.
-أمي دخلت بالعصير، نهلة شربت منه بوق وقالتلها ...
-شكرا يا طنط أنا همشي عشان ماما ماتقلقش عليا، أصل
في بنات بتتخطف الأيام دي.
-أمي بحخضة قالتلها...
-خطف ايه اللي هيحصل في بلدنا؟
-مش عارفة والله بس أبويا حرج عليا متأخرش.
-ماشي يا بنتي روجي طوالي وربك يجيب العواقب سليمة.

قبل ما تمشي نهلة قربت مني وباستني في خدي وقالتي
هرن عليكي بالليل أقولك على الروحة الثالثة طلعت مين، غمضت
عيني وبلعت غصتي وسكت، كان نفسي أصرخ فيها وأقوم أضربها
أشتمها بس كنا هنتفضح، بلعت ريتي وطلبت من امي تضلم
الايضة وتاخذ العصير وتسبيني أنام، كل شوية كانت بتدخل
تظمن عليا، فأمسح دموعي بسرعة وأعمل نفسي نايمة وما اردش
عليها، حتي معاد الاكل قولتلها فيه اني ماليش نفس، فضلت
حاسبة نفسي وحاطة التليفون قدام عيني ، كمنت عملاه صامت
، بعد العشا بنص ساعة شاشة التليفون نورت وظهر اسمها الي
بقي بيرعبي، اتصلت مرة واتنين واضح انها كانت مصرّة اني أرد
عليها فتحت عليها في الثالثة وسمعتها بتضحك وبتقول ...

-تخلي الروح الثالثة طلعت مين؟

قولتلها بصوت مهزوز...

-مين يا نهلة!

-الروح الثالثة.. رغبة صاحبة رحاب بنت الشيخ.

-تفتكري هيسكتوا على بناتهم الي بتختفي دول.

-ما احنا مش عارفين هما بيروحوا فين ولا بيجرالهم ايه؟

-ربنا يستر، ربنا يستر.

-عبير فاضل روحين يا عبير ودورك يجي.

-اخربي بقي.

تعصبت عليها وقفلت التليفون في وشها وفضلت أعيط،

أبويا دخل عليا وقالني...

-للأسف يا بتي الشيخ مش هيجي النهاردة عشان بيدور على بته اللي ضايعة.

-هي ضاعت ازاي يا بابا؟

بيقول كانت بتذاكر مع صاحباتها ومارجعتش من يومها.
-وبلغ؟

-مايعرفش صاحباتها يا بنتي، ربنا يعتره فيها.

-دي مسؤلية عليك يا بابا عشان أنت العمده صح؟

-أكيد يا بتي، ربك عالم بالحال.

فضل قاعد معايا شوية وبعدين جاله تليفون فسابني وخرج وهو متعصب، عرفت من امي اللي دخلتلي بعد ما مشى ان المسؤول عن المركز كلم أبويا عشان هو العمدة وطلب منه يروحلهم عشان يشوفوا هيتصرفوا ازاي في بلغات الاختفاء اللي متقدمة ورا بعضها لبنات في البلد، أمي قالتلي...

-والنبي يا عبير يا بتي ما تطلعيش ولا تدخلي حتى

الامتحانات بلاها مش عيزاكي تتعلمي بس تفضلي جاري، مقدرش أدخل أوضتك الصبح ملاقكيش ولا ان قلبي يتقهر عليكي زي ما مقهور على البنات دول رغم اني ماعرفهمش.

-ربك مايجبش غير الخير يا أمي.

فضلت وخداني في حضنها، كانت بتطبطب عليا وأنا

بعيط بحرقة، مش عارفة كنت بعيط صحايي ولا على نفسي ، فضلت قاعده معايا لحد الفجر وقامت تصلي وقالتلي وهي على باب الأوضة...

-هدعيلك يا نور عينيا.

-ربنا يخليكي يا أمي.

خرجت من الأوضة وسابتني لوحدي، فضلت باصة
للسقف لحد ما حسيت بحركة جنبي على السرير، بلعت ريتي
بصعوبة وبصيت بفرع لقيت قطة سوده على السرير، فجأة قلبي
اتقبض والنور قطع فصرخت بصوت عالي، عيون القطة كانت
بتنور أحمر في الضلم قدامي بس في نفس الوقت كان في نور كشاف
بيقرب من باب الأوضة اللي خبط فجأة فالقطة اختفت فقولت
بصوت مهزوز...

-ادخل.

الباب اتفتح وأحمد ابن عمي وقف وهو ماسك الكشاف

وقالي...

-مالك يا عبير بتصرخي ليه؟

-ولا احاجة اتخضيت بس لما الكهريا قطعت.

-طيب هسيبلك الكشاف هنا، أنت مش عايزة تقوليلي

حاجة؟

-لا شكرا ربنا يخليك.

فضلت صاحية طول الليل ونمت بالنهار، كنت بقوم
على كوابيس أعيط شوية وأنام تاني، وكل ما أسأل على بابا يقولولي
مشغول، العشا أذنت، قفلت موبايل، كنت مرعوبة ان نهلة
تكلمني وقولت كده مش هتعرف توصلني بس في نفس المعاد
لقيت أمي داخلة عليا وبتقولولي...

-خدي نهلة متصلة بيكي عندي وعايزة تكلمك.

مدت ايدي الي كانت بتترعش وخذت منها الموبايل...

-ايوه يا نهلة خير؟

-موبيلك مقفول ليه؟

-هتلاقيه فصل شحن.

-طيب اشحنه وافتحيه على طول عشان عيزاكي.

-حاضر.

أول ما أمي خرجت فتحت الموبايل اللي بمجرد ما اتفتح

جالي اشعار رسالة مكتوب فيها...

-الروح الرابعة .. دعاء.

بلعت ريقى بصدمة وفصلت التليفون، وفضلت قاعدة

مكاني بعيط لتاني يوم الصبح لحد النوم ما غلبنى وصحيت على

صوت قطة بتنونو، مارفعتش راسي، فضلت دافنة وشي في

المخدة كان نفي أتخنق وأخلص، شاشة الموبايل نوررت، بلعت

ريقى بصعوبة كنت عارفة انه ما فيش غيرها فتحت الرسالة كالعادة

كان مكتوب فيها...

-الروح الخامسة .. نورهان

فجأة موبيلي رن ففتحت عليها وسمعت صوتها وهي

بتقولي...

-ماعدش فاضل غيري أنا وانتي يا عيبر، سامحيني أنا بجد

آسفة.

-لما أختفي واسمي يظهر عنك على الحيطه تعالي

احكيلهم كل حاجة، ماتسيبيهمش يدوروا عليا وأنا ميته.

-أنا آسفة يا عيبر والله كنت عايزة أنجح وأرفع راس أبويا.

-مش فارق يا نهلة اللي بيحصل مكتوب وقدر.

قفلت معاها وقومت اتحاملت على نفسي وخرجت من
الاوضة، كنت بودع كل حاجة حتى أمي وأبويا وقبل ما أرجع أوضتي
عديت على أوضة أحمد ودخلتله قعدت على المكتب بتاعه
ابتسم وقال لي...

-ياااه أخير جاية تفضفضي؟

-ماكنش ينفع قبل كده إني أتكلم.

-ودلوقتي عادي؟

-خلاص كلها كام ساعة وكل ده يخلص.

حكيتله كل اللي حصل ففضل يضحك وقال لي...

-ده فيلم رعب عاملينه انتي وصاحبائك؟

-لا يا أحمد ده بجد وتقدر تسأل بابا على البنات اللي

بتختفي، ولو مش مصدق بكره بعد العشا مش هتلاقيني.

-ماشي تمام نستني لبكره ونشوف.

الوقت عدى بسرعة مخيفة، أول ما سمعت آذان العشا

غمضت عيني وفضلت اقرأ قرآن لحد ما سمعت خبط على باب

الأوضة، اتنفضت من على السرير بخضة وقولت...

-مين؟

-أنا أحمد.

-ادخل يا أحمد.

شد كرسي وقعد قدامي وفضل يقرأ ويبصلي الساعة عدت

عشرة كل شوية كنت ببص للموبايل واكلم أحمد وفي الاخر اتصلت

بنهله بس ماكانتش بترد، في الليلة دي كنت خايفة أنا لاني متأكده

اني لما أنا مش هصحبس الغريب اني صحيت تاني يوم عادي

جدا وماكنتش مصدقة نفسي ، أحمد كان كل ما يبصلي يضحك، كنت مستغرياه اوي، عدي ٣ أيام ومافيش حاجة حصلت لحد ما عرفت ان نهلة هي كمان اختفت ولما البوليس راح بيتها لقي اسمها مكتوب بالدم على الحيطه، ماكنتش مستوعبة الخبر بس معني ان ي كام يوم عدي يبقى أنا كده أمان ، بدأت أرجع لخياتي العادية وفي يوم واحنا بنتغدي العساكر ملوا الدوار والظابط وقف قدام ابويا وقاله...

-ماعلش ي عمده بس مطلوب القبض علي عير بتك.

-ليه هي عملت ايه؟

-قتلت ٦ بنات من صحابها.

-ماقتلتش حد والله ما قتلت حد.

وقعت على الأرض وفضلت أصرخ، أحمد سندنني وقالني...

-قومي يا عير وروحي معاهم وأنا هاجيب الدليل الي

يثبت برائتك.

عشان خاطر أبويا ماكيشونيش ، خدوني في البوكس وكل

البلد اتفرجت عليا، ماكنتش عارف أرفع راسي في حد لغاية ما

قعدت قدام الظابط وبددأ يحقق معايا فحكيتله كل الي حصل

في الحقيقة ، على قد ما كان مصدوم في الي حكيتها ومتعاطف

معايا لكنه قالني...

-ما اقدرش اصدقك من غير دليل انكوا حضرتوا حاجة.

-عندي رسايل من نهلة بتأكد كلامي.

-نهلة وموبايلها مختفين، تثبتلي ازاى ان الموبايل

ماكنش معاكي وانتي الي باعته من عليه الرسايل دي؟

في اللحظة دي الباب خبط ودخل المحامي مع أحمد
وقال للظابط ...

-معانا شاهدة بره يا افندم ممكن تسمعها؟
-دخلوها.

كانت تسنيم أخت نورهان الصغيرة وقفت وحكت نفس
اللي حكيتها بس قالت انها ماحككتش لحد غير لما لقوا الجثث
واتأكدت ان أختها ماتت مش هربت بعد ما أحمد قدم ظرف
للظابط وقاله...

دي صور للكاميرت اللي في الدوار، الست اللي موجودة في
الصورة دي واحدة اسمها ستهم كانت موجودة عندنا من غير
سبب وكانت بتيجي كذا مرة بالليل.

وكيل النيابة نادى على العسكري وأمره يجيب ستهم،
وبعد كام ساعة دخل العساكر وهما مجرجرينها، وقفت قداهم،
كانت بتبصلي بغيظ وكره، الظابط قالها ...
-ايه علاقتك بدوار العمدة.

-ماعرفهوش ومابرحهوش يا بيه.

في اللحظة دي سمعن اصوت دوشة جامده بره ودخلت
واحدة تسخة مني بس عندها عين عورة، وقفت قدامها بصدمة
وبيت لأحمد وليهم ، ماحدث كان فاهم حاجة أحمد جه وقف
جنبي وقال ماتخافيش، في اللحظة دي أبويا دخل لمكتب وكيل
النيابة وبص عليا وعلى البنت اللي شبتها ووقف مصدوم، وقال...
-ازاي البت دي شبه عبير بتي؟ كأنها فولة واتقسمت
نصين.

-دي كمان بتك.

-بتي ازاي؟

-اسأل مرتك لما خلفت الاتنين خدت السليمة وطلبت

من الداية تخلص من العورة.

-معقول.

-ستهم ماعملتش حاجة يا ناس أنا اللي قتلت البنات دي

عشان أقهرهم على بتهم لما تنتهم في قتلهم، ستهم مظلومة هي

اللي ربتني وماعملتش حاجة.

-لا يا باشا انا اللي قتلتهم وأنا اللي كنت بأذي عيبر وأنا اللي

سممت ودان صاحبتهم نهلة عشان تجرهم للطريق ده سحر

مالهاش دعوة بحاجة.

الظابط حرفيا ماكنش مستوعب اللي بيحصل فخبط

على المكتب بتاعه وطلب من العسكري يتحفظ على الكل بره

ويدخل واحد واحد، في النهاية اتكشف فعلا ان ستهم عملت كده

عشان تنتقم من أمي فيا وهي اللي كانت بتزولني بالكوايبس

والقطط ستهم في السحر يتفات ليها بلاد، أبويا بعدها بكام يوم

جاب سحر البيت عندنا، هي صعبانة عليا بس أنا مش عارفة

أخطى انها كانت السبب في كل اللي عيشته، فقتلتها وهربت.

-تقصدي ان سحر وستهم السبب في انك تسيبي بلد

وتيجي هنا؟

-منهم لله كلهم، حسبي الله ونعم الوكيل فيهم.

ساعتها سمعت صوت بتاع المعصرة الي كنا قاعدن

قدامها وهو بيقولي...

-البت دي على الله حكايتها خالص دي غلبان ماتقدرش
تقتل ناموسه، ماחדش يعرف عنها حاجة غير انها عملت حادثة
ووقعت في الشارع ولما قامت كانت فاقدة التاكرة بالشكل ده.

سلاسل

كان عندي هوا في اليوم ده وأول ما خلصت وروحت البيت لقيت تليفوني بيرن رميت الشنطة وحطيت الموبايل قدامي وقعدت على الكنبه وسندت ضهري لورا، ماكنش عندي استعداد اسمع كلام زيادة بعد الحلقة بتاعة النهارده، بس اللي كان بيتصل كان حد مستفزباين أوي انه مصمم يخليني أرد عليه، بصيت في التليفون ومطيت شفافي ورميته بعيد عني باستهتار، رجعت بدماعي لورا وغمضت عينيا وافنكرت اليوم اللي كنت بتحايل عليه فيه وبقوله...

-ماتسبنيش، أرجوك بلاش لو سيبتني هموت.

فأكرة رده البارد اللي زي مشاعرة يومها قالي...

-ماحدش بيموت من الحب ، احنا يا دوب مشاعرنا

بتتجرح بس مش أكثر.

يومها مشي وسابني في الكافية وأنا حاسة ان قلبي اتكسر ، خدت عهد على نفسي اني أخليه يندم ويرجع يجري ورايا زي الأول وأكثر ونجحت في كده بدليل اتصالاته اللي بقالها نص ساعة مش بتقف، سليم مش غبي هو عارف انه خسرني بس بيحاول يمكن تصيب وأرجعله بس ده بعده، ضحكت على اللي أنا فيه ، كل ما أتخيل شكله وهو متعصب اني ما بردش عليه بحس بانتصار فظيع ، عملت الفون صامت ودخلت خدت شاور واتعشيت حاجة

خفيفة ودخلت السرير ، شديت عليا البطانية و مسكت المجلة
اللي علي الكومودينو وفضلت أقلب فيها لحد ما عيني راحت في
النوم.

صحيت على جرس الباب اللي ماكنش بيطل رن، لبست
الروب وحاولت أوصل للباب، فتحته وبصيت للشخص اللي كان
واقف قدامي وقولتله...

-خير؟ في حاجة؟

-حضرتك أستاذة ليالي أبو الفتوح الشهيرة بسلاسل؟

-أيوه أنا خير في ايه؟

-حضرتك مطلوبة للشهادة في قسم أول ...

-ليه خيرا!

-ليه دي هتعرفيها لما تيجي معانا، أنا راعيت ان حضرتك

مديعة مشهورة وكده فجاي لحضرتك بلبس ملكي ولوحدي كمان.

-تمام، ممكن تستناني خمس دقائق أغير هدومي بس.

-أكيد اتفضلي يا افندم.

دخلت الاوضة غيرت هدومي بسرعة وسحبت شنطتي

وتليفوني ونزلت مع الطابط وأول ما وصلنا طلب مني استناه ثواني

ودخل لوكيل النيابة وبعد كام دقيقة نادى عليا وقالى...

-اتفضلي يا أستاذة ، عاصم بيه مستنيكي جوه.

-شكرا .

دخلت المكتب ووكيل النيابة رحب بيا وفضل يشكر في

شغلي ويقولني انه من أشد المعجبين بيا وفجأة سكت وقالى...

-أنا عارف ان المواضيع اللي زي دي بتبقى حساسة بالنسبة للمشاهير، عشان كده التحقيق ده مش رسمي.
-مش فاهمة حاجة بصراحة.
-في جريمة قتل حصلت الساعة ٣ ونص الفجر.
-تمام وأنا ايه دخلي بالموضوع ده؟
-أنت اخر رقم لقيني القتل متصل بيه.
-هو مين اللي اتقتل بالظبط؟
كنت مرعوبة من اجابة السؤال وبدعي انه يكون غير اللي في بالي، قلبي اتقبض وهو بيقول ...
-سليم مكاوي .
-سليم!
-تقدري توضحيلي علاقتك بيه عشان يتصل بيكي في وقت زي ده ١٣ مكلمة؟
بلعت ريتي بصعوبة وقولت لنفسي.. يظهر ان اللي افتكرته ماضي وعدى هيتكشف يا ليالي بس هو فوقني من شرودي وقيالي...
-أستاذة سلاسل حضرتك معايا يا افندم.
-اه اه معلش بي الخبر مقبض.
-تمام مافيش مشكلة، أحنا بس حاين نعرف ايه نوع العلاقة اللي كانت بتربطك بالاستايلست سليم مكاوي.
غمضت عيني وبلعت ريتي ودموعي خانتني، كنت متأكدته انه حس اني بحول اتماسك فقررت أقوله الحقيقة...
-أنا ومكاوي كنا مخطوبين .

- كنتوا؟ ولا لسه!
-كنا ، الموضوع خلص من تسع سنين من قبل ما
أكونسلاسل المذيعية ومن قبل ما يكون مكاوي الاستايلست.
-طب ما علش سامحيني في السؤال، ايه اللي يخليه يتصل
بيكي في الوقت ده؟
-ما عرفش؟
-طيب ايه طبيعة علاقتكم بعد فسخ الخطوبة؟
-كنا بنتفادي اننا نتجمع في مكان واحد.
-ما اتكلمتوش بعدها خالص؟
-لا .
-ما حاولش يتصل بيكي خالص؟
-بصراحة كان في أوقات أرقام غريبة بتتصل بيا من فترة
للتانية بس أنا ما كنتش برد.
-وايه اللي يخليكي واثقة ان الارقام دي هو اللي بيتصل
منها؟
-عشان أنا حافظة صوت نفسه.
-لدرجة دي؟
-وأكثر.
-حضرتك ماتعرفيش حاجة خالص عنه، علاقاته،
صحابه ، أهله لو حد عنده عداوه معاه مثلا.
-احنا منفصلين من زمان، بس على العموم ما اعتقدش،
لأن سليم شخص مسالم فوق ما تتخل.

-طيب انا مش عارف أقولك ايه بصرة؟ بس عمما البقاء
لله تقدر تروحي.

-لو في جديد ممكن تبلغني ان أمكن ؟
-أكيد طبعا.

سيبتله الكارت بتاعي يومها ومشيت وأنا مش شايفة
قداي، حاولت أتماسك لحد ما وصلت البيت، وساعتها اتفتحت
في العياط، ماكنتش قادرة اكلم مع حد ولا اطلع هوا حتى عشان
كده أجلت كل شغلي وحلقاتي ، ماكنتش مستوعبة ازاي يموت
كده فجأة! لومت نفسي مليون مرة اني ماردتس عليه، يمكن كنت
أنقذته، بس غروري وجبروتي كانوا سبب في موته، فضلت ألوم
نفسي وحملتها ذنبه لدرجة اني تعبت ودخلت المستشفى،
واتحجرت كذا يوم هناك وفجأة لقيت فوني بيرن ولما رديت لقيت
وكيل النيابة.. حسن باشا، دردش معايا شوية وسألني عن أخباري
ولما طلب مني نتقابل اعتذرتله لاني في المستشفى فخد عنوانها
وصمم يجي يطمئن عليا بنفسه بعد ما يخلص شغله، ماكنتش
عارفة أقابل حد لغاية الممرضة ما بلغتي ان في واحد اسمه حسن
الكردي طالب يدخل ضروري، افكرت اسمه اللي لمحته على
مكتبه ، أيوه هو اللي بيحقق في قضية قتل سليم، قولتها بهدوء...
-خليه يدخل عادي مافيش مشكلة.

بعد ثواني فعلا كان داخل من باب الاوضة وهو مبتسم
وماسك في ايده بوكيه ورد وعلبة شوكلاته، منظره خلاني اضحك
غصب عني، كنت عارفة انه بيجاملني عشان مذيعة ومشهورة

وكده مش عشان سوار عيوني وسط مافيش فيه حد سالك والله،
قدملي بوكيه الورد وحط الشوكولاته وقال...
-ألف سلامة عليكي ، ان شاء الله عدوينك.
-تسلم يا رب.
-خير ايه اللي حصل وصلك لمستشفى ومحاليل والجو

ده؟

-شوية ارهاق بس مش أكثر.
-يعني مش موت سليم مكاوي هو اللي عمل فيكي كده؟
-لا طبعا مكاوي صفحة واتقطعت مش اتقفلت من
زمان.
-أحسن بامانة اللي ظهر في التحريات بيأكد انك بنت
حلال.
-مش فاهمة؟ يعني ايه اللي ظهر في التحريات وليه بتقول
كده!

-مكاوي طلع ليه علاقات نسائية كتيرة وفي بنات وستات
مشتبه فيهم يكونوا هما اللي قتلوه.
-ليه بتقول كده؟
-دوافع قتلهم لسليم قوية.
-دوافع ايه اللي ممكن تخليهم يقتلوا بني ادم.
-الخيانة مثلا، ممكن يكون كان واعد واحدة من اللي
عارفهم بالجواز وخلع، حاجات كتير كده وملابسات غريبة شدي
حيلك وأوعدك اني هخليكي تحضري التحقيقات.
-أحضر تحقيقات ايه؟

- التحقيقات مع المتهمين بقتل سليم مكاوي.
-لا ما اعتقدش اني هقدر أعمل كده.
-ليه ده سبق صحفي وفرصة على طبق من ذهب ليكي؟
-أنا ماستغلتش مكاوي وهو عايش عشان أستغله وهو ميت!
-لسه جواكي مشاعر ليه؟
-لا لا لا.
-يبقي تحضري التحقيقات وتعملي لقاء ، أنا عايز الناس تعرف اننا مش ساكتين وبندور على الحقيقة، ساعديني لو فاكرة لمكاوي حاجة حلوة كانت بينكم في يوم.
غمضت عينيًا وسكت، حاجة حلوة بيني وبين مكاوي؟
دي عمرها ما حصلت، كنت مضطرة أوافق على كلام حسن لأنه هتبقى تغطية لشغل هتعلي نسب المشاهدة للبرنامج بتاعي فهزيت راسي وقولتله...
-طيب خلاص موافقة.
-بكرة الساعة ٩ الصبح تكوني منوراني في المكتب، لو تحبي ممكن أعدي أهدك.
-لا شكرا هعرف اجي لوحدي.
-طيب هستأذن أنا بقى وعلى معادنا بكره.
مشى من قدامي وهو مبتسم، ماعرفش ليه كنت قلقانة ومتوترة ، حاسه اني في اختبار من ربنا، لازم انحي اي حاجة كانت بيني وبين مكاوي عشان نعرف نوصل للي عمل كده وياخد جزاؤه، مكاوي مايستهلش يموت غدر، يمكن لو ساعدتهم يعرفوا القاتل مستوحاة من أحداث حقيقية

ونشرت قصة مكاوي على أعلى مستوي الناس تهتم والدنيا تتقلب
لحد لحقيقة ما تبان والجاني ياخذ عقابه وأهو أبقي ريحت
ضميري، حاولت أنسى الموضوع وأطلعه من دماغي وأنام شوية
بس ماكنتش عارفة أفصل لحد ما الدكتور جه بص عليا وقال...
-أنتي تمام لو حابة تخرجي مافيش مشكلة بس بلاش
تتعرضي لضغط أو ارهاق.

-حاضر يا دكتور.

بعد ما خرج اتصلت بأختي وطلبت منها تيجي تاخذني
وهي ماكدبتش خبر بعد ساعة الاربع كانت معايا في المستشفى
بتحضرلي حاجتي عشان أخرج، صممت يومها اني أروح على
البيت ورفضت أقعد معاها، هي السبب الرئيسي في انفصالي عن
سليم زمان كذا مرة أصلا دخلنا الشقة وقعدت على أقرب كرسي
وبصيتها وقولتها...

-شكرا اني تعبتك معايا.

-تعب ايه يا سلاسل؟ أنا أصلا هبات معاكي.

-لا يا حبيبي ماينفعش عشان جوزك وبنتك.

-أنا معرفاه وهو موافق خلاص بقى.

-لا والله ابدأ لازم تروحي ولو احتاجت أي حاجة أكيد

هكلمك ، انا ماليش غيرك.

-أنت كويسة يا سلاسل؟

-اه يا نرجس بخير.

-متأكدة؟

-أيوه يلا روجي عشان الوقت ما يتأخرش عليكي.

خرجت نرجس وأنا فضلت قاعدة مكاني على الكرسي،
افتكرت أول يوم دخل فيه الشقة بتاعتنا وهو جاي يتعرف على
أهلي وعيظت كتير لدرجة اني كنت سامعة صوته حواليا، فتحت
عيني اللي كانت منفوخة من كتر العياط ورفعت راسي بحزن ،
لقيته قدامي واقف وشكله قلقان، حط ايده على دماغي وقال...

-حبيبتي القمر مالها؟

-ماليش.

-على سليم برضو! ايه اللي حصل ضايقك بالشكل ده؟

-مضايقة انك مشيت وسيتني.

-مشيت فين؟ أنا معاكي أهو!

-معايا ازاي وأنت موت!

-هو أنتي لسه أي حاجة تتقالك تصدقيها!

-يعني انت لسه عايش؟

-أومال معاكي ازاي يا بنتي؟

-ه طيب اثبت بقى.

-ازاي؟

-حضرلي العشا اللي بحبه!

-ماشني حاضر بس...

فتحت عيني وشهقت بصوت عالي، بصيت حواليا لقيت
نفسى قاعدة على الكرسي وعيني مفتوحة على اخرها مش عارفة
الصوت اللي في المطبخ ده جاي منين، بلعت ريقى بصعوبة
ومشيت لحد ما وصلت للمطبخ وقفت على الباب وكنت خايفة

أرفع عيني في اللي جوه، فكرتها في الأول نرجس أختي لكن لما ناديت عليها مرة واتنين وماردتش رفعت عيني ولفيت في المطبخ مالقتش حد بس اتصدمت وعينيا دمعت لما لقيت الطبق بتاع السلطة اللي بحبه محطوط على الترايزة بتاعة المطبخ وجنبه ورقة ستيكي نوت صغيرة مكتوب عليها ... بحبك، ابتسمت تلقائي بس بعد ثواني الابتسامة دي اتلاشت لما افكرت اني بكره هغطي تفاصيل التحقيق مع البنات اللي قتلت سليم ، أومال ايه ده مين حضرلي ده يمكن أنا بيتهيا لي ! حسيت ساعتها بصداق فظيع ودوخة جامدة فاضطريت اني اخذ طبق الفاكهة وأدخل اقعد في الأوضة ، قعدت علي السرير وحطيت الطبق جنبي، حطيت دماغي على المخدة وغمضت عينا وفجأة سمعت صوته وهو بيقولي...

-ملاك نايم والله يا بختي بيكي.

-لا بقولك ايه بقى أنت ميت وأنا بكره هحضر التحقيق

مع البنات اللي متهمة في قتلك.

-ههههههه الله وايه كمان يا حياتي.

-انت بتهزر؟

-وماهزرش ليه؟ اديني سبب يخليني مكشريك

على طول كده.

-سليم أنت عايش ولا مين؟ أنا مابقتش عارفة

الحقيقة من التهيؤات.

-مميمم حطي ايدك على قلبك وأسألبيه

هيجابوك اجابة هتريحك.

-قلبي بيقولي انك عايش، بس هما كلهم بيقولوا

لا.

-طيب انا همشي عشان كلامك بدأ يزعلني،

هسيبك تنامي دلوقتي عشان شكك تعبانة.

-مكاوي أرجوك ماتطلعش ميت.

-أنا لو موت هتبعي انت السبب يا سلاسل.

-هو في حد بيموت حد بيحبه ؟

فجأة صوت الضحك على وسمعت بنات كتيرة بتنادي

عليه...

- مكاوي ، يا سليم، يا سيمو ، سمس.

قومت من على السرير بفرع وقولته...

-مين دول يا سليم بس سليم كان اختفي.

قومت قلبت الشقة عليه بس كان فص ملح وداب

مالوش أثر، لفيت حوالين نفسي بتوهة وقعدت أعيط علنا لأرض

كنت بردانة ومنهارة أوي دموعي كانت بتنزل على خدي تكوييني

لحد ما سمعت رنة الموبايل بتاعي، جريت عليه ورديتبلهفة ، كان

رقم غريب فقولت يمكن يكون سليم...

-ألو مين معايا؟

-أنا حسن يا سلاسل، لقيتك اتأخرتي فقولت

أشوفك هتيجي ولا هترجي في كلامك؟

-حسن مين وهاجي فين؟

-وكيل النيابة مش اتفقنا تحضري التحقيقات!

-ماعلش اسفة ماخدتش بالي.

-أنت كويسة ؟

-اه بس مانمتش كويس ومش حاسة بالدنيا من حواليا.

-طيب أجي اوديكي المستشفى؟

--لا لا هفطر وهاجي اديني بس ساعة.

--خلاص مستنينك.

بصيت حواليا ومسحت وشي بكف ايدي ودخلت الحمام، غيرت هدومي وخذت شاور وأما خلصت، طلعت على المطبخ عشان أشوف اي حاجة اكلها قبل ما أنزل، عملت سندوتش وكتته وأنا واقفة بس فجأة حسيت ان في ايد محطوطة على كتفي، بصيت ورايا بفزع لقيته واقف ورايا وبيقولي باستغراب...

--مالك يا حبيبي؟ ايه اللي خضك كده؟

--هو أنت هنا ازاي؟ مش أنت موت!

--هو خلاص كل ما تشوفيني هتسأليني السؤال ده؟ أنا

غلطان اني جيت أطمئن عليكي؟

فجأة جرس الباب رن، بصيت على الباب ورجعت بصيت لسليم مالمتهوش، خدت نفس عميق وفتحت الباب، لقيت البواب جايبلي وصلات الكهريا، حاسبتة عليهم وخذت شنطتي وحاجتي وخرجت من الشقة، مش عارفة أنا وصلت للقيم ازاي بس حسن أول ما شاف شكلي طلبلي ليمون وخذني في مكتب تاني وفضل يدردش معايا شوية وقال...

--مالك لسه تعبانة ولا ايه؟

--لا انا تمام بس نومي ملخبط.

-- في حاجة أقدر اساعدك بيها؟
-- ما عرفش كوابيس وحاجات غريبة بتحصل.
-- احكي لي هسمعك أنا من أشد المعجبين بيكي.
-- طيب نخلص تسجيل ونروح أي مكان لأن أعصابي مش
مستحيلة.

-- تمام ، تعالي ورايا.
دخلي مكتب جواه باب بيودي على أوضة تانيه وفيه
شباك ازاز تشوف منه اللي في الاوضة ، بصلي وقال لي...
- خليكي هنا وهتسمعي من كل واحد فيهم اللي
حصل بالتفصيل من غير ما حد منهم يعرف ومش هجبرك تقدي
حاجة بس في الاول والاخر السبق الصحفي في القضية دي ليكي.
-- متشكرة جدا.

سحبت كرسي وقعدت عليه وهو فتح الباب ودخل،
كانت الاوضة فيها مكتب وكرسيين وبنط قاعدة ، قعد قدامها
وابتسم وعرفها بنفسه ومسك ملف كان على الترابيزة وقالها...
-- سلوى ابراهيم، ٢٢ سنة من المعادي متخرجة من كلية

اداب بتقدير جيد، ايه علاقتك بالمجني عليه؟
بدأت تتهته في الكلام، كان باين انها مرتبكة ومش عارفة
تجمع كلمتين على بعض وهو كان بيخبط بالقلم على الترابيزة زي
ما يكون قاصد يوترها عشان تعترف ، أخيرا استجمعت شجاعته
وقالتله...

-- كان مفروض هيجي يتقدملي الأسبوع اللي جاي؟

-- وايه اللي حصل؟

--مافيش قريرت خبر وفاته في الجرايد وسمعته في الاخبار زي الناس.

--يعني ما انفصلتوش قبلها وبعثلك رسالة وقالك مش هينفع نكمل مع بعض؟
--لا طبعا الكلام ده ما حصلش.

--حصل يا سلوي النيابة أمرت بتفريغ الرسائل بتاعت تليفون سليم ومن ضمن الرسائل اللي بعثها قبل ما يتوفى بكام ساعة كانت رسالته ليكي اللي قالك فيها انه مش هيقدر يكما معاكي ولا يتجوزك وهو بيحب واحدة تانيه وأنت ساعتها بعثيله رسالة على واتس اب هددتية فيها انك هتفضحيه وهتعملي وهتخلي فيه وبعد شوية حذفتي الرسالة بس سليم الواتس عنده مش بيحذف والرسائل بتفضل.

--والله ماقتلتوش ده كان تهديد عابر عشان يخاف ويرجعلي، أنا بحبه بجنون مستحيل أأذيه.
--وهو؟ كان بيحبك ولا بيتسلى؟
--لا طبعا سليم مستحيل يكون كده.

أول ما سمعت الكلمتين بتوعها دول ضحكت وعينيا دمعت، ماكنتش عارفة أضحك ولا أعيط مش ده اللي قال مش هيجب بعدي، ربنا يلعنه يستاهل اللي حصله، بعد شوية حسن نادي على العسكري خد البنت الي كانت قاعدة نزلها الحبس ونادي على المتهمه اللي بعدها وأول ما دخلت اتصدمت ماكنتش أتوقع ان ذوقه يتدني كده حسن اتكلم وقالها...

--سماح السيد ٥٢ سنة ، ارملة وما عندك كيش عيال،
اتجوزتي واحد غني ودفنتي نفسك معاه لحد ما مات عشان
الفلوس.

--خي يا باشا!

--اقعدي يا سماح ، أنت عارفة أنتي هنا ليه؟

--لا يا باشا هعرف منين؟

--انت متهمه في قتل سليم مكاي .

--سليم ايه ده اللي أبصله وأضيع حياتي عشانه.

--ايه علاقتك بيه؟

--ولا علاقة ولا حاجة ، ما يغركش الكام هدمه اللي كان

بيلبسهم ويتفشخر بيهم دول، ده واد ملون اسألني عليه أنا، كان

بيلف عليا عشان طمعان في فلوسي ولما لقاني لقمة مش سهلة

خلع الله يسامحه.

-يعني أنتي ما كنتيش بتجري وراه مثلاً؟

-لا ما حصلش ده من دور ولادي لو كنت خلفت يعني.

--بس التحريات اثبتت انك كنتي بتطارديه كتير وبتجبيله

هدايا وعرضتي عليه يصاحبك عشان تباني صغيرة وروشة قدام

صاحباتك ولما رفض هددتبه انك هتضيغي مستقبله وتفضحيه

انه مش تمام وبتاع رجالة.

--لا طبعا ما حصلش، الكلام ده كذب، اللي عامل

التحريات دي قاصد يبيني وحشة لا أنا ست شريفة والرجاله بتترمي

عليا كده.

-يعني الصفحة اللي كانت بتهاجم سليم مكاوي قبل موته
بكام يوم مش أنتي اللي عملها يا سماح؟
-لا يا باشا هو أنا هنزل مستويا لمستوي عيل نكرة زي ده!
-عمتا الانكار مش هيفيدك لأننا عارفين كل حاجة.
-بصرحة كده أه ، أنا اللي سلطت البنت اللي شغاله
عندي تعمل كده بس والله ماتوصل للقتل والدم، أنا بس كنت
عايزة أكسرة زي ما كسرني وقال لي أنت في مقام أمي، جاه مو مطرح
ما هو قاعد البعيد.

-ده بدل ما تترحمي عليه.

-ربنا يرحمنا جميعا.

كنت حاسة اني داخعة ومصدومة في اللي بسمعه ، أنا
عارفة ان سليم وحش بس مش للدرجة دي، تةصل بيه ان واحدة
نقول عليه بتاع رجاله! مسحت دموعي اللي خانتني وفوقت على
صوت حسن وهو بيقولي...

-شكلك اتأثرتي جامد؟ أنت لسه بتحببه صح؟

-مش حب بس هو كان كل حاجة في حياتي كان طفولتي
ومراهقتي، ابن الجيران اللي كنت بستناه من السنة للسنة عشان
اشوفة لما يجي يصيف مع أهله ، أنا تخطيته من سنين بس مش
عارفة ليه قلبي واجعني أوي الايام دي.

-يمكن زعلانة علي العشرة؟

-وهو ماشي ماسبش مكان ليها، كل اللي وصلته ده عشان
أثبتله اني هنا عشان يسمع اسمي في كل حته.

-تفتكري كان عايز ايه منك يا سلاسل قبل ما يموت؟

-معرفةش وصدقني بأنب نفسي اني ماردتش، التليفون
كان بيرن قدامي بس أنا ماكنش عندي استعداد بعد تسع سنين
أرجعه حياتي حتى لو صدفه.
-حبيتي بعده؟

--دفت نفسي في الشغل ليل نهار، عشان انساه ونسيت
حياتي معاه ، ما عنديش صحاب ممكن انزل في وسط الليل ابات
عندهم لما أخاف، مليشحد أشكيله أختي متجوزة وعندها حياتها

--مش عارف أقولك ايه؟
--ما تقولش حاجة، فاضل متهمه أنت قوتل ثلاثه؟
--أيوه فاضل واحدة جوه في الاوضة ، أنا قوتل بس أجي
اتكلم معاكي وأفصل شوية من الوش بتاعهم ده.
-هههههه.

--أنت عارفة ان سليم ده طلع مدورها ، كان بيكلم التلاته
في نفس الوقت .
--كمان!

--وفي غيرهم بس مجرد علاقات عابرة، ماكنتش اتخيل
بأمانة ان في بني ادم يوصل لكده.
--عادي بقى أدينا عايشين وبنشوف.
--معاكي حق ، ركزي بقى عشان عايز حلقة جامدة تكسري
بيها الدنيا.
--ماشي تمام يلا بينا.

أنا متعودة من صغري اني أدوس على الحاجة اللي بتوجعني وأعدي عليها عشان ماחדش يفكر يمسكني منها، حسن ماينفعلش يشوفني مهزوزة أو زعلانة على سليم وبالليل عادي هطلع هوا وهعمل حلقة تكسر الدنيا عن مقتل الاستايلست الشهير سليم مكاوي، ابتسمت لانعكاسي في المراية بحسرة وقعدت أسمع اللي بيتقال في استجواب البنت اللي فاضلة...

-اتفضلي ياريم، بصي أنا عارف انك بنت ناس ويمكن انتي مالكيش في الجوده ب بما انك في دايرة الاتهام لازم ندردش شوية.
--أنا ماعملتش حاجة؟

--ريم محمود ١٨ سنة من الفان بتوع سليم مكاوي ، متعصبة دايمًا ليه وفي أي حته بيبقي موجود فيها بتكوني هناك قبله، ايه علاقتك بالمرحوم.

--مافيش أي علاقة أنا كنت واحدة من الفانز بتوعه وعامله بيدج على الفيس بسم الفان فأوقات كنا بنتقابل لو في مناسبة أو حاجة.

--وعملية الاجهاض اللي عملتيها من شهر ونص وهو كان موجود معاك فيها.

--ايه ؟ أن تعرف الكلام ده منين؟

--تحريات ياريم احنا مش بنلعب، ها هتعترفي بكل حاجة ولا نوسع الدنيا ونبلغ أهلك باللي حصل وعلاقتك بسليم.
--لا لا هقول كل حاجة.

كنت مصدومة من اللي بسمعة ومش مستوعبة ، قلبي كان بيدق بسرعة أوي معقول سليم يطلع بالشكل ده ، أنا كنت

عاميه ولا هو الحب اللي بيخلي الانسان أعمي؟ مسحت دموعي
واتعدلت على الكرسي وركزت في كلامها وطريقة تعبيرها اللي الي
حد ما كانت صادقة قائلته...

--سليم مش وحش زي الناس ما هي شيفاه مش بتاع
بنات ولا حاجة، ماחדش فهمه غير ولا حبه قدي.

--عشان كده ، اتجوزك في السر؟ وخلاي تنزلي اللي في
بطنك لما عرفك انك حامل؟

--لا خالص هو عرض عليا انه يتقدملي بس أنا قولتله
نأجل الموضوع شوية لأن أهلي مش هيوافقوا خالص.

--مش عارف يا ريم اصدقك مع انه نفسي ، أنت عايزة
تقنعيني انك ما شوفتيش الاخبار اللي اتنشرت عنه انه بيحب
واحدة في الوسط الفني وعايز يتجوزها.

--اشاعات مجرد اشاعات بتطلع على الكل وأنا كلمته
وواجهته وهو نفى كل الكلام ده.

--قتلتيه ليه؟

--ماقتلتوش.

--لاخر مرة قتلتيه ليه؟

--بقولك ماقتلتوش.

--ورسالة التهديد اللي على الماسنجر بتاعه من أك

مجهول مش انتي اللي بعيتها؟

-لا مش أنا ، سليم حتي لو كان ارتبط بأي واحدة من

الوسط بتاعهم كان هيلف ويرجعلي لأن ماחדش بيفهمه غيري.

--انتي صعبانة عليا أوي ، عارفة كان في كام واحد قبلك
هنا متهمين في نفس القضية؟
بلعت ريقها بصعوبة وفجأة أغمى عليها فنقلوها على
المستشفى، استأذنت من حسن وروحت البيت عشان أجهز
وأنزل شغلي وأول ما وصلت البلاتوه بعته رسالة ... افتح التي في
حالا، الشو هيبداً.
لأول مرة أبقى طالعة هوا وأنا حاسة اني عايزة أعيط وأقول
للناس أنا مش كويسة بس غصب عي لازم أبقى متزنة، حسيت بهوا
بارد بيخبط في وشي وسمعت صوت بيهمس جنب ودني الشمال
كان بيقول...

--بلاش عشان هحول حياتك لجحيم.

خدت اشارة الهوا فابتسمت ببرود وقولت...

رجعالكم بعد غياب أسبوع كامل بتعليق على حادثة
حصلت من كام يوم لاستايلست مشهور كان مكسر الدنيا وكل
بنات البلد كانت بتكراش عليه واسمحولي من مكاني هنا أقولكم
ادعوله بالرحمة مهما كان هو بشر والبشر خطائين...

--سليم مكاي مواليد ٨٨ محافظة القاهرة اتخرج من
كلية هندسة بتقدير جيد، سافر الامارات سنتين ورجع مصر تاني
اشتغل استايلست واعتمد على شكله عشان يجذب البنات ليه
ونجح في ده بصورة كبيرة جداً، سليم مات من كذا يوم واتكشفت
مع موته بلاوي كتيرة، ماكنش بني ادم زي وزيك ده كان شيطان
ماشي على الأرض بينا بينهش في اخواتنا وبيضحك عليهم، بنات
كثير في دايرة الاتهام عشان كان في علاقات بينها وبين سليم بدون

ذكر أسماء على سبيل المثال لا الحصر في اللي كانت بتصرف عليه وفي اللي كانت حامل وخلاها تعمل اجهاض وفي اللي وعدھا بالجواز وخلع كلھم صوابع الاتھام موجهه ليھم عشان مشوا ورا قلبھم وماحكموش عقلھم ، كل مجال في الحلو والوحش ويمكن نصيب بنات كتيرة انها قابلت سليم وأذاھا وأحب أقول لأي بنت من مكاني هنا ماتفقدیش ثقتك في الناس بسبب انسان وحش ، الدنيا مش بتقف على حد.

خلصت الحلقة والدنيا اتقلبت من بعدها ، كنت حاسة في الوقت ده اني خفيت خلاص من سليم وماعدش حاجة فارقة معايا حتى الذكريات اللي بينا دفتنتھا معاه، أول ما روحت البيت اتفاجئت بمكالمة من حسن باركلي يھا على الحلقة وقالي اني كشفت سليم واللي زيه وأنقذت بنات كتيرة أوي، اتفقنا نتقابل تاني يوم وفضلنا ندردش لحد ما فجأة الكهريا بدأت ترعش عني في الشقة والجو برد أوي ، حتى صوت حسن بقي بيقطع، كنت مستغربة أوي لأن الشبكة عندي كويسة، قفلت معاه واتصلت تاني وفتحت الاسبيكر، كنت بتلقت حواليا بخوف سمعت صوت سليم بيرد عليا من تليفون حسن فاتخضيت والفون وقع ني غصب عني، قربت بحذر ومسكت الفون كان حسن بيتصل فتحت عليه وسكت ..

--أنت كويسة فصلتي ليه ؟ ليالي أنت بخير!

--ماعرفش.

--في ايه طيب؟

--سمعت صوت سليم عندك لما اتصلت بيك.

--بس انت ما اتصلتيش .

--لا لما الخط فصل اتصلت وانت فتحت وسمعت

صوت سليم.

--لا والله ما حصلسلم مين اللي هيكلمك من عندي سليم

مات ، يمكن انتي مضغوطة بس مش أكثر، حاولي تتراحي ونكمل كلامنا الصبح.

--تمام ، تصبح على خير.

قفلت معاه وفضلت مركزة مع النور اللي بيروح ويجي

ومسكت دماغي وفضلت أخبط عليها جامد ب فجأة حسيت

بحركة جنبي ، رفعت عيني وبصيت لقيته قاعد قدامي على السرير،

كان وشه كله مليون دم وهدومه مقطعه وفي جسمه جروح كثير،

رجعت لورا وانكمشت على نفسي، مد ايده عشان يمسك ايدي

فبعدت عنه فبصلي بغضب وقال...

-ليه عملتي كده وشوهتي سمعتي؟

--انا ما عملتش حاجة وماقدمتش غير الحقيقة انت اللي

عملت في نفسك وفي بنات الناس كده.

--ليه طلعت حد وحش أوي كده؟

--أنا مش حد وحش يا سلاسل بعدك هو اللي خلق مني

الوحش ٩٥٥ سنين مافكرتيش فيهم تطمني عليا .

فجأة هجم عليا وحاول يخنقني بس أنا زقيته ومسكت

الموبايل والمفاتيح وطلعت اجري سيبت البيت ونزلت قعدت في

الريبة وقفلتها عليا، كنت منهارة من العياط مالقتش حد أرووحله

فطلعت على المقابر ، الساعة كانت داخلة على واحدة ونص

وقفت قدام قبر أبويا وأمي وفضلت اعيط ، جوايا كلام كثير ما اتحكاش واجعني كان نفسي أواجهه ومرة واحدة سمعت ضحكة من ورايا، اتخضيت وحطيت ايدي علي قلبي ورجعت كام خطوة لورا أما سليم فكان بيلف حواليا زي الديق اللي بيحوم حوالين الفريسة بتاعته ، غمضت عنيا وفضلت اعيط وفي اللحظة دي موبالي رن وهو في ايدي ، وقف في مكانه وبصلي فتحت الفون وصرخت ...

--الحقني يا حس انا في المقابر وسليم كمان هنا.
الدنيا بردت أوي وشوفتها وهي بيجري عليا وفي ايده سكينه، وقعت على الارض جسيمي كله اتخشب وعينيا غمضت ، كنت سامعة صوت بينادي عليا من بعيد.. ليالي يا ليالي ، فوقي ماتلعبيش بأعصابي، ماكنتش قادرة أقاوم، كل حاجة بتتعرض قدام عينيا كأناه فيديو فلاش باك، ذكريات طفولتي، اول مرة شوفت سليم فيها يوم فراقنا و... كل حاجة وقفت فجأة.
كنت حاسة بايد ماسكة كف ايدي ومتبته فيه، فتحت عينيا ببطء وشوفت حسن قاعد قدامي وماسك ايدي ، مسح دموعه وقال...

--حمد لله على السلامة وقعتي قلبي في رجليا.
--أنا فين وايه اللي جابني هنا؟
--في المستشفى ، أنا اللي جبتك يا ستي ، بعد ما قفلت معاكي فضلت قلقان عليكي فقولت اتصل بيكي اطمن عليكي ولما رنيت لقيتك بتصرخي وبتقولي انا في المقابر وسليم هنا والخط

فصل، قفلت وخذت عرييتي وجيت لقيتك واقعه في الارض
جنب المقبرة بتاعته.

--أنا مش فاكرة اني كنت جنب قبره خالص.

--انتي اعصابك بس تعبانة شوية ومتوترة.

--لا أنا بشوفه فعلا وكان عاوز يقتلني.

--نعم ازاي؟

حكيتله كل اللي حصل فبصلي باستغراب وفضل ساكت

فقولتله...

--مش مصدقني؟

--لا طبعا مصدقك، بس هو ليه هيظهرلك أنني ويحاول

يأذيكي؟ أنت فيه حاجة مخبياها عليا يا ليالي؟

--أنا... مش مخبية حاجة خالص.

--طيب حاولي ترتاحي وانا هخلص شغل وآجي اطمن

عليكي بعد العصر كده.

مشي حسن والعصر أذن والمغرب والعشا وهو لسه

ماجاش كما ما اتصل بيه يا يكنسل يا مايردش عليا، حسيت اني

تقيلة عليه فطلبت أوبر وروحت البيت ، دخلت أوضتي ورميت

نفسي علي السرير، كنت حاسة اني جعانة أوي فقررت أقوم أعمل

أي ساندوتش يسد جوعي، فتحت التلاجة اللي كانت فاضية

مافيهاش غير علبة جبنة وعلبة تانية فيها مربة فراولة ، بس الجبنة

ريحتها كانت وحشة فخذت علبة المري والعيش وحطيتهم على

التراييزة وقعدت وفتحت العلبة واتصدمت ، فضلت شوية مش

مستوعبة اللي قدامي ، بلعت ريتي بصعوبة، ماكنتش عارفة أخذ

نفسى، جريت على الموبايل وجبته ورجعت تاني وقفت قدام العلبة واتصلت على حسن رغم اني كنت حالفة اني مش هتصل عليه مهما حصل، ماكنش بيرد بس أنا فضلت أزن لحد ما فتح وقالى...

- - حسن الحقني أرجوك في مصيبة.

--ايه هبعثلك صورة واتس اب تعلالى حالا.

صورت علبة المرابي وبعتهاله فاتصل بيها بمجرد ما شاف الصورة وقالى ماتتحركيش ولا تلمسي حاجة أنا جايلك حالا. بعد نص ساعة الشقة تقريبا اتحولت لقسم وناس بترفع بصمات ، حسن كان بيحاول يهديني وسألني لو في حد معاه مفتاح الشقة عشان يعمل فيا المقلب ده، أكدته ان المفتاح معيا انا بس، روحت قعدت في أوتيل قريب من شقة حسن وتاني يوم اتصل بيا وطلب مني نتقابل، اسغربت انه بيعاملني رسمي...

--في ايه يا حسن انت بتعاملني كده ليه؟

--القلب الي كان في مرية الفراولة عندك في التلاجة، قلب سليم وانت أكدتي ان ماحدث معاه مفتاح الشقة غيرك يبقى ايه؟
--ايه! انت بتشك فيا؟

--لا لا شك ايه تفريغ كاميرات المحلات الي قدام العمارة بتاعتك بعد ما اتفرغت بينت انك كنت بتروحي وتيجي مع سليم اخر ٣ اسابيع قبل موته، يعني انتي المشتبه بيه الرئيس في الجريمة دي.

--قتلتيه ليه؟

--أنت تصدق اني أقتل؟

--وهو أنت كنت مصدقة ان سليم يخونك ؟
--سليم كان مفكر ان حياتي تحت امره يمشي وقت ما
يعوز ويرجع وقت ما يحب .
--قتلتيه ليه ؟

--عشان هو قتلي قبلها ، قتلي من تسع سنين يوم ما
سابني ، أنا اجتهدت واشتغلت عشان اثبتله بس اني حد قوي
وأستاهل النجاح ، عارف اللي يضحك ايه ؟ انه بعد ٩ سنين رجع
اعترفلي بكل حاجة حتي خيانتته ليا كان بيحكيلي التفاصيل عشان
اسامحه ، وأنا حاولت بس ماقدرتش وقررت أموته عشان أرحم
البنات من شره ، عارف ضحك على كام واحده طيب أذي كام
واحده ، أنا مش ملاك بس هو كان مفكر اني فازه هيركنها ويرجع
يستعملها وقت ما يحب، اه قتلتته في شقتنا اللي جابها عشان
تجوز فيها كان فاكر انه بيصالحني كده بعد ما فرشناها ماقدرتش
اتخيل ان بعد كل الخيانة دي ممكن يتقفل عليا معاه باب ،
طلعت شنطة السكاكين وحطيتله مخدر في العصير وقطعته
وحطيته في أكياس زباله واتصلت على نفسي من عنده ورميت
الموبايل معاه في شارع بعيد وطلعت هوا بعدها عادي ورجعت
كملت يومي في البيت لحد انت ما ظهرت، لو كنت قابلتك قبل ما
يرجعل ما كنتش حياتي ادمرت بالشكل ده.
--قلبه بيعمل ايه في التلاجه عندك.

--ماعرفش أنا ماكنتش في وعي يومها ممكن أكون خدته
وحبيت احتفظ بيه ونسيت من التوتر اتخلص منه.

--أنا مش عارف بجد أقولك ايه، مستحيل أكمل حياتي
معاكأنت لازم تتعاقبي علي اللي عملتيه، كان ممكن ترفضي
رجوعه ليكي.

--كان نقطة ضعفي لحد ما قابلتك.

--أنا اسف بس لازم اقبض عليكي .

--دي هتبقى أحلي حاجة عملتهاي عشان يسبيني ويبعد

عني.

--ماكنش ينفع أكمل في القضية بعد ما اكتشفت
الحقيقة، حتى لو سليم أذاها بالشكل ده اللي عملته مش صح،
كنت -بعرف أخبارها من بعيد وصيت عليها صحابي.

-- لسه بتحبها؟

--ما قدرتش اتخطاها كانت بريئة أو أنا كنت شايفها كده.

--اخر مرة شوقتها امتي؟

--من كام يوم روحت زورتها في المستشفى.

--مستشفى !

--اه، ليالي اتحولت لمستشفى الأمراض العقلية.

-تفتكر هي مجنونة ولا ادعت الجنان عشان تهرب من

الجريمة اللي عملتها؟

--مش هتفرق كثير.

--طيب أنت ليه بتحكي لي دلوقتي، عشان مش عارف

أتخطي ومحتاج انك تساعديني انساها شوفي حل.

--الي بيحب حد ما بينساهاوش للأسف.

ليزا زغلول "بتاعة العفاريات"

مش عارف لامتي هفضل متعذب بحبي لسلاسل وكأناه
لعنة حلت على راسي من يوم ما شوفتها وأنا مش قادر أتخطاها.

طريق الواحات

لما بنفكر في الموت دايمًا بنخاف، ولما بنتحط في مواجهة مع الموت بنحاول نمسك في الدنيا بايدنا وسنانا، بنعافر علشان مانروحش.. مع اننا في الآخر كلنا فانيين.

في فترة ما أنا قفلت سوشال ميديا، وانعزلت عن العالم نهائي، واكتفيت في الفترة دي باللاب توب بتاعي والنوت بوك، خلصت شغلي وسلمت التقارير والقصص الي كانت مطلوبة مني وفصلت من الدوشة بتاعة الميديا ورجعت تاني بهدوء من غير ما حد يحس، فضلت كذا يوم براقب كل حاجة بتحصل في صمت، مش بفتح رسايل ولا بكومنت عند حد خالص، وفي يوم الساعة ٢ ونص الفجر لقيت رسالة جديدة على الماسنجر، بصيت عليها من بره ولبست نضارتي وقريت محتواها بصوت عالي كان كاتب...

- ازيك، في الحقيقة أنا متوتر وخايف، كل يوم بسمع عن حوادث في الطريق الي بروح من عليه للخدمة بتاعتي، ممكن ده يكون بالنسبالك ده عادي، هتفسرية زي ما كل الناس بتفسره.. حوادث ناتجة عن السرعة، بس الحقيقية غير كده خالص.

خدت نفس عميق وقريت الرسالة كذا مرة، عدو الكاتب مننا هو الفضول، ماعرفتش اهدي برغم اني موقفة شغل وبحاول

أستجم وأفصل، الا ان القدر كان ليه رأي مختلف، فتحت الرسالة وطلبت منه الدااتا اللي تأكدلي كلامه، ولما اتأكدت انه مش حد بيشتغلني، قولتله...

-احكي لي كل حاجة بالتفصيل من فضلك.

-حاضر، بصي يا أستاذة أنا اسمي في البطاقة مجد لكن صحابي وأهلي بينادوني حمادة، الحكاية بدأت وداخل على تمانية وعشرين سنة، معايا دبلوم، ما دخلتس ثانوي عشان كنت عارف ان ظروفنا على قدها، وخصوصا ان أمي اللي كانت بتصرف على البيت بعد موت أبويا، لما خلصت الدبلوم.. ماسبتش شغلانة غير واشتغلتها، وربنا كرمني ولعبت بالفلوس لعب، عشان كده ما بخلتس على أخواتي، صرفت عليهم وعلمتهم ودخلوا كليات، لحد ما لقيت نفسي لابس جيش وأنا بخلص وراقي عشان أسافر بره، كنت مصدوم وبضرب كف على كف وعرفت ان مدام أخويا كبر وعدى سن معين يبقى أنا لازم أدخل جيش لأن بقى في عائل غيري وأنا لسه ماتمتش التلاتين سنة، كنت حاسس ان اللي بيحصلي اختبار من ربنا ولازم أرضى بيه وأصبر وأهي فترة وهتعدي، خلصت وراقي واستعديت عشان اروح مركز التدريب لفترة وبعدين أشوف هتوزع فين؟ ويمكن حظي الحلو وقعني اني أبقي سواق في الخدمة لعربية ظابط رتبه، كان شخصية محترمة جدا وبيعاملني بما يرضي الله، كنت بروح بيه السلوم أسبوع ونقعد هناك أسبوع ويرجع القاهرة فيديني أجازة، حمدت ربنا وقولت مافيش أحسن من كده الوقت هيعدي بسرعة وكلها هتبقى شوية أيام هتتقضي بالطول والعرض، الظابط اللي كنت خدمة معاه

ماكنش بيحب يسافر بالليل، في المرة الأولى ليا معاه على الطريق ، كان شكله متوتر وخايف وكل شويف يتلفت حواليه ، بصيته وقولته...

-مالك يا باشا ؟ حضرتك مضايق النهاردة من سواقتي ولا فيه ايه؟

-لا خالص يا مجد، أنت سواقتك هادية ، بس أنا مش بحب الطريق ده بالليل.

-ليه يا باشا؟

-قلبي بيتقبض منه.

-ماتقولش كده هو حد يجراً يعمل لحضرتك حاجة؟

-أنا مش عاوز أخوفك، بس السواق اللي كان معايا قبلك

مات على الطريق ده مع انه كان ملتزم وبيمشي في حاله ومش بيفح في السرعة.

بلعت ريتي ساعتها بصعوبة وقولته...

-يمكن مات قضاء وقدر؟

-لا يا مجد ، أنا كنت نايم وصحيت على صرخته، وشه كان

مفزوع ، معالم الرعب كانت باينة أوي عليه، عينيه كانت مفتوحة

على آخرها وبارزة لبرهاً وبوقه مشقوق من الناحية الشمال، وشه

لونه كان باهت مايل للزرقه، ماعرفش خبط في ايه عشان يجراه

كده، العربية وقفت في نص الطريق وصرخ، نزلت وحاولت أفوقه

بس كان خلاص روحه راحت للي خلقها، بلغت الإسعاف

والشرطة ومع التحقيقات قالوا ان ما فيش حاجة كانت على

في اللحظة دي سمعت صرخة طالعه من الراديو، جمدت الدم في عروقي، وخلتني اسيب الدرکسيون، العربية كانت خلاص هتقلب بينا بس أنا على آخر لحظة دوست فرامل ولحقت الدنيا وقفت بالعربية وبصيت حواليا، كنت مفكر اني هلاقي الضابط مرعوب من اللي حصل، بصيت في المراية واتصدمت انه لسه نايم مافقش ولا اتحرك من مكانه، مسكت راسي وخبطتها كذا مره في الدرکسيون عشان أفوق وفجأة رجع صوت الشيخ عبد الباسط عبد الصمد وهو بيقرا على اذاعة القرآن الكريم، ساعتها خدت نفس عميق ودورت محرك العربية تاني وكملت طريقي، كل شويه كنت ببص في المرايات، كنت مرعوب ، الطريق مافيهوش صريخ ابن يومين، ماحدثش ببيعدي خالص من هنا، كنت مستعجب ان بعد كل اللي حصل ده الباشا لسه نايم، قررت أسكت وماقلوش علي أي حاجة من اللي حصلت مدام الموضوع عدى على خير خلاص، فضلت سايق لحد ما دخلنا السلوم وحسيت ان الدنيا أمان، ركنت العربية قدام سوبر ماركت ونزلت أشترى مايه عشان كنت ميت من العطش، ولما رجعت لقيت الباشا صحى، بصيته من الباب وقولته...

-تحب أجبلك حاجة من السوبر ماركت يا افندم؟

-ماعلش يا مجدد، هلتلي علبة سجائر ال ام بقي.

مد ايده بالفلوس فخذتها ودخلت السوبر ماركت، جبت السجائر وطلعت فتحت العربية وركبت ولفيت ناولتهاله فابتسم وقالى...

-عارف يا محمد أنا محظوظ بجد عشان أنت شغال معايا،
لأول مرة من بعد الحادثة أبقى مرتاح كده.
بصيتله في المراية وابتسمت وقولتله...
-الله يخليك ي افندم.

كان من جوايا نفسي أقوله انت متعرفش اللي جوالي
وشوفته وانت نايم مش دريان بحاجة، بس دورت العربية وكملنا
لحد ما وصلنا الاستراحة اللي بيقعد فيها ركنت العربية والباشا نزل
دخل جوه وأنا روحت على العنبر اللي العساكر بيباتوا فيه عشان
أبات هناك، دورت على أقرب سرير ورميت نفسي عليه وغمضت
عينيا، كانت أول مرة أعيط من الخوف بعد موت أبويا، كنت
مقتول من التعب بس قومت صليت ركعتين شكر لله وفضلت
ادعيه وأقوله...

-يا رب مايبقاش رجوعنا بالليل، أنا ماقدرش أعيش اللي
عيشته الليلة دي تاني.

في اللحظة دي حسيت بايد بتتحط على كتفي بمجرد ما
سلمت، اتنفضت من مكاني وصرخت بس لما شوفت العسكري
هديت وبلعت ربيقي وقولتله...

-ماحدش يعمل كده، انا دمي نشف بسببك.
-اهدي أنا سمعتك أصلا وأنت بتصلي، انتوا جاين على
الطريق بالليل.

-اه يا سيدي وقعد يحكي لي العسكري اللي كان بيسو
قمعاه قبلي مات ازاي؟
-شوفت حاجة طيب وانت سايق؟

-بص انا ماشوفتش، بس كان في حاجة بتزاوطني وحد ابن
.... صرخ صرخة فزعتني وهو بكل ده كان نايم ماصحاش.
-عارف ان أي حد فينا بيجي بالليل من الطريق ده أوقات
بيشوف الموت بعينيه؟

-جری ايه يا جماعة هو انتوا عايزني انتحر، كفاية بقي.
الواد اتخض من رد فعلي وقام وسابني ورجع سريره،
طلعت على سريري أنا كمان وغمضت عيني وحاولت أنام، بس
فضلت فترة مش عارف أدخل في النوم، كنت بتقلب كل شوية
لحد ما سمعت صوت العسكري اللي نايم في السرير اللي تحتي
وهو بيقولي...

-لو مش جايلك نوم اطلع بره وسبنا ننام.
غمضت عيني وخذت نفسي وطلعت فتحت العربية
ودخلت قعدت فيها وأما حسيت ان ماعدتش قادر افتح عينيل
قفلت العربية عليا وفردت الكرسي ونمت فيها، ما حسيتش
بنفسي الا وانا مش قادر اخذ نفسي، العربية كانت صهد وحر أوي،
مدت ايدي فتحت التكييف وبعدين قفلته بسرعة لان العربية
سخنة وكده غلط عليها، بصيت على الجراش اللي جوه ولمحت
مكان قريب فاضي فدورتها بسرعة ودخلت ركنتها في الضل ونزلت
منها حاسس اني سخن وجسمي مكسر، كل اللي شافوني ساعتها
كانوا بيقولولي...

-مالك؟ أنت كويس؟

ماكنتش عارف ارد أقوله ايه فكنت بسكت، روحت
قعدت بره عن مكتب الطابيط لحد ما صحى وفاق وروحت جبته

فطار وفضلت واقف قدام المكتب بس فجأة حسيت بدوخة
ووقعت عللا الأرض والدنيا ضلمت في وشي .

فتحت عينييا بضعف لقيت في ستارة زرقا حواليا، سندات
علي ايدي عشان أقوم اقعد بس ساعتها حسيت بحاجة بتشكني
في ايدي، فرفعت ايدي لقيت فيها كانيولا متوصله بمحلول، أنا
اخر حاجة فاكرها ، اني كنت واقف على باب الطابط اللي بخدمه،
حسيت بخطوات بتقرب من السرير فعملت نفسي نايم، بس
صاحب الخطوات دي وقف قدام سريري وسمعت الستارة وهي
بتتجر، رفعت راسي لقيت ممرضة واقفة قدامي، قربت مني
وساعدتني أقعد ولما سألتها أنا بعمل ايه هنا قالتلي...
-نقلوك المستشفى عشان أغمي عليك .

-أغمي عليا ليه؟

-ضربة شمس ، بقالك يمين معلق محاليل وبتخرف
والنهارده بس حرارتك نزلت وقولنا يمكن تفوق شوية.
-أنا حصلي كل ده؟ طيب مين اللي جابني هنا؟
-عساكر صحابك ومعاهم ظابط اسمه حسام.
-أيوه أيوه ده الطابط اللي انا مكلف بخدمته.
-طيب هروح انا دي للدكتور بقي واطمن صحابك عليك.
-هما بره؟
-لا بس سايبين ارقام تلفوناتهم عشان لو جرى حاجة.
-تمام شكرا.

خرجت وشدت الستارة عليا ثاني، كنت سامع ناس
عيانين حواليا اللي بيكح واللي مضايق من الجبس، بس أكثر حاجة
لفتت انتباهي هي الست اللي كانت جنبي تقريبا أول مرة تيجي
السلوم وكانت بتكلم ابنها وبتقوله...

-أهو اللي حصل بقى يا ابني هو أنا كنت ضامنه يعني أي
هعمل حادثة وأتكسر، الطريق وحش والله السواق كلن مركز.
بلعت ريقى بصعوبة وغمضت عيني بس ساعتها شوفت
نفسي وأنا سايق العربية وماشي على الطريق، بصيت على حسام
باشا ماكنش موجود ورا، فبصيت ثاني لنفسي باستغراب ولكت
نفسي وقولتله...

-هو حسام باشا فين؟

كنت مركز على الأغاني اللي شغاله ومش حاسس بالدنيا
من حواليا، مديت ايدي عشان افوق نفسي بس فجأة في ايد
اتمدت من الكرسي اللي ورا ومسكت ايدي وشمعت صوت
بيقولي اياك تحذره، هو مش شايفك ولا داري بيك ورايح لمصيره،
فجأة الايد دي شدتني معاها للكرسي اللي ورا ولقيت نفى مره
واحده بخرج من العربية كأني شفاف والعربية كانت مكلمة عادي،
خدت بالي من الايد اللي كانت طالعه من شنطة العربية وبتعملي
باي باي، بلعت ريقى بخوف وحاولت أهدي نفسي، أكيد ده مجرد
كابوس، الدنيا كانت ضلمة جدا من حواليا، والطريق كان فاضي،
حاولت أجري ورا العربية بسس مالحقتها شولمحت يافطة صغيرة
كده على جنب الطريق مكتوب عليها...
-قريبة بق بق.

الاسم واليافاطة كان شكلهم غريب أوي أنا لسه معدي على الطريق ده من كام يوم وما شوفتهاش وبعدين ايه بق بق دي كمان، عديت اليافاطة وفضلت ماشي على رجلي عشان أدور على أي مكان أو بيت ألباله لحد الصباح ، بس عند مكان معين سمعت صريخ فظيع، كان جاي من الطريق رغم انه فاضي، فضلت ألف حوالين نفسي، كنت حاسس ان في حد معايا، مش حد وحد لا دول كانوا كثير، قعدت على الأرض في نص الطريق وفضلت أصرخ بصوت عالي لحد ما شوف نور ضارب في وشي، فتحت عينيا ببطء ولقيت...

الدكتور كان واقف قدامي مبتسم وقال...
-حمد لله على سلامتک يا محمد.

بصيت حواليا وفهمت ان كل الليي كنت فيه ده كان مجرد كابوس، في اللحظة دي دخل الظابط حسام واتنين عساكر صحايي ، الدكتور طمنهم عليا وقالهم...

-هو كويس ويقدر يخرج النهاردة قبل بكره لو حب أنا ممكن أخلصه تصریح الخروج.

الظابط حسام بصلي وقال...
-ها يا محمد حاسس انك كويس ولا تفضل هنا.

-لا انا كويس يا افندم هرجع معاكم طبعا.

خلصوا كل الإجراءات وركبنا العربية، حساب باشا كان

راكب قدام جنب العسكري اللي كان بيسوق مكاني وقال...
-مالك؟ خدت ضربة شمس ازاي؟

-بص حضرتك احنا يوم ما وصلنا أنا ماكنتش عارف أنا ما
فقومت قعدت في العربية وكانت مركونة في مكان شمس ولما
صحيت كان جسمي بيطلع صهد.
-طيب اللي حصل ده مايتكرش تاني، مش عشان العربية
يا مجد، لا عشان نفسك، الشمس هنا م بتهزرش.
-حاضر يا باشا.
-ارتاح انت النهارده كمان وزميلك هيكمل معايا.
-لا يا افندم أنا ...
-من غير مناهدة يا مجد تسمع الكلام انت في عمر اخويا
الصغير.

-حاضر اللي حضرتك تؤمر بيه.
نزلنا أنا والعسكري اللي معايا قدام العنبر ومشى،
العسكري قالي اسند عليا عشان أدخلك، كنت حاسس اني داخ
لسه فماوحتوش وسمحتله يدخلني، وصلنا الاوضة ولقيته
بيقولي...

-خد سريري اللي تحت عشان ماتدوخش أكثر.
-الله يخليك مش عايز أضايكك.
-مافيش حاجة ، أنا اسف اني اتدخلت في كلامك وانت
بتدعي ربنا يوم ما جيت.
-ماعلش أنا اللي كنت مضغوط ومضايق.
-عادي كلنا يوم ما بنيجي بنبقى كده، الطريق صعب
وطاقته زفت ده غير الحوادث اللي بنشوفها عليه واحنا رايعين
وجايين.

افتكرت الكابوس اللي شوفته وحسيت ان الدنيا بتضيق
بيا، بلعت ريقى بخوف وتوتر وقولتله...
-هو الطريق ده عليه حوادث كل يوم ولا ايه؟
-كلنا واحد هنا بيعدي على الطريق ده ليه حكاية.
-وأنت حكايتك ايه معاه؟
-لما تحكيلى الأول هحكىلك.
خدت نفس عميق وحكىتله كل حاجة حصلت معايا
فقالى...

-أحسن حاجة انك موقلتش لحسام باشا على أي حاجة
حصلت معاك.
-ليه يعنى؟ هيفكرني أهبل مثلاً!
-لا طبعا بس هيركز معاك ومش هيبقى مرتاح، ده جنن
السواق اللي قبلك وخلاه يشد في شعره.
-ازاي؟

-الطريق اللي كان بياخد ٥ ساعات كانوا بياخدوه في عشة
أو أكثر كمان وبرضو حذره ده مانجدوش والسواق هو اللي راح .
-أنا مش عارف اذا كنت اللي حصل معايا حقيقة ولا
بيتهيالى!

-لا حقيقة للأسف، أنا باجي في المبكرو باص بتاع الخردمة
بيطلع بينا مخصوص، في اليوم ده قطعوا اجازتي فجأة وطلبوني
عشان أبو واحد من زميلنا مات ولازم حد يكون موجود في مكانه
عشان ينزل...

-وبعدين كمل؟

-جيت بالليل في أماكن معينة كانت إشارة الراديو بتتقطع عندها وتحس ان المواصله اللي راكبها مش ماشية على الأرض، الطريق فيه حاجة، أنا بنام في المواصلات لكن من اليوم ده بطلت، قومت مفزوع على ترزيح الميكروباص في الطريق، ناديت على السواق بس ماكنش بيرد، زي مايكون منوم ومش دريان بحاجة من اللي بتحصل خالص، بصيت من الشباك حواليا لقيت في ناس واقفة على الجنبيين بتوع الطريق وبتشاور، كانوا بيظهروا ويختفوا أول ما العربية تعديهم، كنت سامع صوت الصريخ بس مش عارف هو جاي مينين، من قلب الصحرا ولا من الناس اللي واقفة على الطريق، أول ما عدينا مكان اسمه بق بق الطريق اتعدل وكل حاجة اختفت، عارف شوفنا واحنا معدين على البلد دي كام حادثة، كل كام متر كان في جث على الأرض والسواق كان بيدوسهم وبيكمل عادي، أول ما وصلت هنا، حمدت ربنا ورفضت أسافر أو أنزل بالليل تاني، لما هديت فتحت جوجل وبحث عن الحوادث اللي بتحصل في الطريق ده واتصدمت من كمية الحوادث والجث اللي شوفتها.

-طيب وهما ساكتين على اللي بيحصل ده ليه؟
-ماحدش يقدر يتكلم والا هيتقال عنه مجنون وهيلبس كام قضيه حلوين متفصلين على مقاسه.
-دي أول مره ليا أجي من على الطري ده.
-أتمني انك تتحجج بأي حاجة لو الظابط حسام طلب منك ترجوا بالليل.

-هتججج بابه بس انت مجنون ، ما هو هيسبني ويمشي
وأضطر اتمرمط في المواصلات أنا لوحدي، أهو لما ابقي معاه لو
موت هيهتموا بيا وهيتعرف اني موت مش زي ما اموت في
ميكروباص وأتجسب من الجثث اللي مش معروفها صاحب.
-ربنا يخرجنا من المكان ده على خير.

بعد كام يوم على الساعة تسعة بالليل لقيت حسم باشا
باعتلي مع عسكري، روحته وانا بقدم رجل وبأخر رجل ، كنت
خايف ومرعوب، وقف قدامه وأديت التحية العسكرية
وقولته...

-أوامرك يا افندم.

-صحتك عامله ايه دلوقتي؟

افتكرت كلام العسكري زميلي وجاوبت عليه بجزم
وقولته..

--أحسن الحمد لله يا افندم.

-طيب هتقدر تسوق بينا لحد ما نروح ولا أشوف حد

تاني؟

-لا يا افندم هقدر باذن الله، أنا قدها يا افندم.

-ماشبي يا محمد، لم حاجتك وقدامك ساعة تكون جاهز

عشان نلحق نوصل ونرتاح في بيوتنا.

-علم وينفذ يا افندم.

-انصراف.

طلعت من المكتب وأنا حاسس اني بترعش من كتر

الخوف ، بس كنت مقتنع ان ده القرار الصح اللي مفروض كنت

آخده، دخلت العنبر وحضرت شنطتي ، العسكري كن مستغرب ووقفني وقالى...
-برضو سمعت كلامه وهتنفذ أوامره.

-ماقداميش غير كده صدقني.

-طيب ابقي طمني عليك لما توصل .

-حاضر، ادعيلنا بالله عليك نوصل على خير.

لميت حاجتي وقعدت على طرف السرير وبصيت حواليا
مالقتش حد، مسحت الدموع اللي خاننتي ، ومسكت الموبايل
اتصلت بأختي وعرفتها اني راجع بس طلبت منها ماتقولش لامي
عشان ماتقلقش عليا من السوافة بالليل، وكلمت أمي واطمن عليها
وقولتها اني هتحرك بكره الصبح، كدبتعليه عشان ماتخافش
وتفضل سهرانه، دخلت الحمام واتوضيت وصليت ودعيت ربنا
وحطيت شنطتي في العربية وكلمتها من الجراش ووقفت قدام
مكتب الظابط حسام ونزلت بلغته اني جاهز، ابتسم وقالى...
-يلا بينا نتكل على الله.

-يلا يا باشا.

ركب ودورت العربية واحنا طالعين من البوابة، كان
العسكري اياه واقف حراسة فشاوري بايده وابتسمتله، كنت من
جوايا حاسس انها اخر مرة أشوفه فيها، فضلت متنشن شوية ولما
شغلت إذاعة القرآن الكريم أول ما طلعتنا من السلمو حسيت اني
ارتحت شويه، لمحت يافطه على جنب الطريق قلبي اتقبض
ساعتها وقولت لنفسى بصوت عالي أكيد دي قرية بق بق ، لفيت
بسرعة عشان أبص على حسام باشا لقيته رايح في سابع نومه،

فركزت على الطريق اللي قدامي، وحست فجأة ان في حد معايا في العربية، كنت سامع صوت نفس جاي من الكرسي اللي جنب بس خايف ومرعوب اني ابص عليه، بس غصب عني عيني جت عليه ولمحت واح قاعد جنبي وباصصلي مش باصص للطريق، بلعت ريتي بخوف ورجعت بصيت للطريق وحاولت أقنع نفسي ان اللي حصل ده مجرد وهم مش أكثر، بس كان في صوت جوايا بيقولي...
-بص تاني على الكرسي كده، بص.

بصيت على الكرسي وحسيت ان قلبي وقف، الشخص اللي كان قاعد جنبي كان اختفي وفي واحدة ست عجوزة قاعدة مكانة، غمضت عيني وفتحتها كذا مرة وحاولت أركز في الطريق، كل مره كنت ببص فيها على الكرسي كنت بلاقي شخص مختلف، حلقة الوصل اللي كانت بتربط بينهم كلهم هي ان كان في دود طالع من عينيهم وجسمهم زي ما يكون متاكل، العربيه فجأة خدت مطب جامد، بصيت ورايا وكنت خايف من رد فعل حسام بيه لكنه كان لسه نايم عادي، اتفاجئت بواحد واقف قدامي، بس كان واحد شكله غريب، هدومه مقطعه وجسمه في جروح كتيرة، حاولت أتفاداه بس للأسف ماقدرتش وخبطته في اللحظة اللي جسمه لمس العربية فيها حسيت ان حد شال العربية وهبدها في الأرض، ولما بصيت جنبي لقيت الشخص اللي لسه خابطه كان قاعد على الكرسي اللي جنبي بيضحك، ماكنتش مستوعب اللي بيحصل، مدي ايدي على زرار التحويل بتاع الراديو وحاولت أدوره يمين وشمال بس ماكنش بينطق، فضلت أخبط فيه لحد ما سمعت صوت طالع من الراديو جمد الدم في عروقي، هو كان

بيقطع لكن في جمل ممكن تجمعها منه، زي ما يكون حد بيلهث وهو بيقول...

-الطريق ده ملعون وكله دم، الحوادث.. الحوادث دي

إشارة لـ

الصوت اتقطع ورجع فجأة القرآن اشتغل عادي، اخر حاجه عدينا عليها حادثة ميكروباص كان مقلوب ونوره شغال بس ماحدش حوالية، خوفت أنزل بس وقفت على جنب وفضلت مركز، ماكنش حد موجود في الميكروباص ولا العربية رغم ان كان في دم كتير على الأرض والميكروباص، ومرة واحده سمعت خبط على شباك الازاز اللي جنب الكرسي الثاني ، بصيت لقيت واحد راسه شبه مقطوعه بيشاورلي عشان افتح، اتخضيت وحاولت استوعب اللي بيحصل بس ماكنش في وقت، الراجل فضل يخبط بايديه الاتنين على شباك العربية، كنت حاسس انه هيكسره، دورت العربية وماوقفتش ولا بصيت جنبي الا لما دخلت العمار، وقفت في البنزينة فولت وطلعت، فضلت سايق لحد ما وصلت لبيت حسام باشا ولفيت عشان أصحيه مالمتهوش! بلعت ريتي بخوف وقولت لنفسى...

-هو راح فين؟ مصيبة ليكون جراه حاجة!

طلعت موبايلي واتصلت بيه كذا مرة ماكنش بيرد، بس فجأة لقيت العسكري اللي معايا في العنبر بيتصل بيا، رديت عليه فلقيته بيقولي...

-أنت فين يا محمد حسام بيه قالب عليك الدنيا؟

اتصدمت وماعرفتش أنطق، الكلام اتجمد على لساني
وحسيت ان في حد بيدلق عليا مايه متلجة لحد ما سمعته
بيقولي...

-مجد، انت معايا ، أنت فين يا ابني؟

-أنا روحت.

-روح ازاي وسيت حسام بيه أنت اتهبلت.

-سيبته ازاي بس فهميني، هو أنا مش طالع قدامك وهو

كان راكب ورا وانت شاورتلي؟

-أنت كنت طالع لوحك في العربية وأنا شاورتلك على

أساس انكرايح تجيب حاجة وجاي ماكنتش أعرف انك هتمشي.

-ازاي بس وهو طول الطريق كان نايم في العربية ورايا.

-يا ابني بقولك أنت طالع لوحك وهو هنا قالب عليك

الدنيا ومن ساعتها بيتصل بيك مافيش شبكة عندك، ده حتى

دخل نام وقال اللي يوصل لخبر منه يصحيني.

-طيب أعمل ايه دلوقتي؟

-مش عارف استني لما يصحى وكلمه أو ارجع مسافة

الطريق تكون هنا على ما يصحى.

-انت بتهزر ده اللي شوفته في الطريق يخليني أعمل

المستحيل عشان مامشيش عليه تاني.

-خلاص أصلا كلها ساعة زمن والدنيانور والحركة عليه

تبقى عادية ولما تيجي قوله انك دخلت الصحرا وتوهت ومحتاج

تنام تاني يوم الصبح ابقوا امشوا بقی.

-طيب هحاول أعمل كده.

ماكنش قدامي غير اني أرجع، بصيت على الفلوس اللي كانت في جيبي، ودخلت جبت ساندوتش وكتته وأول النهار ما طلع رجعت السلوم، وأنا معدي على قرية بق بق كنت مستغرب أوي ، هي بالنهار غير بالليل خال، كل حاجة فيها مختلفة عبارة عن صحرا على الجنين، صحرا مافيهاش روح خالص، أموال البيوت والنور ده بيروح في؟ كملت في الطريق لحد ما وصلت وحسن حظي ان حسام باشا ماكنش لسه صحى أصلا ، ركنت العربية وشربت قهوة وفضلت قاعد قدام الاستراحة اللي نايم فيها زي الألف ولما صحى وخرج قرب مني وقالى...

-كنت فين يا محمد، مش عارف اننا مفروض نمشي؟
-والله يا افندم طلعت اغير زيت عشان العربية ماتعطلش
مننا على الطريق بس ..

-بس ايه يا محمد انطق ! العربي جرالها حاجة؟
-لا يا افندم، العربية بخير وفي الجراش سليمة.
-أومال ايه اللي حصل؟
-توهت في الصحرا.
-كل ده؟
-والله يا افندم ما كان في شبكة حتى، فضلت مكاني لحدد
ما واح ابن حلال قالى.. امشي ورايا وطلعني من الصحرا وجيت
على هنا فورا قالولي انك قالب عليا الدنيا.
-طيب الساعة معاك كام؟
-واحدة يا افندم .
-طيب يلا بينا.

-يلا بينا يا افندم.

ركب معايا وطلعنا على الطريق، الدنيا كانت هادية
مافيش حاجة غريبة ووصلنا الحمد لله بخير، سيب العربية قدام
بيته وخذت تاكسي للبيت عندي، سلمت على أمي واخواتي
ودخلت أوضتي قفلت عليا ونمت، مش عارف فضلت نايم قد
ايه بصراحة بس لما صحيت، خدت حمام دافي وغيرت هدومي
وظلعت قعدت معاهم شويه، كانوا فاتحين التلفزيون على برنامج
أخبار، أمي بصتلي وقالتلي...

-ابقى خد بالك يا ابني ، الطريق ده كله حوادث.

ماكنتش مركز مع الخبر أوي، رفعت وشي وقولتها ...

-طريق ايه؟

-طريق السلوم يا ضنايا.

بصيت للتلفزيون وركزت في الخبر الي بيتذاع كان

مكتوب على الشاشة بالبونط العريض...

-طريق الموت حوادث كتيرة بين السرعة والمنبهات!

ضحكت وفضلت أقلب في الموبايل لحد ما قالبلي خبر

عن نفس الحادثة ، ساعتها بس جيئي في بالي وقررت أدخل

اسييلك رسالة أحكيك فيها الي حصل.

ماكنتش مستوعبة الي بيقوله عشان كده دخلت على

جوجل واثأكدت من كل المعلومات والحوادث الي قالها،

واتصدمت لما لقيت ان كل اللي قاله مطبوط وصح وقررت فعلا

أدور ورا الموضوع ده، نزلت من البيت بعدها بكام يوم وركبت

الميكروباص اللي بيروح السلوم، قررت آخذ الريسك ده وزي ما تيجي، الميكروباص اتحرك، كنت واخده الكرسيين اللي جنب السواق، بصيت للحادثة اللي كانت على جنب ودورت وشي وقولتله...

-بقولك ايه يا عم هو الطريق ده الحوادث اللي بتحصل عليه دي بسبب السرعة.

-ماحدش عارف يا بنتي؟ أهى كل يوم حادثة مختلفة توقف الطريق كده ساعة ولا ساعتين.

-أيوه ليه يعني بقي؟

-ساعات بيطلعوا العيب فينا كسواقين وساعات تانية يقولك فرامل وسرعة والطريق وحش.

فضلت باصة من الشبك على الطريق، كان أغلبه صحرا فاضية مافيهاش حياة، كل فين وفين كده ممكن تلاقي بلد صغيرة كده على جنب، عدينا من جنب اليافطة اللي مجد أنكلم عليها، صحرا مافيهاش حتى زرع ولا عمار خالص، بصيت للسواق وقولتله ...

-هي ليه اسمها بق بق؟

-دي حكاية تعرفيه من شيخ الموقف، أنا لسه بقالي سنة ونص على الخط ده.

ابتسمت وفضلت مركزة مع الطريق لحد ما دخلنا السلوم، ووصلنا الموقف، نزلت من الميكروباص ومشيت مع السواق لحد ما وصلني لشيخ الموقف اللي لما وقفت قدامه وسألته على الطريق والحوادث اللي بتحصل عند بق فققالى...

-والله يا بنتي بيتقال حكايات كتيرة وماحدش عارف
الحقيقة فين؟

-بس أنا سمعت ان في حوادث بتحصل من غير سبب؟
-ده حقيقي يا بنتي، مش دايم هتلاقي تفسير لحاجة.
كلامه ماكنش مريح، كأنه عارف حاجات كتيرة وقاصد
يخبي أو يلف ويدور في الكلام، سييته وخرجت من الموقف وقفت
تاكسي وطلبت منه يوصلني على اقرب فندق نضيف، ما أعرفش
ليه وقتها جه في بالي أسأل السواق عن الحوادث اللي بتحصل
على الطريق فقال...

-ده العادي يا أستاذة، الطريق ده أصلا ملعون.
-انتوا ليه كلامكوا كله بيقول انه ملعون!
-لو عاوزة تعرفي الحكاية دي هتلاقي واحدة ست كبيرة
قاعدة عند جامع.... الست دي آخر الناس اللي كانوا قاعدين في
بق بق واتغصبوا انهم يمشوا منها.
-طيب وصلني عندها لو سمحت قبل ما نروح الفندق.
وقف جنب جامع كبير وشاورلي على ست قاعدة هناك
وقالي...

-هتلاقي عندها إجابة أي سؤال دي من بق بق.
-شكرا.
حاسبته ونزلت، كل خطوة كنت بقرب بيها منها، كان في
حاجة جوووايا بتتحرك، يمكن خوف أو قلق، وقفت قدامها
فرفعت راسها وبصتلي وقالت...
-خير يا بنتني؟

- مش عارفة أبدأ منين؟
- ابدأي مكان ما تحبي.
- قعدت جنبها على الرصيف، كان جنبها نصبه صغيرة على الأرض بتعمل فيها شاي فقولتلها...
- هو انتي من السلوم نفسها؟
- لا من مكان على الطريق.
- اسم المكان ده بق بق.
- ضحكت وبصتلي وقالتلي...
- أول مرة حد يقول الاسم ده قدامي من سنين.
- ليه من سنين؟
- عشان هي ماعدلهاش أثر غير يافطة على الطريق وبس.
- هي كانت بلد كبيرة يعني ولا ايه؟
- كانت بلد الأوليا
- وبعدين؟
- كل فترة كان بيطلع منها ولي وصاحب كرامه يعيش في مكان تاني ويساعد الناس وبعد موته بيرج يندفن فيها.
- بس ده مش سبب للحوادث اللي بتحصل على الطريق
- الا لو
- هدوها وردموا على البيوت حتى المقابر بتاعتها زالوها
- عشان يبناو الطريق، شردوا الأهالي ومااحترموش حرمة الميتين ،
- فاتلعنوا والنتيجة اهي على الطريق كل يوم.
- طيب هو مافيش حد يعرف حكاية المقابر اللي تحت
- الطريق دي؟

-عارفين وساكتين لأنهم لو واتكلموا هيحصلوا اللي تحت الأرض.

فضلت قاعدة معاها شوية ولما قومت عشان أروح الفندق قالتلي...

-لو خايقة منهم روجي بالنهار.

وفعلا بيت في الفندق وكتبت القصة كاملة في السلوم وتاني يوم الصبح، خرجت من الفندق وروحت الموقف عشان أرجع، اتصدمت لما لقيتهم كلهم متأثرين وشكلهم مضايق فسألت واحد من اللي كانوا واقفين قالي ان في سواق ايمه رجب عمل حادثة وهو راجع امبارح من السلوم واتوفي ولسه الخبر واصلهم حالا.

رجعت البيت وأنا مش شايقة قدامي، يادوب فتحت القصة وقعدت أقرأ فيها شوية وماكنتش عارفة أكتب ايه في النهاية أقول الحقيقة ولا أسيب الناس مفكرة ان اللي بيحصل بسبب السرعة والمواد المنبهة، بس في النهاية كان لازم احط النقط على الحروف وأقول لأي معدي على الطريق ده بلاش تسافر عليه بالليل ولو كنت مضطرماتبصش على جنب الطريق أول ما تدخل قرية بق بق.

قهوة فاروق

روح البيت بعد الشغل على طول على امل اني افصل دماغي وأرتاح بس للأسف لقيت غادة أختي سايبة لجوزها البيت وجاية قاعدة في الشقة، ماقدرش اقولها حاجة لأن ده بيت أبويا أصلا وهي ليها فيه زيي ، بس بعد موت أبويا وأمي أنا اتكفلت ببقية جهازها وجوزتها عشان أخف من على دماغي مش عشان أول ما أفتح باب الشقة ألاقها مستنياي بعيلين وبتعيط، بعد وصلة شكية طويلة عرفت انها استفزت جوزها فمد ايده عليها وضربها وده شيء ضايقي شخصيًا، نزلت اشترت أكلة سمك جاهزة واكلت انا وهي واتصلت بجوزها وطلبت منه يقابلني على قهوة فاروق اللي في بحري، وقولت بقى ناخذ وندي بعيد بقى عن المنطقة والصحاب وجو الهري ده، خدت حمام دافي ودخلت الأوضة عشان ألبس وأنزله، بس لقيتها داخله عليا بكوباية الشاي اللي حطيتها على السراحة ووقفت تفرك ايديها في بعضها وقالتي...

-بلاش تخلي الموضوع يوصل للطلاق.

-هو انت عاوزه ترجعيله بعد ما مد ايده عليكي؟

-نأدبه شوية بس عشان العيال ما يتمرمطوش.

-غادة هو انت سيبتى شقتك وجيتي هنا عشان أنا أخوكي
واجيبلك حقه ولا عشان تربى جوزك! عايزاه كل شوية يمد ايده
عليكي تاني وتالت؟

-لا والله أبدا أنت عارف إني مستفزة شويتين يا يوسف.
-مستفزة يقوم ضاربك؟ لا ده أنا أكسرله ايديه عشان
مايفكرش يمدها عليكي تاني.

-وحياة العيال اللي بره دي تلم الليلة.
-يعني أقوله ايه؟

-قوله إني قاعدة عندك كام يوم كده لحد ما اهدى ويبقى
يجي ياخذني أنا والعيال لما يصلحني.

-أنا مش عارف هو مستحملك على إيه والله؟ فكري يا
غادة اللي يمد ايده مرة يمد عشرة، مش عايز يجراك حاجة
وأشيل ذنب عيالك!

-هيجرالي ايه يعني؟

-انتي مابتشوفيش الرجاله اللي بتدبح ستاتها وتيتم عيالها
بدم بارد لا ويسألوهم قتلتهم ليه يقوم الواحد من دول قائل
نكدية وطلباتها كتير.

-ما تبطل رخامة بقى يا يوسف.

-أنا غلطان وحقك عليا هروح أقوله اللي قولتية.

خطفت كوباية الشاي وشربتها في السريع ونزلت جري
عشان الحق معادي مع جوز اختي، وأشوف هعمل ايه في المشكلة
اللي بينهم دي! ركبت المشروع بحد ما وصلت بحري وخذتها
مشي لحد ما وصلت عند القهوة اللي اتفقنا نتقابل فيها، وأول ما

قعدت لقيته طالعلي من جوه القهوة، أتاريه كان واصل من بدري
ومستيني جوه من البرد، قعدنا دردشنا شوية وبعدين قولتله...
-أنت عارف يا مصطفى إن غادة مالهاش غيري، ولولا
العيال اللي بينكوا أنا كان هيبقى ليا تصرف تاني معاك.
-والله يا يوسف أنا مظلوم في أختك دي هي اللي مفترية
ومستفزة.

-مستفزة دي عارفها، إنما مفترية دي جديدة.
-لسه جايلها هي والعيال هدوم على العيد من أسبوعين،
والصبح لقيتها بتقولي سيبي فلوس عشان عندي فرح واحدة
صاحبتي، وعازية انزل اشترى هدوم أنا والعيال، هو أنا هقبض كام
مرة في الشهر يا يوسف عشان ألاحق على طالباتها اللي مش
بتخلص دي.

-مش حفيت عشان تتجوزها؛ شيل بقى من غير ما
تصدعني، سيبتها تهدي كام يوم كده وتعالى صلحها وخدها ،
الموضوع مش مستاهل كل ده.

فضلنا ندردش بتاع ساعة ونص، ماحستش بالوقت غير
لما مصطفى قالي...

-هستأذن بقى عشان هاروح أبيت عند أي.

-هي الشقة مالها!

-ماعرفش أدخلها وغادة مش فيها.

-طيب يا مصطفى.

مشى مصطفى وفضلت قاعد مكاني بتفرج على الناس
الرايحة والجاية وبتمني من كل قلبي اني أغمض وأفتح الاقيني قدام

باب الشقة، مش عارف ايه اللي خلاني أختار القهوة بعيدة عن البيت أوي كده، لفت انتباهي الرجل اللي كان قاعد جنب، كان مركز معايا ومبتسم، هزيتله راسي بهدوء وناديت على الولد ودفعت الحساب وقومت اتمشيت شوية عشان ألاقي مشروع يوصلني، خدت بالي من صوت الخطوات اللي كانت مستمرة ورايا بريتم هادي، بلعت ريقني ولفيت مرة واحدة لقيت الرجل اتخض ووقف، فعملت نفسي إني بدور على حاجة واقعة مني لحد ما سيبته يعديني، قولت لنفسي الدنيا ليل ولحكاية مش ناقصة مشاكل، بس مشاكل إيه اللي هيعملها لي راجل عجوز شبه ده، كان في الوقت ده سبقني ومشي قدامي وأنا كنت ماشي وراه على خطواته البطيئة بحد ما زهقت وسرعت خطوتي، لما عدت من جنبه أتكلم وقال...

-هو لسه كتير على مصطفى كامل يا ابني؟
-اه يا حج، لسه شوية، تحب أوقفك تاكسي.
-لا أنا عايز أتمشى شوية بدل الخنقة اللي مسكاني دي.
-معلش يا حج.
هزيت راسي وكنت لسه هكمل طريقي لكنه وقفني

وقالي...

-أنت ساكن فين يا ابني؟
-خير يا حج مالك؟
-رايح فين يعني؟
-أيوه ليه بتسأل يعني!
-كنت هتمشي في طريقك لو مش هيضايك.

-هتتمشى من بحري ل مصطفى كامل يا حج؟
-أنا أبان عجوز بس لسه من جوايا شباب.
-ماشي يا حج نتمشي لحد ما أوصلك، كده كده ماورايش
حاجة.

حاجة جوايا كانت مرتاحة للراجل ده، وفي نفس الوقت
كل اللي بيحصل الأيام دي كان مخوفني، حكالي كتير أوي عن
حياته وعياله ومراته وهو شغال فين ومنين وياه اللي جابه
اسكندرية وليه استقر فيها بعد موت مراته من كام شهر، وصلته
لحد البيت، الوقت عدى من غير ما احس، يمكن عشان كنت
بعمل خير، أو عشرة الراجل ده هي اللي كويسة، وهو على باب
العمارة اللي فيها شقته شاوري على الدور الثالث وقالي...
-فأي يوم الدنيا تديق بيك تعالى هنا، هتلاقيني مستنيك.
-تسلم يا راجل يا طيب تعرف تطلع ولا أساعدك؟
-هعرف طبعا.

فضلت اراقبه بعينيا لحد ما اختفى على السلالم وبعد
شوية نور الشقة اللي على الشارع في الثالث ولع، اطمنت إنه دخل
وبعدها خدت نفسي ومشيت، رجعت البيت لقيت اختي وعيالها
نايمين، حطيت موبايلي على الشاحن ودخلت انام أنا كمان عشان
ألحق الشغل بتاعي، بمجرد ما حطيت راسي على المخدة حسيت
بنار ماسكة في جسمي، اتقلبت شمال ويمين ماكنش في فايذة،
قومت غشلت وشي وخذت حمام بارد، بس برضو نفس الصهد
والنار كان لسه ماسك فيا، قولت يمكن داخل عليا برد، خدت
مجموعة من بتوع البرد وغمضت عينيا بس اتفاجئت إن نور

الاضوة بيولع ويينطفي مع نفسه، قومت قعدت على السرير
وبصيت حواليا بخضة وانا بحاول استوعب اللي بيحصل، بلعت
ريقي بصعوبة ونزلت رجلي من على السرير ووقفت وقربت من
كوبس الكهرباء، اللي كان مقفول، بصيت للمبه باستغراب
وقولت...

-أعوذ بالله من الشيطان الرجيم.

قررت أسيب الاوضة وأطلع أنام في الصلاة، بس باب
الاضوة كان متربس ومش راضي يفتح خالص، كنت سامع صوت
نفس عالي حواليا وفجأة...

-اصحى يا يوسف، ما تصحى بقي يا ابني!

قومت مخضوض وماكنتش مجمع فضلت أقول...

-النور، الباب، عايز أخرج.

-تخرج تروح فين؟

فتحت عينيا على آخرها وبصيت حواليا لقيت نفسي في
اوضتي ونايم على السرير، لقيت أختي بتبصلي باستغراب
وبتقولي...

-مالك ايه اللي حصل؟

-مافيش، ماتشغليش بابك ده كابوس بس مش أكثر.

-عملت إيه مع مصطفى امبارح؟ واناخرت ليه؟

-حضريلي لقمة بس أفطر وأحكيك على الأكل اللي

حصل.

-حاضر.

خرجت وسابتني في الاوضة، قومت عشان أشوف هلبس
إيه وأنا نازل الشغل وادخل اطس وشي بشوية مائة، لما خرجت
من الحمام لفت انتباهي المفتاح اللي كان في جيب البنطلون اللي
كنت لابسه امبارح وسألت غادة...

-هو انتي ادتييني مفتاح شقتك امبارح؟

-لا، هديهولك ليه؟

-أصل انا لقيت مفتاح في جيب البنطلون بتاعي ومش

فاكر بتاع ايه؟

-خلاص حطه فأني مكان لحد ما تفتكر هو بتاع ايه.

قعدت جنبي على السفارة وحكيته كل اللي حصل من

طقطع لسلام عليكم مع مصطفى لحد ما قطعت كلامي لما لقيتها
بتضحك بابتسامة عريضة هبلة كده فقولتها...

-مالك يا غادة؟ خير في ايه؟

-الفرحة مش سيعاني عشان مش قادر يدخل الشقة وأنا

مش موجودة.

-طبعا يا حبيبي مش هيلاقني حد ينكد عليه.

-ههههه اخس عليك يا يوسف والله ما انا عملاك شاي

اعمل لنفسك بقى مدام بتتريق عليا.

-للأسف مش هلحق هروح أشربه في الشغل مع العمال

وانتي اطبخي عندك الاكل في الفريزر.

طول الطريق كنت سامع صوت بيهمس في وديني، وكل

ماجي أبص الاقي الست اللي قاعدة في الكرسي اللي جنبي بصالي

باستغراب مش فاهم ليه؟ بس وأنا بنزل عند ال ٤٥ قالتلي بيروود
جملة فضلت طول اليوم مخلياني مرعوب ومش مركز...

-روح لحد يكشف عليك يا ابني.

مش عارف كانت تقصد ايه بكلامها ده؟ ومالحقتش
أوقف المكروباص تاني عشان أسألها، كل اللي شافني في اليوم ده
لاحظ اني متغير وفيا حاجة حتي مصطفى جوز غادة أختي، لقيته
داخل عليا وأنا قاعد وقالي...

-مالك يا يوسف إيه اللي حصلك؟

-حصل ايه يا عم؟ انتوا فيكوا ايه؟ كل شوية حد يقول

مالك؟ مالك؟

-شكلك متغير عن امبارح أوي، زي ما تكون تعبان

ومانمتش، ممكن مرهق! مش عارف بس في حاجة فيك غريبة.

-مفيش حاجة يا ابني أنا تمام ماتشغلش بالك.

-العيال عاملين ايه وغادة؟

-كويسين يا مصطفى.

-ماتكلمهالي بقي أروح معاك أخذها ونرجع شقتنا؟

-حاضر يا مصطفى، حل عن دماغى بقي وسيبني أشوف

الشغل اللي ورايا.

بعد ما خرج من المكتب كنت حاسس بصداع هيفرتك

دماغى، عشان كده خدت حباية مسكن وقومت اشوف العمال

واصلين لايه في الشغل، كنت حاسس طول الوقت إن فيا حاجة

غلط، سامع حد بينادي بهمس عليا وييلمسني، مش عارف اليوم

ده عدى ازاي! بس وأنا طالع من الشغل لمحت الراجل اللي قابلته

في القهوة واتمشيت معاه واقف قدام بوابة المصنع اللي شغال فيه، استغربت من وجوده في المكان ده واستأذنت من مصطفى وعديت الشارع عشان أشوف لو في حاجة أقدر أعملهاله، بس بمجرد ما وصلت للطريق المقابل كان اختفى، بصيت حواليا بصدمة وماكنتش عارف أعمل ايه؟ لحد ما حسيت بايد بتتحط على كتفي فاتخضيت وسمعت صوت مصطفى وهو بيقولي...

-ايه يا عم سيبتني وروحت فين؟

-مافيش، بيتهيا لي ابي شوفت واحد أعرفه كان واقف هنا

فقولت أسلم عليه.

-طيب يلا يا عم أنا واقع من الجوع.

خدته وروحنا البيت، اتغدي معانا وغادة لمت حاجتها

ورتبت الشقة ومشت مع جوزها وأنا خدت موبايلي وطلعت

قعدت على السطح، كنت حاسس إني تايه ومخنوق، محتاج أغير

جو، مش عارف أفصل وأرتاح رغم اني اطمنت إن اختي رجعت

بيتها خلاص، الوقت سرقي ومحستش بنفسي غير لما نزلت

الشقة ولبست ووقفت على الباب، ماكنتش عارف أنا رايح فين؟

بس كان فيه حاجة بتقولي روح...

-روح القهوة، اقعد هناك يمكن تتحسن وتبقى كويس.

القهوة دي فعلا بحس براحة غريبة فيها، بس مش

بروحها غير كل فين وفين عشان بعيدة عن البيت وأنا مش بتاع

فرهدة ومواصلات، خدت نفسي وطلعت على القهوة، كنت قاعد

بتلفت حواليا زي ما أكون كنت مستنيه يظهر، ماعرفش ليه هو

شاغل تركيزي كده، بس في الآخر زهقت وخذت نفسي ومشيت، رجعت البيت اتعشيت ونمت.

شوفت نفسي وأنا قاعد على القهوة، ماكنش فيها حد غيري أنا وهو، حاولت أنادي عليه بس اكتشفت إني مش فاكتر اسمه أو هو مقالهوش أصلا، مكنتش عارف ليه الراجل ده بالذات اللي معلق معايا أوي كده، قرب مني وجه وقف ورايا وحط ايده على رقبتي وبدأ يخنقني، بصيتله وكنت مستغرب هو ليه بيعمل معايا كده وأنا أصلا مأذيتهوش ولا أعرفه بس...

قومت من النوم مفزوع، جسمي كله كان بيصب عرق، بصيت حواليا بخضة وسمعت الموبايل وهو بيرن، كان مصطفي، مسحت وشي ورديت عليه...

-أيوه يا مصطفي؟

-خير يا ابني مالك؟ ماجتش الشغل النهاردة ليه؟

-هو مش النهاردة الجمعة! أيه اللي هينزلني الشغل في

الأجازة.

-جمعة ايه يا يوسف احنا النهاردة السبت.

-يا نهار مش فايت يعني أنا نمت كل ده.

-صح النوم يا عم، ماتيجي تقعد معانا تغير جو يومين

تلاته كده.

-لا يا عم أنا مرتاح كده.

قفلت معاه وفضلت باصص على الحيطه اللي في وش

السرير، لوهلة شوفت وش الراجل مرسوم عليها، كان بيضحك

بس لما ركزت معاه اتبخر كأنة ماكنش موجود، خدت نفس عميق وغمضت عينيأ، حسيت بحركة جنبي، فتحت عينيأ بسرعة فلقيته واقف جنب السرير وبيشاور على الكوميدينو، بلعت ريقى بخوف وماقدرتش أتحرك من على السرير، لساني زي مايكون معقود، وأخيرا اتحرر فقولتله...

-هو انت دخلت هنا ازاي؟

مااتكلمش، فضل ثابت وايدة بتشاور على الكوميدينو، وفجأة بدون مقدمات بصلي ولقيت نفسي بقوله...
-أنت ايه حكايتك معايا بالظبط؟ ماكنتش مرة الي شوفتك فيها.

بمجرد ما شيلت الغطا ونزلت رجلي من على السرير، الكهريا فجأة قطعت وسمعت صوت صرخة عالية كانت جاية من جنبي، ساعتها الدم اتجمد في عروقي وغمضت عينيأ وفضلت أقرأ آية الكرسي لحد ما حسيت ان الدنيا هديت، أول ما فتحت عيني، شوفته واقف قدامي لسه بس عينيه كلها كانت بيضا، مديت ايدي ناحيته عشان اهزه بدل ما هو واقف كده، في اللحظة دي حسيت اني حطيت ايدي في وسط النار، وبسرعة شديت ايدي من عليه، وجسمي فضل يتنفض، حسيت بدوخه جامدة فقعدت على طرف السرير ومسكت دماغي وفجأة موبايلي رن، رفعت راسي عشان أشوف الموبايل فين بس مالقتهوش، كان لسه بيرن، لفيت بعيني على في الأوضة مالقتش الرجل، صوت رنة الموبايل كان طالع من الدرج بتاع الكوميدينو، مديت ايدي وفتحته لقيت الموبايل فعلا فيه، بس أنا مش فاكر اني حطيته هنا أصلا، طلعتة

عشان أشوف مين واتصدمت لما لقيت ان ما حدش كان بيرن،
أومال الصوت ده كان طالع منين؟ وأنا بقفل درج الكوميدينو
لمحت المفتاح اللي لقيته في جيبي، مسكته في ايدي وفضلت
باصص عليه، حاولت أفكر هو بتاع ايه بس ذاكرتي كانت فاضية
مش لاقى فيها أي حاجة تفكرني البتاع ده أنا لقيته فين، ده انا حتى
قولت لنفسى في الآخر اني ممكن أكون لقيت في الشارع وخذته
بالغلط، آخر ما زهقت ركنته مكانه وقفلت الدرج، بصيت في
الموبايل وقررت افصل، لبست وروحت عند غادة أختي قولت
أبات الليلة دي عندها، مصطفى فتحلي تحقيق أول ماشافني،
حتى غادة اللي ملاحظتها ضعيفة سألتني مالي؟ ماكنش عندي
إجابة على كلامهم، لقيت نفسى بقعد على أقرب كرسي في
الصالون عندها وحاوطت ايديا براسي وقولتها...

-أنا مش عارف أيه اللي بيحصل بالظبط.

-احكي يا يوسف ما تقلقنيش عليك؟

قعد مصطفى وغادة جنب وسمعوني للاخر، وغادة كل
اللي كانت بتعمله انها من وقت للتاني لما تتصدم تشهق وتخبط
بايدها على صدرها ولما خلصت قالتلي...

-كل ده وسأكت يا قلب أختك؟

-هعمل ايه يعني يا غادة؟

-تحكي لي ده أنا أختك وفي مقام أمك.

-وبعد ما أحكيك ايه اللي هيحصل؟

-احنا لازم نروح مقام سيدي أبو العباس المرسي نقرا
الفاتحة هناك ونشوف حد يرقيك، أكيد اللي بيظهرلك ده اللهم

ما احفظنا من القعدة لوحك، يا ما قولتلك اتجوز وهات واحدة
تاخذ بحسك.

-مقام ايه ويقرالي ايه يا غادة! مش هعمل كده طبعاً.
مصطفى ميل عليا وقال بصوت واطي...
-لا غادة مايتقلهاش لا.

-يعني انت شايف ان اللي هيحللي اللي انا بشوفه ده اني
اروح مقام واحد ميت!!؟
-أنا لو منك تروح لدكتور نفسي، القعدة لوحك صعبة
برضو.

-واحدة طلعتني ممسوس والثاني طلعتني مجنون ، أنا
ماشي وسايبهاالكوا.

غادة طلعت من الاوضة وهي بتربط طرحتها وبتقولي...
-يلا بينا أنا خلصت اهو.

-يلا بينا فين؟

-انا ماليش خلق على المناهدة، يلا يا يوسف تعالى نروح
المقام، ودي العيال لأمك وهنستناك تحت يامصطفي.

هز راسه وخد العيال ونزل، غادة قربت مني وقالتلي...

-أنا شاكة في حد إنه آزيك ولو طلع شكي في محله ورب
الكعبة ما هخلي نهار تاني يطلع على بن بهية.

ضحكت على طريقته وقولتها...

-وعمتك هتأذيبي أنا ليه؟

-عشان تجننك ما هي فقدت الأمل انها تجوزك بنتها

المقشفة دي.

-والنبي يا غادة، ماتدخليش في سكك وحوارات مالهاش لزمة، أنا جيت اقعد معاكوا شوية ، الموضوع مش آذيني يعني.

-هو أنا هستني لما تتأذي!

نزلت معاها غضب عني وخذنا مصطفي وطلعنا على المقام، صلينا هناك وغادة قربت من راجل كبير وفضلت تتكلم معاه شوية وبعدين شاورتله عليا وندهت علينا، بصيت لمصطفي اللي ابتسم وقال...
-عشان تعذرني.

ماكنتش بالبع أي حاجة من اللي بيحصل بس غضب عني، كنت تايه ومش عارف إيه اللي يحصل من حواليا ونفسي أغمض وأرتاح، وقفت قدام الراجل اللي مد ايده وسلم عليا وفضل ماسك ايدي وهو بيتتمم بكلام بصوت واطي ولما خلص قال...
-محتاجين نقعد شوية بره المقام، في شوية تفاصيل عايز

اعرفها منك.

طلعنا كلنا بره وحكيته كل حاجة حصلت بالتفصيل، طلب مني أجيبه المفتاح في أقرب وقت لأنه حل كل اللي بيجرالي، بس للأسف لما روحت .. قلبت الشقة على المفتاح ومالقهوش، كنت متأكد إني سيبتته في درج الكوميدينو، مين خده مش عارف؟ قعدت على طرف السرير اضرب كف بكف، رديت على غادة اللي ما بطلت رن...
-يا ابي ماجبتش المفتاح وجيت ليه؟
-مش لاقيه؟

-ماتهرزرش يا يوسف انت مأكد علينا انك سايبه في درج الكوميدينو.
-هو ده في هزار؟ قلبت الشقة كلها عليه مش لاقيه والله.
-طيب وبعدين؟
-مش عارف.
-هتصل بالراجل وهو هيدلنا على اللي نعمله ، ماتخافش هبعترك مصطفى يبات معاك النهاردة.
-غادة ماتكبريش الموضوع انا قاعد في البيت ده بقالي ٢٩ سنة ماتخافيش عليا.

قفلت في وشها التليفون وقومت رتبت الأوضة وشغلت التليفزيون وقعدت قدامه، ماعرفش ليه كنت حاسس إني سامع الفيلم اللي بيتعرض، لا لا مش سمعه بس بيتهيايلى اني عارف البطل والحكاية، تقريبا دي نفس الحكاية اللي الراجل حكهاالي عن نفسه وأنا بوصله، مسكت الريموت وغيرت القناة كذا مرة بس في كل مرة كانت القناة بترجع عليه لوحدها، بصيت حوالي بخوف وحسيت إني مش لوحدي، سمعت صوت الراجل اللي شوفته في القهوة ومشى ورايا جنب وديني الشمال، كان بينادي عليا بصوت ضعيف، اتلفت حواليا بخوف ومابقتش عارف أعمل ايه، فضلت ثابت مكاني لحد ما حسيت بصوايح باردة بتلف على رقبتى، ساعتها بس زقيت الريموت بعيد عني وقومت سحبت الموبايل من على الكنبه وخذت نفسي وخرجت بره الضقة، وقفت على السلالم وماكنتش قادر أخذ نفسي بس فجأة موبايلي رن ولما بصيت لقيت غادة اللي بتتصل فكنسلت عليه، روحت القهوة

اللي شوفته عليها أول مرة وسألت عليه هناك بس أغلب الناس قالت إنه بقاله فترة مابيجيش، وفيهم اللي قال انه غير القهوة وبقي بيقتد في مكان تاني، ماكنش قدامي حل غير إني اروحله تحت البيت، أنا فاكرا الشوارع طشاش كده، مشيت على الوصف اللي كنت فاكركه لحد ما لقيت نفسي تحت العمارة بتاعته، أيوه ألبان سعيد أنا فاكرا المكان بالمحل ده، فضلت واقف قدام العمارة، الساعة بقت ١١ ونص، كنت كل شوية برفع راسي أشوف النور ولع في الشقة ولالا، الضلمة اللي جوه الشقة كانت بتقول إنه لسه بره، فضلت مستنيه يرجع بس الوقت اتأخر خالص، الساعة بقت واحدة ونص، وصاحب السوبر ماركت اللي تحت العمارة شك فيا وقرب مني وقال... فيا

- في حاجة يا أستاذ؟ أنت مستني حد؟

- بصراحة، في واحد في الدور الثالث الشقة دي عايز اظمن

عليه هو صاحب الحاج ابويا وموصيني عليه.

- اه اه انا شوفتك من كام يوم وانت واقف هنا، أكيد تقصد

عم عمران.

- هو اللي ساكن في الثالث؟

- مافيش حد غيره ساكن في العمارة كلها أصلا.

- عمما هتلاقيه عند حد من قرابية، هو بيظهر ويختفي كل

شوية، بس ماتلقش احنا داخلين على اول الشهر هتلاقيه كمان

كام يوم جاي ياخذ الايجار اللي مكسور عليا منا أصلي مأجر

المحل ده منه وهو كان عاطيني مهله كام شهر عشان فرح بنتي.

- طيب لو بان كلمني على الرقم ده من فضلك.

-حاضر يا أستاذ أنت تؤمر.

روح البيت يومها وأنا قلبي مقبوض، كل حاجة بتقول ان الراجل ده مش طبيعي، يعني ايه بيظهر ويختفي والبيت مافيش حد ساكن فيه غيره، كل اللي عقلي صورهولي في الوقت ده إن الراجل ده أكيد بيحضر، اه أنا صح، يوم ما شوفته مشى معايا مسافة طويلة سنه ولياقتة ماتسمحش ليه بمشيها، كلامه ونبرة صوته، بس ياترى واحد زي ده هيعوز مني ايه؟ أنا لازم أشوف شيخ لأن الموضوع كبير أوي، كنا بالليل والوقت متأخر، فاضطريت اني أروح البيت واترميت على السرير وشغلت الموبايل جنبني علي القرآن، كل ما عيني تغمض كنت بلاقي صوت القرآن وقف، أنا فاكراني كنت ببقى سامع صوت نجاة وهي بتغني القريب منك بعيد، هي نفس الاغنية الي كانت شغالة في القهوة يومها، لكن بمجرد ما بفتح عيني كل حاجة بتسكت والصوت يختفي، حاولت أكثر من مرة أرفع راسي وأقوم من على السرير، بس كنت حاسس إن في حاجة بتشدني عشان افضل مثبت على السرير، بعد معاناة طويلة، قومت طلعت الصالة، وقعدت على الكنبه وبدأت آخذ نفسي براحة لحد ما هديت، سمعت صوت جاي من المطبخ، ففكرتها غادة، ناديت عليها كذا مرة ماردتش، اتسندت على الحيطه لحد ما وصلت للمطبخ ووقفت على الباب مذهول، بلعت ريقى بخوف وقولتله...

-أنت بتعمل ايه هنا؟

للمرة الأولى من يوم ما شوفته رد عليا وقالي...

-جاي أسليك أصلك وحداني زيي.

-أنت مين وعاوز مني ايه؟
-عمران، ما أنت عرفت، هو انت مش كنت عندي تحت
البيت وسألت عليا وقالك ان اسمي عمران وقاعد في العمارة
لوحدي.

بلعت ريقى ورجعت كام خطوة لور وبصيت عليه لقيته
اختفى فقولت يمكن كل اللي حصل ده تهيئات بس صوته اللي
جه من ورايا وهو بيقولي...

-لا يا يوسف، أنا حقيقة المرة دي مش تهيئات.
لفيت بسرعة وبصيتله، كان واقف قدامي وفي ايده كوباية
الشاي اللي كان بيعملها فقولتلته...

-هو انت ازاي ملامحك بتصغر كده!
-زي ما ملامحك بتكبر يا يوسف، أنت امتي اخر مرة
بصيت فيها في المراية؟

سرحت في كلامه، أنا فعلا بقالي كثير ما بصتتش في المراية
وكل اللي يشوفني يقولي ات مرهق ومش بتنام، مشيت لحد ما
وصلت للمراية ووقف قدامها وبعيت لوشي اللي بان عليه الكبر
بدري أوي، مش عارف أنا عجزت بالسرعة دي ازاي؟ وامتي حصل
كل ده؟ رجعت الصالة ودورت عليه، كان فص ملح وداب، بس
الكوباية بتاعة الشاي اللي كانت في ايده كانت محطوطة جنب
الريموت ولسه سخنة، فضلت طول الليل قاعد قدام التلفزيون
ومشغل قناة القرآن قدامي وعلى الساعة ٦ الصبح لقيت مصطفي
بيرن عليا، كنت مفكره هيسألني على الشغل لكنه قالي...

-غادة شافتلك حلم وحش أوي وأول ما النهار طلع لبست
وخرجت بس مش عارف راحت فين؟
-غادة وهبل غادة، هو أنا ناقص جنانها، شوف مراتك
راحت فين يا مصطفى وابعدها عن طريقي عشان مافيش حاجة
تأذيها.

-مش لما أعرف هي فين أصلا؟
-طيب لما ترجع طمني عليها ولو جاتلي هكلمك
وهطمنك.

قفلت معاه وفضلت قاعد مكاني، مش قادر أتحرك ولا
عارف أفكر لحد ما سمعت الباب بتاع الشقة وهو بيتفتح، رفعت
راسي وبصيت لقيت غدة داخله عليا ومعها راجل شكله كبير في
السن، قرب مني وحط ايده على راسي وقرأ كام آية وطلب من
غادة تجيب كوباية ماية، قرأ عليه قرآن وطلب مني أشربها،
الغريب اني شربتها عادي فبص لغادة وقالها...

-مش شارب ولا واكل يا بنتي.
-يمكن يكون مخطي حاجة؟
-كان بان عليه، سيبيني معاه شوية.

غادة دخلت الاوضة وسابته قاعد معايا، فبصلي وقال...
-هو انت حد غيرك شافه يا ابني؟
-لما وصفته للناس اللي في القهوة عرفوه.
-يعني بني ادم بحق وحقيقي وموجود.
-اه، والراجل اللي مأجر تحت العمارة عرفه لما
وصفتهوله.

-طيب يا ابني أنت أذيت حاجة غصب عنك؟
-لا والله يا شيخ.

-طيب تعالي معايا نروح نشوفه رجع وحد شافه ولا لا؟
روحنا سألنا عليه بتاع السوبر ماركت فقال انه
مشافهوش، طلعلنا خبطنا عليه كذا مرة ماحدث رد فاضطرينا
ناخد نفسنا ونمشي، الشيخ قالي...

-لم حاجتك الأساسية اللي بتحتاجها وتعالي معايا يا ابني.
-ليه هنروح فين؟
-هعملك خلوة.

-يعني ايه؟
-هخليك تنعزل عن العالم كله وتفهم ايه اللي بيحصلك
وحل اللي بتمر بيه.

-هو ده ممكن بني ادم عادي يعمله؟
-هو انت مش مؤمن بربنا؟
-مؤمن طبعا.
-يبقى خلاص تقدر.

خدت موبايلي ومفتاح الشقة، وطلبت مصطفى وصيته
يقدملي على أجازة، ويطنم غادة اني هروح كام يوم مع الشيخ،
وصلت معاه بيته اللي كان في بلد بعيدة شوية عننا، كانوا بدو وكل
حاجة هناك رمله وبحر والدنيا هادية، علمني شوية حاجات قالي
انها من شروط الدخول للخلوة من ضمنها اني أستحضر مراقبة
ربنا ليا واني ماعملش الغلط حتي لو مافيش حد شايفني، في الفترة
دي الكوابيس كانت خفت شوية، كانت بتزورني بين كل فترة

والتانية، آه كانت بتبقي شديدة عليا بس بتعدي وفي اخر مرة حكيت للشيخ على الكابوس اللي شوفته قالي...
-عمران عايزك ي يوسف ومش هيهدي الا لما ينول مراده.

-أنا مش عارف مين عمران ده أصلا! وعاييز مني ايه؟
-يمكن حد رابط بينك وبين عمران، حد من أهلك أذاه
وبينتقم فيك؟ احنا لازم نوصل لعمران عشان نفك اللي معمولك،
الخلوة مش هتبعده عنك كثير، انت جسمك ضعيف وهالتك
بتنطفي وبتبهت.

-هنوصله ازاي والراجل بتاع السوبر ماركت قال انه بقاله
كثير ماشافهوش؟ وماحدش يعرف عنه حاجة!
-مش يمكن نقف في مكان تاني زي الناس ما قالوا انهم
شافوه في قهوة تانية؟
-مش عارف!

-احنا لازم نسأل يا ابني، كلم جوز اختك اديله تفاصيله
وخلية يروح القهوة ويسأل هناك يمكن نوصل لحاجة.
-حاضر يا شيخ، اللي تؤمر بيه.

كلمت مصطفي وحكيتله على اللي الشيخ طلبه فوعدي
انه ينزل بعد الشغل ويكلمني من على القهوة كمان ويسأل الناس،
قفلت معاه وحسيت بصداق فظيع ماكنتش عارف سببه، كنت
شايف كل حاجة قدامه مشوشه، حتي صوت الشيخ كان ضعيف
ويروح ويجي، قعد جنبي ومرة واحدة وشه اتحول لوش عمران
فبعدت عنه وزقيته وقومت هجمت عليه وكنت بخنقه بس في

آخر لحظة رجع تاني وش الشيخ لطبيعته، بعدت عنه وبصيت لايديا اللي كنت بخنقه بيها وداريت بيها وفضلت أعيط، ساعتها الشيخ طبطب عليا وقرب مني وقالى...

-عايز يسيطر عليك، اجمد يا يوسف واوعي تستسلم، أول ما نعرف اللي عاوزة منك؛ أوعدك اني هبعده عنك للأبد ومش هخليه يعرف يوصلك تاني.

كنت مفتح عينيا بس مش قادر أتكلم، دموعي كانت مغرقة وشي، خدت نفس عميق ودورت وشي للناحية الثانية، افتكرت أبويا وهو بيموت، مش عارف ليه تحديد اللحظة دي اللي جت في بالي، بس أنا يومها فضلت قاعد جنبه وكنت حاسس بوجوده حواليا حتى بعد ما مات ودفنوه، فضلت اقولهم انه عايش ومامتش بس ماחדش صدقني، فضلت فترة طويلة بشوف كوابيس ومع الوقت اتعافيت، بس ياترى في علاقة بين عمران وأبويا عشان يظهرلي كده ولا هو عاوز مني ايه؟ طلعت قعدت قدام البحر وفضلت مركز مع الموج بتاعه، الشيخ قالي ان الموج مش بيجي الا لما يبقى هياخد حاجة، يعني مثلا عمران لو مش عاوز مني حاجة مش هيجيلي، كل حاجة حواليا كانت بتأكدلي ان الراجل ده ليه عندي حاجة بس ايه هي مش عارفها، سمعت صوت موبايلى وهو بيرن جوه، فجريت عليه ورديت، كان مصطفى اللي بيتصل...

-أيوه يا مصطفى وصلت لحاجة؟

-وصلت وماوصلتش.

-هي حياتي ناقصة أغاز يا مصطفى؟ ما تنجز يا ابني!

-الراجل ده كل الناس اللي في قهوة فاروق بيشكروا فيه.
-عارف النقطة دي، لما سألت عنه مافيش حد قال في
حقة كلمة وحشة.

-بس اللي ما تعرفوش انه بقاله ٣ شهور بيقولوا انه
ماجاش القهوة.

-لاكده حد بيستعبطك، أنا شايفه اخر مرة يوم ما كلمتك
نتقابل عشان مشكلتك مع غادة والموضوع ماکملش شهر.
-والله ده الكلام اللي قالوه، أنا قعدت مع اللي ماسك
القهوة وأكدي انه يعرفه وكان بييجي كثير هنا، بس فجأة قطع
وماحدث بقى عارف يوصل لحاجة عنه.
-يعني ايه؟

-مايعنيش ممكن يكون غير القهوة اللي بيقعد فيها ولا
حاجة!

-بس مش غريبة انهم يقولوا بقاله ٣ شهور ماجاش
القهوة وأنا شايفه هناك من أقل من شهر؟
-يمكن الراجل ده ماكنش موجود في الوقت ده، بتحصل
يا يوسف ما تركزش على حاجات فاضية.

-طيب هنعمل ايه دلوقتي؟
-اديني عنوانه يا يوسف وأنا هخلي واحد يقطرلك البيت
بتاعه والأماكن القريبة منه والقهواوي اللي في المنطقة كمان.
-وبعد ما يقطره هنعمل ايه؟ هروح أقوله عاوز مني ايه؟
-لا هنعرف هو دجال ولا مخاوي ولا ايه ملته وبناء عليه
نتعامل معاه.

-طيب يا مصطفى، هبعثلك العنوان في رسالة.
أول ما الليل بدأ يحل، حسيت بقبضة في قلبي وكنت
شامم ريحة وحشة أوي، فضلت أوصف للشيخ لكنه قالي...
-دي هلاوس من الشيطان أو من عمران نفسه عشان
يزعزعك.

قلبي كان بيدق بسرعة أوي ونفسي كان طالع نازل،
سمعت صوته وهو بينادييني، كان ضعيف ومهزوز، جسمي اتنفض
ودوخت، كنت حاسس اني سخن، الشيخ فضل سهران جنبي
يعملي في كمادات ويرقيني لكن مافيش فايده، الريحة كانت بتزيد
لدرجة انها بدأت تخنقني، كنت بتحايل عليه يفتح الأبواب
والشبابيك عشان أقدر آخذ نفسي، لكنه صدمني وقال...
-مافيش أمل يا ابني، اللي فيك ده غريب عني ومش
عارفله تفسير، بس لو عاوز ترجع بيتك هرجعك وربنا يعينك على
اللي أنت فيه.

طلبت منه يرجعني فعلا بس من غير ما يقول لمصطفى
ولا غادة، فضلت قاعد في الشقة يومين على السرير مش بتحرك
إلا لو روحت الحمام وكلت أي قمة أسند بيها طولي، كنت نايم
وفتحت عينيا فجأة فلمحت ضل طويل واقف جنب باب الشقة،
الضل كان طويل ورفيع، مالوش ملامح وش بس فجأة خرج من
الباب في لمح البصر، قومت من على السرير غصب عني عشان
اشوف ايه اللي بيحصل واتصدمت لما لمحت الضل ده داخل
الحمام، بلعت ريقى بصعوبة وقربت من الحمام، بصيت عليه من
بره كان غرقان في الضلمة، مديت ايدي على الحيطه وشغلت

النور وفتحت باب الحمام على آخره بس مالقتش حاجة، وقبل ما أدور عشان أخرج من الحمام لمحت كلمة مكتوبة على مرآة الحمام، قربت منها ببطء وبدأت أجمع الحروف اللي كانت بالترتيب بتقول...

-الشقة دلوقتي بتاعتك.

مش فاهم شقة ايه اللي بتاعتي!

خرجت من الحمام وأنا بدعك في عينيا ولقيت موبايلي بيرن، كنت عارف ان الشيخ أكيد وصلهم اني سيبتته ومشيت عشان كده بتصلوا، أنا زهقت من كل اللي بيحصل، لو عمران ده هيموتي يموتي ونخلص، بقي عندي سنة استبياع رغم اني خايف ومرعوب، بعد شوية لقيت باب الشقة بيخبط، بس لما مفتحتش، عادة أختي طلعت المفتاح اللي معاها ودخلت هي ومصطفى، كنت قاعد على الكنبه وباصص ناحية الباب، دخلوا وقفلوا وراهم، عادة قعدت جنبي وفضلت تطبطب عليا ومصطفى قعد على الكرسي اللي قصادي وقال...
-في حاجة غلط يا يوسف، حاجة أكبر منا كلنا احنا مش فاهمينها.

-يعني ايه؟

-كل الناس بتشكر في الراجل اللي اسمه عمران ده وبتقول مستحيل يأذي حتى ناموسة، ازاي هياذيك وليه؟
-ما اعرفش.

-انت يوم ما وصلته تحت البيت، ضايقته بالكلام، هزرت معاه جامد مثلا وفهمك غلط.

-بالعكس الراجل كان طيب جدا.
-أومال ليه قلبها معاك ضلمة أوي كده؟
-مش عارف، بس زي انت ما قولت في حلقة ناقصة في
الحكاية دي لازم أعرفها عشان احط حد لكل اللي أنا فيه ده.
-ودي هتعرفها ازاى؟
-بيته.

-هو مش يتاع السوبر ماركت قالك انه بقاله فتره مش
بيشوفه وماخدش الايجار، ممكن يكون سافر أو قاعد عند حد
من قرابية؟

-أيا كان أنا حاسساني هلاقي في بيته حاجة تبرد ناري
وتجاوب على كل الأسئلة اللي في دماغي لازم الاقي إجابات عشان
انا خلاص قربت اتجنن.

-طيب هتعمل ايه دلوقتي؟
-هلبس وهروحله البيت، متأكد اني هلاقي في بيته حاجة
تنورلي طريقتي.

لبست ونزلت مع مصطفى وغادة أصرت انها تيجي معنا
مارضتش تسبنا وقالتلي...

-كده كده العيال عند حماتي، مش هعرف أقعد بيهم
واسيبكم، رجلي على رجلكم مهما يحصل.

مصطفى رفع كتافه باستسلام وقاللي...

-ماقدرش ارفضها طلب والله .

خدنا تاكسي لعنوان عمران، السوبر ماركت اللي كان تحت
البيت كان فاتح، شاور للراجل اللي كان وقف فيه فجالي وقاللي...

-خير يا ابني مالك؟

-هو عم عمران ماظهرش لسه؟

-لا والله ، أنا كمان بلف على أي حد قريبة عشان اسيبله
الفلوس بتاعت الايجار عنده بدل ما تتصرف مني بس مش عارف،
محدث جه سأل عليه طول حياته أصلاً غيرك.

-طيب أنا محتاج أطلع الشقة بتاعته، في حاجة ليا
ضروري أخذها.

-اطلع يا ابني هو أنا حوشتك! بس خد الفلوس دي
حطهاله في الشقة مينين ما يرجع يلاقها بدل ما تتصرف مني وما
اعرفش أجمعها تاني.

-لا عالي معايا وحطها انت بايدك.

-ما تأخذنيش في السؤال، هما مين اللي معاك دول؟

-ده جوز أختي وأختي.

طلعنا شقة عم عمران، الدور الثالث، خبطت على الباب
كذا مرة ولفت انتباهي الرسمة اللي على كالون الباب، هي نفس
الرسمة اللي على المفتاح، المفتاح اللي ضاع مني، اللي ظهر فجأة
واختفى فجأة، افكرت في اللحظة دي عمران وهو بيقولي خلي
المفتاح ده معاك ولما حد يسأل عليه اديهوله، يا خسارة كان مفتاح
شقتي في ايدي وأنا اللي ضيعته، ماكنش ينفع أكسر الباب، نزلنا
ومصطفي وغادة وقفوا تاكسي ومشوا، لكن قبل ما امشي بتاع
السوبر ماركت صمم يديني الفلوس أخليها معايا، خدتهم وطلعت
المحفظة عشان أحطهم فيها واتصدمت لما لقيت المفتاح بتاع
شقة عمران بيلمع في قلب المحفظة، بصيت للراج وقولتله...

-تعالى ده مفتاح الشقة أهوانت حط الفلوس بايدك وأنا ادور على الورق اللي جاي ليه.

طلعنا تاني الدور الثالث، كنت بحط المفاح في الباب وخايف مايفتحش بس لحسن الحظ فتح، واتصدمت، ريحة الشقة كانت وحشة أوي، نفس الريحة اللي كنت بشمها وأنا عند الشيخ، حطيت ايدي على بوقي ودخلت مع بتاع السوبر ماركت عشن نفتح الشبابيك واتصدمنا لما وصلنا لأوضة النوم، التليفزيون كان مفتوح على إذاعة القرآن الكريم وعم عمران على السرير بس جسمه متحلل والدود ممالي السرير وعلى الأرض، طلعت أجري من الشقة وقعدت قدام العمارة، ماخستش بنفسي غير وانا بكلم الشيخ وحكيتله على كل اللي حصل فابتسم وقال...
-انت شوفت قرينه وهو اللي كان يبزاولك عشان توصله وتكشف موته لكن هو نفسه ماكنش عاوز يأذيك.

بلغنا البوليس وجم نقلوه واندفن، والعمارة كلها دخلت اوقاف عشان مالوش ورثة، وأنا بطلت أسهر على قهاوي، وكل ما أعدي من قدام قهوة فاروق أحس اني شايفه قدامي وهو بيشاورلي.

ماسح الأحذية

بقالي فترة باشوف كوابيس مفزعة ومش مفهومة ولما بصحى من النوم بالاقى في جسمي علامات زرقا وغريبة، مش فاكر تحديدا الموضوع ده بدأ معايا من امتى بس بقاله شوية، اخر حاجة لاحظتها كانت في ايدي جنب الساعة بالظبط، كنت بحاول اخبي العلامات دي عشان ما حدش يحرجني بس للاسف من اول الصيف ما طلع وما بقتش عارف اعمل ايه؟ في ناس من صحابي نصحوني اروح لدكتور جلدية شاطر وفي منهم اللي قالولي...
-روح لدكتور امراض دم لأن ده اكيد نزيف تحت الجلد وممكن يعرض حياتك للخطر.

بس للاسف كل الدكاترة اللي روحتلهم قالوا اني سليم وما فيش عندي اي حاجة تسبب العلامات دي، وحتى الموضوع ماطلعش نفسي زي ما كنت متخيل، بس في مرة واحنا سهرانيين في كافية على البحر واحد صاحبي اوي وواخدين على بعض ضحك وقالى...

-ما تيجي اوديك لشيخ يمكن تكون مأذي منهم؟

-مش فاهم مأذي من مين؟

-منهم يا حسين.

- مش فاهم والله .

- من اللي تحت، ممكن تكون ممسوس وفي حاجة بتأذيك من غير ما تحس أو حد عاملك عمل.
- يا سلام والله.
- انا عارف انك مش مصدق بس مش هتخسر حاجة خلينا نجرب.
- روح جرب في نفسك انا مش فاضي للهبل ده .
- هبل ماشي يا حسين براحتك انت اللي هتندم مش انا.
أدهم صاحبنا لما حس أن النقاش بينا احتد قالنا ...
- بقولكوا ايه يا شباب احنا جاين نفضي دماغنا وتسهر
عشان نفصل من جو العيال والزن.
كنت خلاص قفلت من كلام أحمد فقولتلهم...
-افصلوا انتوا انا ماشي .
-يا ابني خليك قاعد هو احنا بنشوف بعض غير كل فين
وفين.
-سيه يا ادهم حسين مش حاسس بالنار اللي احنا فيها.
مش عارف نار ايه اللي بيتكلموا عليها بس يصيتلهم
وقولتلهم باستهزاء...
-نار ايه انتوا متجوزين ومخلفين وشغالين في مناصب
كويسه عايزين ايه تاني؟
-عايزين الراحة والفصلان، نفسي ارجع البيت انام من
غير خناق يا حسين.
أدهم ضحك وقال...

-وانا خلاص كحيت تراب من كتر فلوس اللي بتروح على البامبرز.

-انتوا بتكرهوني يا جدعان في الجواز كده، انا ماشي ربنا يكون في عون مراتاتكم بجد.

سبتهم يومها وقومت خرجت من الكافية كله، اتمشيت على البحر شوية وبعدين حسيت أن الخنقة الي انا فيها بتزيد فقررت أروح البيت، انا حسين عندي ٢٩ سنة وشغال محاسب في بنك كبير في اسكندرية، حياتي مقتصرة على الشغل وصحابي والاربع حيطان اللي انا حابس نفسي فيهم ومسميهم بيت، من يوم امي ما ماتت وانا قاطع علاقتي بكل حاجة، بلبس وباكل عشان اعيش أصل حياتي وقفت من زمان، اترميت على السرير وغمضت عيني وافتكرت اليوم اللي عمامي دخلوا فيه عليا المدرسة عشان ياخدوني معاهم البلد بعد موت ابويا بس امي وقفتلهم ومنعتهم أنهم ياخدوني، لحد دلوقتي بسأل نفسي... هي ليه راحت ؟ ماكنش ينفع تفضل شوية! صحيت علي جرس الشقة وهو بيرن مش عارف مين اللي ممكن يجيلي في وقت متأخر زي ده! قومت فتحت الباب واتصدمت لما لقيت أحمد صاحبي قدامي، فقولتله بپرود...

-عاوز ايه، في ايه؟ ايه اللي جابك؟

-جاي عشان اعتذرلك انا مشيت بعدك على طول وروحت البيت بس ماقدرتش أدخل على عيالي وانت زعلان مني.
-يا سلام.

-حسين انت مش صاحبي اللي اعرفه من ثانوي، انت اخويا.

-اخوك اللي عاوز تدخله في دوامة .
- يا ابني لا دوامة ولا حاجة احنا كنا هنروح لشيخ نشوف لو في حاجة بتأذيك يبعدها عنك.
اتعصبت عليه وقولتله...
-مافيش حاجة بتأذي الواحد مننا غير صديق السوء اللي زيك.

- انا صديق سوء! تشكر يا حسين.
سابني ومشى بس على اخر سلمة قبل ما يختفي لف وشه وبصلي وقال...
-لو عوزت حاجة كلمني يا حسين.

قفلت الباب وراه بعصبية كنت حاسس أن الباب هيقع عليا من الهبة اللي هبدهاله بس ربنا ستر، نفخت بنفاذ صبر وفتحت باب الشقة تاني وخذت السلالم جري وانا بنادي عليه...
-استنى يا بني استنى يا أحمد.

-نعم يا حسين مالك؟
- اصبر اخد نفسي من السلالم دي.
- بالراحة طيب.
-تعالى نطلع فوق مش هينفع نتكلم هنا على السلالم.
- هو انا مش كنت صديق سوء على الباب دلوقتي تعالى نطلع فوق أنت ايه يا ابني ما ترسى على بر.
- هتطلع ولا لا يا زفت أنت؟

-هطلع، اتفضل قدامي لما أشوف آخرها معاك.

دخلنا الشقة وقفلت الباب وقولتله...

-هعمل شاي تشرب ايه؟

-شاي زيك.

دخلت المطبخ وولعت البتوجاز وجهزت الكوبايات

والسكر واتجمدت في مكاني لما حسيت أن هوا سخن بيخبط

في رقبتي، رسمت مليون تصور جمدوا الدم في عروقي وأنا واقف

مكاني لكن لفيت بسرعة لقيت أحمد واقف ورايا وبيقولي ...

-في ايه سا حسين اتخضيت كده ليه؟

-انت اهبل يا احمد؟ بتعمل ايه في قفايا؟

-كان في حاجة على التيشيرت فكنت بنفخ فيها.

-حرام عليك هو انا ناقص رعب انا لو اتجوزت والله ما

هخلف بسبب اللي بيحصلي ده.

-وهو ايه اللي بيحصلك أصلا؟

- ده أنت فايق يا أحمد والله كل ده وبتسأل ايه اللي

بيحصلي!

ممام طيب اعمل الشاي وتعالى احكي لي كل حاجة .

-ماشني روح اقعد في الانترية وانا جاي وراك.

-لا عايز اقعد في الصالون.

- اقعد في أي مكان يا احمد وأنا هعمل الشاي وجاي، ألا

قولي يا احمد هو انت مش حاسس ان الوقت اتأخر؟ ولازم تروح

عشان عيالك وكده؟

- لا ولو بترسم انك تطردني فعائز اقولك مش هيحصل
انا متعارك مع المدام وهقعد عندك كام يوم.
- يا ابن ال.... يعني ماكنتش جاي تصالحني عشان مزعلني
والهرى ده.
- لا طبعا يا حسين انت حبيبي واخويا وصاحبي بس مش
للدرجة دي.
- طول عمرك بتاع مصلحتك يا أحمد والله.
- شوفلنا حاجة تتاكل مع الشاي عشان عصافير بطني
بتصوصو.
- بتصوصو؟ والله ده أنا اللي هصوصو، جبتك يا عبد
المعين تعيني لقيتك عاوز تتعان.
- خلص بس انت الشاي وهاتلي اي حاجة اكها وهحللك
كل مشاكلك.
- طيب اتفضل يا احمد البيت بيتك بما انك هتبات
ادخل شوف حاجة في هدومي البسها وخذلك دش على ما أكون
حضرتك حاجة تتاكل.
- ماشي يا حسين.
- فضلت واقف في المطبخ مش عارف أعمله ايه بس
افتكرت اني عندي أكل بايت كنت حاطه في الفريزر طلعته
وسخنه في الميكرويف، خدت الاكل وحطيته على السفرة
وفضلت قاعد مستني أحمد باشا لما يطلع من الحمام، فتحت
التيك توك كالعادة وانسجمت معاه حتى ما حستش بأحمد وهو

بيقعد على الكرسي اللي جنبي الا لما حط ايده على كتفي
فاتنفضت من مكاني من الخضة وقولتله بزعيق...

-هو أنت جاي تقضي يومين معايا تجيب فيهم أجلى؟
-أنت اللي بتركب الهوا وبتتخض بسرعة أعملك ايه بقى

يعني؟

-ماتعملش ابقى اتكلم بصوت على لما تلاقيني سرحان انما
ماتقربليش.

-ماشي يا حسين خلاص أنا اسف.

- حصل خير كل يلا بالهنا والشفاء.

مسك المعلقة وبدأ ياكل كان شكله جعان أوي بس في نص

الاكل قالي...

-احكي لي بقى ايه اللي بيحصل معاك .

-مش عارف والله في ايه؟ بس اللي بيحصلي مش طبيعي.

-طيب احكي يلا سامعك أهو.

-مش هتقولي في الاخر نروح لشيخ وأعمال وبتاع؟

-مش هقول بس خلصني واحكي.

-كوابيس كلها أفضع من بعضها العامل المشترك فيهم ان

الشخص اللي بيظهرلي عاوز يقتلني وبصحى الاقي علامات زرقا

على جسمي من غير سبب.

-مين اللي بيحاول يقتلك وليه؟

-ماعرش يا أحمد.

-طيب انت روحت للدكتور يا حسين عشان العلامات

دي؟

- روحت لأكثر من خمس دكاتره وعملت تحاليل وأشعة
وكل حاجة سليمة حاسس اني هتجنن مش عارف سبب أي حاجة
من اللي بتحصلي.

- طيب أنت من امتي وكل ده بيحصلك؟
- مش فاكر والله يا أحمد تقريبا من شهرين.
- بص يا حسين حاول تفتكر ممكن تكون أذيت حد.
- أنت عارف اني حد مسالم وماليش في الاذي اصلا.
- يمكن يكون حد من قرايب أبوك، اعمامك مثلا
عاملينك حاجة عشان يخلصوا منك وياخدوا الورث.

- بس أنا مادورتش على الورث وهما عارفين كده كويس
ومعاملتهم ليا عاديه يعني مش ملاحظ فيها حاجة، أصلا مش
بنتجمع غير في المناسبات وأخر مرة كنت في البلد كانت من حوالي
شهرين ونص تقريبا قعدت هناك يومين وحضرت فرح كريم ابن
عمي ورجعت على طول.

- والي بيحصلك ده كان بردو قبل ما تروح ولا بعد ما
رجعت.

- تقريبا بعد ما رجعت.
- يبقى زي ما توقعت اللي بيحصلك بسببهم وحد فيهم
أكيد اللي عامل كده، طول عمرك بتحط دماغك على المخدة تنام
مافيش مرة شوفتك بتقول انك حلمت فيها حتى بكابوسغير من
فترة قليلة.

-طيب ولو افترضنا ان كلامك صح هعمل ايه أمشي ورا
كلامك واروح لشيوخ واعمل زار وجو الافلام ده؟!

-طيب بلاش تروح لشيخ تعالى ناخذ يومين أجازة ونروح
أنا وأنت البلد نقعد هناك ونحاول نشوف ايه الدنيا.
- يعني أنت بتقولي انهم احتمال يبقوا هما السبب في اللي
أنا فيه وعاوزني اروحلهم برجليا؟
-أكيد لأن لو هما السبب يبقى علاجك كعندهم مش هنا.
-بقولك ايه فكك من الكلام ده لا رايح ولا جاي وهدخل
أنام وأنت عارف مكان أوضة الضيوف لما تحب تنام براحتك.
سببته فعلا ودخلت أوضتي وقعدت على طرف السرير،
كنت عارف ان أهل أبويا ممكن فعلا يأذوني لأن ببساطة كلهم
بيكرهوه وشايفينه نجح في اللي هما فشلوا فيه ورفض يمشي ورا
أوامر جدي عشان الأراضي والفلوس، من يوم ما اتجوز أُمي وهما
قاطعوه وماشوفناش وشهم غير لما عرفوا انه مات وجم عشان
ياخدوني بس أُمي رفضت، يمكن دي أحسن حاجة عملتها لي انها
حمتني منهم وماسابتنيش ليهم يعملوا مني مسخ عايش ينفذ
التعليماتن كريم ابن عمي اتجوز عشان دي كانت وصية جدي،
حتى بعد موت جدي لسه كلامه وأوامره بتتنفذ وبتمشي على
رقابهم كلهم، طفيت نور الأباجورة وفردت جسمي على السرير
وغمضت عيني.

كنت واقف في مكان كله ضلمة أوي وسامع صوت
بينادي عليا بس ماكنت شايف حد قدامي ولا عارف ده صوت
مين فضلت ألف حوالين نفسي في المكان لحد ما اتعترت ووقعت
في الأرض وساعتها رفعت راسي و...

فتحت عيني واتنفضت من على السرير لما شوفته قدامي،
كان واقف متنحلي اتمالكت نفسي وقولتله...
-في ايه يا أحمد ايه اللي موقفك كده؟
فضل باصصلي شوية وبعدين ابتسم وسابني وخرج من
الايضة وقفل الباب وراه من غير ما ينطق بكلمة واحدة، ماكنتش
مستوعب اللي بيحصل بس ماقدرتش أقوم أشوف أحمد ماله،
دماغي كانت ثقيله وعينيا بتقفل لوحدها فرجعت كملت نوم
وقولت لنفسي يمكن بيظمن عليا اني نايم كويس ومافيش كوايبس
وبمجرد ما غمضت عيني ما حستش بالدنيا من حواليا خالص
اتصدمت لما صحيت لقيت نفسي على سرير مش بتاعي فقومت
بفزع وبصيت حواليا بتوتر الأوضة فعلا كان شكلها غريب وأول ما
عيني جت على السرير تاني اتنفضت وقومت وقفت مصدوم زي
اللي لدغه تعبان، فضلت متتح أما هي ففتحت عينيها وقالتي ...
-Buona giorno cara sono ben content di

vederti?

-بون جورنو كارا سونو بن كونتانتو دي فيديرتي.
كنت واقف زي الأهل مش عارف مين دي ولا بتقول
ايه ولا حتى أنا فين؟ كل اللي عملته اني فتحت باب الاوضة
وطلعت أجري وقفت في الصالة لقيت في ناس غريبة حواليا سواء
لبسهم أو تسريحة شعرهم وفجأة حد حط ايده على كتفي ومن
غير ما يتكلم جرتني وراه وفتح باب الشقة ورماني بره ، ماكنتش
مستوعب اللي بيحصل ومش عارف أنا جيت هنا ازاي أصلا؟
بصيت على نفسي وحمدت ربنا اني لابس هدوم ستراني، وخذت

السلامم جري لحد ما طلعت من العمارة ووقفت في الشارع
مذهول تقريبا رجعت بالزمن أو في حاجة غلط بتحصل الناس اللي
ماشية في الشارع كلها كانوا لابسين هدموم شكلها غريب على عيني
بصيت على العمارة اللي نزلت منها لقيت مكتوب عليها السكاكيني
٢٣ وفجأة حسيت ان حد مسكني من كتفي و...

كنت حاسس ان جسمي كله بيتهز ففتحت عيني بخضبة
وماكنتش فاهم حاجة لحد ما لقيت أحمد جنبي على السرير،
اتخضيت وقومت وأنا بزعقله وبقوله ...

- في ايه أنا فين؟

- بلعت ريقى بصدمة وبصيت حواليا وقولت...

- الحمد لله يا رب انه كان كابوس.

- انا دخلت صحيت كذا مرة وحضرت الفطار وبرد وانت
تقوم تقولي خمس دقائق وتروح في النوم زي القتيل وفي الاخر
تقولي كابوس.

- كابوس والله بس كان رخم شويتين.

- مين قتلك المرة دي؟

- ماحدث قتلي، أنا كنت في مكان ثاني مع ناس معرفهاش

تقريبا في القاهرة وفجأة انت صحيتني لقيت نفسي هنا.

- ده أنت نايم خفيف حتى أو مال لو كنت اتعشيت!

- أحمد ليه مفكرني طول الوقت بهزر؟

- عشان مش مستوعب اللي بتقوله يا حسين.

- أنا هنزل القاهرة.

- هو أنت تعرف حد هناك؟
- السكاكيني ٢٣ ده عنوان لمكان اللي كنت فيه يمكن يكون هناك خيط يوصلني لحاجة.
- عايز تروح مكان شوفته في كابوسك؟
- مش يمكن حل كل اللي أنا فيه ده هناك؟
- طيب هاجي معاك.
- مش عايز اعطلك يا أحمد أنت وراك شغل وبيت مفتوح.
- بطل عبط أنا كده كده صايع ومش راجع البيت الكام يوم دول.
- ماشي خلاص نفطر ونتحرك ان شاء الله.
- هروح اسخن الفطار للمرة اللي مش عارف عددها على ما تفوق كده وتطس وشك بشوية مائة.
- ماشي، ألا صحيح انت كنت عاوز ايه امبارح؟
- عاوز ايه في ايه مش فاهم؟
- لما دخلت عليا وفضلت باصصلي وبعدين ضحكت وخرجت وقفلت الباب.
- أنا يا ابني؟
- اه يا أحمد هو في جد غيرنا في البيت؟
- لا يا حسين بس أنا مادخلتش الاوضة غير من شوية لما صحبتك قبل كده كنت بنادي عليك من على الباب.
- لا أنا واثق من اللي بقوله.

- يمكن بتحلك أنا والله مادخلتش عليك الاوضة غير دلوقتي.

- طيب ماشي خلاص.

أحمد خرج من الأوضة وفضلت قاعد على السرير بحاول أرتب الي حصل في دماغي، مش فاكر انه صحاني عشان أفطر أصلا وحاسس ان الفترة دي ثقيلة عليا أوي، قومت من على السرير أخيرا ودخلت الحمام غسلت وشي وخرجت على المطبخ لقيت أحمد محضر الفطار ويعمل الشاي، فطرنا ورغينا شوية واحنا بنشرب الشاي ولما قومنا عشان نلبس أحمد وقف في نص الصالة وقالي...

-ما نلكم أدهم يجي معانا وأهو نبقى مع بعض ونغير جو.

-هو احنا رايجين نتفسح يا أحمد، عمنا كلمه ولو فاضي

خليه يجي .

دخلت الأوضة عشان أحضر هدومي وسيبته ماسك موبايله، سحبت من الدولاب شنطة هاند باج صغيرة حطيت فيها طقمين لكل واحد فينا والحاجات الضرورية اللي ممكن نحتاجها زي الشاحن والباور بانك وشوية مسكنات ولبست هدومي وشيكت على البطاقة بتاعتي والرخصو وخرجت من الأوضة لقيت أحمد هو كمان لبس وقاعد في الصالون، حطيت الشنطة جنب الباب وقعدت قدامه وقولتله...

-أدهم باشا مشغول طبعا ومش هيعرف يجي معانا

صح؟!

- ههههه بالعكس ده ماصدق وقال انه راشق معانا.

- طيب هيچي هنا ولا ايه دنيته؟

- لا هنفوت عليه في الشغل .

-امتى؟

-دلوقتي لو جهزت.

-طيب يلا بينا عشان ما نتأخرش.

نزلنا من شقتي وخذنا العربية بتاعتي وعدينا على أدهم في الشغل، أحمد رن عليه كذا مرة وفي الاخر لقيناه بيفتح باب العربية اللي ورا وداخل، فضلنا نهزر شوية وبعدين اتحركنا الطريق من اسكندرية للقاهرة كان طويل شويتين عشان كده بدلنا أنا وأدهم في السواقة لحد ما وصلنا رمسيس وهناك حجزنا في أول فندق قابلنا واتغدينا وريحنا شوية عشان بالليل نزل منطقة السكاكيني ندور علي العمارة الي رقمها ٢٣ من بهدلة الطريق نمت ما حستش بحاجة ولا شوفت كوابيس خالص ، صحيت على صوت أدهم اللي كان قاعد على السرير اللي جنبي وبينادي عليا كأنه تباع بيحمل عربية، بصيتله بغضب وقومت حادفة بالمخدة وأنا بقوله...

-بس يا حبيبي احنا في مكان محترم ما تخليش القاهرية

يألشوا علينا.

-مش عارف ليه ماشوفتش كابوس في دهب أو مراسي لازم

القاهرة يعني؟

- تصدق انت عيل رخم، هقوم أخذ شاور وانتوا فوقوا

وصحي الناييم ده عشان هنزل ولا انتوا مش جاينين معايا؟

- لا طبعا معاك يا حسين أومال احنا هنا ليه!

دخلت الحمام وخذت شاور سريع ولما طلعت لقيت أحمد واقف علي باب الحمام وأدهم لابس هدومه ومستني، على ما لبست كان أحمد خرج وبدأ يلبس هو كمان بعد ما جهزنا كلنا نزلنا ركبنا العربية وفتحت الجي بي اس عشان أوصل للمكان اللي عاوز أروحه لكن الغريب في الموضوع ان اللي ظهرلي قصر السكاكيني، فشلت ماشي بتاع ربيع ساعة لحد ما وصلت لحي الظاهر واتصدمت لما اكتشفت ان حي السكاكيني والبيوت اللي كانت فيه اتهدت كلها مع تطوير المنطقة، كنت واقف ببص حواليا وحاسس اني تايه، أنا جيت المشوار ده كله على الفاضي وطبعاً ماسلمتش من تريقة أحمد ولا لسان أدهم اللي استلمني تريقة لحد الفجر، قررنا نرجع ثاني يوم على طول مالهاش لزمة القعدة، رجعنا الفندق بعد الفجر وقولنا نرتاح ساعتين لحد الصبح، أول ما دخلت الاوضة اترميت على السرير وغمضت عيني وروحت في النوم مش عارف هو هروب منهم ولا احساس بخيبة أمل، المكان كان ضلمة وبارد أوي من حواليا بس فجأة في نور ضعيف ولع وواحد قرب مني وهو ماسك سكينه فضل يقرب مني لحد ما مسك رجلي ورفعها وبدأ يسلك جلد رجلي ماكنتش شايف ملامح وشه أوي بس كنت سامع صوت ضحكه، فضلت أصرخ بعلو صوتي عشان حد ينقذني كنت شايف رجلي وهي بتنزف دم كتير والوجع هيموتني وفجأة...

فتحت عيني وأنا بصرخ ولقيت أحمد وأدهم واقفين جنب السرير ومصدومين جسمي كله كان بيصب عرق ومش قادر

أخذ نفسي أحمد شديني وعدلي المخدة ورا ضهري وأدهم جابلي
كوباية مايه وفضل يطبطب عليا ويقول...
- خلاص عدى اهدى يا حسين احنا معاك اهو.

- رجلي بتوجعني مش قادر في ألم فظيع.
أحمد شال البطانية وقالي...
-أهني واحدة اللي بتوجعك وأنا أدلكهالك يمكن شد
عضلي ولا حاجة.

-الشمال .

رفع البنطلون وأنا بتألم وفجأة شفق وبعد مرة واحدة
لدرجة انه من الخضة وقع من على السرير، كان يببص لرجلي
بخوف، بصيت أنا كمان للمكان اللي بيوجعني واتصدمت كان في
حته من جلد رجلي مسلوخة مش موجود مكانها جلد خالص
اللحم باين من تحتها، أدهم حاول يتكلم ويهديني فقالي...

-تلاقيك اتخبطت ولا حاجة واحنا بره.

-لا يا أدهم لا راجع سليم الوجع لسه حاسس بيه ده نفس
المكان اللي الراجل في الكابوس سلخه.

أحمد نطق بخوف وقال...

-معنى كده ان كوايبسك كلها بتتحقق.

-أنا مش عارف يا أحمد هاتولي مسكن من الشنطة عشان

الوجع لا يحتمل.

- مسكن ايه يا ابني احنا هننزل دلوقتي أي مستشفى لازم

دكتور يشوفك ويعاين الجرح كمان.

كانوا مصرين وأنا مافياش حيل للمناهدة فوافقت ونزلت
معاهم وأول ما وصلنا الطوارئ الدكتور جه شاف رجلي وبصلهم
وقال...

-ايه اللي عمل فيه كده؟

أدهم قاله...

-والله يادكتور احنا محتاجين حضرتك اللي تقولنا ده جرح

ايه او اتعمل ازاى لأن هو مش راضي يتكلم ولا يحكي حاجة.

الدكتور بصلي وسكت شويه وقالهم...

-الجرح ده اتعمل بألة حادة واتسلخ كمان وشكله لسه من

قريب أوي يعني من ساعة ونص ساعتين بالكثير .

أحمد وأدهم بصوا لبعض وبعدين بصولي وسكتوا،

الدكتور بدأ يطهر الجرح وربطه وكتبلي شوية كريمات ومضادات

عشان أخف بسرعة ونبه عليهم وقالهم...

-الجرح ده ممكن يسخنه جامد ويخليه يهلوس، ضروري

حرارته ماتزيدش عن المعدل الطبيعي ولو في حاجة كلموني.

طلعنا من المستشفى على الفندق على طول وخذنا

حاجتنا وركبنا العربية، قعدت في الكنبة اللي ورا ومددت رجليا

وأدهم اللي ساق وأحمد كان قاعد جنبه من التعب نمت بس كل

شوية كنت بقوم مفزوع من الالم حتي المسكن ماعملش حاجة،

أول ما وصلنا تحت البيت أدهم ركن العربية وأحمد ساعده

وظلعوني الشقة ولما ارتاحت أحمد بص لأدهم وقاله...

-خليك معاه عينك ماتغفلش عنه لحظة وأنا هروح

مشوار في السريع وراجع على طول.

-تمام وأنت جاي هاتلنا أكل معاك لأن ماحدث فينا
هيقدر يعمل حاجة.

- حاضر يا أدهم أخلص المشوار وأجبلك أكل عينيا.
فضلت قاعد أنا وأدهم سوا أول مرة أحس ان أدهم
صاحبي بيخاف عليا بالشكل ده كان بيتنفض مع كل اه كنت بقولها
فتضحكت وقولتله...

-تعرف يا وا يا أدهم المواقف فعلا هي اللي بتكشف
الناس كنت مفكرك جبلة ومش بتحس بحد ولا بتهتم غير بنفسك
بس طلعت غير كده.

-أنا كده على طول بس أنت عشان أحمد أقربلك مني
فامفيش مساحة عينك تجيب الحلو اللي مستخبي بس زي ما
قولت المواقف هي اللي بتبين وأنت وأحمد اخواتي بجد.
فضلنا نرغي لحد ما جرس باب الشقة رن وأدهم قام فتح
ورجع ووراه أحمد وراجل شكله غريب، بصيت لأحمد باستغراب
فقال للراجل...

-اتفضل حضرتك ارتاح .
وبعدها أحمد قرب مني وقالي...
-بص أنا عارف ان اللي عملته وهعمله هيضايقتك مني بس
صدقني ده لمصلحتك مستحل أضرك.

بص للراجل وشاور عليه وكمل كلامه وقال...
-ده شيخ من الازهر، مش دجل ولا نصاب من اياهم.
مسحت بكف ايدي على وشي بنفاذ صبر وقولتله...

-وايه المطلوب مني دلوقتي؟ أجبله عين نملة داوودية
وجفن جعران مطلق خمس مرات يعني ولا ايه؟!
في اللحظة دي الشيخ انفجر في الضحك وقام من مكانه
وطبطب على أحمد وقاله...

-بس سيبهولي يا ابني وأنا هفهمه كل حاجة ولو ما
اقتنمش بكلامي همشي مافيش حاجة.
احمد قام والشيخ قعد جنبي على طرف الكنبة ، حاولت
أقوم أقعد عدل لكنه شاورلي وقال...

-خليك زي ما أنت احنا أهم حاجة عندنا كلنا راحتك، أنت
ماتعرفنيش يا ابني أنا اسمي الشيخ امام ساكن جنب أحمد
صاحبك في نفس المنطقة بتاعته كنت أوقات بصادف وأشوفك
معدي على أحمد أو موصله ولما أحمد كلمني وجالي وحكالي اللي
أنت بتمر بيه ماترددتش ثانية اني أجيلك معاه عشان أساعدك،
رغم اني ممكن أصلا ماقدرش اساعدك، كل لمطلوب منك انك
تسيبها على الله وتحكيلي كل اللي بيحصل معاك بالتفصيل
وبعدها هكون صريح معاك لو ماقدرش اساعدك هقولك .

بصيت لأحمد وأدهم اللي كانوا واقفين بيهزوا راسهم
فقلت للشيخ...

-حاضر هحكي لحضرتك كل حاجة.
حكيتله كل حاجة حصلت معايا من أول كابوس وعلامة
لحد رجلي اللي اتسلخت فقالي...
-علم الغيب عند ربنا بس أنا هطلب منك تغمض عينيك
وتقولي أول مكان هيحي في بالك.

-حاضر.

غمضت عيني فعلا واتفاجئت انه حط ايده على راسي
وبدا يقرأ آيات مختلفة من القرآن، كنت حاسس بصداع فظيع
وشامم ريحة وحشة أوي فتحت عيني لما صوت القرآن اختفى
لقيت نفسي واقف قدام بيت جدي اللي ف البلد وفجأة رجع
صوت القرآن يعلي تاني فلقيت نفسي قاعد في مكاني ما اتحركتش،
الشيخ امام بصلي وقاللي...

-ها يا حسين شوفت حاجة؟

-البلد.

-طيب يا ابني ماقدرش أقولك في حاجة معمولالك هناك
لأنني هبقى بكذب بس اللي أقدر أكدهولك ان حل كل اللي بتمر
بيه متعلق في البلد دي .

-يعني لازم أرجع هناك وادور على سبب لي أنا فيه؟

- اللي بتدور عليه بيدور عليك خلي الجملة دي دايمًا في

بالك.

-مش فاهم يا شيخ امام!

-مش لازم تفهم دلوقتي

في الوقت المناسب هتفتكر كلامي وهتفهمه، أستأذن بقي
عشان ألحق صلاة المغرب جماعة.

أحمد نزل مع الشيخ امام عشان يوصله، اما ادهم ففضل
باصصلي وساكت لحد ما أحمد رجع وكان جايب أكل معاه، أكلنا
كلنا سوا وأدهم فضل سهران معانا ومشى بالليل عشان يروح
يشوف عياله، كنت حاسس ان أحمد تقريبا استحل القعدة معايا

، بعد أدهم ما مشى جاب كوبايتين شاي وساعدني أطلع أقعد في
البلكونة وقعد معايا وفضلنا ندردش لحد الفجروصلني الأوضة
اللي هنام فيها وقعدني على السرير وغطاني كمان وقالى...
-فكر في كلام الشيخ امام وخصوصا انه ماقلش حاجة
غلط ولا حرام من اللي كانت مخوفاك.

-مش هنكر يا أبو حميد اني ارتحت للشيخ ده من كلامه
وأسلوبه بس هروح أعمل ايه في البلد؟ أقولهم ايه؟
-على فكرة ده بيت أبوك وليك زيك زي عمامك في البيت
والأراضي وفي كل حاجة.

-بس ماليش حد في البيت ماشفتهمش يوم الفرح بتاع
كريم كانوا بيتعاملوا معايا ازاي، ماحدث غلط فيا بس ماخستش
اني منهم.

-في الاول والآخر دول أهلك والشيخ نفسه قالك حل اللي
انت فيه في البلد، المرة دي جت سليمة يا عالم بعد كده ايه اللي
هيحصل!

- خلاص الصبح هكلم عمي وأقوله اني هروح البلد أقعد
عندهم لحد ما أخف.

- لو عاوزني معاك ما عنديش مشكلة والله.
- لا أنا عايزك تعقل وتروح بيتك وتراضي مراتك وتبطل
حركات المخطوبين دي، أنت ما فكرتش هما بيحسوا بالامان من
غيرك ازاي؟ ماتعودهمش على غيابك عشان بعد كده وجودك
مش هيفرق.

- حكيم يا واد يا حسين مش عارف الحاج ماسامكش
حكيم ليه؟ عقبال ما نشوف حكمتك دي في بيتك.
- يلا يا أحمد اطفي النور عشان عاوز أنام.
- اه بتخلع دلوقتي بشياكة ماشي ليك يوم يا سحس.
طفي النور وخرج وقفل باب الأوضة وراه وساعتها
حطيت دماغي على المخدة وغمضت عيني وحاولت أبعد
بتفكيرى عن أي حاجة هتوترني عشان أعرف أنام بهدوء، كنت
مقتنع بكل كلمة قالها الشيخ بس مش عارف لوروح البلد هبدأ
منين؟ همشي أحكي لكل واحد اللي بيحصلي وأحلفه لو كان عاملي
حاجة يفكها؟ أكيد لا لو حد عاملي حاجة ويبكرهني هيشوفها
فرصة مناسبة عشان يخلص مني، مابقتش عارف أعمل ايه ولا
أتصرف ازاي؟ حاسس اني لو حديرغم وجود صحابي حواليا
ماعرفش أنا نمت امتي بس صحيت علي صوت أدهم، فتحت
عيني بتقل كنت مفكر ان ده كابوس بس لقيته واقف قدامي
ويقولى...

-يلا أحمد بيحضر الفطار.

رفعت وشي من علي المخده وقولتله...

- ايه النشاط ده كله هي الساعة كام؟

كان واقف قدامي ويبصلي ومصدوم مش بينطق حركت

ايدي قدامه قومت اتعدلت وقولتله...

-يا ابني أنت روجت فين؟

فجأة أحمد دخل وهو بيقول...

-باعته يصحيك مش...

قطع كلامه وفضل باصصلي بصدمة فقولتلهم...
-في ايه يا شباب؟ هو أنا فيا حاجة غريبة؟ مالكم متنحين
كده ليه؟

أحمد رفع ايده وشاور ففكرت ان في حاجة على الحيطه
ورايا بس لما لفيت مالقتش حاجة فبصيتلهم باستنكار وقولتلهم...
-في ايه يا شباب أنا أعصابي بايظة لوحدها حد يفهمنا ايه
اللي بيحصل؟

أحمد اتكلم وقال...
-وشك.

-ماله وشي يا ابني في ايه؟ متعورا!

-لا فيه حاجة زي كدمة زرقا.

-وده اللي خاضضكم ومخليكم متنحين كده! ده عادي

العلامات دي بتظهر وبتختفي.

-بس دي أول مرة أشوفها في وشك يا حسين، كانت بتظهر

في ايديك أو ذراعك أو ضهرك.

-لعله خير ماتضايقوش نفسكوا، أنا قررت اني أروح لبلد.

-هتروح ازاي؟

-بالعربية طبعاً.

-طيب خلاص هاجي معاك أنا وأدهم ونوصلك.

-وترجعوا ازاي؟

أدهم ادخل في الكلام وقال...

-مالكش دعوة يا حسين بهنرجع ازاي دي ، احنا هنوصلك

البلد ونقعد معاك شوية وهنرجع ماتقلقش علينا.

- ماشي خلاص اللي تشوفوه.
- يلاقوم عشان تغسل وشك ونفطر ويادوب تلحق تجهز
على ما نوصل بلدكم دي النهار هيكون خلص.
- حاضر قايم أهو يا سيدي.

الوجع اللي كان في رجلي خف شوية عن امبارح فسندوني
لحد ما وصلت الحمام وأدهم استناني على الباب وأحمد راح
يشوف الأكل، وقفت قدام مرآة الحمام خايف أرفع راسي وأبص
فيها بس من جوايا عايز أشوف ايه اللي حصل في وشي كانت
كدمة زرقا تحت عيني الشمال زي ما يكون حد مديني بالبوكس
في وشي، ضحكت على شكل ورفعت صوابي مشيتها عليها كنت
مستغرب أوي ان الكدمات دي مابتوجعنيش بس فجأة لمحت
واحد واقف ورايا وفي سكينه في ايده حاططها على رقبتني فبلعت
ريقني بصعوبة ولفيت بسرعة بس مالمقتش حد، ماأعرفش ليه فجأة
حسيت ان الحمام بقى صهد أوي وكنت سامع صوت نفس زي
ما يكون فيه حد معايا بصيت حواليا بخوف وأول ما عيني جت
على المرآة اللي فوق الحوض تاني حسيت ان الدم اتجمد في
عروقي ومابقتش قادر أتحرك كان البخار مغطي المرآة ومكتوب
عليها marco فضلت متنح شوية لحد ما فوقت على صوت
خبط على الباب وبعدها أدهم قال...

-حسين أنت كويس؟

ماردتش عليه فضلت باصص للمرآة ماكنتش قادر أحرك
عينيا من عليها بس فجأة أدهم فتح الباب ودخل راسه وقال...
-في ايه يا حسين ما انت كويس أهو مش بترد عليا ليه؟

بلعت ريقى وبصيتله وشاورت على المراية فبصلي بصدمة

وقال...

-ماتنطق يا ابني في ايه مالك واقف كده ليه؟

قرب مني وهزني فحسيت ان الدنيا بتلف بيا وعينيا

بتقفل وفجأة وقعت من طولي وأنا سامعة بينادي على أحمد

ويقله ...

-الحقني يا أحمد تعالى بسرعة.

فتحت عيني لقيت نفسي على السرير آخر حاجة فاكرها

اني كنت في الحمام وأدهم... مش عارف أفكر اللي حصل بعد

كده، حاولت أقوم وأقعد بس الصداع اللي كان في دماغي كان

صعب سمعت صوت أحمد وهو بيقلولي...

-ارتاح وكفاية فرهدة بقى.

-هو ايه اللي حصل؟ أنا كنت في الحمام وكان في واحد

ورايا حاطط سكينه على رقبتى وكان في كلمة على مراية الحمام بس

مش عارف جيت هنا ازاى؟

-حمام ايه اللي كنت فيه وواحد ومراية ايه؟ أنت كنت

سخن وبتهلوس وأنا فضلت جنبك صاحي طول الليل بعملك

كمادات ماغمضتش عيني حتى.

-بهلوس ايه بس هفكرك يا ابني مش أدهم صحاني الصبح

وكان ف كدمة في وشي وانتوا اتصدمتموا...

قاطع كلامي وقالى...

-ارتاح عشان أنا أعصابي تعبت منك، الدكتور قال
هتسخن وتهلوس فاهدي على نفسك شوية أدهم زمانه جاي.
-يااااه معقوله كل اللي حصل ده كان هلاوس، أنا قررت
أنزل البلد.

- امتي؟

-مش عارف اذا كنت هقدر أسوق ولا لا؟
-أنا ممكن أوصلك أو أدهم عادي بس أنت متأكد انك
عاوز تنزل؟
- الشيخ قال قدامكوا ان حل كل اللي بمر بيه هناك في
البد.

جرس الباب رن وقاطع كلامنا أحمد قام فتح ورجع بأدهم
اللي كان جايب معاه سندوتشات وحطها على الكوميدينو وقعد
جنبي على السرير وقال...
-عامل ايه النهاردة؟
-الحمد لله كويس.
أحمد ضحك وقاله...
-حسين عيشني ليلة عيالي نفسهم ما شوفتهاش على
ايدهم وهما صغيرين.

- على فكرة عادي الدكتور نفسه قال هيسخن .
-الغريب ان كل المسكنات والخوافض اللي خدها
ماعمלתش حاجة وصاحي مقرر ينزل البلد .
-ده عشان كلام الشيخ امام؟
اتكلمت أخيرا وقولتلهم...

-عايز أعمل اللي عليا وأنزل يمكن فعلا يكون حل اللي أنا فيه هناك، أنا تعبت أوي ماحدث فيكم حاسس باللي أنا فيه.
أدهم خبطني على كتفي وقالى ...
-خلاص يا حين لو عاوز تنزل أن معاك.
-وأنا كمان معاك.
- مش عارف من غيركوا هعمل ايه! ربنا يخليكوا ليا.
- ناولني يا أحمد السندوتشات عشان حسين هيقلبها
دراما.

قعدنا كلنا وأحمد قام عمل الشاي ، بصيت لأدهم
وقولتله...

-عاوزك أنت اللي تيجي معايا بس قبل ما نمشي نصالح
أحمد ومراته.

- يا ابني دول بيقولوا صباح الخير بالخناق.
- اسمع كلامي بس وكلمهالي.

مسك تليفونه واتصل بيها وخذته منه وكلمتها وهو راح
يعطل أحمد لحد ما أناديه، اتكلمت معاها وشرحتلها حاجات كتير
عن أحمد هي ماكنتش فهمهاها برغم انهم متجوزين من سبع سنين
ووعدتني انها هتقفل معايا وهتكلمه عشان يرجع البيت
ويتصالحو، خلصت كلام معاها وقفلت وناديت على أدهم فدخل
هو وأحمد بصينية الشاي والكلام خدنا وقعدنا نرغي لحد ما لقينا
موبايل أحمد بيرن ولما سألناه مين قالنا...
-دي مراتي .

فضلنا نزن عليه لحد ما رد عليها واتكلم معاها واتصافوا،
كنت مبسوط أوي اني بردله حاجة بسيطة من اللي عملها معايا
وبعد ما خلص مكالمته قولتله...

-يلا على بيتك بقي.

- انتوا مش رايعين البلد ولا ايه؟

- هروح أنا وأدهم كفاية عليك لحد كده عيالك اولى بيك.

- هو أنا كنت اشتكيتلك؟

- سمع الكلام وأديك معنا على تليفونات.

-ماشي يا حسين اللي تشوفه.

لبست وأدهم حضري شنطتي ونزلنا وصلنا حسين لبيته
وبعد كده اتحركنا على البلد، الطريق خد بتاع ساعتين الاربع وأول
ما وصلنا أدهم كان مبهور بمنظر الجنان والأراضي الخضرا
وقالي...

-يعني أنت سايب النعيم والجنة دي وقاعد في الزحمة.

-ماتعودتش على القعدة هنا كنت باجي زيارات.

وصلنا بيت جدي اللي عمامي الاتنين قاعدين فيه، كان
منهم واحد اتجوز وخلف وعياله كمان اتجوزا والتاني ظروفه
الصحية بعافية شويتين، ادهم قاطع تفكيري وقالي...

-هو عمك صلاح اللي على الكرسي اللي هناك ده؟

- اه هو .

-غريبة أوي يا حسين جدك مقتدر وغني ازاي ساب ابنه

كده.

-ماحدش يعرف اللي حصل لعمي وخلاه كده، عمي صلاح ما اتولدش قعيد .

- عشان كده ماتجوزش؟

- مش عارف.

ركنا العربية وأدهم ساعدني أنزل والعيلة اتلمت حوالينا،
كلهم كانوا مستغربين من شكلي حتى كريم وقف جنبي وسنديني
وقالي...

-ايه اللي حصل فيك يا حسين؟ مالك كده؟

- ندخل بس عشان مش قادر أقف على رجلي.

دخلنا وقعدنا في المندره مرات عمي كلمت عمي الكبير
وجه على طول اتجمع هو وعياله حواليا، كنت أول مرة أشوفهم
قلقانيين عليا كده عمي اسماعيل قعد جنبي وقال...

-مالك يا حسين فيك ايه يا ابن الغالي؟ ايه اللي صابك؟

كنت حاسس اني ضعيف أوي وغصب عني عينيا دمعت

فرقع وشي بايده وقالي...

-ماعدناش رجالة تبكي، البكا ده للحريم.

-غصب عني يا عمي والله اللي بيحصلني مش قليل.

عمي بص لولاده وقالهم...

- اطلعوا برهوسيونا لوحدنا .

فضل في الأوضة عمي صلاح وأدهم وأنا وعم اسماعيل

اللي اتكلم وقالي...

-احكي احنا عمامك وفي ضهرك لو فيه حاجة بايدنا

هنساعدك.

- كوايبس.. واحد عاوز يقتلني في كوايبسي وبتحصلي حاجات غريبة و...
حكيتلهم كل حاجة حصلت معايا حتي كلام الشيخ لما قالي انزل البلد كنت حاسس ان عم اسماعيل قاعد مصدوم ومش مستوعب اللي بحكيه لحد ما قالي...
-في شيخ كبير هنا صاحب سيدك هشوفه يمكن يساعدك ولو الموضوع ده محتاج مصاريف احنا رقبتنا سداة يا ابن أخويا.
- الله يخليك يا عمي مستورة والله أنا مش محتاج فلوس خالص .

- روح أنت وصاحبك ارتاحوا من الطريق وأنا بعد صلاة المغرب هجيب الشيخ الكبير بيص عليك.
دخلت أنا وأدهم أوضتي اللي في الدور الثاني ، هي كانت أوضة أبويا زمان وخذتها لما جيت بعد موته، أخرمة كنت فيها ايام فرح كريم بيت هنا ليلتين وبعد الفرح سافرت على طول، مافيش حاجة بتتنقل من مكانها ولا حد بيدخلها أصلا، أدهم كان واقف مبهور من شكل الأوضة أما انا فقعدت على السرير وفردت رجلي وبعد شوية أدهم طلع المضاد الحيوي ودهنلي رجلي، ماعداش وقت طويل ولقينا حد بيخبط على الباب فأدهم قام يشوف مين لقينا كريم شايل صينية عليها أكل كثير حطها على الترابيزة اللي في نص الأوضة وبصلنا وقال...
-عشان ماتبقاش رجلك حجة وتقول مش قادر أقوم أكل وصاحبك مايتكسفش جبنالكم الأكل لحد عندكم في الأوضة.
- مش عارف أقولك ايه والله يا كريم.

- ماتقولش حاجة ده الواجب يا حسين.
أدهم قاله...
-طيب اقعد كل معانا يا عم كريم عشان يبقى عيش وملح.
- ماشي يلا يا حسين قوم.
قعدنا كلنا احنا التلاته ولما خلصنا كريم شال الأكل
وقالنا...
-تعالوا نشرب الشاي في الجنية بدل حبسة الأوضة دي.
هزيت راسي وابتسمت وقولت لأدهم...
-عندنا حته مورجiche في الجنية فظيعة.
سندوني وطلعنا قعدنا في الجنية، كنت حاسس اني
مرتاح ومطمئن والوقت عدى بسرعة أوي لدرجة اني لقيت عمي
اسماعيل بينادي علينا عشان الشيخ جه، دخلنا قعدنا كلنا في
المنذرة الشيخ بصلي وابتسم وقال...
-ماشاء الله عليك شبه جدك أيام ما كان شباب.
-ربنا يخليك هو أنا أطول!
-احكي لي يا ابني ايه علتك.
حكيتله كل حاجة فبص حواليه وسأل على عمي صلاح
فقالوله في أوضته من الصبح فقال لكريم ابن عمي لاوح ناديه ولما
كريم خرج قال...
-مش عايز اللي هقوله يطلع بره العيلة.
وبص لأدهم وسكت فقام وقف وقال...
- هروح الأوضة أنا يا حسين ولما تحتاجني ناديلي.
مسكت ايده وقولتله...

-اقعد يا ادهم، ده أكثر من أخويا يا شيخ.

- تمام يا ابني.

بعد كام دقيقة دخل كريم وهو بيزق الكرسي بعم صلاح،
الشيخ قامله وسلم عليه وفضل يطبطب على كتفه أما عم
اسماعيل فطلب من كريم يروح يشوف الشغل اللي فاضب
يكمله، حسيت انه مش عاوزه يحضر اللي هيتقال ، أول ما الباب
اتقفل علينا الشيخ بدأ كلامه وقال...

-جدك زمان يا حسين ساب البلد وهو عنده ١٥ سنة ونزل
القاهرة يدور على شغل، ولما الدنيا ضاقت بيه اشتغل مع واحد
جزمجي عنده محل صغير علمه الصنعة وشربها له بس لما مات
عياله قفلوا الدكانة، فاضطر جدك انه يمسح الجزم وخدها
شغلانة، فضل خمس سنتين على الوضع ده لحد ما في مرة وقف
قدامه واحد بيتكلم عربي مكسر عرف منه انه ايطالي، اتصاحب
على جدك وشجعه على شغله وطلب منه يروح يسهر معاهم هو
وصحابه، ده حتى خده معاه شقة مفروشه مرة في الثانية ماركو
حاول يغوي جدك ويطلب منه حاجات مش مضبوطة، عشان
كده جدك بعد عنه بس ماركوا فضل يرخم عليه وفي مرة وجدك
بيلم عدته ومروح ماركوا وصحابوا وقفوه وكانوا عايزين ياخدوه
معاهم بالغصب، فجدك قاومهم وضرب ماركوا على دماغه
وساعتها وقع على الارض ولما صحابوا شافوه سايح في دمه هربوا
وسابوه، جدك ماكنش عارف يتصرف ازاى هو قتله ولو ساب
جثته هيتقبض عليه قرر ساعتها انه يتخلص منه وماكنش في
طريقة قدام جدك غير انه يسلم جلداه وبعد كده يتخلص من

جثته وفعلا عمل كدا وفكر يرجع البلد بس ماكنش عارف يعمل ايه في جلد ماركووا اللي معها وساعتها بس خطرته فكره انه يعمل من جلده ده جزمة ويحتفظ بيها وماحدش هيشك فيه، هو عمل كده فعلا ورجع البلد واتأسف لأبوه وماحكاش لحد اللي حصل فضل مخبي الجزمة وخايف يقرب منها، دنيته مشت بعد كده وورث من أبوه الارض وكبرها والدنيا ظبطت واتجوز وخلف ولما ابنه اللي هو أبوك راح وقاله عاوز يسافر القاهرة.. خاف واترعب يحصل في ابنه اللي حصل فيه عشان كده كان ممانع ابوك ومقاطعة بس الحكاية ماوقفتش لحد كده عمك صالح كان عاوز يتعايق على صحابه فخد الجزمة اللي جدك كان مخبها ورجع لجدك زي ما هو كده يومها جدك جالي وحكالي اللي حصلحالولنا كذا مرة نتخلص منها لأنها هتبقى لعنة عليه بس في كل مرة كنا بنحرقها ماكنتش بتتحرق ونرج نلاقيها في دولاب جدك، عشان كده هو منع أي حد يقرب منها او يلمسها وخباهها فوق الدولاب بس الظاهر انك وصلتها ولبستها.

-أنا فعلا في فرح كريم كنت لابس كوتشي ومرات عمي اسماعيل قالتلي شكله مش لايق على البدلة هجبلك جزمة من بتوع جدك وتقريبا من يوم ما لبستها وأنا كل ده بيحصلي.

-فين الجزمة؟

- سبيتها لما رجعت من الفرحة ماروحتش بيها.

عم اسماعيل نطق اخيرا وقال...

-انتوا ازاى خبيتوا حاجة زي دي؟

الشيخ قاله...

هنقول ايه؟ أبوك قتل؟

-كنت خبيت الجزمة ماسيتهاش قدامهم كده، مراتي

السبب في اللي حسين فيه دلوقتي أنا مش عارف ايه العمل؟

-ماحدش يعرف ايه العمل عمك صلاح اتشل وأنت اخر

اللي انت فيه ده هتخسر عقلك بالتدريج ومش هتחסس بالدنيا

من حواليك.

حطيت وشي في الأرض وضحكت وقولتلم بصوت

مخنوق بالدموع...

-يعني أنا اتكتب عليا أموت قبل ما أعيش؟

-مش هتموت يا حسين يا ابن أخويا.

-هو المجانين عايشين يا عمي.

قومت وقفت وطلبت من أدهم يوصلني للأوضة وهناك

قولتله...

-كنا جاين عشان نعرف سبب اللي انا فيه عشان ارتاح

يظهر ان مافيهاش راحة، تعالى نرجع اسكندرية.

اصريت على أدهم اننا نرجع في نفس اليوم باللي ودعتهم

كلهم وقربت من عمي صلاح وقعدت قدامه وبصيتله وطبببت

عليه ومشيت مع أدهم ، طول الطريق كنت بسأل نفسي هو أنا

أستحق النهاية دي؟ ليه مافيش عدل؟ وصلت البيت وأدهم

طلعني الشقة وساعتها طلبت منه يروح هو كمان ويقي يعدي

عليا الصبح هو وأحمد عشان نفطر سوا، بعد ما مشي دخلت

المطبخ عملت كوباية شاي وخذتها ودخلت الاوضة فتحت درج

الكومودينو وطلعت منه كراسة المذكرات بتاعتيوكتبت كل حاجة

حصلت معايا وقفلتها وفضلت باصص حواليا ثاني وبعدين مسكت القلم وفتحت المذكرات وكتبت...

-ايا كان مين اللي هيقرا كلامي أتمني تدعيلي بالرحمة، أنا عافرت في الدنيا عشان أعيش وتقبلت حاجات كثيرة أوي بس ان الناس تشاور عليا في يوم وتقول المجنون اهو ده انا مش متخيله عشان كده بمجرد ما أقفل المذكرة هقوم أنتحر، هرعي نفسي من البلكونة عشان أخلص نفسي من العذاب اللي أنا فيه.

-وصاحبك انتحر فعلا؟

- ثاني يوم أدهم عدى عليا وحكالي اللي حصل واحنا بنجيب سندوتشات وروحنا على بيت حسين بس ...

- بس ايه؟

-لقينا الدنيا مقلوبة لأن حسين فعلا كان انتحري انتي ما قريتي مذكراته دى.

- طيب والجزمة؟

-ماحدث فينا يعرف عنها حاجة، عمام حسين لما كلمناهم جم خدوه ودفنوه عندهم في البلد وسابولنا مفتاح شقته لأن دي كانت وصيته اننا نتجمع فيها كل فترة ونقراله قرآن.

-حسين مات امتي؟

-من سبع سنين.

-وايه اللي فكرك بقصته دلوقتي ؟ ليه قررت تحكيها؟

-بحلم بيه كتير أوي ومش عاوز أقابله غير وكل الناس
عارفة حكايته وبتدعيه، أصل الناس ساعتها مارحمتهوش وقالوا
انه أكيد شاب طائش وخذ جرعة مخدرات زيادة وانتحر.

الفهرس

٥	الكرسي الهزاز
٢٨	الكرسي الهزاز ج ٢
٥٠	بث مباشر
٧٨	برئيس
١٠٧	خمس جثث
١٣٠	بطانية الدجال (خمس جثث ٢)
١٥٣	سبع ارواح
١٨٣	سلاسل
٢١١	طريق الواحات
٢٣٥	قهوة فاروق
٢٦٣	ماسح الاحذية